

საქართველოს სსრ
საბავშვო და ახალგაზრდობის ლიტერატურის
სახელმწიფო გამომცემლობა
"ნაკადული"
19 თბილისი 62

დ ე დ ა ს

დედის ჩაწვეთებულ ცრემლზე ია ამოდისო!— ასე იტყოდნენ ჩემს ყრმობაში.

ჩემი სოფლის ტყისპირებში ყოველ გაზაფხულზე ია ბლუჯეულად ამოდოდა, არემარე სულ ლურჯად გადაიბურებოდა ხოლმე.

მეგონა, მთელი ქვეყნის დედებს აქ ეტირნათ, იმდენი ია ამოსულიყო ჩემი სოფლის მშვენიერ მიდამოებში.

ძალზე მიკვირდა და თან სათუთად ვკრეფდი იებს, ზე ხომ თვითეული ია დედის ცრემლი მეგონა!

— უჰ, რამდენი უტირნია დედაჩემს! — ქვრივი დედა მყავდა, შავკაბიანი.

იის სიყვარული დედამ შთამაგონა, იასავით სპეტაკი აღამიანი იყო.

თვითონაც ხომ პირველი იების მოსვლის დღეებში გაგვშორდა...

ეს პატარა წიგნი გამთბარია იმ პირველ იების სურნე-
ლით და ცხოვრების იმ შეგნებით, რომ ია მხოლოდ დედის
ცრემლის ნაწვეთალზე ამოდის.

ამ წიგნს ვუძღვნი ძვირფას დედას, რომელმაც მასწავ-
ლა იების სისპეტაკისა და მშობლიური მიწის სიყვარული.

ავტორი.

მშობლიურ ხეთა ჩრდილებში

ეს პატარა წიგნი, — ჩემი ყრმობის მოგონებანია. მაშინდელი განცდილი, დანახული ქართულ სოფელში.

მინდა მკითხველს გაეუწოდო, როგორც სახილე ტაბაკი თუ ხახალი და მით ჩემი ბავშვობის მოგონებათა ხილი მივუწილადო.

კი არ უნდა ვწერდე, ყვავილებით უნდა ვწინავდე. ჩემი სოფლის ყვავილებით უნდა ვქსოვდე ამ წიგნის კაბადონებს. შიგ ჩემი ცისა და მიწის ღიმილია ჩართული, შიგ ჩემი ყრმობის სუნ-თქვაა!

რა ტკბილი იყო შუქილვარა დილა პატარძელში! ოქროვანი ხმით მოწკრიალე გაზაფხულის დღეები, როცა ჩვენც ნუშებივით ვყვოდით, როცა ფეხქვეშ მიწა გრიალებდა, გული გვედგა ოქროს ბურთისა და თავს ოქროს წვიმა გვაწვიმდა...

ეს ჩემი სიტყვაც იმ გაზაფხულის დილიდან არის გამონაწერი, იმ წყარობიდან გამონაყური, რომელთა თავზე მდგარ ნიგვზნართა ხეივანში გულყვითელა „ბიჭო-გოგიას“ მომძახოდა, როგორც თანამოსახელესა და მეგობარს...

ეს სიტყვები იმ ლურჯთვალა იებში მიბოვნია, ჩვენს მიდა-

მოებში რომ ვკრეფდი, იმ ყაყაჩოგარეულ ჯეჯილებში, მზით ამოვსებულ თავთავეებში, შეთქვირებულ ყანებში რომ დგანან სხივმოსილი სიტკბოებითა და იღუმალებით.

ვერცხლულა იორი მიმღერდა ამ სიტყვას, ვენახებიანი, ხილნარიანი, ბარდნარ-ჭალუებიანი, ჯალჯიან-შამზნარიანი.

ივრის თვალსამოთხე ნაპირები—ალღაგ ქვიშრობში გამონაჟური ფშებით, სველი ღვინჭრობებით, ხასხასა მდელთით, იყო ჩემი ყრმობის ემბაზი, ჩემი პირველი პოეტური საასპარეზო.

იქ ივრის წნორებს ვუკითხავდი ჩემს პირველ ლექსებს.

იქ რიყიანი და ხმიანი იორი მასწავლიდა ქართული ლექსის მუსიკას!

დღესაც იქით არის ჩემი მუდმივი მისახედავი, იქიდან ველოდები ჩემი სიმღერის ხმებს.

ისევ იქა დგას ჩემი მშრომელი დედა ვაზებით გარმოდგმული, ქართულკაბიანი, იქიდან მელიმილება!

დილის სხივთა სიმღერაში ფუტკრის ზუზუნი მიყვარდა!

რა კარგი იყო ჩვენი წყნარი საფუტკრე! — აპრილის დილით რომ შევიდოდი, ატმის ქვეშ ვარდისფერი თოვლი რომ იდო! ნიავს თუ გაველო წუხელ ჩვენს საფუტკრეში! ნეტავ კიდევ გამარბენინა ფეხშიშველა იონჯაზე! ნეტავ კიდევ დამაძინა ჩვენი იასამნის ქვეშ!

...ჩვენი დაბადაგებული ცაცხვები, ზედ შესეული ფუტკარი... ჩემი შრომის მაგალითი ჯერ ფუტკარი იყო, მერე დედაჩემი და სოფლის ხალხი!

ამ წუთშიც ისევ მომესმის ჩვენი კალოს სევდიანი ოროველა, საწნახლის სამაჭრე ღარის შხრიალი, ჩვენი ბოსტნის მწვანე-ნილეულის ფშვინვარება.

ისევ მეზმანებიან ჩემი ალ-ავარდნილი ვარდები, სამასწლო-
ვანი ფშატი, რთვილივით რომ ჩამოჰყრიდა ყვითელ ყვავილს...
ყრმობისას დაკმეული მისი სურნელი დღესაც გულზე ტკბილად
მომებოლება. ჩვენი რქაგალაღებული ვაზები, თავთავდაწმენდი-
ლი, აყრილი ყანები!

ეს სიტყვები იქა მაქვს აკრეფილი, იქ მაქვს ნაბოვნი! — იმ
მოოქროვილ დღეთა ყვავილსურნელება ახლაც ისევ მესალბუ-
ნება!

და ისევ... დაყანებული, ყვავილოვანი მინდვრები... ტყეების
ბურვილი თავგუმბათი... ნუშის, ატმის და ვაშლის, ტყემლის
გამოფეთქილი ნამქერი, — ბუნების მადლიანი, შეუზომელი სი-
ლამაზე!

...ისევ იორის ლაქვარდული ჩალიმილება, მისი სადაფური
აელვარება, ქვიშასა და კენჭებზე გადამავალი ტბორი ფშა-
წყაროსი, უწმინდესი კამკამა ჭავლებით.

ჩემი მეორე მშობელი — იორია!

როგორ მიყვარდა ივრის ბროლნამსხვრევი, დაიისფრებული
ზვირთები, მუდამ მჩქროლავი, მთრთოლავი ტოროლას ფრთები-
ვით, მხიარული, მოსიყვარულე!

ახლაც ისე ვერ შევხედავ იორს, რომ გული არ ამიჩქროლ-
დეს!

ისევ ჩემი სამწყურვალთა იორი!

მთელი ჩემი ბავშვობა მის ერთ ციმციმა ზვირთზე იყო აკი-
დებული და იმ ზვირთმა დიდი ხანია ჩაიქროლა, ჩაიგრილა!

რა კარგი იყო ივრის მურწა, ნაფოტა, ჭანარი! მიყვარდა
ჩანგლის ჩაყრა დილით, ბადის მოსმა, ხოლიხი, ივრის ტოტის
დაწურვა, დაწყვეტა, მერე ქვებში ხელაობა.

ხან მორევში ჩახერგილ კამეჩის გახრეშილ ქედზე ყინჩად
ჯდომა. ხან მორევის ძირში ყურყუმელაობა. დავრბოდით,
დავკუნტრუმობდით ბასრი ეკლით მოკირწყლული ტერფებით
ჭყანტობ-ჭაობნარში. ეჰ, ვინ იცის რამდენჯერ შემჭრია ფეხის-
გული ფესვის ამონახეთქზე? ვინ ჰგრძნობდა ტკივილს?

ლურჯად ციმციმებდა იორის თვალი. საამო იყო ცვართა
გადაშხეფება, ნიაგზე ჩალების სისინი, თევზის ვერცხლური შე-
ციმციმება ზვირთის ქეჩოზე!

აქ, ივრის ჭალებში, ფშანებსა და ლერწმებში ვიდექ სმენად
ყურდაპყრობილი, რომ ოქროს ჩიტის ხმა გამეგონა, ბავშვობი-
დან რომ ამღევენებია.

ზამთრობით, როცა ვაშლის გორა დაეყრებოდა ჩვენს ძირა
ოთახებში, ჩემთვის იმაზე საყვარელი არა იყო რა ვაშლის საამო
სურნელით გაჟღენთილი იყო ჩვენი სახლი!

ვაშლის ნაფტქვენს არ გადავყრიდი. დედამ მასწავლა: ვაშ-
ლის ქერქი უთუოდ ცეცხლში უნდა ჩაყაროო, ერთი ჩიტი მაგისი
სურნელით ცხოვრობსო ეს სწორედ ის ჩიტია, დღემდის რომ
არ მაძლევს მოსვენებას, მივდევ და ვერ დამიჭერია!

მიყვარდა მათში ვარდმოფენის დღე! დილიდანვე დავიწყებ-
დით სახლის მორთვას ვარდით, სოსანით, ფშატის აყვავილებუ-
ლი ტოტებით, მინდვრის ფერადფერადი ყვავილებით. მთელი
ურემი ყვავილი მოგვექონდა მინდვრიდან. განსაკუთრებით ირთ-
ვებოდა სახლის წინამო-აივანი, სარკმელები, სვეტები; თვითე-
ულ სვეტს შემოვაწნავდით ვარდს, სოსანს, დიდილოს, გვირი-
ლას, შალგას...

იატაკსაც მოვფენდით ფოთლებითა და ყვავილებით.

ეს დღე მიყვარდა ბუნების დიდი სიყვარულით. ვარდმო-

ფენობას ჩვენი კერა არასდროს მოსცდებოდა დედაჩემის პოეტური ბუნების წყალობითა.

ის ფერადი ყვავილები გამოჰყვა ჩემს სულს, ჩემს სიტყვას! დღესაც ყველაზე მეტად მინდვრის ყვავილი მიყვარს!

დედაჩემი ყოველ გაზაფხულზე წაგვიყვანდა ხოლმე ყანის დასახედად:

ვიდექით, ვუმზერდით მოღალანე ყანას და თვალს ვერ ვაშორებდით.

მომხიბლავი იყო თავანკარა, დათავთავებული, მზით ამოვსებული მაძლარი ყანა, ცხრაფრად რომ ლივლივებს ნიავის შექროლებაზე. „მზეკაბანი“ ჰქვიან ყანაზე მზიანი ნიავის გადაცურება-გადალივლივებას, მზის ათასფერი კაბა ფრიალებდა, ბრიალებდა სავსე მინდორზე!

მოწიწებით ვიდექით ჩუმად გარინდებულები, ადამიანისა და ბუნების — შრომისა და შემოქმედების ამ საოცნებო ზღვის წინაშე, შევყურებდით, ვხარობდით, ამაგსა ვგრძნობდით და გულში კაცობის ნათელი დგებოდა!

მახსოვს, საახალწლო თონეში ჩემთვისა და ჩემი ძმებისთვის ნაზუქთან ერთად ცხვებოდა: ბასილა, პურის გუთანნი, ბარები, წალდები, ცულები, ჭიგოები! — მაგრამ ყველაზე მეტად კი პურის ხმლების გოგოებიც არა რჩებოდნენ უპატიოდ; მათთვისაც აცხობდნენ: პურის ჯარას, თითისტარს, ფურის ძუძუს, ქათმის კლანჭს.

ყოველივე ეს ბავშვობიდანვე შთაგვაგონებდა შრომის სიყვარულს.

თუმც ჩემთვის დედას კალამი არ გამოუცხვია, მაგრამ ასე მგონია, პურის კალამი მიჭირავს ხელთ და იმ ქართული

პურის მადლითა და სიპართლით ქალაღდზე გაღამაქვს ის, რაც დამავალა დედამ და ჩემმა მშობელმა ხალხმა!

ისევ პატარაქულის აივანზე ვღგევარ...

ჩვენს შარაზე მიღი-მოდინ წარსულის აჩრდილები, ჩითის-კაბიანები, თავშალიანები, ფარაჯიანები, ტყაპუჭებინი, ქალამნებინი.

გადავძახი:

— გამარჯვებათ, მეგობრებო, მეზობლებო, გამარჯვებათ ვეღარ მიცანიო? მე ხომ ის პატარა ბიჭი ვარ იისთვალეზა, ყვითელქოჩორა, ლოყებ-ატკრეცილი თქვენს შორის რომ დავრბოდი! მე ისა ვარ, თქვენს კევრზე რომ ვიჯექი, თქვენი გუთნის საყვეარის უღელზე, თქვენს ურემზე: რომ დავღვედით მინდორსა თუ ვენახში!

მე ისა ვარ, წიგნებს რომ გიკითხავდით; თქვენგან რომ ვიწერდი შაირებს, გამოცანებს, სიმღერებს!

— აღარ გახსოვართ?

— ამოდით, ამოდით ჩემსას, აივანზე, ნუ გერიღებათ!

ამოდით, აჩრდილებო, თამამად და თქვენი მძღავრი სიტყვით მომიყევით ყვეღაფერი!

მე ხომ თქვენს უბირ ცხოვრებასა ვწერ ამ წიგნში გამოუცდელი პროზაიკოსის ხელით; მე ხომ მხოლოდ თქვენ გიგონებო...

— ამოდით, ამოდით, მეზობლებო, მეგობრებო! ვიცი, აღარა ხართ, მაგრამ როდი წარეცხილხართ ჩემი გულიდან, ისევ მეცნაურებით!

ყვეღანი მახსოვხართ!

მე ხომ თქვენით გავეცანი ცხოვრების სიტკბოსა თუ სიმწარეს!

თქვენ იყავით ჩემი პირველი მასწავლებლნი!

— ოჰ, თქვენც აქა ხართ, ნინუცი, გაიანე, მაგდა, მართავ, — ჩემო მეზღაპრეებო! რა უცნაურად გაიპარენით: რა უნანებლად დასტოვეთ აკვანი და ჯარა, ბოსტანი და თონე, ვენახი და მინდორი! დამიწებულეებო, უღმერთო ჯაფით დაწრეტილებო, როგორც მკერდს ჩაიკრავდით თქვენს ბალებს, ახლა ისე მიჰკვრიხართ მშობელ მიწას! თქვენც ხომ მისი ნაწილი ხართ!

თქვენ აღარა ხართ, მაგრამ ისევ იცინის დილა პატარძეულში: ისევ იბენტებიან ნუშის, ატმის, ვაშლის, მსხლისა და ტყემლის ყვავილები!

თქვენს ეზოებში ახლა სხვა დიასახლისები ფუსფუსებენ, თქვენს ნაცვლად და არც კი იციან, რომ ოდესღაც აქ შრომობდით, ჩემო საყვარელო ადამიანებო!

— ამოდით, ამოდით, ჩემთან აივანზე, მეგობრებო, მომავონეთ. შთამავონეთ!



ხელჩქარად მომიხდა ამ წიგნის წერა, სულ რამდენიმე თვეში!

ლოლოს უთქვამს: ნეტავი ჩემს პატრონს ათი წლის უნახავი ძმა მოუვიდეს, რომ ცოტა ხანს კიდევ ვიხარშოო!

მე ვინატრებდი: ნეტავ ჩემს გამომცემელს ქალაქის მოსვლამ შეუგვიანოს ზღვითა თუ ხმელით, რომ ნება-ნება, მყუდროებითა და სიტკბოებით ვწერო; რათა ჩემი სიტყვა გავფურჩნო,

გაფრახო, გავაკამკამო და ისე წარვდგე მკითხველის წინაშე,
გულითა წრფელითა და სიტყვითა ნათელითა!

ო, როგორ მიყვარს მუხლადი, ბედაური, მაძლარი სიტყვა!

მშვენიერი ხარ ხოხობო,

ბოლო რომ გამოგიჩნდებაო, — ამბობს ხალხი.

ვნახოთ, რა ბოლო გამოაჩნდება ამ ჩემს პატარა წიგნს —
ვაზფურცელას.

19 ივნისი

1961 წ.

ს. ო. ფ. პ ა ტ ა რ ძ ე უ ლ ი



ნაზვინის ხე

„ხეა ხეა ხერავანდი,
ზედ ასხია შარავანდი“.

ხ ა ლ ხ უ რ ი

დიაკვანი ელეფთერი სალამო ხანს სოფლის მოედანზე იდგა და გლეხებში საუბარს გულს აყოლებდა.

ეს ის ელეფთერია, რომელსაც სწორედ გასულ თვეს სცემეს კეტებით დღეობაში მოსულმა ჭირვეულმა სტუმრებმა — ელეფთერი რათა გქვიანო! ამ ელეფთერზე იტყო-

და სოფლის მღვდელი: ორი ელევთერი რომ მყავდეს, ერთს უსათუოდ ჩამოვალჩობდიო!

დიაკვანი ელევთერი ღვინის კაცი უფრო იყო, ვიდრე სულისა, თავქეიფა, ლზინიკო, ღვინის ხაპია! წირვა-ლოცვაზე საღეთო წერილს სულ უღიმდამოდ, ლულუღით ჩაიკითხავდა, მაგრამ ფსალმუნის იმ ადგილს, სადაც წერია: „ღვინო ახარებს გულსა კაცისასაო“, დიდი სიყვარულით, რიხითა და ხმის ამალღებით წარმოსთქვამდა.

შეზინღებამღე მინღვრიდან ნახირი დაბრუნდა, ყველამ თავის საქონელს მიაშურა, სოფლის მოედანი დაცარიელდა. უსაქმო ელევთერს უღარიბესი გღეხი ელიოზი-ღა შერჩა ხელთ.

— მაშ, ეს კი არ იცი, შენ, ძმაო, დაღონებუღო?—მიმართა ელიოზს, — რომ ვეშა-წყარო უქვღავების წყალია?!

ღიაკვანმა გამღლეღ გოგოს აბღიას სვეღი ლიტრა გამოღ-ღიჯა ხელიდან და მიიყუღდა. ჟერ პირში წყალი დაიღემოღენა, მერე დაახრიაღა, ახღა ზეღიზეღ იწაღა და კმაყოფიღმა, ბეღნიერებით მიზნეღღიღმა, წყნარად თქვა: — ვაი, ჩემი თავი მოღიკვღეს და აღარა გყავღეს, თუ არ იცი, რა არის ვეშა-წყარო!

— საღ არის ეგ წყარო?

— თეტორობიანის მთებში!

— რის წამალია? — მორცხვად იკითხა ელიოზმა.

— წამალი კი არა, უქვღავება!

— უქვღავება რა არის?

— სულ ცოცნალი იქნები!

ელიოზი შეკრთა, უკან დაიხია.

— არა, არ მინდა! რათ მინდა, ამ ტანჯვასა და სიღარიბი?

— მერე და ვინ გაძლევს შე საცოდავო! განა შენისთანებს ესვლებათ ვეშა-წყაროსთან?! — და თვალები გადაუბრია.

დიაკვანი ელფეთერი განაწყენებული შესცქეროდა ელიოზს, დიდად გაკვირვებული, რომ ასეთი ბნელი და იეში კაცი ნახა, რომელიც უარს ამბობს მის მიერ აღმონილ უკვდავების წამალზე.

ტყუილად წყრებოდა დიაკვანი. წვრილშვილი ელიოზი აშველო დატაკი იყო.

— ისეთია, ისეთი, რომ მშიერი ძალღი პურს არ გამოთმევსო! — იტყოდნენ ხოლმე მეზობლები და მართლაც სამულო, უსარჩოო ელიოზის ჩამონგრეული მიწურის ნ მუდამ გუბე იდგა, მწვანე ბუზებით სავსე... ძონძები... რები... ჭუჭყი... შიმშილი... საზიზღარი სიღარიბის უკვდავე-რათ უნდოდა საწყალ ელიოზს?

ნაზი გულის ადამიანი იყო ელიოზი და თან ცხარე მეოცბე. ცხოვრების სისასტიკეს მის სულში ვერ ჩაეჭრო ოცნების პერწყალი და თავისივე შეთხზულ უცნაურ ოცნებებით იფავდა თავს მხეცივით შემოტეულ სინამდვილისაგან.

ჯერ ოქროკვერცხას, ოქროს მდებელ ქათამს ეძებდა ბუჩქრებში, მერე დაეყინა ნათელთევზას დაჭერა და მთელი დღეი დაკარწყახებული იდგა იორში: მოჩხრიკა, ამოხაპა იორი, დალა ბადე, ჩანგალი; წყლის ტოტებიც დაწურა, ხელაობა-

საც გადააკვდა, მაგრამ არ იქნა, ნათელთევზა ვერ იგდო ხელთ
და ვერა!

ახლა გულში ჩაედო ხერეევანდის ხისა ანუ ნატვრის ხის
ნახვა და მისი ნაყოფის ჭამა; ამ სურვილის ასრულება და მისი
გამდიდრება ხომ ერთი იქნებოდა!

ელიოზს სწამდა: იანვრის სასტიკ ყინვიან ღამეში, თუ შუა-
ღამისას მოხვდი ტყეში და თუ ცის გახსნას შეესწარ, მაში-
დაინახავ ტურფად აყვავილებულ ჯადოსნურ ხეს. არა მშვექ
ნიერება მას არა სჯობია! ის ხე, თურმე ერთ საათში კიდევ
აყვავდება, კიდევ ნაყოფს მოისხამს: თუ მისი ნაყოფი ხელს
იგდე, ერთი გაკვენეტა და მორჩა! სიღარიბე იმწამსვე ჩამოგე-
ლება სამუდამოდ! ვინ უთხრა, ვინ ჩააგონა, დღესაც არ ვიცი!
ეს კია, რომ იანვრის ღამეებში, როცა ყინვით ცა გასკდომანება,
ხშირად დახეტილობდა დაკონკილი ელიოზი ტყეში, მარტოდ-
მარტო, ცის გახსნისა და იმ ნატვრის ხის ნახვის მოლოდინში.

— ან დათვისა არ გეშინიან, ან მგლისა, ან აფთრისა, რომ
შიშველი ხელებით დადიხარ უღრან ტყეში?

მაგრამ ელიოზის თვალწინ მხოლოდ წითელ-ყვითლად აბ-
რიალებული, აყვავებული ხე იდგა და სხვას ვეღარას ხედავ-
და — ვერც საშიშს, ვერც სახიფათოს. და მისი კონკებში გა-
მოხვეული სხეულიც ოცნებით გახურებული, ეტყობა ვერ
გრძნობდა მოუთმენელ სიცივეს.

ცოლ-შვილი ვედრებით უშლიდა ელიოზს ტყეში სიარულს,
მაგრამ მან თავისი არ დასთმო. ბოლოს შეეჩვივნენ კიდევ და
თავი მიანებეს. ტყიდან დაბრუნებული შუშის გულდურას ჩამოა-
ყოლებდა ხოლმე ხელს და ოჯახში კიდევ უხაროდათ.

— რა ჰქენი ელიოზ, იპოვე შენი ნატერის ხე? — შეგეკითხებოდით ღიმილით.

— ვერა, მაგრამ ვნახავ!

— ტყეში რომ ცივა, რომ ბაბანებ და თრთი ამ ფიცხელ სიცივეში?

— მაშ როგორ გინდა, შე ოჯახაშენებულო?

— და აი, ერთ ზამთრის დილას, როცა სიცივეს ჰახჰახი გაუფიოდა, ტყიდან მარხილით ჩამოასვენეს გაფიჩხული ელიოზი. ნატერის ხის ძიებაში, მის ყარაულობასა და ლოდინში, ყინვით აყვავებულ ხის ქვეშ გაყინულიყო.

— მართლაც ისეთი ლამაზი ხე ამოერჩია საწყალს, რომ იმის დანახვას არაფერი სჯობდა. ყინვას მოერთო ათასნაირი ყვავილებით, არშიებით, რუშებით, ჯინჯილებით, სულ დასურბებული იყო, — ამბობდა ტყის მცველი ბოდაველი, რომელიც შემთხვევით ზედ წასდგომოდა გაყინულ ელიოზს ბნელ ტყეში.

ასე კი იყო...

ელიოზს კუბო თავისი ფარღალალა საბძლის ფიცრებიდან შეუქრეს.

დიაკვანი ელეფთერი კიდევ ერთხელ გამოთვრა ელიოზის ზელები და მით მორიგი ოცნება გაინაღდა. მეორე დღეს მხოლოდ დარდის ამშლელ ნაღვინეობას უჩიოდა.

საწყალი ელიოზი მაინც ვერ გაექცა შემზარავ სინამდვილეს და ოცნების ხეს შეეწირა.

პოეტები მხოლოდ ქაღალდზე რითმებით მოლაპარაკენი ოდი არიან. პოეტური თვალით, პოეტური გულით და დიდი ოცნებით გასხივოსნებული სხვაც ბევრი დადის დედამიწაზე



ჩვენნი ჭერამი

იორზე, ვენახში დიდი ჭერამი გვედგა, — შებუთქვილი, დახუნძლული.

თუ თავდაპირველად იგი ჩემი საყვარელი ხე იყო, მერე იგი მხოლოდ სევდას იწვევდა ჩემში, თან რაღაც ზიზლსაც კი; მერე ისე გაიარა ჩემმა ბავშვობამ, ზედ ერთხელაც აღარ ავსულვარ, აღარც მისი ტოტი დამირხევია. თითქოს უმძრახად

ვიყავ ამ ხესთან, გვერდით გავუვლიდი, ზედაც არ შეეხებოდა. მერე დაბერდა, გახმა, წაიქცა, არცა მწყენია, თითქოს კიდევაც გამეხარდა.

გულში მფიფქავდა ერთი მოგონება, თორემ უმიზეზოდ რათ შევიძლებდი ნაადრევი ხილით გამხარებელ ხეს?

მაშინ კახეთის რკინიგზა გაჰყავდათ. გზა ჩვენს ივრის ვენახებზე გადიოდა. მალე დაიწყო ჯოჯოხეთური მუშაობა. მექანისპეები მაშინ არ ჰქონდათ და ხელით ებრძოდნენ სალიანდაგო სათხრელ მიწას. დიდძალი მუშა ტრიალებდა — ქართველები, სომხები, რუსობაც ბევრი იყო. ადგილი იყო დახაშმული, ჰაერი — ბოტრორი. ივრის მწვანე ჭაობნარი, ჭყანტობები, ჭანჭრობები, ლიები საწყალ მუშებს უხვად ასაჩუქრებდნენ ციებ-ცხელებით, სიცხე სუნთქვას აგუბებდა, სახეს სწევდა თონის ალმურივით. მუშას სასმელი წყალიც კი არ ჰქონდა, მღვრიე იორის გარდა. ავად ხდებოდნენ, იქვე მიწაზე ჭერებებივით ეყარნენ. პატრონი ვინ იყო? ზედამდეგები, შინამდეგები უყვიროდნენ, აგინებდნენ, ხოლო ქედწაგრებილი მუშები უსიტყვოდ ასრულებდნენ მათს ბრძანებას.

სალამობით, სამუშაოს აშეებისას, ახალგაზრდა მუშები ცდილობდნენ ვითომც გამხიარულებას, მაგრამ წელმოწყვეტილი დათუთქული ადამიანის ლხინი ვის გაუგონია? ერთხელ, ორჯერ მოსწევდნენ გარმონს, მაგრამ გულს ხალისი არა ჰქონდა, ხოლო მარჯვენას — ღონე და გარმონი იქვე მიყუჩდებოდა, თითქოს შორიდან ვილაცამ დაიკვნესაო! სიცხისაგან გათანგულ მუშებს საუბარიც კი ეზარებოდათ.

მათი ერთადერთი იმედი, გახარება და გასართობი ივრის

ვენახების ხილი იყო. ჩვენი ვენახიც ხომ ზედ ივრის პირას იდგა!

ვენახები უღვეველი ხილით იყო სავსე: ბალი, თუთა, ჭერამი, თაფლა მსხალი, გულაბი, პანტა, ატამი, ვაშლი, კომში, ფშატი... ყურძენი ხომ იყო და იყო! შიგ და შიგ თავკარავიანი კაკლები იდგა, რომლის ტოტებზე ბალერინასავით დახტოდა ყვითელი ძოლალური და „ბიჭო გოგიას“ დაგვძახოდა.

უთვალავი ხეხილი ზედ გზის პირას იდგა ლალ-ზურმუხტის-ფრად, მაგრამ არც ერთ მუშას არასოდეს უკადრია ხილის მოპარვა. მხოლოდ ფულის შემოძლევა კი იცოდნენ. გლეხებს ეხატებოდათ ფულის აღება და ისე შესთავაზებდნენ ხოლმე, მაგრამ მუდამ ხომ არ შეიძლება თავაზა? და აი, თითქოს მიწიდან ამოცვივდნენ ჩარჩები, ვაჭრუკანები, დაერივნენ ჩვენს ვენახებს და თვითეული ხე, ძალითა თუ ნებით, შეისყიდეს, რათა მერე ერთი ათად გადაეყიდათ მუშებზე. ერთი ხეც კი აღარ დარჩა სადმე ბავშვების პირის ჩასატკბარუნებლად. როგორც მახსოვს, თითო ხეში ექვს შაურს, ათ შაურს, სამ აბაზს და ასე მანეთამდე იძლეოდნენ, თვითონ კი თუმნობით იგებდნენ.

ხეხილის მსხმოიარობით გახარებული საწყალი ბავშვი მიადგებოდა უხვად დასხმულ ხეს, მაგრამ უეცრივ მოაგონდებოდა სასტიკი სიტყვა „გაყიდულია“ და გველნაკბენივით უკან გამობრუნდებოდა. ასე დაემართათ ჩემს ფეხშიშველა ამხანაგებს — ფიფონას, ბათულას, აგლიას, არსენას. ვინ წაართო ეს თაფლივით ჭერამი?! იმ ვერცხლის ათშაურიანმა, რომელიც მათმა მამებმა ჩაიდეს დახეული ახალუხის ჯიბეში.

აი ქურდულად მიიხედ-მოიხედავს ბავშვი, — მერე რა მსხა-

ლია? მსხლებს რომ პირი ჰქონდეთ, ხომ ერთმანეთს დასჯამდნენი მაგრამ დიდდას მუხლქვეშ გაზრდილებს ქურდობისა ეშინოდათ, თან ყურში ჩასძახოდათ ის სიტყვები, ჩარჩმა რომ დაავედრა მათ მამებს ათშაურიანის მიცემისას.

— აბა, გაბრო, ამ დასხმულ ხეს გაბარებ. ასევე უნდა დამახვედრო, ბავშვებმა არ მომიკრიფონ.

გაბროც მამის სულს დაიფიცავდა, შეჰპირდებოდა პატიოსნებას, მაგრამ რატომ თავისი ქერა ბიჭი ფიფონა არ ეცოდებოდა? ბარემ... მაგრამ ჩარჩის ათი შაური სიღარიბის რომელი-ღაც ჭუჭრუტანას ამოუფესებდა ბეჩავ გაბროს.

შეიკრა, გაიფიცა ბავშვების წინაშე ივრის ხეხილი. ვის გაეგონა წინათ ხილის აკრძალვა? მთელი ივრის ხილი ხომ ჩვენი იყო. ჩიტებივით დავნავარდობდით ტოტებზე ბალლები, ახლა კი, მთელი ივრის ბაღნარები ჩვენთვის შეეკრული, მოკვეთილი აღმოჩნდა; ამ მოულოდნელმა რისხვამ დაგვამუნჯა. მეტად მოულოდნელი და შემზარავი იყო. გულზე ჯანლად დაგვედო.

ივრის ბაღნარი კი ისევ ისე შრიალებდა. ჰრელ-ჰრელი ხილი ისევ თვალს გვტაცებდა, ჩვენ კი თითქოს ერთ დღეში დავებრდით; თითქოს ბავშვობა აგვიკრძალეს იმ ხილის აკვეთით და ხილთან ერთად ხომ თვითონ იორიც კრძალებოდა. რაღა საქმე გვქონდა იორზე, რაღათ უნდა ჩავქანებულყავით სოფლიდან ივრის ქალებში?

იორი კი ჩვენი ემბაზი და ასპარეზი იყო — საბანაო, სათევზაო. ივრის მორევში ჩაწოლილ კამეჩის გახეშულ კისერზე ჯდომა — დიდი ნეტარება იყო. ერთი სიტყვით, მთელი დღე იორზე ვეყარენით... და აი, ახლა ისე დამუნჯდა იორი, თითქოს შაკ-აბაზი მეორედ შემოგვესია და ბავშვები მთლად გა-

უეუეიათ თუ კევრით გაულეწიაო. მგონი ჩიტებიც კი აღარ
ჭიკჭიკებდნენ ბავშვების ცოდვით.

მე ერთი ვიყავი იმედიაანად, მე ხომ მქონდა იორზე საკუთა-
რი ხელუხლებელი ჭერამი? ჰოდა, ჩემს ფეხშიშველა მეგობ-
რებს ჩავიყვანდი ჩვენს ვენახში და ვეტყოდი:

— აღი ბიჭო, დაარხიე, დაკრიფე, გაიხარე!

და აი, ერთ კვირა დილას, ჩავცვივდით იორზე, — მთელი
უბნის ბალღობა მყავდა დაპატიჟებული; ახლა რას გვიზამს
ჩარჩის აკრძალვა? ჩემი ხეა და ჩემად შევიანახე, ფულზე არ
გაპიცვლია! მაგრამ, იცით, რა მოხდა! შორიდანვე დავინახე,
ჩვენ ჭერამთან იდგა ჩარჩი მელქო, გოდრებით აკიდებული
ცხენი იქვე ეყენა და გულმოდგინედ კრეფდა ჩემს ჭერამს.

თურმე დედაჩემს ჩვენი ჭერამიც გაეყიდნა: ცოდონი არიან
მეზობლის ბავშვები, რომ მარტო შენ გქონდეს ხილიო! არაუ-
შავს რა, შენც მათთან ერთად იმარხულეო და გადმომცა სამი
ვერცხლის აბაზიანი.

— შენი საყვარელი წიგნები იყიდეო!

მე მართლაც ვიყიდე ორიოდ წიგნი, მაგრამ მალე შემ-
ძულდნენ ის წიგნებიც და მათი დამწერნიც.

აი, რა მიზეზით იყო, რომ ჩვენი ჭერამი მხოლოდ სევდას
და სიძულვილს იწვევდა ჩემში.

იგი სასტიკად მოექცა ჩემს უდარდელ ბავშვობას. მისკა
მსხმოიარე ტოტებმა დაჩხვლიტეს, დაკბინეს ჩვენი ბავშვური
უზრუნველობა.



თ ა ლ რ ი ა ?

— სინათლე გაგვდის ფერდებიდან, შიმშილით ნაწლავები გვეწურება — შემომჩიოდნენ გლეხები.

ბევრი, უიმედო ცხოვრებას დამორჩილებული, წამოიკვნესებდა: ნეტავ როდის ამოსულა მთვარის ადგილს მზეო?

ცხოვრებაზე ხელჩაქნეული იყო ჩემი მეზობელი გლეხი თაღრიაც, ახოვანი, მტკიცე აგებულებისა, ყალიონის ბოლისაგან შექარვებულ თეთრ წვერ-ულვაშით შეხირხლული, წვრილ-შვილი, შვიდი გამურული გოგოს პატრონი — სიღარიბისაგან გაწყალებული, ჯანით მრეთა-მრე, სიღარიბის ვერ მომრევი.

ახლაც თვალწინ მიდგა თაღრია, ძალმიწვებული, დუნე, მთვლემარე, უსურვილო, სიღარიბით თითქმის გონებადაჩ-
ლუნგებული.

ამაყი კი იყო.

— „გვიბოძესი“ არა მინდა რაო! — ჯიქური სიამაყით
ითმენდა სიღარიბეს.

— დედაკაცო!

— რა გინდა შე ნაცარდასაყრელო, ავთვლო! — ასეთი
აღერსით უპასუხებდა თაღრიას მეუღლე თოთოლა, რომელიც
ცისკრიდან ბინდამდის ფენჩაუხრელად ფუსფუსებდა, ფარფა-
ტებდა. ძილს არ იძინებდა. როგორც სურა არ დაწვება, ისე
იდგა ფეხზე. ქიშმიშივით დამჭკნარსა და სარივით გამხმარს, ან
რაში ედგა სული.

თავისი სიღარიბის საიდუმლო იცოდა თაღრიამ და კიდევაც
უტყუად დამორჩილებოდა.

ღმერთი ხომ დიდი მექუდეა! განა თაღრიას კი არ დაჰყვბ
ქუღბედი დაბადებისას? მაგრამ მშობიარობის ორომტრიალში
ბებია ქალებმა თურჰე ქუღბედი დაუკარგეს, ვედარც იპოვეს
და... დარჩა თაღრია უქუღბედლოდ. ამიტომაც არ აქვს ხვაგი და
ბარაქა მის შრომას. შვიდი გოგოს მამად ყოფნაც სწორედ
ქუღბედის დაკარგვის ბრალია! ეს იცის და აღარც მუშაობს
მონდომებით, იცის, რომ სულ ერთია, ცხოვრებაში არაფერი
გამოუვა.

არც თოთოლას დაჰყოლია ბედი! მასაც აქვს თავისი წილი
სასაყვედურო:

— ბედნიერი ბედი გინდა ძვირფასო? ამაღლება ღღეს,

დილაადრიან ბინდორში ოთხყურა უნდა მოსწყვიტო ოქროს ბეჭდით და ბედნიერებას მოგიტანს!

— მე კი, სწორედ იმ დილას ვნახე მსუქნად გადაშლილი ოთხყურა, ჩვენი ვენახის თავში! ბევრი ვუტრიალე, ჩემს გარდა არავინ იყო სიახლოვეს, მაგრამ ოქროს ბეჭედი ვინ მომაშავა? მამამ არ მიყიდა, ძმამ და ნათლიამ! ამიტომ დავკარგე ბედი და ახლა თაღრიას ცოლობაში უნდა ვცვიტო ჩემი ღონე და ჯანი! შემაყელთა სიღარიბემ!

— ეჰ, რა ვიცოდი, თურმე მძინარე მდინარეს თუ მიეპარე, თუ უხელთე, რასაც ჩააგდებ შიგ, ოქროდ გადაიქცევა. მეც რა მენადვლებოდა, უბრალო თითბრის ბეჭედი ჩამეგდო მდინარეში, გაოქროვდებოდა, ამოვიღებდი და მით ოთხყურას მოვწყვეტდი. მაგრამ რა ვიცოდი?!

— ახ, ჩემი ოთხყურა ვინ მოწყვიტა იმ უღმერთომ, ვინა? — მწარედ ჩიოდა თოთოლა და თან პატარა გოგოს გულმოდგინედ თავს უხილავდა.

სიღარიბისაგან გაოგნებული თაღრია ხან დღიურ მუშადაც წავიდოდა ხოლმე. სხვისას უკეთ მუშაობდა, ვიდრე თავის ოჯახში, რადგან იქ რიგიანი კვება ჰქონდა, შინ კი სად იყო ჯეროვანი შეპატიება! ამიტომ ეზარებოდა შინ მუშაობა და ცოლს მიაწება ყველაფერი.

სიღარიბით იყო თაღრია დაქანცული. მისი მხიარულება არც მინახავს, არც გამიგონია. მხოლოდ ერთხელ, მახსოვს, სიმღერით შევიდა თავის ეზოში, ქული მოიხადა, დაახეთქა მიწაზე და შესძახა: „მართალ ძეძუს გაუმარჯოსო!“ და იქვე ფშატის ქვეშ მიწვა, მიიძინა. კარგა ხნის შემდეგ, ვენახიდან

დაბრუნდა თოთოლა, ნაგლეჯი ბალახით ხელში. მიწაზე გაწო-
ლილი მთვრალი ქმარი რომ დაინახა, შეძრწუნდა, მაშინვე სვე-
ლი მჩვარი დაადო შუბლზე; რომ არა გამოვიდა-რა, ვერ ჩაავ-
დო გონებაში, მერე ლიტრით წყაროს ცივი წყალი შეასხა პირ-
ზე, ეგების გამოფხიზლდესო.

დაფეთებული წამოხტა თაღრია და კინაღამ გაბღვნა.

— შე უღმერთოვ, რად გამომაღვიძე? მე უკანასკნელი
გროში დავხარჯე, რომ დამთვრალიყავ, შენ კი მათხიზლებ,
ღმერთი არა გაქვსო? — გულმტკივნეულად ჩიოდა ძილიდან
გამოსული და ახლა ისევ შეუბრალებელ სინამდვილეს შემც-
ქერალი საწყალი თაღრია.

... მთელი ღღეები გარინდებული იჯდა დერეფანში და გა-
ნუყრელ ჩიბუხს აბოლებდა, მაგრამ ჩიბუხზე მეტად თაღრიას
ძილი უყვარდა; ცოლიც ამიტომ ეძახდა „სამძილას“, რაზედაც
თაღრია თავს იმართლებდა: — სულ ერთია, ქვეყანას ვერ გა-
ვასწრებ და ძილსაც მოვცდებიო.

— მეორედ მოსვლის საყვირიც ვერ გააღვიძებს მაგ სამ-
ძილასაო! — დაცინვით იტყოდა სოფლის მღვდელიც.

და... ეძინა გულიანად, შეუმღვრევლად... მისი გაღვიძება
ერთი ამბავი იყო ოჯახისათვის.

მახსოვს, ცისკარი რომ აციალდებოდა ცაზე, ხმაური
ატყდებოდა თაღრიას დერეფანში, მე მახლობლად, ჩვენს აი-
ვანზე ვიწექი. დილის ჰაერი ხომ მკაფიოდ გადმოსცემს ხმას
და თითქოს ახლაც ჩამესმის ყურში ცოლ-ქმრის შეჯავა-
ხება:

— ადე კაცო, ადე! გეყოფა ძილუავ, არ გამოსცხვი ძი-
ლითა?

— ზავი დამანებე, დედაკაცო! რას იღერლები ძაღლივითა! — და უფრო იკუჭავდა საბანს. წევს თაღრია და თან ფიქრობს თვალდახუჭული:

— ავდგე, თორემ ვაზით დაგრაგნილი ზვარი არ მელოდეს. ხარის ენის ტოლა ვენახი მიგდია რალაც; იმას შენც ეყოფი, რა უნდა ვიმუშაო გამოლალულ, გამოფიტულ მიწაზე!

— ავდგე, თორემ გამართული გუთანი არ მიცდიდეს, შებმული ურემი, ცხერის ფარა, ნახირი შორაქანზე არ მყავდეს გასარეკი და ცხენის ჯოგი, ღორის კოლტი მოსავლელად!

— ავდგე, თორემ მამა-პაპის ზედაშე არ მელოდეს და ხიზილალას შექამანდი არ დამიდგან წინ. ამ ჭილობის ძველაზე მეტი რა მაბაღია? ამისთვის ავდგე?

— ადე თავხმელო, ცისკარი გადავიდა!

— ადე, მთელი ქვეყანა სარჩოთი აივსო, — არა ცხრებოდა ცოლი, თუმცა მხოლოდ ჯერ ცისკრის ციალი კრთოდა ცაზე.

— შე ძუძუნაწყვეტო, რას მისძარ-მოსძარ ხმელეთი? დე-დამიწა შეიზნიქა შენი ჭყვირილით!

— ადექი, შე დევერხანა, მარტო ამ ჩვენი დერეფნის მერცხლისა მრცხვენია, რას იტყვის ჩვენს სიღარიბეზე.

— ადე, საცაა მზე ამოვიდა!

მაშინ კი იფეთქებდა თაღრია, თითქოს კლდემ გახუვლაო.

— დედაკაცო, მე ვინა ვგდივარ, მზეს აუუსწრო! ჯერ მზე უნდა ამობრძანდეს, მერე მე ავეთრიო!

ეტყობა ამ ყოვლადშემძლე დასაბუთებას ველარ უძლებდა

ბოთოლა და ისიც მცირე ხნით თავს მიაწვებდა ქმარს, რომელიც ახლა საამო ნეტარყუჩობაში წავიდოდა.

მაგრამ მცირე ხანში ისევ ისე დაიწყებდა:

— ადე, შე გასაცეებლო!

— ადე მამა, მამილო, მამაგულა, — ალერსით დაეხვეოდნენ ბალები. თან მხარში უდგებოდნენ, ზოგი წინდას აწოდებდა, ზოგი ქალამანს, ქამარს, ზოგი ჩვრებს, რომელთაც ახალუხი და შარვალი ერქვა. ერთი წლის გოგო იამზე ცაცებით ქუდს მიაწოდებდა.

მაშინ დიდი ამბით დაიწყებდა ადგომას თაღრია; დაიჭერდა ცალ წინდას ხელში და ჩაცმის მოლოდინში გარინდებოდა, თითქოს ფიქრობდა: ღირს ადგომა თუ არაო? ახლა ამაზე გაიხეთქავდა გულს თოთოლა:

— ახა ვაითას, ახა ვაგლახთას შენს ხელში!

— ნეტავ რა დროს მუშაობაა, ვერა ხედავ როგორ იკბინება მკათათვის მზის თვალი? — მორცხვად შეუბედავდა ცოლს თაღრია, მაგრამ კალო უკვე ჩაშლილი იყო თოთოლასა და ბავშვების მიერ და ცხენშებპული კევრი უცდიდა ოჯახის უფროსს. გოგო-ბიჭები კარგა ხანია რაც კევრზე ისხდნენ და ზარმაც მამას ჩუმად ახელებდნენ.

მალე თაღრია კევრზე იჯდა და თან ოროველას აზუზუნებდა.

მეტად მძიმე იყო კალოზე მუშაობა: უმზეურად კალოს ჩაშლა, მერე მთელი დღე სიცხიგულზე, საფიცხარაში კევრზე ჯდომა.

— რა ვქნათ, თუ ზაფხულის სიცხეში ტვინი არ ავიდუღეთ,

ისე ზამთარში ქვაბი ვერ აგვიღულდებო! — დასძენდნენ გლეხები.

ჩვენ, ბაღლებს მეტად გვიხაროდა კალო: კევრზე სრიალი, კალოს მსხალი, არნადით კალოს შეხვეტა და განიავება, საღამოთი კი ახლად მორწყულ კალოზე წითელი ხვავი და მის გარშემო ლხინი, ტაშგოგონა, სიცილი, თქართქარი, ვარსკვლავების თვლა, ვერცხლურ მდინარის გამონაჟონი — ირმის ნახტომი ღა მთვარე, მოქათქათე, ღიმილიანი მთვარე.

რა ვიცოდით, თუ რა აწუხებდათ ჩვენს უფროსებს; რა ვიცოდით, თუ მათ უმთვარო, უმთენარო ცხოვრება ჰქონდათ?!



უ უ უ ა რ ა

მკათათვე... გზისპირას მღუმარედ იდგნენ აყვითლებული ყანები. თავდაზნეპილი თავთავეები ფხიან ნამგალს უცდიდნენ. ნიავე სადღაც გახიზნულიყო. გზა იყო დახეთქილი, მტკრიანი... ირგვლივ მხოლოდ სევდა და თვლენა...

გზაზე გამოჩნდა მარტოდმარტო ბერიქალა. არსაფერისად ეცვა, სხვადასხვა მხიარული, ჭყეტელა ნაჭრებისაგან შეკერილი კაბა. ცალი ხელით მოძველო ქოლგა ეჭირა, მეორეთი ჭრული ბოღჩა. ძველებური შავი თათმანი ეცვა ხელთ და ადამის

ხნის დაგლეჯილი, მაღალქუსლიანი, ჩაღილული, ყელიანი ფეხ-საცმელი, მომტვრეული, შუაზე გადაჩეხილი ქუსლი ძალზე აწვალეზდა. მოქანცული, შეოფლიანებული, გმინავდა, შეწუხებული ცალკე სიცხით, ცალკე უხერხული ფეხსაცმლით, ცალკე თავისი მწარე ბედით!

— როდემდის, როდემდის, ამდენი წანწალი! — კენესოდა და თან მკერდზე თათმანით ოფლს იმშრალეზდა, — მალე სიარულსაც ველარ შევიძლებ და სადღაც, ღობის ძირას ამომხდება სული!

გუშინ, სარკეში ჩაიხედა და სარკე მიწაზე დაანარცხა. სარკემ უთხრა, რომ პირის მთვარიანობა დიდი ხანია რაც ჩაჰქრობოდა, ბროლის ნათელი, ლალის ბღღვრიალი გაჰხუნებოდა, შუქგადამდგარ საღამოს მიჰგავდა. მისი ყვავილიანი სამზეო დაღეულიყო. წყალმა წაიღო სილამაზეც და თაყვანისცემაც!

ოდესღაც კი სილამაზისთვის „ფუფალა“ უწოდეს!

— აგერ ჩემი სოფელიც... ამდენ ხანს დასანატრელი... ჩემი კერა, სადაც აღარც სახლი მაქვს, აღარც კარი! ვინ გამომეგებება? ვინღა მეტყვის დედასავით, ტკბილად, — შვილო, მშვიდობით მომიხველო? ჭირი მოგპარეო! ვინღა მეტყვის? — არავინ! ვინა მყავს შათი ნაცვალგარდა? მოხრეკილი საწუთრო, უდაბნო-უგულო!

— რა კარგი იყო ჩვენი მთვარიანი აივანი, ჩვენი ხეივანი!

— საწყალი მამაჩემი, ყარსის ციხის ამღები! ხელმწიფემ მისი სურათი რომ მოითხოვა, მამამ დიდი, რუსული ცხენის ნალი მოღუნა ხელში, ეს ნალი გაუგზავნეთ სურათის მაგაერო! და მისი შვილი, აზნაურის ქალი, ახლა ააე დავწანწალე!

ყანის ბოლოში, დიდი კაკლის ხე იდგა, ბერიქლას ჟრუან-
ტელმა დაუარა.

ამ კაკლის ქვეშ, უკანასკნელად შესვდა ტელეგრაფისტი
გაბო.

— უშენოდ ველარ გამიძლიაო; შენს გარდა ველარაფერს
ვხედავო; შენი სურვილი დამეცაო... ორი მკათათვე რომ
შეერთდეს, მე უშენოდ ვერ დამთბებაო!

— მე როდი გავიკარე მისი სიტყვა? მეორე დღეს, საწამ-
ლავი დალია ჩემი გულისთვის! ვინ იცის, ახლა ციდან ხედავს
ჩემს წანწალს და გული სტკივა. ვიცი, რომ უღმერთოდ
სტკივა!

ფუფალამ მთაზე შეჰხედა ნგრეულ ნაშთს და პირჯვარი
გადაიწერა.

რა კარგი იყო მისი დღეობა! განა აქ არ იყო, რომ
თავზე ხელადებული დოღენჯი, ფუფალას გულისთვის შვიდ
ნაბადზე გადახტა შეკაზმულ ცხენით! ზაზუნა კი, დარდიმან-
დი ზაზუნა ეკითხებოდა, მზეღმერთი ხარო, თუ ვინაო?

— აჩრდილივით სულ თან დამდეგდა არდაშელი: შენს
იქით გზა არა მაქვსო, შემრისხე და შემიწყალო! მაგრამ
ქვაქალი ვიყავ, ვიღას ველოდებოდი უწამებელი, ურწმუნო?!

— ეს რა ხორშაკი ქარი ამომივარდა, რომ სულ ყველა
ერთიანად შემომძარცვა?

გამოჩნდა ჩალური და წითელკრამიტიანი სახლები...
ორღობეში აყოჩებულ სიმინდს თავი გადმოეყო. რეჰანის და
კამის სურნელი მოდიოდა დარწყულ ბოსტნებიდან.

თავისი აობრებული ნასახლარის დანახვაზე ფუფალას წა-

მოაგონდა წუხანდელი ნასიზმრი: ლოგინში მწოლარეს დედა
ნაზად დაჰლილინებდა:

ელი ელამდა,
ზღვა ბიბინებდა;
ზღვისა პირსა კარავი იდგა,
შიგ ქალი იწვა,
ფარჩა ეხურა,
ფარჩა ავხადე, სამი ვაკოცე,
სამმა კოცნამა ფერი უცვალა,
ფერმა ნაცვალმა წიგნი დასწერა,
ვის გაუგზავნა?..

— ვის გაუგზავნი? — ღიმილით ეკითხებოდა დედილო, —
სულხანს თუ არჩილს? რამაზს? აბა, მაშ ვის, გენაცვალე! —
ფუფალას ვერ გამოერკვია ვისთვის გაეგზავნა უსტარი და
ქოქმანობდა. დედა კი ეხვეწებოდა ლოგინზე წამომჯდარს, —
რად ეგრე? წარბი გახსენი, ჩემო სიცოცხლეო!

გაჰქრა თბილი სიზმარი... მყუდრო ლოგინი... ფუფალას
ნათლიდედას ქონში გამოედვიძა, მიწაზე დაგებულ ჩალაზე.
დერეფნიდან შემოესმა მასპინძელი გლეხის გამწყრალი ხმა,
ცოლს ურისხდებოდა:

— თავიდან მომაშორე, თორემ შემოგვეჩვევა, ჩვენთან
დაიდებს ბინასო!

— როგორ დავითხოვო, რომ მწამლობსო! ამას წინათაც
თავის ტკივილებისაგან მომარჩინაო!

— ერბოხალი მიართვი, მამა უცხონდაო!

ბერიქალა ვითომ კიდევ ექიმბაშობდა ლუკმა-პურის გუ-
ლისთვის.

— ყუავი მოხარშე ისე, რომ ორთქლი არ გამოუვიდეს, იმისი წვენი დალიე!

— მორიელის სისხლი გაახმე და მიიღე!

— მუხის ხის წყალი, მიმინოს ქონი აურიე ირმის ქონში, მტრედის გული ვარდის წყალში ჩააგდე!

მკურნალ ფუფალას აფთიაქს შეადგენდა: ბალახი ვირის-გვერდა, დელადუნტის ძირი, ტირიფის არაყი, აქლემის ძვალი, ჯოჯოხეთის ქვა, ეშმაკის კიტრანა, კრაზანა — ბალახი...

ფუფალას წამალი არავის ეჭირვებოდა. არც თითონ ატანდა ძალას. მაინც სოფლის იმედი იყო... ისევ მკურნალის სახელით ცხოვრობდა, ოდესღაც სხვათა გულის დამჭრელი... ღვთისნიერი ნაცნობები შებრალებით აძლევდნენ თავშესაფარს.

ბერიქალა შედიოდა სოფელში; როგორც ქარიშხლისაგან დაგვემილი ნავი მიეჩქარება თავისს ნავსაყუდარში.

— იქნებ, უკანასკნელადაც მოვდივარ ჩემ სოფელში? — გაიფიქრა სევდიანად.

ზედ გზაზე, ღობესთან, დიდი ფშატის ძირას, — სოფლის არეობაგზე, იჯდა ქალთა სინედრიონი. თვალყბედი კორელები ქაქანებდნენ.

რამდენი ენაც კი არსებობს ამ ქვეყანაზე, სულ აქ იყო შენაჯგუფარი: ენამძლე, ენაგესლი, ენაქლარცი, ენამორბედი, უკლიტო ენა, ენამუხლმალი, ენა გაბნეულ-გამობნეული, სახრიკო ენა, ენამრე, ენაწყალინაყია, ენაქუხილი, ენამახვილი, ორენა...

კიდევ დავუმატოთ? ორკაბა ენა, ენატლეკია, ენაჭრიკინა. კიდევ ვინ იცის? რას არ იტყვის დაუყენებელი ყბა!

ჭორელებმა წამოანთხიეს გულის ღარღლი, დაღერღეს ყველა, დაასახიჩრეს, დააჩინჩხვარეს, მტვერი აადინეს!

განზე იჯდა ნაჯაფთარი ბებია გაიანე, ხუთი შვილიშვილით, ენახიდან გამოსული თითისტარს აძგრიალებდა, თან აღმაცურად გადახედავდა მეჭორეებს.

სალაყბოზე, სხვათა განწილვა-განქიქებაში, ყველაზე მეტად ბასრობდა ენით მქლეშელი „ქარცეცხლა“ — დალაქის ცოლი. ქარცეცხლასათვის მთელი ქვეყანა მოუწონარი იყო, არა მის ნებაზე გაჩენილი. სამყაროს მიმართ ამბოხებულს, ყველა ათვალული ჰყავდა კბილგასაკრავად. მას ბანს აძლევდა მიმტყნარი ბაბაღე, რომელიც წინასწარ ნაზი გაფრთხილებითა და გაზვიადებით მოგანდობდა დიდ საიდუმლოს:

— გეთაყვა, ეგ სიტყვა კი ანგელოზმა შეინახოსო, — მაგრამ თვით მისგანვე, უკვე მთელმა სოფელმა იცოდა.

— თქვენს წინ კი, ია და ვარდი, ჰფენია! — და საოცარ თავზარდასაცემ ჭორს ჩამოჰყაჰავდა.

ახლაც დაიწყო... რა დაიწყო!..

ბაბაღეს გადმოცემით, სოფლის მზეთუნახავ ნარგიზას ხალი მარცხენა ძუძუს ქვეშ რომ ჰქონდა, ბარემ ათ ბიჰს სცოდნია სოფელში!

— კარგადაც უქნია ნარგიზას! — წარმოსთქვა ნინუცამ, რომელსაც აღარც ერთი კბილი არ შერჩენოდა ყბაში და მხოლოდ ენას ალაღლაღებდა.

— მეტი რა უნდა წაიღოს ამ ქვეყნიდან. აბა, ჩემი პატიოსნებით რა გავიტანე? დიახამც, ვნანობ, რომ ჩემი სიღამაზე სარეცხსა, ქათმებსა და საქონლის მოვლას გადავალე!

— რა ყოფილა ჩვენი სიცოცხლე! მართლაც, წამიეთია,

წუთის ქვეყანაა, დამტყნარებას ვერც კი მოასწრობ, რომ ხელში გაგიცურდება... ეს ოხერი, როგორ ხუნდება — ჩიოდა ისევ ნინუცა.

მზე ჩასავალზე იყო. ის იყო ჭორელებმა ყველაფერი ვაბათილეს, გადააბრუნეს და თითქმის აკლდებოდათ ჭორის მარაგი, აკი ღმერთმა უშველათ! სოფლის შარაზე ჩვენი მგზავრი ბერიქალაც გამოჩნდა.

— აგერ, ფუფალაც მოდის! — დაიძახეს ერთხმად და შარას მიაჩერდნენ — რამდენი ხანია, რაც არ გამოჩენილა! სად რას არის გადაქინძული? აჰა, გინდ ეგეც განთქმული მზეთუნახავი, ახლა საფრთხობელას დაემსგავსა. მართლაც, რა ფუჰია წუთისოფელი!

— როგორ იქნებოდა მზეთუნახავი? სახე თონეში შემწვარ ვაშლს მიუგავს! — გაკვირვებით იკითხა ლურჯთვალა გოგომ.

ფუფალა ბოხჩითა და ქოლგით მიუახლოვდა ქალთა კრებას. სახე ატკრეცილი ჰქონდა, ოფლს ზოლდაზოლ უმარილი ჩამოერეცხა.

ფუფალა მიესალმა.

— კარგია, რომ დაგვხედე! სად გადაიქარგე?

— თვალი ჩამოგავლეთ! ისე შეგეწიოთ მზე, დედასთან მიმავალი, როგორც მე თქვენ მიყვარხართ!

— რაზე ზღაპრობდით — იკითხა ფუფალამ, როცა სული მოითქვა და დახეული ქოლგა დაკეცა დიდი სიფრთხილით.

— ტიალ წუთისოფელზე, ოხერი რა მალე ცვდება! აა, გინდ შენი მე რომ მახსოვხარ, ღმერთო, რა იყავი აღარ ვიცო-

დი, შენ იდექი ჩემს წინ, ვარდი თუ ბროწეული? დადიოდა, ანათებდი! — უთხრა ნინუცამ.

ფუფალამ შეიფერა... თავი ამაყად გადასწია:

— ჩემო დაო, შენ რომ პატარძლად მოგიყვანეს, შე სულ ცხრამეტი წლისა ვიყავი. მაშინ ყველა ლამაზია! საქმე დღეს არი, დღეს იყო ლამაზი, თორემ წასული სილამაზე ჩავლილი წყალივით არი, ვისლა ახსოვს? — და თან დაუმატა ნინუცას საამებლად:

— შენც კარგი იყავ, ნინუცი! — მაგრამ არავითარი შედარება არ გაიმეტა ფუფალამ ნინუცას წარსული მშვენიერების გამოსახატად.

— მთვარეს ჰგავდი, ცისკრიანად! — მლიქვნელურად შეაქო ნინუცა ბაბალემ.

ფუფალამ იწყინა მეტოქის ხოტბა. ისიც, არა გულწრფელი, უმართლო გადამეტფასება და ქორივით გადახედა ბაბალეს, რომელიც მის თვალთხედვის ქვეშ მწყერივით გაინაბა. უხერხულობა იგრძნო თითონ ნინუცამ, რომ მიაგეს მიუგებელი, მაგრამ ქათინაური არ იუარა და ფუფალას დასაშოშმინებლად, სიტყვა ქალის სხვა ღირსებაზე გადაიტანა.

— საქმე სილამაზე კი არ არის, პატროსნები ვიყავით! ოჯახის ერთგულები! — აი, ეს არის თავი და თავი!..

— მართლაც ლამაზი ვიყავი! — ამოიოხრა ფუფალამ, სწორედ ვარდს ვგავდი! — აღქალას, ოქროქალას, თვალ-უუუუნას იმეძახდნენ.

— ახლა კი ბუს გეძახიან! — წამოიძახა კიტრიპარია ბიჭმა და თავქვე მოჰკურცხლა.

— რას გარბინარ, სასიკვდილევ! მე არ მეშინიან, ახლა,

რაც გინდა დაჰიძახონ! ხომ მიმტკნარი ვარდი ვარ, მაინც ვარდი მქვიანს ნიორი და ხახვი ხომ არა ვარ დედაშენივით! ეჰ, რა ლამაზი ვიყავი — განაგრძობდა ფუფალა, — თვალადი, ტანადი, მაგრამ შიოლას შევსწირე ყმაწვილქალობა!

— ახლაც ვარდს იფენ, — ნახევრად დაცივნით სთქვა ქარცეცხლამ. — შენი ცალი და ნაჭერი სად არი! — თუმცა ფუფალამ, როგორც შესაკმევი სიტყვა, ისე გაიგო.

სამოც წელს გადაცილებული ფუფალა, მაინც ყველას დაწუნებაში იყო:

— ვინ არი? — ეტყოდნენ, ესა და ეს ვაუკაციო!

— ჩია თუ ქია? გინდაც ფთია იყოს! ერთი გოშია კაცი, უნდო ვილაც, ჟაჟილა თუ ყაყლაჩა! — და ზედ ქვასა და ქაცვს მიაყრიდა.

— თვალში მეფუქსავატება! მაგას მაინც არ გავყვები, სულ რომ მარტო დავრჩე, მინდვრის თაგვივით!

სიძულვილით სძულდა ახლანდელი კაცები — ესე ვივლი, ცალა-რქა ირემივით! — და მოიღერებდა ყელს: — ციხის ამღების შვილი ვარ!

— რამდენს ვუყვარდუ... რამდენი სისხლი მოიღვარა ჩემთვის! დამფრთხალ ჭივჭავივითლა ვარ! ეჰე, შიოლა... შიოლა... სადა ხარ? — ერთხელ, წყაროზე შემხვდა შიოლა, მიიხედ-მოიხედა; რომ არავინ იყო, ჩუმად მითხრა: მე რომ შენი საქმრო ვიყო, გეფიცები, ყვინს არ მივცემდი სალამსაო! სწორედ ასე მითხრა, ჩემი ნაგონარი არ გეგონოთ!

იქვე მჯდარმა შეველე რეხვიამ ჩაიფრუტუნა. ცეცხლი ჰყარა ფუფალამ.

— აბა, სარკეში ჩაიხედე, ვითომც შენც კაცი ხარ, კაცი კი

არა, საჩურჩხლე ქვაბი ხარ! — სიცილი ვერც ბირხლამ შეი-
მაგრა. ფუფალამ შეუტია:

— რას იცინი, ნივრიგლეჯიავ, დოდრიალავ, მუხის ფუტუ-
როსავით თავი რომ გაბია და ზედ ქინძი ამოგდის! — და თვა-
ლები სიბოროტით მიუელვარა.

— აბა, რა კაცი ხარ, კუჭია კაცუნა! შეუვსებელი ჯამი! —
და იქვე მოკეცილ დედაკაცებს მოუბრუნდა, თითისტარს რომ
აძგრიალებდნენ:

— ერთი მითხარით, გეთაყვათ, ეს კაცია თუ ფლასის ნაძ-
ველა?

ბირხლა იცინოდა...

— შიოლასავით არავინ არ გამოსულა, — განაგრძობდა
ფუფალა, — მასავით ქამანდარი სროლაში, მასავით ხმატკბილი
მღერაში... რა თვალადი, რა ტანადი, ბოჭორმის წმიდა გიორ-
გი გეგონებოდა!

— ხატობაში დავენახე, სულ პიზველად, ჩემი ატლასურ-
ნარინჯული კაბის შემხედვარე გაგიყებულიყო! უნდა გენახათ
ომის კარს, ომის კარს უნდა გენახათ, დუქნის კარს კი არა,
ახლა რომ ჰყრიხართ მთელი დღე! — მიუბრუნდა ბირხლას.

ბირხლამ ველარ გაუძლო და გაიქცა...

ფუფალას თანამოსაუბრეთა ერთი ჯგუფი ჩამოეცლებოდა,
ახლა სხვა დედაკაცები დასხდებოდნენ, შინიდან საჭორაოდ,
დასამთქნარებლად გამოპარულები, ან ბავშვის საძებრად, ან
დუქანში ნავთის მოსატანად გამოსულები... გამოჩნდებოდა
ფუფალას ახალი გამამწარებელიც და იწყებოდა ფუფალას ახა-
ლი წამებანი.

— ეჰეი, მერცხლის თვალეზავ, ისევ ცალადი ხარ? რატომ

არ თხოვდები, ხომ არ გადაკრუხებულხარ? — შეესიტყვებოდა ძმობილი მურწა, კვიმატი კაცი, — თუმცა სად არი შენა ფანდი? — არც მურწამ დაინდო ნადობილარი!

— ეჰ, წავიდა, გული წაიღო შიოლამ! — და თითქოს შიოლას ესაუბრებოდა: — ერთი იყავი, რათ მოკვდიო?

— ეჰ, ვუყვარდი, ორმოცი წლის წინათ ვუყვარდი!

— რათ გინდა ორმოცი წლის დამიწებულის სიყვარული, რა ბედენა!

— სიყვარული არა კვდება! — ნაზად უპასუხა ფუფალამ და თვალები ააციმციმა;

— გმირი იყო, მდიდარიც, ლამაზიც, მაგრამ არ მიყვარდა და არ გავყე! — აი, სად იყო ძველად ქალის პატიოსნება!

— მდიდარი იყო, მდიდარი, სიმდიდრე-შეუზომელი, შეუწონელი, მაგრამ არ გავყე; არც პირობა მიმიცია, ჩქამიც არ დამიძრავს!

— ეგ შიოლა ვინ-ღა იყო, როდის ცხოვრობდა, წარღვნის აქეთ, თუ წარღვნის იქით? — იკითხა ლურჯთვალამ.

— ღვრნა შენ და წარღვნა! — გააღმასდებოდა ფუფალა.

— დიამც, გაგჩეებით ვუყვარდი შიოლას! დაჩოქილი მეხვეწებოდა, — ერთი დღე შენთან მამყოფა და უკვდავება დამალევინაო. არ გავყე ცოლად, მაგრამ მიწაში ვენაცვალე!

ფუფალას სიტყვით, შიოლა ორმოცი წლის წინათ მომკვდა-რიყო. სოფელში კი აღარავინ იყო შიოლას მახსოვარი.

— დიახამც, საჭვეყნო კაცი იყო შიოლა და მაინც არ გავყევი!

— არ გაჰყევ და ახლა საუძლურეში ამოჰყოფ თავს! — დანესტრა დედაკაცებში ისევ შემოპარულმა კიტრიპარიამ; მაგრამ

ისეთი დაუბრიალა ფუფალამ, რომ კიტრიპარია ბიჭი თავქვე გარბოდა.

— მგლის პირი შენ და ქორის კლანჭი! — გაადევნა ფუფალამ.

გზაზე ცხვრები ჩამოატარეს:

— ჩვენი სოფლის მთა-ბარი, მთლად შიოლას ცხვრით იყო შეხურხლული. ამ სოფლის სასაძოვრე თუ სათიბი შიოლას საქონელს ეჭირა!

— ამბობენ, სხვათა მოჯამაგირეობაში მოკვდაო! თუ ზღვა-საევით მდიდარი იყო, სხვას რად ედგა მოჯამაგირედ? — გესლიანად შეეკითხა ლურჯთვალა.

— არა, ის სხვა შიოლა იყო, სხვა გვარისა! — და ფუფალა უფრო გაზვიადებით განაგრძობდა:

— პირის მარგალიტი ეყიდა ჩემთვის შიოლას, ოქროს ჯაჭვიც, ლალის საყურე, ბეჭედი, მაგრამ სყიდვით კი ეყიდნა, შიშით ველარ გამოეგზავნა ჩემთვის! სულ ერთია, არ მიიღებ-სო, არ მიკადრებ-სო!

არავინ იცოდა, მართლა იყო თუ არა ამ ქვეყნად ფუფალას მიჯნური შიოლა; მართლა ოქროს ჯაჭვს უგზავნიდა თუ არა?

— აბა, რა კაცი ყოფილა შენი შიოლა, — მეცხვარე კაცა, წვერჩამობანდული, ქაცვისაგან ჩამოგლეჯილი, წვიმა-ავდრი-საგან ჩამოსველებული, ჩამოღარული! წავიდა შიოლა, მაისის წყალი დალია! რას მისტირი, რას გამოელოდები? — არა ცხრებოდა მურწა.

— მეცხვარე კი არა, ცხვრის პატრონი იყო! — შეუსწორა ფუფალამ.

— ჩინჩალა ყოფილა, თურმე, ბეჩაევი, უამური! — წამოედგა პირსიცილით ყელმძვიანი ქერა გოგო პირბალიშა.

— მიწამ კი დაგიკეტოს კარი, შე ულხინებელი! ფრინველს მიჰქონდეს შენი თმები თავისი ბუდისათვის! — წამოიკლაცნა ფუფალა და ხელთ ქვა აიღო. გოგო გაიქცა, ფუფალას ქვა შერჩა ხელში.

შერყეული, გულზე ეკალდასხმული იდგა ფუფალა და ფიქრობდა: ეჰ, რამდენი ბოროტი ადამიანია ქვეყანაზე?! ამოსწყდეს მათი ფესვი და ნაშენიო!

— აი, შე ეშმაკის დანარჩენო, — და წამოვიდა ამტუტებული, შებეზრებული ფუფალას მეზმფრქვეველი სიტყვები.

ფუფალამ დამშვიდებაც უმაღ იცოდა. გაშფოთებული ძალე დაწყნარდებოდა:

— დახეთ, დახეთ, სად გადამიბნელა დღე! სად გამიტეხა ნათელ-მირონი, ამ ბაბაჰუა ფეიქარამ! — და როდესაც ზემოდან ისევ ჩამოიარა მურწამ, წყრომის ნისლაყრილმა ფუფალამ ასე მიჰმართა:

— ბოლოსა და ბოლოს, მიწა ვართ, დავითრგუნებით! მაგრამ ძმაო გენაცვალოს შენი დის თვალები, ჩემო ჩამოქნილო სანთელო, რათ უნდა მაწყენინო? არა გრცხვენინან, რომ ამ მიწაზე დადიხარ? — მურწამ ფეხი გადადგა წასასვლელად.

— არა, არა, ჯერ ვერ წახვალ, ჯერ გული გამიმთელე ეჭვიდან, თუ არა და სიკვდილზე წილი ვიყაროთ: ღმერთმა გაგვასწოროს, ის იყოს ნების მყოფელი!

— ხმალი ხარ, ამოღებული, მძინარე ლომს გააღვიძებ! — ჩაიჩურჩულა მურწამ.

— ნამტკივნი გული ლაპარაკობს, განა მე! — ლმობიერებით ეუბნებოდა ფუფალა:

— სალბუნი მომეცი, სალბუნი, რომ დავმშვიდდე... სულ ვარდს მოგაშლი, ოღონდ გულის სალბუნი მომეცი!

— გულის ძმა ხარი! ერთად ვართ შეზრდილები, ვერაფერი გამიგია, ტვინის ძაფი დამექსაქსა. რათ უნდა მაწყენინო, 'შე უღმერთოვ! თუ ჩემგან რამე გეწყინა, გული გავიწმინდოთ, ვთქვათ ყველაფერი, თავწყაით, ბოლომდე ვთქვათ და გავათაოთ!

— სალბუნი მომეცი, სალბუნი! — ემუდარებოდა თავდაბრილი, მიწას ჩამტკეპრი ფუფალა მურწას. მაგრამ მურწა უკვე გაპარულიყო. ისე გართულიყო ფუფალა თავის მკვევრმეტყველებაში, თავი როცა აიღო, მურწას მაგიერ მოლიმარე ახალგაზრდა ქორია იდგა მის წინაშე.

— ეს ვილაა, საიღამ მოთრეულა?

— წიწმატის ტოტზე ვიჯექი, წიწმატის ტოტი მომიტყადა! — წამოიძახა ქორიამ.

— რაო?

— შენი კუბოს ფიცრის სათლელად ვიყავი, ახლა მოველი, რომ კუბოს ზომა ავიღო, ხომ გაიგე? — თავხედად ჩაუქარგალიტა ქორიამ. ფუფალა გაფოთდა, მაგრამ ყური მოიყრუა.

— ჰო, ეს შენა ხარ, მუტელავ, ქორო, ბორიაქარო, სოფელი რომ გააციე! — შეუცეცხლა ფუფალამ. ქორია ხომ განოქმული ქურდი იყო, მტაცებელი! და თანაც ფუფალას უტიფარი მწვალებელი — ისევ თავიდან დაიწყო ფუფალას წამება.

მზე ჩადიოდა... ასალამურდა... ბინდი დაეცა სოფლის შარას.

— უფალო, შენ დამეხე, დაწვი, დანაცრე ჩემი მტერის

უძილო მატლი სჭამდეს ჯოჯოხეთში! — იძახოდა დაღლილი, წამებული.

შარაზე ნახირი გამოჩნდა. დედაკაცობა წამოიშალა.

ფუფალაც წამოდგა, ჩააშტერდა ნინუცას და უცბად ორივე ხელით შემოეხვია. ზოგნი იქვე დარჩნენ ცნობისმოყვარეობით.

— ნინუცი, ერთი უმფარველო გოგო ვარ, ხომ გამიკითხავ, როცა მოვეკვდები?

ნინუცა შეკრთა, — რას ამბობო, და მიესაყვარლა.

— არა, ხომ დამიტირებ შენი ლამაზი თვალებით? ნამდვილი ცრემლით, გულის ატირებით, ხომ ლოყას ჩამოიხზოკავ, ჩამოიკაწრავ?

— რას ამბობ, უწინამც შენ დამაყრი მიწასა! — ამბობდა სახტად დარჩენილი ნინუცა.

დედაკაცობა შეხორხორდა...

— აბა, სიტყვა მომეცი, რომ ჩემზე თმას გაიშლი, ჩემზე შავს ჩაიცივამ, ჩემს კუბოზე დაახლი თავს! — და აზუზუნდა, ფუფალა ატირდა, აქვითინდა ადუღებული გულით, ცრემლდაახმული თვალებით. ნინუცა ტიროდა, დედაკაცებმაც ცრემლი გაშალეს. გასათხოვარი გოგოები იკბინებოდნენ:

— ოჰო, ძუძუთა ნუკრს დამიხედეთ!

— ჩემო მიწის დამყრელო, ჩემო დამსუღვრელო, ჩემო მოკეთევ, სულ ლექსით დამიტირე, შენ გენაცვალე, ცრემლში გატარებული სიტყვებით! — იხვეწებოდა თავმორეული, ყველასგან გარიყული, უშტოვო ხესავით მარტო, ყინვა-სიცხეში ჩამომწვარი ფუფალა.

— სულ ცაში ადიოდეს შენი ტირილი. ხომ იცი, უპატრონო ვარ, ლიტაო. არა მყავს გულშემატკივარი! — კანკა-

ლებდა აძაგრული, საყელოცრემლიანი, ლოყაზე კურცხლმიწე-
ბებული, მინაცრებული ფუფალა.

— ცრემლის ღვარჩქერს დაგიყენებთ, თუ გინდა დანჩქერ-
საც! — ფრუტუნებდა ლურჯთვალასთან ერთად მზევარდამო-
მავალი პირბალიშა.

თავდადრეკილი, გადასვენებული, ღონემიხდილი ფუფალა
კუნძზე იჯდა გულგადაღებული და ლიტრის წყლით აბრუ-
ნებდნენ...

ბოლოს, როგორც იყო დაშოშმინდა ფუფალა. ნინუცა არ
მოშორებია. შინ უნდოდა წაეყვანა, მაგრამ ხეპრე ქმრისა ეში-
ნოდა, ორივეს კარში გამოგვეყრისო, გაიჯეჯილებსო, სად მაქვს
მაგის შესანახი ლუკმაო!

ბოლოს კიტრიპარია ბიჭმა ხმამაღლა დაიძახა დაშლის ნი-
შანი: ჩიტმა თავის ბუდე იცისო!

კიდევ ერთხელ მიესაყვარლა ნინუცა ბოდინით და შინის-
კენ გაეჩქარა.

მეპურმარილე არავინ გამოჩნდა.

ბინდი გამუქდა... ფუფალამ გაშალა ქოლგა და ლასლასით
გაუდგა გზას. საით? თითონაც არ იცოდა!

ბინდში გაშლილი ქოლგა რომ დაინახა, — მზე არ მოგეკი-
დოსო, — გესლიანად მიაძახა ქარცეცხლამ.

— ხედავთ, ციცინათელა თავის შუქს მისდევს! — დასცი-
ნა ლურჯთვალამ.

— ჭრელო პეპელა, გაფრინდი ნელა! — მისძახოდა პირ-
ბალიშა.

— იცით რა, საიდუმლოს გეტყვით? — ბოროტიანმა ქარ-

ცეცხლამ დიდმნიშვნელოვნად პირზე ხელი მიიღო და გარინდლა.

— გვითხარ, შენი ჭირიმე, გვითხარ, თავს შემოგეველე! — შემოეხვივნენ დარჩენილები, მაგრამ ქარცეცხლა ასე იოლად როდი გაიმეტებდა საიდუმლოს.

— იცით რა — იძახდა ხმაშეკიდებით.

— ჩქარა გვითხარი, თორემ შინ სახრეს ვერ გადაურჩები! ბოლოს ქარცეცხლამ, როგორც იყო, გაამყლავნა დიდი საიდუმლო:

— ისე არა ყოფილა შიოლა ამ ქვეყნად, როგორც მე არა ვარ ახლა დედოფალი! — წარმოსთქვა ჩამარცვლით.

— როგორ, შენი ჭირიმე, ეს როგორ? — ელდანაკრავები ეკითხებოდნენ ქარცეცხლას, — წმიდა გიორგი, შენ გვიშველე!

— ისე! სულ ფუფალას მოგონილია! შიოლა არცა ყოფილა ამ ქვეყანაზე, არც არავის უნახავს... ისევე როგორც მისი წამლები!

იმ ჭრელ ბოხჩაში მართლა წამლები კი არ უწყევია! არა, საყვარლებო, ჩემო სიცოცხლებო, — აგზნებით ქაქანებდა ქარცეცხლა, — ფერუმარილი ულაგია, გუნდა, ლახუსტაკი, ზირა, ქარვახუთო, ზეთები, სახეს რომ ითითხნის ყოველდღე, სილამაზის ნაკვალევი მაინც შევინარჩუნო! რომ ჩაიკეტება ხოლმე, განა მართლა წამლებს ამზადებს, ჯერ ნებივრად კამოიძინებს, მერე ჯიბის სარკეს დაიდგამს წინ და თავს ილამაზებს...

— უყურეთ, მაგ პეწენიკს, თვალთმაქცს, როგორ გვატყუილებდა! ერთი უყურეთ! — ვიშვიშებდნენ დედაკაცები. ლურჯ-

თვალა და პირბალიშა ზეიმობდნენ, ყველაზე მეტად კიტრიპარია ხტოდა გახარებული.

ფუფალა მიჰფარდა იქვე ორლობის მოსახვევში თავის ქოლგით, ბოხჩითა და თექვსმეტნაჭრიანი კაბით. მიდიოდა პურ-უჭმელი, დაბეგვილი, მოთუთქული, დაქოლვილი, ნაწამები, და არ იცოდა, რომ უკვე გაცემული იყო ყველა მისი დიდი საიდუმლოება, რომ ხვალდან უკვე მზადდებოდა მისთვის ახალი გოლგოთა. ახალი ჯვარცმით...



მ ე ე ზ დ ე ი ა გ მ რ ა

ამ წვიმიან დღეს, რატომღაც ჩვენებური მოხუცი მეეტლე იაგორა შემახსენდა.

ორმოც წელიწადზე მეტი იყო სოფლიდან თბილისში მეეტლედ გაქცეული იაგორა და ერთხელაც არ გახსენებია სოფელი.

ჯგუხი, ჯანმრთელი მეეტლე თბილისში შრომისა და ცხოვრების ამოებაში იყო გართული. ქალაქში პატარა ქონიკ ეყიდნა და უკვე მოქალაქედ გამხდარი, სოფელს აღარ კადრულობდა. ბოლოს კი მოხუცებაში „მიწამ მოიკითხა“. თავათ უშვილო იყო, ცოლიც მოუკვდა თანანა; ცხენებიც დაეხოცა, ქონში წვიმამ ჩამოატანა, მსოფლიო ომიც დაიწყო; გაღარიბდა,

დავადმყოფდა ჩვენი იაგორა და სოფელს მოაშურა. ეს იყო მსოფლიო ომის მეორე წელს.

კარგად მახსოვს მისი ქალაქიდან დაბრუნების დღე. ჩვენს უბანში ეს იყო „ახალი ამბავი“, თუ გინდ, მთელი „მოვლენაც“. სწორედ იმ დღეებში წმიდა გიორგის ხატში ვიყავით, სოფლის განთქმულ სალოცავში. აპრილის გასულები იყო; ათქვირებული ბალახი მუხლზე გვცემდა, ზეიმობდა პირველი სიმწვანე გაზაფხულისა.

მეზობლები იაგორას პატივით ხვდებოდნენ და ხატობაშაც მიიპატიეს, რომელიც, აგერ ორმოცი წელიწადია, რაც არ ელოცნა.

იაგორა ხარობდა, იცინოდა, გამოიცვალა, თითქოს სიბერის ქურქი გადასძვრაო, თითქოს ფენიქსივით განახლდაო, აღტაცებული მწვანე ბალახში ეხვეოდა:

— უჰ, თქვენი ჭირიმეთ და!.. — თან მუხლი ეჭრებოდა.

როცა ხატობის სუფრაზე დავჯექით და იაგორას სახსევ კერძი მიაწოდეს, მან მოულოდნელად წამოიძახა:

— მთელ სიცოცხლეს ვნატრობდი: ღმერთო, აუწონავი ხორციტ გამაძღე-მეთქი! ჰოი, თქვენს დედის რძეს ვენაცვალე!

თამადა — მოხუცი რკინიგზელი მუშა თვითვე სადღეგრძელოს ასე იწყებდა: „შაგნებულო და მომზადებულო ამხანაგებო!“ იაგორა კი არ აცლიდა თამადას მჭევრმეტყველებას და გაიძახოდა:

— აუწონავი ხორცი, აუწონავი! უჰ, თქვენი ჭირიმეთ!

ორმოც წელიწადს ქალაქის სასწორის შემყურე იაგორასათვის, ამ ომიანობის დამშეულ დროს, როცა შავი პური საძე-

ბარი გახდა, მართლაც და სანატრელი უნდა ყოფილიყო აუწონავი, მუქთი ხორცი... აქ კი, — კმასყოფელი პურმარილი, ღვინო...

ზვარას ხარტყავი და დასისხლული თავი ეგდო ძირს, ბალახში, ჭიანჭველად შეღებულ მიწაზე. გრძელი მწვადები შიშხინებდა, სიმსუქნის ქონი მიწას ეწვეთებოდა.

მიამიტ სოფლელებს უკვირდათ იაგორას აღტაცება; ერცხვინებოდათ ჭამაზე ლაპარაკი ქალაქელი კაცისა, განსაკუთრებით კრძალულ მანდილოსნებს. კაცები კი, ხორცთან ერთად, ღვინოსაც აძალებდნენ:

— ჩაიგემე, ჩაიგემე, ჩვენებური მირონიაო!

შემთვრალ იაგორას კი თითქოს ქვეყნის კიდური შემოეფლოს, ისე მოჰქონდა თავი! ვის არ იცნობდა თურმე თბილისში, ვინ არ უტარებია თავისი ეტლით — თავადი, ბობოლა, მონხელე თუ დიდი ვაჭარი?

— გულბაათ ჭავჭავაძე გაგიგონია, „გალიცინი“ გაგიგონია, „შერემეტოვი“ იცი, მელიქ-ალა გინახავს? როგორც გასახელბულ კაცს შეეფერება, ერთი „საწუთროს ჯამში“ არ ჩაუხედია, თორემ სხვა ყოველივე იცოდა და ნანახი ჰქონდა, თუმცა კი სუფრაზე ბოზბაშისა თუ არტალის ჯამში უფრო ხარბად იყურებოდა იმ დღეს, „მიწასთან დაბრუნებული“ უძღები შვილი.

— უჰ, თქვენი ჭირიმეთ! — დიდხმაობდა, კუნტრუშობდა იაგორა, სოფლელები კი ტკბილად მუსაიფობდნენ, უხაროდან ერთმანეთობა, გულახსნილობა. მალე კიდევაც მაგრად დაღვინიანდნენ. ღვინომოკიდებული იაგორა ქალაქურ ყაიდაზე ჭიკჭიკებდა:

— სულ ოთხი ფუთი ვართ! ექვსი მისხალი ენა გვაქვს! არ გავაფუჭოთ!

— მე რომ დილით შინიდან გამოვდივარ, ენას შაქარში ვავლებ, რომ ტკბილად ვილაპარაკო.

— ენავ, ტკბილად გაისარჯე! ხალხში რომ მივიდეთ, გავატკბილოთ, ვინც ჩვენთვის ტკბილ ენას ამუშავებს, ცოცხალი იყოს.

— ეჰ, სულ ხორციით ვართ გაფუჭებული! კაცი ვიყოთ, ამ პატარა ენით ვიყვნეთ!

— ეჰ, რა დრო იყო, დაი დად გვეკუთვნოდა, დათ მიგვიღია! დედა ყოფილა, „დედა“ დაგვიძახნია, ნათელ-მირონი რომ შუბლზე წაუსვიათ, იმათ ძვლებს ვენაცვალე!

იაგორა ჩარჩა სოფელში, დაბრუნების აღტაცებამ ნელ-ნელა გაიარა. სოფლის სინამდვილემ მალე გააცნო თავი, ვედარ გაისაძლისა, მძიმე გლეხური ცხოვრება სიცხესა თუ ტალახში ვერ აიტანა. დაიწყო ქალაქზე დარდიანობა. საღამოთი გადადგებოდა თბილისის მხრივ სოფლის ბექობზე, ვითომ ქალაქიდან მისი შუქი შორიდან უნდა დაენახა, თვალი მოეკრა.


— აგერ, აგერ მთაწმინდაზე შუქი აინთო, აჰა, სიონის ზარის ხმა მომესმის, — იძახოდა ღიმილით, თითქო შორეულ ტკბილ მოჩვენებას ესაუბრებო. სულ ქალაქზე ფიქრობდა. სადაც ეგულებოდნენ ძმაკაცები, მუშტრები, იგონებდა ვერისა და ორთაჭალის სალხინო სახლებს და გულზე მუშტს იბაგუნებდა. მაგრამ აღარც ჯანი მოსდევდა! აღარც წელი, აღარც ჯიბე, ვედარც გლეხურ ცხოვრებას მიუდგა. დარჩა უმწეო, გარიყული, მარტოდმარტო, ეული.

— ახ, ვერა ვძლებ უქალაქოდ, იქაურ სინათლეს ვენა-

ცვალე! კაციც ის არის, ვინც ქვაფენილი გამოიგონა! ვერა, ვერ ვიტან აქაურ ტალახს, აქაურ სიბნელეს! ქათმებთან ერთად როგორ დავიძინო? მარტო ვარ... მომწყინდა... შინ რა მინდა... თუ არა და ციხეში წავალ, იქ, ხალხში მაინც ვილაპარაკებ...

— როგორ გიკითხო, იაგორ?

— ვხმები, ვხმები ღალღას ტირიფივით! — ქალაქურად ოხუნჯობდა სევდიანი იაგორა და აქი კიდევ გადაჰყვა ამ ტირიფს... წინასწარ ერთი ბოთლი ჭაჭის არაყი დაეღია და თავი ჩამოეხრჩო სახლის წინ, სწორედ იმ ტირიფზე, რომელიც ძალზე უყვარდა მწვანეანობის გამო.



ხ ვ ე რ ი ა

ბორგი, უსმინარი, აღმართი-კაცი იყო ხვედია. ვის არ ახსოვს ჩვენ სოფელში, უკეთური, გულდორდიანი, ღვარძლა, ჭინჭულიანი, ენიდან შხამის მდენელი!

შესახედავდაც ძნელი იყო: დამშხალული, შეკვამლული, ჩაღრუბლული, თანაც წყალდასხმულ-ნაცრისფერი.

მოთმინებიდან გამოსული ძმა ეტყოდა: — კაცი ხარ, ქვაკაცი თუ ხერკინა, შე გულდაფშენეტილო?!

— რაო, დაგებეჯა ენის ხორცი განა? — მრისხანედ შეუძახებდა ხვედია ცოლს, თუ ორ სიტყვას გადააცდენდა საწყალი დედაკაცი.

— ღვიძლი ჩამიღბო ამ კაცის გულგამომხრავმა სიტყვებმა!

ხოკივით წამიჭერს ხოლმე ყელში! როგორც კალთაზე ნაკვერცხალი დაგეცეს და მაშინვე არ გადაადგდე, თორემ დაიწვები, ისე ჩემი ქმრის სიტყვებია — ჩიოდა უბანში ნინორე.

არავინ უყვარდა ხვედიას. მით უმეტეს ჩიტები! სძულდა ნიბლია-ბედურები. არც მათთვის იშურებდა გულის დამბოლავ სიტყვებს.

— რა ამბავი გაქვთ, სხვაგან ალაგი ვერ მონახეთ? — დილაობით შესძახებდა თავის ვენახში მოჟღივილე ჩიტებს და გაბეზრებული, გაშმაგებული მოჰგლეჯდა სარს, შესტყორცნიდა ჩიტებით დახუნძლულ ხეს და გარეკავდა ისე, რომ წამში ის არემარე უდაბნოსავით დამუნჯდებოდა.

ჩიტებზე მეტად ბავშვები სძულდა. როცა დედაჩემს რძე გაუშრა და მე უძუძურად დავრჩი ცოტა ხანს, მაშინ ხვედიას ცოლი ნინორე მაწოვებდა ძუძუს, ხვედიას შიშით, ფარულად.

როცა ხვედია შინ იყო ხოლმე, მე უწოვნელად მისტუმრებდნენ.

ერთხელ, ცივი ზამთრის საღამოს, შალში თბილად გახვეული მიმიყვანეს ხვედიას ცოლთან ძუძუს საწოვრად.

ხვედია თურმე ახტა-დახტა: რა დროს მაგის ხეტიალია, ამ შუალამისასო? ამ დროს აქ რა უნდა, დაეყვირა ჩემი მიმიყვანისათვის, თითქოს საქეიფოდ მივსულიყავ და არა წვეთი რძისათვის! ერთი სიტყვით, იმ ღამეს ურძეოდ დამარჩინა თურმე ბოროტმა ხვედიამ.

უმცროს ძმას ჩიტალას, საცოლედ შედღერებულს, რომელიც კარგ მომღერლად ითვლებოდა, ჩონგურის დაკვრასა და სიმღერას უშლიდა:

— რას ჩაუშტერდი ჩონგურს, ცოლი გინდა განა? ჯერ სარჩოს მოეკიდე, რა დროს ჩონგური და სიყვარულია? თუ არა და ქალი ხომ არა ხარ, რომ მღერი?!

ხვედია ღამურა კაცი იყო; როცა ღამე გაიწონებოდა, მაშინ ადგებოდა, შემოივლიდა თავის პატარა კარ-მიდამოს, ეზო-ბოსტანს, კალოს, ვენახს, სადაც იგი თვითმპყრობელადა გრძნობდა თავს.

— ეს ჩემია! — თან დაარტყამდა ფეხით მიწას, ჩაჰბღუოდა: ჩემი მამულია! ჩემი საკუთარია! — და მკერდით ზედ გადაეფარებოდა.

ხან უსაფრდებოდა უხილავს მტერსა თუ ქურდს, რომელიც, მისი წარმოდგენით, უთუოდ იქვე ბუჩქებთან თუ ღობესთან იყო მიმაღული, მისი საკუთრების წასართმევად.

ხვედია მზად იყო გამვლელ მგზავრისთვისაც კი ჩხუბი აეტეხა, იმდენად ეჭვიანი მესაკუთრე იყო სწყყინდა, ბრაზობდა თუ სხვა ვინმე გაივლიდა მის მიწაზე. მოსვენება არ იყო მისი გაუთავებელი ჩხუბისა და კივილისაგან.

— ერთი ხელის დადება მიჯნა გადაგიწევია, შე ქრისტეს ფეხის მომკმელო! — შეუყვირებდა უდანაშაულო მეზობელს და დატრიალდებოდა კეტი, კომბალი, მარგილი, ცელი თუ ცული! მისი ბორბლებისა და ყაყანისაგან მოსვენება არ იყო.


— რატომ არ დაწყნარდები შე საბრალოდ აშენებულო, შე შავმუჭა მიწავ, შავო მტვერო! — შესძახებდა მოთმინებიდან გამოსული ღეთისნიერი ნინორე, ოდესღაც ფერწითური, შოლტივით ქალი, ლალი, მხიარული, ახლა კი, ხვედიას ხელში ელდით ჩამომდნარი, მოხრილი, ჩამუშლული. ცოლი სულ იმის შიშში იყო, ან ახლა გამომაბავს ქმარი ცხენის ძუას, ან ახლაო!

ხარბმა ხვედიამ სიკვდილიც კი ადრე მისაკუთრა. საკვირ-
ველი იყო, ცოლი დასტიროდა ქმარს და თან გულში შვებას
გრძნობდა! რა დასამალია, ცოლმაც ამოისუნთქა, უბანმაც
და მთელმა სოფელმა, — მოვისვენეთო!

წინორე დასტიროდა: — აჰა, ეგეც შენი მიწა — სამი ად-
ლი მიწა! სულ მაგას ნატრულობდი, რათ გინდოდა შე უბედუ-
რო, რომ ყარყაში არ მოგწყინდა მაგ შავი მიწისთვის!

ხვედია კი იწვა გულზე ხელდაკრეფილი, თითქოს დიდად
კმაყოფილი, რომ ახლა საკუთარი მიწა დაეყრებოდა გულ-
მკერდზე... თითქოს ბედნიერებისათვის მიეგნო და მზად იყო
ორივე ხელით ჩაებღუჯა ის სამი ადლი მიწა, რომელიც ახლა
საკუთრებად ერგო და მის სამუდამო მფლობელობაში გადა-
დიოდა. მაგრამ სახის შენაცრულ ფერზე მაინც ეტყობოდა, რომ
ჯერ კიდევ ეშინოდა და ფრთხილობდა ვინმე უხილავი არ შე-
მეცილოსო! ალბათ ჯერ კიდევ არ ჰქონდა გუნება დამყუდ-
როებული.

ჩიტები კი მღეროდნენ, ჟლიოდნენ... ცა იყო ლურჯი...
ლურჯი...



ო რ ი შ ე მ ო ხ ე რ ვ ა

თუ კახეთის გზაზე გივლიათ, გეცოდინებათ, თბილისის სი-
ახლოვეს ლოჭინის ხევი

ახალ ხიდქვეშ. ლოჭინის ხევისწყალი მოწანწკარებს თავ-
მდაბლად, ქვიშაზე ტკბილად გადამაეჭლი. ზათხულის პაპანაქე-
ბაში ოდნაველა მოჩანს, დაჭრილი მტრედის ფრთის ბარტყუ-
ნივით ძლივსლა მიიგნებს გზას.

ამ წყალსაც ახსოვს ჩემი ბავშვობა!

ზემთ, პატარა სოფელში, რომელსაც კლდის წყარო ჰქვი-
ან, მამიდაჩემის განიერ მამულში ჩამოჩხრიალებდა, ჩამოციმ-
ციმებდა უნალვლოდ. მე კარგად მიცნობს ეს პატარა წყალი

ჰკითხეთ, მოგიყვებათ, თუ ჩემს ყრმობაში როგორ ვესტუმრებოდი ხოლმე მამიდავანთ! რა მოამაგე ბიძა მყავდა ნიკოლოზი, რა კარგი ტოლები მყავდნენ იმ სოფელში: საბედა, ავლია, არსენა, ზაზილა, ქეთე, მაისა, ჩიტოფეხა, ნიტრია, შოშია, ზეცურა, ლექსურა და ვინ მოსთვლის... ნიკოლოზის ძმას, გარსევანს — ისიც ხომ ნათესავად მომხვდებოდა, — ჩარხიანი წისქვილი ჰქონდა ზვარში. მბრუნავ ჩარხზე წყალი იმსხვრეოდა ალმასჩქერებდა. ჩამოვჯდებოდი ხოლმე წისქვილის გვერდით, დიდ გადაჩრდილულ კაკლის გრილოში და ვტკებობდი წყლის ჩქერალის ფრქვევით, თითქოს ჩარხზე ათასი ცისარტყელა ყოფილიყო დახვეული.

ერთ დღეს წისქვილი მოულოდნელად დაკეტილი დამხვდა. სიბერით დახვეწილი მეწისქვილე ჩალხია უეცრივ გარდაცვლილიყო, თითქოს მისძინებოდა ფქვილის ტომრებსა და საცალოებ შუა მიწოლილს.

ღრმა მოხუცს ბაღების თავი არა ჰქონდა, არ გვიკარებდა. გარსევანს მეტად შეენანა აჰაგდარი ჩალხია და საქელეხო პურდვინო შეაწია. კეთილი იყო გარსევანი, თუმცა, ხელმაგარი, ჯიქი. მე ძალზე ვუყვარდი და ხშირად გაზეთებს მაკითხებდა: ესიამოვნებოდა, რომ ისე პატარა თავისუფლად ვკითხულობდი წიგნსა თუ გაზეთს.

სწორედ ამაზე აღრე, სანამ კლდის წყაროში გადავიდოდი, დედაჩემმა ჩემი საყვარელი გნოლა ხარი გაყიდა. მოჯამაგირე უჩიოდა — უღელს ეურჩება, უარშიობსო! მე კი ძალზე მიყვარდა. ლამაზი იყო ჩვენი ხარი, გნოლისფერი, ლამაზთვალეობა, მეც ვუყვარდი გნოლას, კისერზე ვეკიდებოდი, ბალახს ვთავაზობდი. არც ერთ სხვა ხარში არ გავცვლიდი გნოლას, მაგ-

რამ რა მექნა მზვიდა მყიდველი, გახარებულმა აპეური გამოაბა, ჩასჭიდა ხელი წასაყვანად... და უცებ ჭიშკართან, გნოლა ხარმა შემომხედა ისეთი თვალებით, რომ კინაღამ იქვე არ გავიყინე. დღესაც კი მახსოვს გნოლას სამღურავიანი თვალები, გნოლას თვალის ღრუბელი...

იმ დღეებში სევდიანი ვიყავ, გნოლას გაშორებით აფორიაქებული... ერთხელ წისქვილს მივაშურე. წისქვილის კარები ღია დამხვდა. ჩარხი ისევ ტრიალებდა. ჩალხიას ნაცვლად ვინმე ახლად გადმობინადრებული მეწისქვილე დამხვდა, მე შეეკრთი და უკანვე უნდა გამოვბრუნებულიყავი, მაგრამ მან თვითონ დამინახა, დამიყვავა... გამეცნო...

წყნარი და სათნო მეჩვენა რაედენა, იმ წისქვილივით, იმ პატარა წყალივით, წისქვილს რომ ატრიალებდა; მაშინვე გული გადამიშალა... მეც ჩემი შეეჩივლე, გნოლა ხარის ამბავი, გულმოდგინედ მომისმინა; თვითონაც ცრემლი გადმოსცვივგა... გამიკვირდა... გავიდა ხანი, დავმეგობრდით.

რაედენაზე დაცინვით ამბობდნენ — ცის მეცნიერიაო, ვარსკვლავებს ანგარიშობსო, და მართლაც, არა ერთხელ მინახავს, როგორი გატაცებით შეჰყურებდა ხოლმე ვარსკვლავებით მოჭედნილ ცას...

— აი, ის ყუყუნა სამხიარულო ვარსკვლავი მიყვარს, ზღუჯა-ზღუჯა სხივებს რომ ჰყრის, ის მაცოცხლებს, — და ხელს გაიშვერდა გვირგვინიან ვარსკვლავისაკენ. — ის კი, მეორე, ჩემსავით მიბუუტული, გულმიმქრალი, არ მიყვარს, არა — ღიმილით იტყოდა. წისქვილის გვერდით, მწვანეზე წამოწოლილი ფლამარიონივით მისჩერებოდა ცას: იტაცებდა ვარსკვლავთა დაკამკამება.

— ვინ იცის. იქაც არის ქალი და კაცის იქაც არის ქალაქები; ვინ იცის, იქაც არის გადარეული სიმდიდრე თუ იქნებ სიღარიბით იქაც ქვას ლოკავს ადამიანი. იქნებ, იქ სიკვდილი არც არის, ვინ იცის! — დასძენდა დიდი ჭიჩუმის მერე.

— ხან მინდა სურვილი გავგზავნო; შევისხა ფრთები და გავფრინდე მზის დედასთან საჩივლელად!

— ვის უჩივლებ?

— ცხოვრებას, ბოროტ ადამიანებს, ბედს!

ეჰ, ვერ ვიპოვე ჩემი ვარსკვლავი!

საჩივარი კი მართლაც ბევრი ჰქონდა... სიტკბოიანი რაყდენა ბედისაგან დაჩაგრული იყო; ჯერ ცოლი მოკვდომოდა: მერე ომსა თუ ხეტიალში უპატრონოს თურმე ჭლექი შეჰპარვოდა. გაეგო, რომ სადღაც არსებობდა აბასთუმანი, რომლის სამკურნალო ჰაერი მოარჩენდა, მაგრამ აბასთუმანი მისთვის მიუწვდომელ ოცნებად რჩებოდა.

ერთ ხანს სცადა კიდევ თავის მოვლა. რძესა და კვერცხებს შეეწყო, მაგრამ სოფელში დაცინვა დაუწყეს, — იძულებული გახდა კვერცხი ფარულად ეყლაპა, სადმე ბუჩქნარში, ვენახის მიფარებულ ყურეში, ან თავის დაკეტილ ქოხში. მაგრამ სოფლის დამცინარ თვალს რა დაემალებოდა? მალე სულაც აკვეთა რძე და კვერცხი, დაცინვამაც გააგულისა.

— მაინც არაფერი მარგო...

...წისქვილის დახავსებული ჩარხის თვალი კი ცხოვრებასავით ტრიალებდა; ზედ ემსხვრეოდა ათი ათასი მარგალიტი... ნაღამურზე ცა ქათქათებდა ირმის ნახტომის აღმასური მტვერით და ვარსკვლავთა უმანკობით... რძედანღვრილ დამეში

მთვლემარე კაკლის ხეები და ვერხვები მოშამბნარულ ჩრდი-
ლებით ბინდს აძლიერებდნენ:

მთვარეო, მთვარის ნაღო,
გორის პირს მოდი მალეო,
ბნელ-გული გამიხარეო...

ლიღინებდა თავისთვის რაჟდენა... ჩვენ, პატარა გოგო-ბიჭები
ვუსმენდით.

თუ მზე ხარ დაბლა ჩამოდი.
მალა მთას რას ეფარები?

მეწისქვილე ათას რამეს გვიამბობდა. უწიგნო კაცი იყო,
მაგრამ წიგნებს მაკითხებდა, თითონ ღიმილით მისმენდა. ზოგი-
ერთ წიგნზე იტყოდა:

— არა, არა, მაგ წიგნში ის არა სწერია, რაც ჩემს გულს
უნდაო!

რაჟდენა ბევრის მნახველი იყო.

— ერთი, წისქვილის ყელში არ გამომივლია, თორემ და-
ნარჩენი ყველაფერი მინახავს ცხოვრებაში

და მართლაც რა არ ენახა? მარტო იაპონიის ომ-
ში ყოფნა რად უღირდა? ორჯერ იყო დაჭრილი ლიაოანთან
და პორტ-არტურთან.

— რა ყოფილა ომი, ნულარ მკითხავთ. მე რომ იქ გა-
ყუყუული ხალხი ვნახე, გაბრული მკლავები... თავის კენჩხო ქვი-
შაზე მეტი ეყარა, ნეტავ რა სამართალმა უნდა უშვე-
ლოს ჩვენს ხელმწიფეს,—ჩუმად იტყოდა, თან სიფრთხილით
აქეთ-იქით მიიხედავდა..—რას სჩადიან ეს ხელმწიფეები... რომ

ნახო მათი ნამხეცავი, ნაქნარი, ნადირიც კი არ იკადრებს! ზოგი სალდათი შავად, ქონივით დამდნარიყო მიწაზე. ძნელია საამბობლად...

ომიდან შინ მობრუნებულ რაყდენას, სახლის მაგიერ პარტახი დახვედრია. დედა გარდაცვლია; მამა არც ომში წასვლამდე ჰყოლია, ერთადერთი დაც სხვა სოფელში გათხოვილიყო. გამოჯარული, ნატიალევი სახლიდა დარჩენილიყო. ნაეზოვარში, ლობეზე ატოტებული თხა სჭამდა მონაგარ ხეხილს. მეზობლებმა სამახსოვროდ აჭრილი და მისთვის საგანგებოდ შენახული დედის ჭალარა დაახვედრეს.

მეორე დღეს, ნასალდათარს უნდა ეფიქრნა ცხოვრებაზე და მეზობლების თათბირით იგი ჩაღხიას მონაცვლე გახდა.

...დიდხანს უგდებდა ყურს რაყდენა ლელქაშის მუხიკას და ვერხნალას შრიალს:

— ვერხვისთანა შრიალი არა ხეს არ გამოუვა! — იტყოდა დარწმუნებით. ბუნების ამბები უხვად იცოდა. მეტად უყვარდა მზის მშვენიებით მოფენილი, უღრუბლო იაღნოს მთის აივანი მარტყოფის თავზე, ცივ-გომბორის სერები...

უხაროდა ბროლოსანი ლაყვარდი, ვარდნარი, თავაყრილი ყანა... მტევან-ოქროვანი ვაზი... ატმის ბრიალა კალათა...

მინდვრის თვითეული ყვავილისა და მცენარის სახელი იცოდა; ყველას ესაყვარლებოდა:

— აი, კოკროჭინა, ვარდკაჭაჭა, ოქროშენდა, წალიკა, ხაჭიქორა, ფურფუშელა, ღრინქოლა!

— აი ფამფარა, ყვავისკუდა, ჯორისძუთა, ძირტკბილა, ხვართქლა, შალგა, სოსანი, ღვია, სვია...

— ნეტა, რომელია მათში უკვდავების წამალი?

— ეს გორველა ვარო; ეს ავშანი ვარო; ეს აბზინდა ვარო!
თვალსაზრიანი იყო: პურის ცილა მასავით არავინ იცოდა.

— აგერ, ღობეზე წითლისჩიტა, კიდევ პატარა ჯიხოლა,
მისხლა, შიშიმქრალა! მასზე საწყალი არავინაა, ბუღე არ აუნ-
გროო!

უყვარდა კალიის მკამელი ტარბი, — ადამიანს ეხმარებო, წაბლია ხარი გლეხის ძმაო! ჭიანჭველის გორალას დააცქერ-
დებოდა: ერთ დღეს ცოცხლობს ჭიანჭველა და ექვსი თვის ცხოვრებისთვის ცდილობსო!

გულუბრყვილო შემოცქერა იცოდა — გამომცინარი თვა-
ლებით.

აჭრილი ვახის აკიდოს ჰკოცნიდა; თურაშაული ვაშლი შუ-
ქით გულს უნათებდა, ჭირნახულს აღმერთებდა. — ჭირნახული წმინდააო, მართლაც ჭირნახულიაო! ნიავეწრილზე პირსიცილი მოსდიოდა: — ეგრე შემოიქროლე ნიავეო, არ დაიდალო. ცოდ-
ვაა ადამიანი. ჩვენ რომ ახლა ამ ჩრდილში ვისვენებთ, რამდენი მუშაობს მზის გულზე! ძნა მოდის ჯარა-ჯარა, ზედ ოფლის წვიმა მოსწვიმს, რომ იცოდდე!

ხის ნაკოდი ეცოდებოდა...

— ყური მოიმახვილე, ყველა სულიერია მამ, მიწა რათ სტირის? არ გინახია მიწის ტირილი დილა ადრიან? ბალახი რომ ნამს გაუშვებს, ის მიწის ტირილია რა ატირებს — ჩვენი ცოდ-
ვა? თუ მზის ამოსვლა უხარია? შენ იცი, რომ ხემ და ქვამაც იცის დარდი? სიცილიც იცის დედამიწამ, — თეთრად რომ იცი-
ნის ხეხილი გაზაფხულზე, ყვავილით იცინის დედამიწა, ცა ვარსკვლავებით იცინის!

გულაღმა მოაჩერდებოდა ცაზე ირმის ნახტომს და მისი სა-

ნახაობით დამტკბარი, აღფრთოვანებული, იტყოდა: — ეს ირმის ნახტომი რომ არ იყოს, ცხოვრება ჩალად არ ეღირებოდაო!

...ოქროს საბადოს არ ეძებდა სხვასავით, ოქრომძივებით გაბრწყინებული კორდი, მდელი, ხევნარი თუ ელვარე ხილნარი მისი ოქროს საბადური იყო, მას ესაუბრებოდა ყოველდღიურად; მისი სიუხვე და უმანკოება იტაცებდა; წყლის ჩქრო უყვარდა, წყალცოტაობას ვერ იტანდა...

ცხოვრობდა ბუნების მფარველობით, სხვისი უმფარველო. გაკვირვებული იყო ყვავილიანი სამზეოს სიმდიდრითა და ადამიანის სიღარიბით! საიდან გაჩნდა ამ ელვარე მზეში ჭუჭყი ან სიღარიბე, როცა ჩემი სული ყვავილებშია გახვეულიო?

ძალზე უყვარდა ხევში მოსული „ქრისტეს ბალახა“. ქრისტეს სიყვარულის გამო თაყვანს სცემდა. გრძელი და ბრტყელი ფოთლები ჰქონდა ამ ბალახს. ფოთლებზე თურმე ქრისტეს ტირილი ეწერა და რაყდენაზე ამბობდნენ, იმ ფოთლებზე ქრისტეს ტირილს წიგნივით კითხულობსო!

მალე თითონ რაყდენას სატირლად გაუხდა საქმე: გაუფრთხილებლობით მარცხი მოუვიდა, უნებურად, წისქვილის ჩარხში ხელი მოაყოლა. ჩარხმა ხელი ჩაითრია. დიდხანს იავადმყოფა, სოფლის დედაკაცებმა სიკვდილს გადაარჩინეს სამკურნალო ბალახებითა და მალამოებით, გადარჩა, მაგრამ ხელი კი სამუდამოდ დაკარგა, გაუხმა...

ცოტა რომ მოიმელოვა, მოკრძალებით გარსევანს მოციქული მიუგზავნა, ზარალი შემიმსუბუქე, ლუკმის მათხოვრად ნუ გადამაქცევო! გარსევანმა გაიკმარა, — ჩემი რა ბრალია, თუ რა-

ყდენა ცას შეჰყურებდა, ვარსკვლავებს ითვლიდა და ხელი ჩარხში მოაყოლაო, და მეორეც, — მე თვითონ ვაპირებდი დავხმარებოდი, თხოვნა რად დამასწროვო, განა ასეთი გულქვა ვარო?!

მაშინ, სხვათა რჩევით, რაყდენამ უჩივლა. ახლა გარსევან-მა იმწვიტინა, როგორ თუ ჩივილი მკადრაო. ჯიბრზე დადგა.

გარსევანის სახეს სახლი ნაქონობით მართლაც ხეობის თვალი იყო: ავსებული ყანწი, დასხმული ჯამი! სახლს დოვლათის ნათელი ადგა; გარსევანი არ იყო ღვთის უბეში გაზრდილი, არც ოქროს არტახებში დაბადებული, მაგრამ თავის დროზე მეცადინე, საქმის გამრიგე, ახლა შეძენაზე გაჩერებული იყო; მეტი ხვეჭის ზრუნვაში აღარ იყო, როგორც უშვილძირო. რაც ქონება ჰქონდა, ისიც სხვას უნდა დარჩენოდა. ამიტომ მისი ცხოვრება უმეტესად ხელგაშლილ მასპინძლობაში მიდიოდა.

— ჭკვიანმა კაცმა სოფელი ააგო! — ასეთი სახელი ჰქონდა დავარდნილი გარსევანს. მაგრამ თვითონვე თავმომწონებით დასძენდა: „ჭკვიანის სიტყვას რეგვენის ყურში სძინავსო!“

— ხევრე და ხევრე! — ტვინგაფიცვებით იტყოდა — შესაწევარი უნდოდათ?! — იმუშაონ და ექნებათ! მე რათ მევალება, ყველა ვარჩინოო, რა ჩემზე იპოვეს ტაროსიო!

ორივეს მხრივ სამდურავი, გულკლება გამოჩნდა. სოფელი ორ ბანაკად გაიყო: რიგი მემამულეს ემხრობოდა, რიგი — რაყდენას. შეიქნა სამართალში რბენა, მოწმეების შოვნა...

ორი წლის შემდეგ რაყდენამ წააგო საქმე! იმ დილას სამჯერ გახურდა გარსევანის თონე, ცხვართან ერთად ნასუქარო დეკეულიც წამოაქციეს, ქათმები გაწყვიტეს, ქვევრს ახადეს...

ქამეს, სვეს, ილალობეს, იბობოქრეს... მესამე დღეს კენებით, ცხენფრენით წავიდნენ სტუმრები... ერთ კვირას მოუნდნენ გარსევანიანი სახლის დალაგებასა და პირვანდელ წესრიგში მოყვანას.

რაჟდენა აღარ მუშაობდა წისქვილში, მაგრამ წისქვილს ხშირად დახედავდა ხოლმე. დაჯდებოდა მწვანეზე და შორიდან ისე ესაყვარლებოდა. წისქვილში ახლა სხვა მუშაობდა.

ერთხელ მე და გარსევანი ვაშლის ქვეშ ვიჯექით. მე ახალ გაზეთს ვუკითხავდი, რადგან სათვალე დაქარგოდა. ზვარში ამოიარა რაჟდენამ და გარსევანმა თვალი შეჰკრა დაბეჩაებულს. შეეცოდა, გამარჯვებული კაცის გულკეთილობით მთხოვა: დაეწიე, დაუძახე, ტკბილ სიტყვას ვეტყვიო! — აკი გითხარით, კეთილი კაცი იყო გარსევანი. მეც გამიხარდა, დავეწიე, გეძახის-მეთქი აჩქარებული რაჟდენა წამით მობრუნდა, შედგა და ერთი ისეთი შემომხედა, იმ გნოლა ხარივით, გული კინალამ გადამიქანდა. მას მერე აღარ მინახავს...

პაგრამ დავინახავ თუ არა ლოჭინის წყალს, მაშინვე საწყალი რაჟდენა მომაგონდება ხოლმე! თითქოს ლოჭინის წყლის წყნარი ზვირთებიდან რაჟდენას სევდიანი ხმა მეძახისო. ამ ზვირთებიდან ხომ ჩემი ყრმობა მეციმციმება...

ვერა, ვერასოდეს ვერ დავივიწყებ რაჟდენას შემოხედვას, ისევე, როგორც დღემდე არ მასვენებს გნოლა ხარის თვალის ღრუბელი..



ს ა მ თ ო ს ა ბ ა ლ ა ხ ე

— ეხ, შვილიერება ჩემი დასრულდა! სამეშკვიდროდ ვაჟი არ შეყოლა! ცასა და ქვეყანაზე მარტო დავრჩი! დიდ გვარს, დიდებულს ღმერთმა შვილი არ მიბოძა. რა ვქნა, რომ ჩემს უკან არავინ რჩება ჩვენი დიდი გვარიდან! გვარია, განა მატყლია! ჭირს, განსაცდელს, შეწუხებას, ჭირდებულებას რაჲდენს შევებრძოლე, ისევ ღმერთს უნდა შეეწირო მადლობა! — ამბობდა ნამგალივით მოხრილი, თვალზე ნისლ-წაკრული ნათა-

ვადარი ყადორი რევოლუციის პირველ დღეებში და თან პირ-
ჯვარს იწერდა. — დიდება შენდა უფალო დაუსაწყისო! მაგ-
რამ ვინ შესცვლის ზენასუფევას?

— მითხარ ყმაწვილო, რომელი ერთი ვიჩივლო? გვა-
რის ამოწყვეტა, მხცოვანება თუ მამულიდან ცარიელათ და-
რჩომა? — ჩიოდა კომისრის კანცელარიის ზღურბლზე გვარის
უკანასკნელი შთამომავალი, გვარის დამბოლოვებელი ყადორი,
რომელიც ახლა უკანასკნელად თხოვნით მისულიყო კომისარ-
თან, რათა ნაკუთვნილარი საბალახე მთა უკან დაებრუნებინათ
საზრდოდ, სარჩომად... ცხენი იქვე, მარგილზე გამოება. ყვავე-
ბი და ყორნები სდარაჯობდნენ მოლოდინში თავადის რაშს...

ცხენიც მშვიერი იყო, ბატონიც! მსახური ბიჭი „შავბეწვა“
ლორისწველაშვილი გაჰქცეოდა. შინ აღარავინ ჰყავდა, გაციე-
ბული ოთახი ელოდა, იმასაც ართმევდნენ. ვერა და ვერ ჩა-
მომშორდა იმ დღეს დამკრთალი, შეშინებული, ნათავადარი ყა-
დორი, რომელიც უარით გამოისტუმრეს კანცელარიიდან, კი-
დეც უთხრეს, რომ მეორედ აღარ მისულიყო ამ სათხოვარზე.

სადილობის დრო იყო, დაბის დუქანში შევედით, შევიპა-
ტიყე. დუქნური სუფრა გაიშალა. ხორაგისა და ღვინის დანახ-
ვაზე ყადორი ცოტა მომხნევდა, მაგრამ თავის დონეზე აღარ
იყო: რაღა ვარ ეხლა, ცარიელი მათრახილა დამრჩა მთისა, ბა-
რისა და ტყის ნაცვლად!

არ დატება ჩემი წუთისოფელი, რა ვქნა? არსაქნელი არ იქ-
ნების! — და უცბად შეჭოკმანდა, — იქნებ ეს ქვეყანა კი-
დევ დამტკიცდეს? მაგრამ, ისეთია დღეს ქვეყნის გადასხევაყე-
ბა, გადავითარება, რომ ეს ქვეყანა მალე არ დამტკიცდება და
მე შიმშილით უნდა მოვკვდე! — ამბობდა ყადორი, — ასე მგო-

ნია თითქოს მკვდარი ვარ, თითქოს აღამიანდაც გაუქმებული ვარ! — და უეცრივ იკითხა: მაინც ვერ გამიგია რატომ არა-
ვინ მაძლევს საბალახეს?

— რევოლუცია მოხდა! — ვეტყვდი გულუბრყვილოდ.

— მერე ჩემმა მთამ, ჩემმა ბალახმა რა დააშავა? — ვერა
და ვერ გაეგო ბატონ ყადორს.

— მერე იცი, რა ბალახია?

— პაპის პაპაჩემი — შერმაზანი დარბაზბატონი მთელი კა-
ხუთის პატრონი ყოფილა და მე ერთი მთა აღარ მეკუთვნო-
დეს? და მისი ბალახი?

— პაპაჩემ ჯანზურაბს მეჯინიბე ცალკე ჰყვოლია, მეაბჯრე
და პირის მელვინე ცალკე და მე ამ ფამფარა ბალახის მეტს ხომ
არა ვთხოულობ?

— მამაჩემის ამილდაბარის სუფრაზე ყოველდღე თითო
ძროხა იკვლებოდა და მე სამთო საბალახოზე მეტს ხომ არა
ჯთხოვთ?

— აბა, მაშინ კაი ბიჭები ვიყავით, როცა დიდ ომებში, ჩვე-
ნი გვარის მედგარი ძახილი გაისმოდა: „დაჰკარ, დაჰკარი!“
სულ ჯორებით უზიდიათ ომიდან მოკვეთილი თათრის თავები!

— და მე ვისთვის რა დამიშავებია, ყველასათვის ძმა ვიყავ
და მეგობარი, ნათელ-მირონი, მეზობელი და გულის მოკეთე, ეს
რა ღროება მოდის! სინდისი დაიმარხა, ზრდილობა და პატივი-
სცემა გაჰქრა, მაშ საქართველოც ხომ დაიღუპა, მითხარ, ყმა-
წვილო, შენ გენაცვალე! — დაყინებულად მიცქეროდა ყადო-
რი და ჩემგან ელოდა თავისი სიტყვის დადასტურებას.

— პირახსნითა და გულახსნით მინდა გელაპარაკო: მე ბედს

ვემორჩილები, არ ვიტყვი: კბილი კბილის წილ! — დამდაბლებული ღიმილით მეუბნებოდა ყადორი — ან რას მეტყვის კარგს ადუღებული გუნება? მაგრამ გული მტკივა! მეც ხომ ძეხორციელი ვარ, მეც ხომ მინდა არსებობა?

გულს ახარებდა ნაწვიმარზე გულის მაცოცხლებელი გაზაფხულის წვეთები და აბრიალებული ცისარტყელა, ახლად აყვავებული ნუშისა და მსხლის ყვავილთა ფერფლით მომფრინავი ნიავი და ყადორის ნაღვლიანი სიტყვები ამ დროს ჩემს გულს არ ეგუებოდა.

ყადორი კი თავისას განაგრძობდა: ქვეყანას ოთხი რამ აკლია, ცას — კიბე, ზღვას — ხიდი, ჯორს — შვილი და კაცს — სამართალი წაიღეს ჩემი მამული! სამართალია? რომ მაგონდება ჩემი დიდი კაკლის ქალა, შიგ მზის წვერიც რომ ვერ გაატანდა ჩემი ურთხნალი ან ჩემი კორიდეთის ტყე! — რამდენ ირმის ჯოგს გადავყოლილვარ იქ, ან ჩემი მინდვრები, — რამდენ ჯეირნის ნახტომს გაუცდენივარ? ვაი მას, ვისაც ბუხრის წინ არაფერი აქვს მოსაგონებელი ახლა, ბუხარიც წამერთო, რა უღვთოებაა, ყმაწვილო კაცო, ამიხსენი, გამაგებინე! — ვის რა დავუშავე, რა წავუხდინე? გეფიცები, ყოველდღე ვიგონებ ჩემს ცოდვებს, რომ შეეინანო და ვერ მომიგონია და ახლა რად გადამხდა? ვისი გულისთვის? ორი ათასი წელიწადია, ჩემი გვარი თავადობდა რამდენი იყო ჩემი გვარისა — კაცი, ქალი! იქეიფეს, დრო გაატარეს, ყმები ჰყავდათ, მთა-ბარი ჰქონდათ, შეირგეს წუთისოფელი ზომაზე მეტად და ახლა ამისთანა საწყალ მოხუცის წელზე უნდა გადატყდეს ჯოხნი? მათი ცოდვები მე რათ უნდა ვზიდო, მე მართლმართომ? ცოდვა არა ვარ? სამართალია?

მერე რა ცოდვები მე მიმიძღვის, რა სისხლის მსმელი და მიწის დამარბეველი მე მნახეს? მხოლოდ ერთი ცოდვა არ მასვენებს, მოდი, ახლოს მოჯექი „ტკბილი გითხრა მწარისათვის“:

— ერთხელ, დიდმარხვას ძალიან ავად გავხდი. სულთ ვებრძოდი. საკვირველია, თან ამ ქვეყნად არ ვიყავ, თან სრული გონება მქონდა.

— მაზიარეთი ესლა წამოვიზმულიე და ჩემი ცოლის ტირილი შემომმესმა. გათანგულს ისეე ჩამეძინა. ვხედავ საიქიოა! ჯოჯოხეთის ნახეთქები. კუპრის ტბა. სამი კაცი დადგა ჩემს წინ. მოკლე ქართული კაბები ეცვათ, ხელში დავთრები ეჭირათ, ერთმა თქვა:

— მოიგონე, რა ცოდვა ჩაგიდენიაო! — მე ჭირის ოფლმა დამასხა, ძლივს მოვახსენე:

— არაფერი, შენი ჭირი...

— კარგად იფიქრე, ცოდვის შვილი ხარ თუ არა?

— დედის მუცლიდან, შენი ჭირი მე...

— არა, სწორედ უნდა გვითხრა, რა ცოდვა ჩაგიდენია.

— არაფერი შენი ჭირი...

— მაშ კარგი აქეთ წამოდექი, — ანიშნა ერთმა მათგანმა ვილაცას და უეცრად ჩვენი მეზობელი კი წამოდგა — სოსიკა თეთრ-სუდარაგადაცმული. სამი წლის მკვდარი იყო, მაინც გამეხარდა, მეზობელი რომ დავინახე.

— იცნობ ამას? — დამიძახა პირველმა.

— როგორ არ ვიცნობ?

თავჩაღუნული იდგა სოსიკა, ორივე ხელი გულზე დაეკრიფა.

— ახლა მოიგონე, რაც დაგიშავებია. — მითხრა სამოთხის კაცმა, მაშინ წამომავინდა...

ჰო, ერთხელ ზამთარში ტყე მქონდა შეკრული. ამბავი მომივიდა ტყესა გპარავნო. ავიღე და ტყიურ წველ. მივატანე თუ არა, ვხედავ სოსიკა — მასზე ღარიბი გლეხი არ იყო სოფელში — მოდის და ზურგით ჩემი ხეები მოაქვს.

გავცეცხლდი.

— არა გრცხვენია, სოსიკავ, შენგან ეგ მეკუთვნის? მომეცი წალდი! — დავეყვილე და წალდუნა წავართვი. ეგ იყო დეგ...

როდის ჩამიდენია სხვა ცოდვა? ან რალა ვქენი, არ ვიცი! აი, ეს ცოდვა მომავინეს სამოთხის კაცებმა.

სოსიკას რომ წალდი წავართვი, წამოვიღე და საბძელზე შევდე, მერე, კარგა ხნის მერე საბძელს რომ ჩალა გამოუცვალე, წალდიც ლელში ჩაიკარგა. ამასობაში სოსიკაც მოკვდა. შემოდგომის ერთ ქარიან დღეს, ქარმა საბძელს ლელი აჰხადა და წალდი ისევ ვიპოვე, სხვენზე შევდე.

— მიეცი წალდი სოსიკას და თავისუფალი ხარ! — ერთხმად წამოიძახეს სულთამხუთაეებმა.

გამომეღვიძა თუ არა, დავიძახე:

— წალდი!

ცოლმა ტირილი დაიწყო, ეგონა ყელი უნდა გამომეჭრა!

— რათ გინდა წალდი? — ჩამომიჯდა მეზობელი.

— ასე იყო, ასე... — ლულულუდით ვუამბე დასუსტებულმა. ზედ დატანებაზე სოსიკას ბიჭიც შემოვიდა.

— რა ამბავია, ნათლი, რათ გაგიგრძელდა ეგრე სატყივარი?

ვუამბე სიზმარი, წალდი ჩავაბარე... აი, ეს ცოდვა მომაგონეს სამოთხის კაცებმა! იქნებ, ამისათვისაც დავისაჯედღეს?

ერთხელ კიდევ ყურძენი მოვიპარე ბავშვობისას... სხვა რა ჩამიდენია? ჯიხვით, ჯამით მისევამს. მეზობელი მიყვარდა, ნუთუ არ ჩამეთვლება? — მოსთქვამდა ყადორი და თან წითელღვინოს ბრკეს აცლიდა... და უტბად შეშინებულმა თითქოს სხვისი ხმით წამოიძახა:

— მაშ, ორი ათასი წლის ცოდვა მარტო ჩემს წელზე რად უნდა გადატყდეს? ცოდო არა ვარ, მე მარტო? — გაკვირვებული მიყურებდა, ისე შემკრთალი, თითქოს საცაა მდულარე წყალში უნდა გადაუძახონო.

და სწორედ ამ დროს მედუქნემ სასწრაფოდ მოხურა, ჩაკეტა კარი და ფანჯარა. უეცრივ ცამ იელვა, მერე იდგრაღლა, კიდევ იდანდგარა და მცირე ტორტმანის შემდეგ შავ-ლურჯმა ღრუბლებმა უწითლესი წინწკლების ბურჯღლები გაპყარა. და ანაზღეულ, ჩქეფით წამოვიდა ნიაღვარი, დელგმა. მწუხრის მოშავფენებამ იმატა, სივრცე გაკუპრდა, ცისქცევა, უცნაური კრჩხიალი, ბაგუნი და ზრიალი აყრუებდა ყოველივეს.


და უტბად გაიზარდა შემზარავი, სიკვდილის ხმიანი წეწა, ლეწვა, — სეტყვა წამოვიდა, ახმაურდა ჭერი — კრამიტი თუ თუნუქი, ჯერ ხორხოშამ დაიწყო ხტუნაობა, მერე ნამდვილი ქვები აგორდა თითქოს... ბუნება ბობოქრობდა. ჩვენ ჭიანჭველებად ვიგრძენით თავი, ისე მცირედ გვეჩვენა ჩვენი ღონე ბუნების ძლიერებასთან.

ირეგვებოდა ყოველივე, იმსხვრეოდა. ღამე, ქარი, ნიაღვარი, შეერთებულნი იერიშით გადმოდიოდნენ და მოსპობით გვე-

ბუქრებოდნენ, რა უნდა გვექნა? რა ჰქნას კანთხელმა კანსი-
მაგრის მეტი?!

ყადორი კი ჭიქა ღვინოზე ისევ ჩიოდა ბედის უსამარ-
თლობას, თუ რატომ უნდა გადაეტანა მხოლოდ მას, მარტოდ
მარტოს — ორი ათასი წლის ცოდვა თავისი გვარისა და პასუ-
ხი ვერ მიეღო.

ირგვლივ ყველაფერი ილეწებოდა, ვის ეცალა ყადორის
ცოდვებისათვის?



მონუსი გუთნისდების სიკვირი

და წავდგე ჩემს მეუფესთან
ხელთანებული ცვილითა.
გ ა ჯ ა ფ შ ა ვ ე ლ ა

არავისზე ნაწყენი, არავის ნამტერალი არა ყოფილა გუთ-
ნისდედა ნინია. თუ ვინმე შემთხვევით აწყენინებდა, იტყოდა:
— რამდენი ადამის შვილი ჩამოდის ამ ქვეყანაზე, ათასი
ფერი და ფერადი ვის რას გაუგებ?

არასოდეს უნატრია სიმდიდრე, მხოლოდ თავისი პურის
ხვავით იყო მადლიერი.

— ყველა რომ მდიდარი იყოს დედამიწაზე, ლარიბი ვილამ მოიგონოს? — და ათქვირებულ ყანას რომ შეხედავდა, სასოებით წაიჩურჩულებდა:

— შენი მადლის ჳირიმე!

ოთხმოც წელს მიაღწია და არაფერი ასტკივებია. მეოთხმოცდაერთეში სისუსტე იგრძნო, მაგრამ სიკვდილისა არ ეშინოდა. თვითონ სიკვდილი არად მიაჩნდა. უფრო ეზარებოდა, ვიდრე ეშინოდა. ეზარებოდა, როგორც ნათბილარს ლოგინის მერე გარეთ გასვლა ბნელ ქარიშხლიან ღამეში.

— გამოთეთრებით რომ გითხრა, რა მოსაგონი იყო სიკვდილი?! — იტყოდა წყენით ნინია, როცა გულმძიმობას იგრძნობდა.

ბოლოს, აღმეებიდან შემონაქროლმა სიკვდილმა ნინიას სალამი მისცა, ჯერ გვერდით მოუჯდა, ცივად შეაყრუოლა, მერე ჩონჩხარა მკლავები შემოჰხვია და აღარ უშვებდა.

— მოიცა, მოიცა, სიკვდილო, შენი წვერ-უღვაშის გამოსვლასა!

ჯერ სიცილით ეხუმრებოდა ნინია სიკვდილს, ერთხელ-ორჯერ კიდევაც მაგრა შეუქაზუნა გულმოსულმა — რა ღროს ეგ არი, მომშორდიო! განგებ ღვინოც გადაჰკრა ლოგინში, — საესე ჯამი, რომ მტერს ავად არ ვეგონო, ხოლო სიკვდილს სათავისო!

კარის მეზობლებმა, მეხრეებმა, მისი გუთნისდედობით გაწვრთნილებმა, ინახულეს, გულის გადასაყოლებელი ამბებიც უამბეს, მაგრამ ჯანი უსუსტდებოდა, სული კი არა ტყდებოდა.

— ალალ-მართალი, გულგაწმენდილი მივდივარ წუთი-

სოფლიდან, არავის არას ვემართლებოდი, არავისი საყვედური არ მიმდევს... პურის მომყვანი ვიყავი ამ ქვეყნად, აი, ეს გაფხრეწილი პერანგი მიმყვება მხოლოდ! ბევრი მინდორი გადამიშავებია. და ახლა... სად უნდა წავიდე, სად გავნიავდე?—წამოიწია და მუდარით ითხოვა:

— მინდორს გადამახედეთ!

ორივე შვილი მხარში შეუდგა და მოწიწებით აივანზე გაიყვანეს.

ქვემოთ, ვენახებში გადაფანტული სოფელი მოჩანდა, შორს, ლურჯ-ლილისფრად დაბურული მთები, ზედ შავად შელანძული ციხის ნაშალი, კლდიდან ქვაკიბე რომ ჩამოჰყვებოდა და ძირს გაშლილი სავსე მინდორი, ქსნისა და არაგვს შუა გადაჰკიმული... აფერებულ ყანებზე დაუდგრომელი ნიავი შლიდა, აფენდა და აქანებდა მზეკაბას. თავთავი ჩუმად შრიალებდა.

აგერ წილკანი... ჯვართმუხა... იდგა ღვთაებრივი სიჩუმე... ბუნება შეერთხმებულიყო... მზე ჩადიოდა... ბროლის ნიავი შეეთამაშა მომაკვდავ გუთნისდედას, შუბლზე მიელამუნა, შეეგრილა, თითქოს მის სპეტაკ თმის კულულს მოეხვია და აკოცაო!

ნინიამ ზეგარდიდან დაჰხედა სავსე მინდორს, ხარბად თვალი შემოატარა. გულქქერით შესისყვარლა ამრეშებული ყანები, ამოხეთქილი ბურღალი ბალახი...

ტკბილმა მოგონებამ გული-გულში გაუარა და გაეღიმა...

ოცი წლისამ აიღო გუთანი ხელში, მაშ, სამოცი წელი სჭერია! უხნავს, ხალხი დაუპურებია...

— ახლა, ნაცარმტვერი უნდა გავხდე?!

სადღაც, თითქოს შემოესმა სევდიანი ოროველას ზუზუნი და თვალზე ცრემლი მოეგუბა. მზე ბუდისაკენ მიდიოდა... შეიმცნაურა... მიხვდა ყოველივეს...

შვილებმა მხრებში უეცარი სიძიმე იგრძნეს. მამას შეჰხედეს. ბუნებაში გადამდნარაყო უკვე ნინია, სული დაელია...

მზე ჩავიდა დიდებულებით, მიებარა ღამის მღვიმეს. ამკვირვალდა მშობლიური კამკამა ცა, ლურჯად მინაქრული, ღამის იით აყვავებული...

გამოჩნდა რკალი ახალი მთვარისა... ვერცხლის ლუმბა...



ჩ ი რ ი კ ი დ ა ჩ ი კ ო ზ ე დ ა

განა არ იყვნენ ჩვენს დაბაში განთქმული ადამიანები? გინდაც, შაბაშელა — სოფლის დიაკვანი, პატრონი ულამაზესი. ახალგაზრდა ცოლის ზიზილასი. როცა ზიზილა სადღესასწაულოდ ქართულ კაბაში მოირთვებოდა, დიაკვანი ორივე ხელს გაშლიდა ცოლის სილამაზით გაკვირვებული და აღტაცებით შეჰკლალაღებდა: „დაფარნა ცანი მშვენიერებამან შენმან და ქებითა შენითა აზავსო ქვეყანა! შე კურთხეულის შვილო, რამ გაგაჩინა ეგრე ლამაზი?“

კიდევ? მოხუცი სამხედრო, გადაყრუებული, გადაშტერებული, „გიტარა-მაიორი“. ოდესღაც სიძღერა ჰყვარებოდა, ახლა კი, ხეზედ ამოსულ სოკოს აბედივით გამომშრალს ყურში ჩაძახილიც ძლივს ესმოდა.

— ბევრი მათრია, მაგრამ მეც ძაღლის კუდივით ვითრიე წუთისოფელიო! — ნულნულით კვებულობდა და ხველებ-ხველებით ხითხითებდა.

შემდეგ: ჰამპურა ჰამაპურიძე, რომელმაც ჰამა იცოდა სახაძლეოზე და უყვარდა ყანწიანობა.

ჰამპურას საათობით შეეძლო ემსჯელა, თუ რა სჯობია — ორაგული, მურა კალმანი, თუ მურწა ვაზის ფოთოლზე? რა უგემრიელესია? — ზუთხი, თართი, თუ ლოქო ძმრიან ქინძში? ქათმის ჩიხირთმა თუ ბატკნის ბოზართმა. ხონჩით პური და მარილი, ხახალზე მწვანილეული, კიტრი, ყველი, ცხვრისთავი, ლურჯი კაბუეტები, მწვადი... ახ!.. მოყუდებული ჩარექა!..

— მაშ, ამ წითელ ღვინოში მზის მადლი არ ინახება? მაშ, რათ არის ნაკურთხი ზედაზე?!

სულ მუდამ ღვინის კაპი სწყუროდა. შეყუენყრუკდებოდა, მერე დუქნიდან ფრატა-ფრუტით მოდიოდა.

— გემრიელი კერძი და ძლიერი ღვინო. მადით სჰამე, გულით დალიე, მხიარულად იცინე! — ასეთი იყო ჰამპურა ჰამაპურიძის თუ ძვალიყლაპიაშვილის აღთქმა.

თევზეულობის დიდ თაყვანისმცემელს, სალაპარაკოდ უფრო სალიანის თევზეულობა ჰქონდა — კარგად გამოსული შამაია, ახალი ქვირითი და წითელი ზიზილალა! ეს იყო მისი ფიქრი და საგონებარის

კიდევ ვინ იყვნენ? — თოთომა, ხატს რომ შეწირულ ფულებს ჰპარავდა ნიშიდან!

მელუქნე „ჩარირანა“, — მის ღუქანში ხშირად შეგხვდებოდა თამადა, ხელში ყანწით, — პეტრე ერქვა, რატომღაც პავლეს ეძახდნენ: მოლაყბის ყბა ჰქონდა.

„პერიგიდი“, რომელზედაც იტყოდნენ: ეშმაკმა რომ სიარული დაიწყო, ფეხის ადგმა მაგან ასწავლაო!

კონდრო — თვალვიწრო და წუწკი, ძუნწი. ღამ-ღამ, საათის „მიატნიკს“ ჩამოხსნიდა, არ გაცვდესო! განჯინა მუდამ დაკეტილი ჰქონდა, თუმცა, შიგ ერთი თეფში იღო, ისიც შუაზე გადამტვრეული და პავთულით შეკრული.

პროვიზორი ანთა, რომელმაც მეხუთე ღღეს ამოაგდო თავისი ფეხსაცმლიდან შიგ ჩამძვრალი, მოგუდული თავი, მანამდე სულაც ვერ გაეგო და ეს ამბავი საკვეხურად ჰქონდა, როგორც რამ საგმირო! პროვიზორს დიდი ფეხები ჰქონდა და კალოშებს ვარშავიდან იწერდა, რადგან მისი ფეხის ზომის შონვა ჩვენში არ შეიძლებოდა.

და კიდევ ვინ? როგორ თუ ვინ? — ჩემი ორი კარის მეზობელი — ჩირიკი და ჩიკოტელა!

ბცით კი, რა არის ჩირიკი? ხომ გაგიგონიათ, — ყველა მიწვება, მოწვება, ჩირიკი ხეზე გაწვება!

ჩირიკი და ჩიკოტელა სიღარიბის გამო სხვის მამაპაპურ კოშკში შეხიზნულიყვნენ. როცა ერთი ოჯახის ქოთანში ლობიო ჩუხჩუხებდა, მისი სანელი ქინძის სურნელი მეორეს მისდიოდა სუფრაზე. ჩიკოტელა ჩირიკის მადლა ცხოვრობდა კოშკში, ჩირიკი — ქვემოში.

ჩირიკი ყველაზე მოხერხებულია. ჩვენი ჩირიკიც, მართლა, ბელაური კაცი იყო!

ჩირიკის ერთადერთ ვაჟს კიკრიკიკო ერქვა. გადმოვდგებოდით ბალები სოფლის ბეჭობზე, დაკვიმავდით ყელის ძაფებს და დავიძახებდით: „კიკრიკიკოოოო!“ მკვირცხლი ბიჭი იყო, ხელგამომავალი, მოხატრებული.

თავგზიანი ჩირიკი ძალზე მშრომელი იყო, უმეტესობის მუშაკი, სათხოვარზე უარს არ იტყოდა. ცისკრიდან ბინდამდის მუშაობდა და იძახოდა: ღმერთო, შენი ამაგი იყოსო.

ჩირიკზე იტყოდნენ: ისეთია, სადაც ნემსს შესდებს, სახნისს გამოიღებსო! ჩოხის კონკში გახვეული შრომობდა... ხელდაკორძილი, ჯაფის კაცი, მაინც უღარიბესი იყო. შემატებაგადიდებაზე სულაც არა ზრუნავდა, მღღევარ ლუქმისთვის იბრძოდა. თავდაბალი იყო, მაგრამ არავის დაეჩაგვრინებოდა: — უსამართლობას ნუ მიზამ, შენი ჭირიმე, შესაწევარს კი არა გთხოვო, სანამდე გავიხარებდეთ, სანამ ერთმანეთს ვხედავდეთო!

ერთი ბუდრუგანა ვენახი ჰქონდა, ორიოდე ვაზი ედგა. ერთთავად ვაზებში ტრიალებდა, ვაზებს მტლედ შემოდებულნი: ხან სარს უდგამდა, ხან ჰფურჩნიდა, ხან ჰყელავდა; ხან ვაზის ძირს ბალახს აცლიდა, ასუფთავებდა, აფხვიერებდა, შაბიამანს ასხამდა, გოგირდს აყრიდა, ხან რწყავდა, ხან ყარაულობდა. ვაზი კი არა, ვაზის კაპწალებიც კი უყვარდა, — ვაზის ძაფები... ვაზს ეხვეოდა, ჰკოცნიდა. თუ ვენახში ესტუმრებოდი, ხახალით მოგეგებებოდა — მებალის ნობათით. ახალახალი თარფეული, დილის ცვარმომცვერეული ხილი თვალს

იტაცებდა. ვაზებში ხილის ხეები ჰქონდა ჩარიგებული, როგორც ძველად იცოდნენ.

სალამობით, ვენახიდან რომ შინისკენ გასწევდა, ჩვენი სახლის წინ, შარაზე უნდა ჩაეელო. მკლავზე, ვენახში გამოთიბული, გამომარგლილი რძიანა ღიჟა ბალახი ეწყო მუდამ.

ვენახიდან დაბრუნებული ჩირიკი ცოლს მხიარულად შესძახებდა:

— გაიხარე, ვაზმა რქა ცისაკენ ასწია! რა მსხვილ მტევანს უჩანს პირი! ყორნებივით ჩამოსხდებიან ვაზებზე შავი საფერავის მტევნები!

ჩირიკის საამაყო მისი ჩავაშლებული ცხენი იყო. სხვა საქონელი არა ჰყოლია.

ღარიბი იყო, მაგრამ მხიარული, ხუმარი, პირსიცილიანი, დიდად სალმიანი.

— ირემმა ირემს ბალახი მიუშვირაო, განა თუ გაკლიაო! შეიძლება, ღარიბები ვიყვნეთო ბალახზე, მაგრამ მდიდრები უნდა ვიყვნეთ სალამზე! ქართველი კაცის ყველაზე დიდი სიმდიდრე სალამიაო! — და შეხვედრისას დაგასწრებდა: სალამი, მამიშენის მზეს, სალამი! მადლი და მშვიდობა!

— რა ვუყოთ, რომ ძროხა არა მყავს? მეწველი ირმები სულ მე არ გავუშვი ტყეში? ერთი რო დავუძახო, მაშინვე ჩემს კარებზე მოქუჩდებიან! — იტყოდა ყბაშეთეთრებული ჩირიკი.

შებინდებისას, ჰასოფლო ნახირს დახვდებოდა შარაგზაზე, მითომ შინ თავისი ხარ-ძროხა უნდა წაესხა ისე, როგორც სხვა გლეხებს მიჰყავდათ სალამობით. სოფლის ორღობეში ცარიელ ხელებს იქნევდა, ნახირზე თვალმიმავალი:

— აქეთ გამოდით, ჯვარელა, მირეშა, ბულია, შავთვალავ! ფრთხილად გამოიარეთ, მარცვალა, ღვინია, ორბია, შინდავ, ლაღავ, ჩემო ნახირო, გამოდი! ეზოში ვაზი კი არ დამიღეწო, წამყენი არ გამიფუჭო, სიმინდი არ დამიზიანო!

— გამოდი, დი-დო, დემფილავ, ჭურჭელი არ დამიმტვრიო! — თან ჰაერში ხელებს ატრიალებდა, თითქოს აღარ იცოდა, რომელ ერთისთვის მოევლო.

— გამოდით, მოიწველენით, ტაგანა მზად არის! — და არც ეცინებოდა. თავისი სიტყვისა თვითონვე სჯეროდა.

ეზოში შესული დაიძახებდა: — დედაკაცო, საწველელი გამოიტანე, ძროხა მოწველე! — ცოლი თუ გუნებაზე იყო, გაიღიმებდა, თუ არა და, აკვნესებული იტყოდა: ნეტავი შენ, მაგისი გული გაქვს და ბავშვები არ გეცოდება, ასე ადრიან ჩაწვენენ უქმელებიო! ჩირიკს ცოლი ძალიან უყვარდა, შვილებზე მზე ამოსდიოდა: — კიდევაც დავიცემ დანას, თუ ჩემ შვილებს მოჰშივათო! მაგრამ... პური მუდამ გაზაფხულზე უთავდებოდათ, ოდოჲდერს სჭამდნენ ანუ ნედლ თავთავს, ხუხავდნენ ცეცხლზე და ისე გადიოდნენ იოლას.

— დედი, პური, პური! — ხშირად შესძახებდნენ ბალები დედას.

— განა მე პური მქვიან, თქვე გასაწყვეტლებო?! — შერისხავდა დამშეული დედა.

თუ ჩირიკი სრული, სავსე კაცი იყო, შავი მომზო უღვაშებით, მუხლადი, ჩიკოტელა ქოსა იყო და თანაც გრძელი, ყინულის ანჩხარივით გამხმარი, გამხდარი, გაყინწული, ჯოყარივით ცრიატი, წეროს მიჰგავდა. წოპწოპა ქუდი ეხურა.

ჩიკოტელა უსალმო, ყომრალი, ცადაღრუბლული კაცი

იყო, გულაკაცი, მზვობარბი, თითქოს, ქვეყნის ტვირთი მისთვის აუქიდნიათო. ავღრიან დღეს უგაედა თავ-პირი. სევდიანი იყო ციხის ნაშალივით. მუდამ უქმაყოფილო, — ხან წვიმას უჩიოდა, ხან უწვიმრობას, ხან ცოლს, ხან ცოლის ნათესავებს და უფრორე მეზობლებს და ყველაზე მეტს კი ჩირიკს. უთმობელი იყო. ჩანაბასრი სიტყვა იცოდა, არ ესმოდა, რომ ავი სიტყვა — ზამთარია, ტკბილი სიტყვა — ზაფხული. ხელმოკერილიც იყო: ფეტვი არ გაჰვარდება ხელიდანო. ერთი სიტყვით, ნათლიადაც არავინ წაიყვანა.

საკვირველია, მის ეზოში, ხეხილი ხეხილს ეხვეოდა, ტოტი ტოტს, ყვაილი—ყვაილს, ჩიკოტელას კი მეზობლები სძულდა, სძულდა უფრო კი ჩირიკი, — მოსისხლე მტრად მიაჩნდა; ამბობდნენ — შურიტო, სხვისი ნაშრომი ჰშურდა, თვითონ კი უქნარა იყო, დღეობებისა და უქმედღეების მოტრფიალე. უსაქნარო, თავაყრილი კაცი იყო ჩიკოტელა. სოფელში სათვალსეიროთ გავლა უყვარდა, ზამთრობით კი, კიწაწი შეშა არა ჰქონდა.

დიდი ზარმაცი იყო და დიდი მორწმუნეც. არც ერთ საუფლო დღეს არ გამოსტოვებდა. უქმე დღეები კი მაშინ ბევრი იყო. ან რა გასამტყუნარი იყო მორწმუნე ჩიკოტელა, მაგალითად. მაისში? ოთხ მაისს, — „ჩიტის უქმე“ იყო. მერე „შვიდმაისობა“ — საგაზაფხულო გუთნების გატანა მინდორში და საღვთოები, იმავე დღეებში „ზღუდრობა“ იცოდა, პარასკევს, ცალკე დღეობა იყო „კოხიაობა“ სეტყვის ასაცილებლად. მერე სამძო სუფრა „არიფანა“ და ამნაირად, მაისი სულ დროსტარებაში გადიოდა.

ახლაც არ ვიცი, რით იყო გამოწვეული მაისში ხშირი

დღესასწაული და ნადიმობა. მაგრამ ბუნებაც ხელს უწყობდა. ჩვენს ეზოში ვერ გაივლიდი, ისე იყო მიმობნეული ვარდისა, ზამბახისა და იასამანის სურნელი. დაბადაგებული ცაცხვები, გადათაფლული აკაციები... ზედ ფშატის ყვავილის დამათრობელი სურნელი რო დაერთვოდა! მოდი ამ ღროს და ქედი წახარე სამუშაოდ. განა მართალი არ იყო უმადლო ჩიკოტელა?

მხიარულ ჩირიკს კი არც ერთი დღე ნადიმისთვის აზ ეცალა, ქედწახრილი მუშაობდა. შრომაში დამტკბარი, კეთილი იყო.

ჩიკოტელას ერთადერთი მურიანი გოგო ჰყავდა თეთრუა. შეიძლება ისიც იყო ჩიკოტელას სიზარმაცის მიზეზი, რომ ოჯახში ბევრი შესანახი არა ჰყავდა.

ერთხელ სიზმრად ენახა, რომ თავისი სახლის კარაპანში მარილის ქვის ყორეები ელაგა, ერბო, ყველი, ხიზილალა გუდებით და გამოფხიზლებული თურმე ხელის ფათურით ეძებდა, სიზმრად ნანახ სარჩოს. თითქოსდა ვიღაცამ ააღაგა, გაიტანა, მოჰპარა. დიდხანს თვალეებზე ხელს იფარავდა, ვითომც სიზმარი განეგრძო.

წარსულზე ოცნებითაც სცხოვრობდა ჩიკოტელა.

სოფლის სალაყოზზე აზღაპრებდა წარსულს თავისი ოჯახისას, რომელიც, ოდესღაც ისე შეძლებული ყოფილა, რომ ყმებიც კი ჰყოლია. შეიძლება, ბევრმა არც იცოდეს, რომ ძველად, ჩვენში, ყმიანი გლეხებიც ყოფილან!

— გაგიგონიათ, რა შეძლებული ყოფილა ჩემი მამა-პაპა გლეხობის კვალობაზე? მკვიდროვანი ოჯახი, კლდეზე მტკიცე, ქონებით აღმომდინარე, ნაშრომი, ნაწაღმართევი. ძველადი მოსავალი, ხორავი, საზრდო, პური, სათესლედ ცალკე გადარ-

ჩეული. ბელელი, ჭურ-მარანი—საესე! პაპისპაპა „ფეხდიდას“ სამოცი მარტო ნიკორა ზაქი დაუდიოდა, საკუთარი გუთნიდე-და, საკუთარი მეზერე და მწყემსი!

ეგრე კი ნუ მიყურებთ, ბიჭებო! ყოველივე სახლში გექონია: ხამი ტილო, მერდინი, ფარდაგი და ჯეჯიმი ზომ სულ სახლში იქსოვებოდა. საპონსაც კი შინ ვხარშავდით. ზეთსაც შინ ვხდიდით. არ გინახავს, ჩვენს ეზოში გელაზები? აღზევანშიც დავდენილვართ მარილზე. სალიანშიც თევზეულობაზე. ეგრე კი ნუ მიყურებთ, ბიჭებო! ჩვენს დერეფანში მარილის ქვის ყორეები კოშკებად მდგარა, მარნის ბაქანზე ხიზილალისა, ყველ-ერბოს სავსე გულები ელაგა!

— გინდ დიდდა თავთუხას ჰკითხეთ! ეგ რომ პატარძალი მოეყვანათ, პაპაჩემს მაგის მყარებისათვის სულ ხიზილალა უჭმევია თავმობმული ჯამებით. ეგრე კი ნუ მიყურებთ, ბიჭებო, ჩვენი ცხოვრება სულ დულდა და გადმოდდიოდა... ჩვენ, ჩვენი წილი სიმდიდრე გამოვიარეთ, დავხარჯეთ, არ გაუფრთხილდით და მიტომ ახლა არა გვაქვს არაფერი! მერე რა უყოთ... ეგრე კი ნუ მიყურებთ... და!

მართალი იყო ჩიკოტელა თუ არა, არავინ იცოდა, დახავსებული ყრუ დედაბერი თავთუხა ასწლისაზე მეტისა იყო. დრო დააბერა ბებომ. მოწმედ ვერ გამოდგებოდა, სხვა კი არავინ ლაპარაკობდა ჩიკოტელას ოჯახის ძველ სიმდიდრეზე, სხვას რა ედარდებოდა, ჩიკოტელას მდიდარი წარსული? ნათქვამია: სხვას სხვისი მკვდარი მძინარე ეგონაო!

— სიზმართა შუაა! — ელიმებოდათ მეზობლებს. თანაც სჯეროდათ ჩიკოტელას ნაუბარი. მაინც ჩიკოტელას მთავარი სასაუბრო საგანი — ჩირიკი იყო და მასთან დავა. ჩირიკი ჩემი მამულის მოჩემარიო!

— გულზე ისეთი ცეცხლი მიკიდია, როგორც ჩიბუხს! გამაშვარა ჩირიკის ვენახმა, საზღვრების გადმოწევამ მამულის სარჩელმა! ვერ დავჩუმდები, უნდა ვებრძოლო, კირი არ წავა უჭიროდ, თუ კირის დედა მთელია. ცეცხლს წყალი დროზე უნდა მიუღვარო!

სად ეცალა საწყალ ჩირიკს ჩხუბისათვის, ან რას ემართლებოდნენ? მაგრამ შური უძლეველია. ღვარძლსა და შურს დაეპყრო ჩიკოტელას გული.

უწინ, როგორც ამბობენ, ღვარძლი არა ყოფილა. ერთხელ, ერთ კაცს მეზობლის კალოზე გადაუვლია, შეუხედა გორად დამდგარ პურის ხვავისათვის, მოსწონებია, ერთი მუჭა ხორბალი კიდევ აუღია და გულში ღვარძლიანი ფიჭვი გაუვლია, ხორბალი ისევ დაუყრია ხვავზე, მაგრამ ღვარძლად ქცეულა, მას აქეთ ღვარძლი გამრავლდა პურში და ადამიანის გულშიცო!

ჩიკოტელას დავა ჩირიკთან ვენახის მიჯნა-საზღვარი იყო, ნაპირყურეს ედავებოდა: — ჩვენი მამულები ტოლი და ბარდიბარია, მაგრამ თვალდათვალ მტაცებს, სამეტოში წილს იღებს, შემაზავთა, დანის ყელზე მიმიყვანა! გველის ფხაში გავძვრები და არ შევარჩენო! — ყვიროდა მეხთამტეხი სიტყვებით.

ჩირიკი სულ უდანაშაულო იყო და, რასაც ჩიკოტელა აბრალებდა, სიზმრადაც არ მოლანდებია! ჩხუბის დროს ჩიკოტელა გამოიტანდა შინდის ჯოხზე დახვეულ, გაყვითლებულ გრანისიგელს, ანუ, როგორც თვითონ ეძახდენ, „წიგნსა და დამტკიცებას“, ჰაერში ატრიალებდა და რისხვეული გაჰკიოდა: — აქა სწერია, ჩემი. ნამდვილი მიჯნა და საზღვარი!

ნასყიდობის სიგელში მართლაც ეწერა მამულის საზღვრები: „ზეით, რუისპირზე ორი ვერხვია, — სამძღვარი ის არის, ქვეით — პატარა მუხაა. ქვემოთ კიდევ — დიდი ნიგვზები. იმას ქვევით, სამი ტოტი თუთის ძირია. სამძღვრები ეს არის. ამის ჩამოსწორ, წყლის პირას, კიდევ ორი ვერხვია ტყუბათო“.

მოდით ახლა და იპოვეთ ორასი წლის მერე ის მაშინდელი ორი ვერხვი, ის პატარა მუხა, ის დიდი ნიგვზები, ის თუთის ძირები და ის ტყუპი ვერხვი! ეჰ, მათი მტვერთა მტვერიც კი აღარ იყო ამ ქვეყნად, სიგელი ხომ ერეკლე მეფის დროს იყო დაწერილი! სიგელის გულუბრყვილო დამწერლებმა თავისდაუნებურად, ეს ორი მეზობელი ორასი წლის შემდეგ წაჰკიდეს ერთმანეთს და თუმცა მათივე სიტყვებით, იგი სიგელი იყო „უმანკო, უმიზნო“, „უცვლელი, უსარჩლელი, უქცეველი, მოუშლელი, სამემკვიდრო, საბოლოო“, მაგრამ სწორედ ეს ბრიყვი სიგელი გახდა მათი შფოთის დედა. ხომ ამ სიგელმა შესაზღვრა მათი ვენახები?..

სულ ამ ვენახის მიჯნისათვის ეჭინჭრებოდა ჩირიკს გულნამცეცა ჩიკოტელა. ბოროტ გზასაც არ ერიდებოდა. იმდენი ქნა, დიდი კაკლის ხე, რომლის ჩრდილი ჩიკოტელას მამულში გადადიოდა, ჩხუბისა და ყარყაშისაგან გაბეზრებულ ჩირიკს მთლადაც მოაჭრევინა.

ერთხელ, მის ვენახში შემთხვევით გადასული დადღღებულ ვარია ტაბიკით მოუკლა. ერთხელაც, მიჯნას აქეთ წამოწვდილი ჩირიკის ბუდეშურის ხუთი ვაზი წალდით გადაკაფა, როგორ თუ სხვისი ვაზის რტო შეეხო მის წილკერძს!

ბევრჯერ კიდევაც გადასწყვიტა ჭირდებულმა ჩირიკმა ვენახის გაყიდვა ან სხვაგან გადასახლება, მაგრამ როცა ვენახის

მუშტარი მოუვიდოდა, თვალზე ცრემლი მოადგებოდა და საკუთარი ოფლით ნაპოხი მამული არ ეთმობოდა.

— რა ვქნა, რა გადამეშარა. რა მაქვს სხვისი დასაჩემი? ღმერთო, რა გასაჩენი იყო ეს ჩემი საქმის დამცარავი — ეს მეჩახმახე, ონავარი?

ჩირიკის ძირიანად ამოვარდნის ნატრული იყო ჩიკოტელა.

— ზმმ! — შეზმუვლებდა ზოგჯერ მტრის სიცოცხლით შეძრწუნებული.

— ზმმ! — თითქოს შიგნიდან იყო დაქრილი, დაკემსილი; ბევრჯერ წინასწარ დაუღევია ჩირიკის შესანდობარი ფიალა, მაშინ, მისი გული მჭედლის ქურაზე ცხელი ხდებოდა. მომუქავდა ხელს მინაცრებული, გაძაგრული და წაიზმუვლებდა — უუუ! და მტრის დასაძლევად ნატრობდა თავის გავლილ ძალას. თუმცა სულაც არ ჰქონდა სამამაცო გუნება.

— შენ რას უზამ ჩირიკს? ვერ მოერევი! შესახედავად, დახედულობით სუსტი ხარ, ვერ შეედრები. მძლავრი მტერი გაყავს, ტანით ძლიერი!

— აბა, დაჰხედე ამ პატარა წყალს! — და თან ხელს მიიშვერდა სოფლის ლიკლიკა ნაკადულზე, — რამდენი კაკალი მოუგლეჯია ადიდებულზე, რამდენი ცაცხვი; ალვის ხე? ხომ გახსოვს, მაშ, რაღად მეუბნევი?! ახ, თუ ერთი ავიწყვიტე?!

— არა, ნუ აუჩქარდები ჩირიკს, ნუ!

— მართებული სიტყვაა! — ჩაერეოდნენ სხვებიც.

— უუუ! უამებელო სიცოცხლე! — ჩაიკვნესებდა გულში გულნაკლული ჩიკოტელა.

— ზოგ კაცს პირზე თავისი ბედის ნათელი აფენია, ჩემს

ბედს კი სძინავს შუა გზაზე, მტვერში უსირცხვილოდ გაშობილს, უზრუნველს!

გადიოდა წლები, ამასობაში ჩირიკი კი არ კვდებოდა, პირიქით, გამრავლდა, კიდევაც ტყუპი გოგო ეყოლა.

— ძველი დავაგდოთ სათქმელად, არც არა საუბნარია! — ურჩევდნენ ჩიკოტელას.

— ვერ გამტეხავთ, ლაშქარნო! — შემადლებული ხმით ეტყოდა გულზე შემჯდარი ჩიკოტელა შუაქაცებს, მთლად შეჯავშნული ჩირიკის სიძულვილით.

— ზმმ! მომეწყურა ჩირიკის სისხლი! — ისევ დაიზმუვლებდა თავისი კოშკიდან და კოშკზე აფრენილ მამალს თავდაყირა დაუშვებდა.

— რა მოგივიდა, რას გეჩხუბება, რა გაწყენინა? რაზე დაობთ? — შეეკითხებოდნენ. კეთილი ჩირიკი მხრებს აიჩეჩავდა, წყნარად იტყოდა:

ბულბულმა სთქვა გამიყვირა,
შაშვი რასმე წამეკიდა,
უკადრისი სიტყვა მკადრა,
ვაი, ავად მამეკიდა!

ერთხელ პირშიც უთხრა დამთმო ჩირიკმა ჩიკოტელას: რას მეფურტკნები, მარგალიტის საყულო ხომ არ აგაჭერო? საპასუხოდ ჩიკოტელა ხელში ააფრიალებდა სიგელს, რომელიც თავისთავად იხვეოდა შინდის ჯოხზე — ამან იცის, აქა სწერია ჩემი სიმართლე!

— თქვენ არ იცით, — მიჰმართავდა მეზობლებს, — რა ხარბია, როგორ აღიდებს ღამ-ღამობით თავისი ვენახის სამზღვრებს. ეგ ჩემს მტრობას არ მოიშლის მეორედ მოსვლამდი!

ზოგი ბოროტი მეზობელი აქეზებდა:

— მტერი არ მოკშლის მტრობასაო!

— ხმალს ნუ შეაჭმევე ჟანგს, ცოდოაო!

— ამ სიგელმა იცის სწორე საზღვარი, მაგრამ ვინ იჯერებს? — კენესიანი ხმით დასძენდა ჩიკოტელა — რას არ იტყოდა ნაეკლარი გული, აბორგებული სულის სიმწარე?

— უნდა გათავდეს! ამ შემოდგომაზე ვეღარ დაიჭიროს ჩირიკმა ხელთ მაჭრის ჯამი! — და სევდით სავსე თვალებს აქეთ-იქით ატრიალებდა.

ჩირიკი?... აინუნშიც არ იყო! შეთვალულ ყურძენს შეჰხაროდა — წრეულს, კიდევ უნდა ვუმატო ვენახს რქაწითელი, — ფიქრობდა და ხალხიც კვერს უკრავდა: უდაბნოს დაასხმევინებს სწორედო!

— ღმერთო და პირიმზევ, შენ გეწყალობდე! — ეს იყო ჩირიკის სალოცავი. სად ეცალა ჩხუბისა და ყარყაშისათვის, თუმცა ჩიკოტელა დაუღალავი მეშფოთე იყო.

— აგერ, მოილახვრება პირქვე დასამარხავი! — იტყოდა ჩირიკის დანახვაზე გაშავრკინებული ჩიკოტელა.

კეთილ ჩირიკს პირსიცილი მოსდიოდა. — რაზე იკლავს თავს ეგ უბედური! კაცი მიწამტვერიაო, დღე არა აქვს ბევრიაო!

ჩიკოტელა კი გაიძახოდა: ჰაიდა... მანახა მაგისი შენგრეული გულის ფიცარიო, სისხლი შეესხას ქვისთვისო!

— სული დაგიმძიმდა განა, შე უბედურო, — შეუწყრებოდა ღვთისნიერი ცოლი თაშნეურა.

— მაშ, რათა ვარ ბედ-გაკვანძილი, სად არი ღვთის ნამატები, გამარჯვებულება? მითხარი, — ტირილის ხმით შესძა-

ხოდა ცოლს, საქმეზე თავდაუდებელი.—მაშ, რათა ვართ ღარიბები! განა ჩირიკის ბრალი არ არი ჩვენი სიღარიბე? დატრამალდა გული!

თაშნეურა, მუდამ თავლოვანი სიტყვის პატრონი, ამართლებდა კეთილ ჩირიკს, მაგრამ შემფოთებული ჩიკოტელა სეტყვის ქარივით ეცემოდა:

— მაშ, ჩემი მიჯნა აქეთ არ გადმოსწია? მაშ ის ხუთი ვაზი რა იყო, მიჯნის გაყოლება?

— რა გაგიხდა ეგ ხუთი ვაზი? განა ხუთი ვაზით აცხოვრებ ოჯახს? — უპასუხებდა სათნო ცოლი.

— რატომ არ მიჰყავს სიკვდილს ჩემი მტერი? ეგ უნდა წავიდეს ჩემზე ადრე, საიქიოში ჩირიკმა უნდა შემიღოს შავეთის კარები! — არა ცხრებოდა ჩიკოტელა.

— კარგი, გეყოფა, ხორშაკეულო, ცულაფთარო! — ეტყოდა თაშნეურა. მატყლის მჩეჩელი საწყალი ქალი გავიდოდა და ეზოს ვარდთან ჩამოჯდებოდა, იქ უყვარდა ყოფნა, პირჯვარს დაიწერდა — წმიდა გიორგი, შენ გვიშველე!

ჩიკოტელა განშირებით ოხრავდა... მერე მეზობლისას გადავიდოდა, შესჩივლებდა, ჭირის თქმა ხომ დამწვარ გულს ანელებს!

— ჭირს ნუ დაუწვები, უფრო დაგაწვება! სთქვი გულის საწნეხი! — აღიზიანებდა თვალთმაქცი მეზობელი. ჩიკოტელა ასჯერ მეტისას ამბობდა, ის კი არ იცოდა, კოჭობი რომ აღუღლება, გადმოვა და კოჭობივე დაიფუფქება!

საკუთნოს მუდმივ დავაში მიდიოდა ჩიკოტელას ბალღამიანი ღლები! იყო შემთხვევა, როცა ბეწვზე ეკიდა ჩირიკისა და ჩიკოტელას სიცოცხლე!

ივრის ლერწმოვან-ჩალიანებში, მდინარის ტოტზე გაღა-
წოლილი, გადაბარჯღული გრძელი, გამხმარი ვერხვი იდო,
ის იყო ჩვენი ხიდი! აი, სწორედ ამ ხიდურზე შეხვდა ერთ
დილას ეს ორი უმძრახი, ნაწყენი მეზობელი. ვინ იცის, რა
უბედურება უნდა დატრიალებულიყო იმ ხმელ ვერხვზე,
მაგრამ ამპარტავანმა ჩიკოტელამ გზააუქცევ-თავდაუხრელად
სცადა გავლა და შიგ წყალში კი გაადინა ტყაპანი!

ჩირიკმა ღიმილით გაიარა თავისუფალი ხიდი და შეერია
ვენახს.

მეორე დღეს, შემფოთებული ჩიკოტელა ძიობდა სოფელში:

— ვინ გაიგო, ვინა სთქვა, ვის გაეხარდა-ო?!

ერთ ზამთარ, თოვლში რომ მოემწყვდა სოფელი, უსაქ-
მურობით შეყელთებულმა მეზობლებმა ითავეს და შერიგე-
ბის შუაკაცებად ორი დარბაისელი მიუგზავნეს, — ივანე გო-
ჭიყლაპა და ბეცია ბატიყვლეფა.

— გეყოთ დავა, შფოთი ჩაარონინეთო! — მაგრამ არაფე-
რი გამოვიდა. უთმობელი ჩიკოტელა ისე გაიბერა, თითქოს
ქვეყანას დასჭირდა მისი თავიო!

მშვიდი, გულქართული, თვალებიდან გამომცინარი ჩირიკი
აწყნარებდა მეზობლებს, დაანებეთ თავი, მაგ სიტყვა-
პრტყელს! გულძვირობას არ მოიშლისო!

და ერთ დღეს მოხდა სასწაული! გამოვიდა მთხრობელი
მათი შერჩევისა, თუმცა კი არავის სჯეროდა.

საქმე ასე ყოფილიყო:

იორგალმა, აზამბურის მინდორში. ყანის მკის დროს, ჩიკო-
ტელა გაცივებულყო. იორი გამოეტობა, როგორც იყო, სოფ-
ლისკენ დაემართა გზა, მაგრამ მუხლმოჭრილი, სიცხისაგან

მოკვეთილი, გზისპირად, მთვრალი კაცივით მიგდებულებო. იქნებ, სამადლოდ, ვინმემ შინ წამიყვანოს! მგზავრი არ გამოჩენილიყო, არც ურმებს გამოვევლოთ! ეგდო საბრალო ჩიკოტელა კაქკაჟ-ყორანთა საწიწქნად, მგელთა საგლეჯად! გპინავდა და ღმერთს ეხვეწებოდა ძე-ხორციელის გამოჩენას. მზე კიდევ ჩადიოდა... სოფელი არც ისე ახლოს იყო... უნუგეშინისცემო ჩიკოტელა სიცხისაგან გათანგული გმინავდა...

სწორედ ამ დროს, როცა მზემ უკანასკნელი სხივები ჩაწურა ჩასავლეთში, გამოჩნდა ივრიდან მომავალი, იცით, ვინ? თითონ მიხვდებით! ჩიკოტელა შეერთა, შეიკუმშა, ფარაჯაში შეძვრა, როგორც კუ სქელ ბაკანში, ნეტამც არ დამინახოს!

ჩირიკი მიუახლოვდა მწოლიარეს, ისიც შეერთა, და... თითქოს ვერ დაინახა და ისევ გზა განაგრძო... სიცხიან ჩიკოტელას ერთი პირობა კიდევ გაეხარდა... მაგრამ ჩირიკი უკანასკნელი სასოებადა იყო მისი და თუ ჩირიკი არა, შეიძლება, მართლაც სამგლედ გამხდარიყო. მცირე ყოყმანის მერე, ჩირიკმა ცხენი მოაბრუნა, ჩამოხდა, ჩიკოტელას მიუახლოვდა:

— ეგ რა მოგსვლია, ბეჩაო? — გაუბედავად შეეკითხა.

— არაფერი! — მორცხვად ამოთქვა ჩიკოტელამ.

არც აცია, არც აცხელა ჩირიკმა და პირშეწილებული, ღვარძლიანი მტერი ცხენის გავაზე შემოისვა და სოფელში წამოიყვანა. მოჰყავდა და თან არიგებდა: სიცხიანი ხარ, წელზე ხელი მაგრად ჩამჭიდე, ცხენიდან არ გადმოვარდეთ!

ჩიკოტელა გაბუყული იჯდა და მოხატრებით ხელს უქერდა წელზე ნამტერალს. სოფელში ერთი ღრიანცელი ატყდა. არავის სჯეროდა, თუმცა საკუთარი თვალით ენახათ. ისიც ეგონათ: ალბათ, ჩირიკმა აჯობა ჩხუბში, შეკრა და ახლა მამა-

სახლისთან წარმოადგინაო! — ხმამაღლა გაიძახოდნენ: ჩირიკმა ტყვე მოიყვანაო! ბევრიც იცინეს!

ერთი თვე ეს ამბავი ჰქონდა სოფელს თავშესაქცევრად.

დაყარა ფარხმალი ჩიკოტელამ. დაჩუმდა, რაღას იზამდა? გაკვირვებული იყო ჩირიკის საქციელით.

ამას მალე სხვა უარესი ამბავი ზედ დაერთო: ჩიკოტელას ერთი მურიანი გოგო ჰყავდა-მეთქი, გახსოვთ? მაგრამ ვიდრე მოთხრობის ბოლომდე გავიდოდი, ამასობაში, ის მურიანი გოგო უკვე წამოჩიტდა, წამოიზარდა, ძუძუ დაეტყო, გაიბადრა. — მართლაც ქოჩორა მტრედი, ჩამარგალიტებული გოგო დადგა თეთრუა!. ლურჯთვალა, შავ-წამწამშაბურული, დანუკრებული...

და რას არ იტყვის, ჩხიკვის ენა! — ერთხელ, შუადღისას, ვენახი რომ შეზეერა, ჩიკოტელას ვაზის ბურვილში შემოესმა ნაზი სიტყვები: „შენი ქოჩრის მონაგლეჯი დამწვარ გულზე დამაყარე“!-ო.

— ამიყვანე, წამიყვანე! — ისევ ისმოდა ნაზი ხმა.

ნასმენალის მერე ჩიკოტელამ ფრთხილად გადასწია ვაზის ფოთლები და რა სახილავი ნახა! ზედ მიჯნაზე მისი თეთრუა ისე ჩაჰკვროდა ჩირიკის ვაჟს კიკრიკიკოს, რომ ხმალიც ვერ გააცილებდა ერთმანეთს!

ჯერ კი შეიუცხოვა — აი, შე სვეტიცხოველის დამქცევოო! ესლა შეჰყვირა გაოცებულმა ჩიკოტელამ; ბიჭი და გოგო ქვეით გარბოდნენ ჰიგოების ლაწალუწით. რამდენი ვაზი წაიქცა! ჩიკოტელა გაშეშებული იდგა, სიტყვა ველარ ამოეგო. ახლა მიხვდა, რად ელამუნებოდა თეთრუა მეზობლის ბიჭს. მიხვდა მისახვდომარს: ვაი, თავდებო, ახლა ქალიც მტრისკენ

მიდიოდა, მიცურავდა ვენახიც! შიჯნა მთლად უქმდებოდა! ჩიკოტელას ხომ ერთადერთი ქალის მეტი არ ჰყავდა?!. ერ-ჩივნა ქვესკნელის ფსკერში ჩამძვრალიყო, მაგრამ რა ექნა? თაშნეურას ძალზე გაეხარდა თეთრუას ამბავი: კიკრიკიკო ხომ ყველას უყვარდა.

ერთი კვირის მერე, ჩირიკმა დატალახებულ ქვევრს მოხანდა... ახლა, ჩირიკი და ჩიკოტელა ერთად უნდა მსხდარიყვნენ საქორწილო სუფრაზე. ერთმანეთისთვისაც უნდა ეკოცნათ ღვინის ჯამებით ხელში, ძმად შეყრილიყვნენ, ასეც მოხდა.

რამდენიმე წლის შემდეგ, მე დავინახე, ორივე პაპას ხელი ჩაეჭიდნათ შვილიშვილისათვის და ფეხის ადგმას ასწავლიდნენ აყვავებულ ნუშის ქვეშ.

ასე აჯობა მტრობას სიყვარულმა! უმსგავსი საქმე ყოველი, მოკლეა, მით ოხერია!

ამ პატარა, გვირგვინიანი ბიჭუნამ, რომელიც ახლა ორივე პაპას ტაატიტ დაჰყავდათ, თავისი ფუნჩულა თათებით საბოლოოდ სამარე გაუთხარა ორი ადამიანის მტრობას.

გავიდნენ დრონი. ბევრჯერ წითლად გადაუარა მზემ ჩვენს სოფელს. ბევრი ვარსკვლავი დაცვივდა... ბუნებამ დალია ჩირიკისა და ჩიკოტელას ჯანიც....

ძალზე დაუსუსურდა შრომით დაძალული ჩირიკი. ოჯახს კიკრიკიკო გაუძღვა, მაგრამ მოხუცი თავის საყვარელ ვენახს თავს არ ანებებდა. თუმცა ვენახი მას აღარ ეკუთვნოდა, სოფლის საერთო მამულად იქცა. მაგრამ ჩირიკმა ვერ გაიგო, რამდენიც არ აუხსნეს, ვერ მიხვდა. მის გონებაში კერძო საკუთრების გრძნობა ვერაფერმა ვერ შესცვალა. ახლა, პირიქით, მთლად ვენახში დაიღო ბინა... აღარ გამოდიოდა. ვერა

და ვერ მოაშლევინეს ვერც შვილმა, ვერც შვილიშვილმა, ვერც სოფელმა... ისევ თავს დასტრიალებდა ვაზებს თავისი მიქანცული მარჯვენით.

— ეგეც ერთი ჟინი ყოფილაო. დაე ეგ ჟინი მოიკლასო!..

და ერთ აღდგომა დღეს, ჩირიკის სახლიდან გლოვის ხმა გამოისმა, — ჩირიკი აღარ არიო!

თურმე არც აღდგომა ღამეს მოშორებია ჩირიკი საყვა-რელ ვაზებს. ვაზის ძირში, სააღდგომო სანთლები დაენტო. სუფრა გაეშალა, ლიტანია შემოევლო ვენახისათვის, მერე მიმჯდარიყო ვაზის ძირში, გულზე ხელები დაეკრიბა და მიცვლილიყო...

შვილიშვილს აღდგომის წითელი კვერცხები ჩაეტანა ვენახში და ეგრე კი ენახა!

რა დაემართა ჩიკოტელას? წოპწოპა ქუდი პირზე მიეფარა და ტიროდა — ვაი ძმაზე ძმებულოო! თვითონაც სიკვდილი ეხედვებოდა... მეორე კვირას, ჩიკოტელა ჩირიკს გვერდით მიუწვინეს.

ერთი ავი მეზობელი, ვითომდა გულშემატკივარი, დანა-ნებით ამბობდა: ბარემ ერთ დღეს დახოცილიყვნენ, ორი ქე-ლენის ხარჯით ოჯახი არ დამძიმდებოდაო!

მე ხომ კარის მეზობელი ვიყავ, შემატყობინეს ქალაქში, მთხოვეს დავსწრებოდი მათ დამარხვას, მაგრამ ვერ შევძელი, პატივი ვერ ვეცი, ხინჯად კი ჩამრჩა გულში, ბევრი ღრო გამი-ტარებია მათთან პატარაობისას, ბევრჯერაც გარჯილან ჩენი ოჯახისათვის!

ახლა, ამ მოთხრობაში, ასე მგონია, ვალი მოვიხადე მათი აჩრდილების წინაშე, ავწერე რა ჩირიკისა და ჩიკოტელას მტრობისა და სიყვარულის ამბავი, გასაღიმებელი და გულის გაღასაყოლებელი...



სახელის მიღობვა

„... ქართველნი... სალაშქროთა შინა ახოვანი, საჭურველმოყვარენი, ამაყნი, ლაღნი, სახელის მაძიებელნი ესრეთ, რამეთუ თვისთა სახელთათვის არა რიდებენ ქვეყანასა და მეფესა თვისსა“.

ვ ა ხ უ შ ტ ი

„სახელიანებ საფლავებს
გულდიდად გაღმოვცქერიო“.

ხ ა ლ ხ უ რ ი

„მკვდარს ულოცავენ სახელსა
ჩვენ კი გვიწყენენ კირსაო“.

ხ ა ლ ხ უ რ ი

I

ჩემი სოფლის თავნი თეთრი ციხე-კოშკი დგას, თავჩამორღვეული, ნანგრევი, ხავსდასხმული ლოდებით, სახელოვანი სიმაგრე, ძველად დიდად ნაბრძოლი ახლაც ატყვია, ალყაში ჩამდგარ, მოიერიშე მტერს ხმლები რომ ზედ უღესია ციხის ძირითა ლოდებზე.

ერთხელ, ბრძოლა რომ გათავებულა და მტერი გაქცეულა, ჩვენებს თურმე ნიჩბით მოუხვეტიათ ტყვია ციხის გარშემო, იმდენი უსროლია მტერს!

ჩემს ბაღლობაში მსმენია, თურმე, დანიშნულ ღამით, ცისკრის ამოხვლის უწინარეს, თმაქაღარა მანდილოსანი გაფოთებული ჩამორბის ციხიდან თავქვე, მთვარის კიბეზე, ვილაცას შორიდან აუქნევს ხელს და ამრიზებული მკაცრად შესძახებს:

— არ გაბედო მოსვლა, სირცხვილიანო, არ მომეკარო!

ტანაბჯრიანი, დაჩოქილი შვილი თავში ხელს წაიშენს, შეჭლმუვლებს სიმწრით, ისევე უკან გამორბის ხმალამოლებული, უცბად შეჩერდება და დედას შორიდან შეუთქვამს:

— ან შევაკვდები. ან მოგივალ იმედიანი!

დედა ისევე კოშკში შევარდება, კარებს მიაჯიქურებს, მძამე ურდულს აუგდებს და კოშკიდან ისევე გამოისმის გამწყრალი ხმა:

— არ დამენახო, გაბრუნდი, სახელის შემრცხვენო, ავსახელიანო!

... და უცბად, წყვდიაღში აქეთ-იქიდან ატყდება უჩინართა ძახილი:

---- თითისტარი შიეცი!

— თავს ჩიქილა დახურე!

— თმა ჩამოიწნას ქალისა!

და სხვა წყევა, შეჩვენება...

თმაქალარა მანდილოსნის აჩრდილი მკერდში მჯიღს ჩაიკრავს:

— ვაი, რა ვქნა, რა უყო, წავალ და გავნიავდები!

და მართლაც, ღამის ნიავს დაეხსომება სიტყვები შუალამისა, მსუბუქი ფრთით წაიღებს, სოფლად ჩაიტანს, თვითეულ ქონს გააგონებს, ზედ კერაზე დაჰყრის ამბავს და ცისკრის საზღვარზე ისევ გაისმის ჰაერში შემონახული მწველი სიტყვები და მუქარა. განრისხებული დედისა...

ღამე გაიცრიცება, მამალი შეჰყვივლებს და ყოველივე მიუხრდება...

იტყვიან, ეს თმაქალარა მანდილოსანი ლასურძიანთ ხვარამზეა, ჩვენი სოფელი, ერეკლე მეფის დროს უცხოვრია თურმე.

გმირების დედა ყოფილა. შვილები მტერს შეჰხოციან, ერთი ვაჟი გამოსვლია მხდალი და დღესაც იმასა სწუხსო! პეტი არა გამიგია რა ხვარამზეზე. მაგრამ ჩემი ყრმობის დროიდან მახსოვს ლასურძიანთ ოჯახიდან — დეიდა ჩახტაურა — მომჩინარი მანდილოსანი, მძლავრი და მკაცრი დედაკაცი, ყველასაგან პატივდებული, სოფლის ქალთათავე.

ჩვენ, ბალებს ძალიან გვიყვარდა...

ახალგაზრდობაში, თურმე, ცხენოსნობას უქებდნენ. ახლა, ქვირილობაში, ოჯახის ბურჯი გამხდარიყო. მეურნეობა უყვარდა; მეზობლებს რჩევა-დარიგებით აფხიზლებდა, სოფლის ქალებს ყაითნის საქმეს, საკერავს ასწავლიდა.

ჯეჯიმები, ჩახსაკრავები, მუთაქის პირები, ღიბაზე ნაკერი

ყაჯრები ხომ სულ მისი ხელიდან გამოდიოდა. თავის ქალს ფერანასაც ასწავლა.

ერთი სიტყვით, ხელწმინდა ქალი იყო.

სხვა საქმის გარდა, ჩახტაურა განთქმული შემლოცავიც იყო. ახლაც მახსოვს მისი შელოცვიდან, მგონი, ორსულ ქალზე: „ბანი იძრა, ტყე იძრა, ვენახი იძრა... ირმის მუცელში შველი იძრა, შელის მუცელში ნუკრი იძრა“. და სხვა. ეს პოეტური შელოცვა ძალიან მომწონდა.

ამინდის გამოცნობასაც უქებდნენ ჩახტაურას. ესეც ხომ მისგან ჩავიწერე მოწაფეობის დროს:

„დილა წითდა, — ღამე წვიმდა,
ღამე წვიმდა, — დილა მზითა“.

...პირველი მსოფლიო ომის დროა. დეიდა ჩახტაურა ზის მარტოდმარტო შემპალ, ძველებურ აივანზე, კერას არ აციებს... ზის და წინდას ქსოვს... სამი ვაჟიდან ვითომდა შემორჩენილ ერთადერთი ვაჟიშვილ შალიასთვის, რომელიც სულ ამას წინათ ომში დაეღუპა, მაგრამ ჩახტაურა მაინც წინდას უქსოვს. ორჯერაც მოუტანეს შავი უწყება, მაგრამ ჩახტაურას არ სჯერა, ღრმად სწამს შვილის უკვდავება და ფოსტალიონს მკაცრი კილოთი ეტყვის:

— ენამც მოგტყდება, ენამცდარო! უკანვე წაილე! ეს ქალღალი იმასვე მიუტანე, ვინც გამოგატანა შალია როდი მყავს მკედარი! აღარ გაბედო ამის თქმა — და ისევ განაგრძობს წინდის ქსოვას კიბის თავზე... წუთის შემდეგ, ჩახტაურა ისევ მრისხანე ხმას დააწევს შარაზე მიმავალ, განცვიფრებულ გუგუნას:

— აღარ გაბედო მაგნიარ შავი ქალღმერთ აქ მოსვლა, თორემ ძაღლებს დაგაგლეჯინებ! სამახარობლოდ მოდი, სამახარობლოდ!..

11

გორგასალ გმირის დავაჟკაცებას ისე არ ელოდნენ, ალბათ, მისი დაჩაგრული, დადრეკილი დედა და ბალათერასაგან გატაცებული დაი, როგორც ჩვენი მეზობლის შალიას დავაჟკაცებას გამოელოდნენ დედამისი ჩახტაურა და გასათხოვარი დაი ფერანა.

ეს, ის სანატრი დღე იქნებოდა, როცა ჭაბუკი აზნაური შალია ახალხმალშებმული თავისი ხელით შექაზმავდა ხალეზიან „ქარფეხა“ ცხენს და გააქენებდა.

— რა დღეს შეკაზმავ, შენი ჭირიმე, მითხარი, გამაგებინე, რომ მოვესწრო და დაგინახო, თორემ დიდი დღე კი არ მიწერიას!

— რა მაქვს აგრე საჩქარობელი? — ღიმილით ეტყოდა შალია.

— მაშ, არ გინდა, მალე ცხრა ცას დავეწიო სიხარულით? ჩითვის მხიარული კაბა ჩავიცვა, იმ დღით ახალი ბალდადი დაგვიხურო, დაბასმული ლეჩაქი, ვარაყიანი?

შალია ამოწყვეტილი, ძველი აზნაურიშვილის ოჯახიდან იყო. მამა-მისს შერმადინს ლხინით მოეჭამა წუთისოფელი. შალიას ძმები და ბიძები ზოგი ომში ჩაეხოცათ, ზოგი ჩხუბში თუ მამულის დავაში და ახლა, შალიას მეტი, აღარავინ ბოგინობდა ლასურიძიანთ გვარში. საქალეთზედა იყო მიმდგარი სახელოვანი გვარი!

ამიტომაც, ასე დიდის ამბით ელოდნენ შალიას მიერ ცხენის შეკაზმვას, ხმლის შებმას, ანუ დაეჯეკებინათ. მგონი, სამარიდანაც მოუთმენლად შემოჰყურებდნენ დაჭრილ-დაკუწული წინაპრები და ბიძა-ძმები!

დედა თოქალთოს უქსოვდა, ფერანა ჩახსაკრავს, ძალუა გარიელა კი მათრახს უწნავდა.

თვალმცეცხლი იყო შალია, თავგული, სხარტი, ლალი, გულზავი, გიჟმაჟი, გაშლილი გუნებისა, ამაყი, სამხედროსაყენ მიმდრეკი, ტოლ-ამხანაგთა შორის სახელის მაძიებელი. სახელისათვის დაუზოგავი იყო. არც ცეკვა-თამაშში, — კარგი ქართული იცოდა, — არც ქიდაობაში სახელს არავის დაუთმობდა.

— სახელდებული ბიჭი მყავს! — თავმოძწონებდა დეიდა ჩახტაურა.

ახლაც, თვალწინ მიდგა — ზანგელა, დაგიშრულ ქოჩრიანი, ჯიღათვალემა, დაგეშილ მიმინოსავით ტანსწრაფი, ხელუკრთომელი, ერთი სიტყვით, სანდომობით საყვარელი, ჩემზე ხუთი-ექვსი წლით უფროსი იქნებოდა.

დედა, დაი საოცარი სიყვარულით შესცქეროდნენ შალიას.

— ვინ იქნება შენფერი, ცათა და დედამიწის შუა? — ელამუნებოდა ფიქრებში დედა ნებიერ შვილს, — მაგრამ კენტი ხარ, საბრალო!

მუდამ აძაგრული იყო ჭაბუკი, თუ ჭაბუკობას მიტანებული შალია: ონავარი, ფიცხელი, კისკასი, თავისწვერა; არ უყვარდა რბილობა. „ომის თამაშის“ მიზიდულობა ჰქონდა, დაუზოგავი იყო, ქოჩრაობდა, სულ ბრეს გვადენდა! აუცდომარი სროლა იცოდა ისრისა. ცხენი უყვარდა. უბელოს დააჭენებდა ქა-

ჯივით, მონადირეც იყო. სულ ფეხით ჰქონდა მოვლილი მგრგვლივ კლდე-ღრე, ფლატე, ღრანტეები, ტყეები ჩვენი სოფლისა. ხან ნადირობდა, ხან ისე დაეხეტებოდა, ხან სალამურის მასალას ეძებდა ტყისპირებში.

საოცარი მესალამურე იყო შალია, სალამურის გამომჭრელი, გამოსჭრიდა დუდგულას და დაგვირიგებდა.

ჩახტაურა აღმაცერად გადაჰხედავდა სასტვენელას, სალამურებს, თან კედლიდან მოწიწებით ჩამოჰხსნიდა მამაჰაპეულ ხმალს, გადააწვდიდა შალიას და ეტყოდა: რა ბედენაა სულ სალამური? აი, მამაჰაპეული ხმალი! ენდე ღმერთს. მალე უნდა შემოირტყა! შენს ძმებს არ ერგოთ ბედად მაგ ხმლის ტარება, აღრე დამიხოცეს, შენ წაემჯობინები! უგვარკილო კი არა ხარი კიდევ ცოცხლობენ ლასურიძეები! კიდევ გვჭირდება სახელი! უსახელო გვარი რისი მაქნისია? — შალია მახვილი თვალთ შინჯავდა ხმალს.

— იცი, რა ხმალია? — ეტყოდა დედა, — ყენის ანაგლეჯია! შენს პაპის-პაპას ჯარდანს ყენისთვის აუგლეჯნია ომში! მთელი ლაშქარი გაკვირვებულა! შიგ შუბლში უკოცნია ერეკლეს! თვითონ ერეკლეს ხმალი კი არ ერტყა, ომში თითონ შემოერტყმებოდა ხოლმე!

ღარიბი აზნაურები იყვნენ დღეს ლასურიძეები, მაგრამ მუდამ სანაქებო, ჯიშინი ცხენი ება მათ ბაგაზე, — თუმცა არც ხარი ჰყავდათ, არც კამეჩი თითონაც შალია ერთგულად უვლიდა თავის გამოკვერცხილ „ქარფეხას“.

ის დღეც მოახლოვდა. ცხენი გალობითა და სიმღერით უნდა შეეკაზმათ, მერე ხმალშებმულ შალიას უნდა გაეყვანა ცხენი, გაენავარდებინა დიდ მინდორზე. ეს იქნებოდა მისი დავაყვა-

ცების დღეც... უბნის ლამაზი ქალებიც მოგროვდებოდნენ მხედრის საზეიმო დღის საცქერად. ჩახტაურაც სიხარულის სუფრას გაშლიდა... და თავის ვალსაც გაასწორებდა შვილთან.

iii

მაგრამ, სწორედ ერთი კვირის წინ ცხენის შეკახმამდე, როცა შალია სასალამურო დუღგულებით იღლიაში ამოჩრილი ტყიდან ბრუნდებოდა, ჩაფარმა „საღდათის ბილეთი“ გადასცა. შალიას კიდევ გაუხარდა, თითქოს დიდ ზეიმზე იპატიუებენო, ისე მიიღო. ჯარში წაიყვანეს. მამულის წვენის დაღევა ვერც კი მოასწრო, ისე წავიდა... მამაპაპეული ხმალიც თან წაიღო... ცხენოსან ლაშქარში გაწერეს. ჯერ იმედიან წერილებს იწერებოდა, ზედ ნატვრას ურთავდა: ივრის ჩქრო მომესმისო, ნეტავ ერთი კიდევ მაჩვენა მთებით შემოღობილი ჩემი სოფელიო, ცხენს კარგად მოუარეთო! ხან წერილებში ჩიოდა,— სისხლის ავდარი ძოდისო, დედამიწა 'შიშით ზანზარებსო! ბოლოს მოიწერა, — სიზმარში ხმალი გამიტყდაო, ჩემი მოლოდინი ნულარ გექნებათო, ველარ მოგივალთო, მაგრამ სახელი ხომ დარჩებაო! ბოლოს წერილები სულ მისწყდა და კიდევ გავიგეთ, რომ ივრის გაზრდილი ვარშავის ახლო მიესრისათ სასტიკ ბრძოლაში.

მეჩონგურის ლექსი გადმოგვეცემდა: შალია სიკვდილს ხმლით ეომაო, ცხრა დაკაფა ცხენდაცხენ, მეთემე კი ხიშტი ბეჭებში ჩასცაო, სისხლში გასვრილი ხმლის ნატეხი კიდევ ეჭირა შალიას ხელშიო! ერთიც არ დაუგმინიაო!

მეჩონგურის ლექსი მთავრდებოდა:

„სახელისათვის მომკვდარო,
ბევრ ცოცხალს სჯობხარ მედარო!“

ჯერჯერობით, დედას უმაღლედნენ შალიას სიკვდილს, თუმცა შემკვდარებულ ფერანას ტირილი ცაში ადიოდა — ვითომც, სიზმარი ვნახე ცუდიო და იმაზე ვტირიო! დედა ანუ-გეშებდა, ავსიზმარს რად უჯერებო! ჩვენთან რა უნდაო?!

ზამთარი დგებოდა, „ქარფეხა“ ცხენი გაყიდეს, შენახვა გაუჭირდათ და ვერც ცოდვით უყურეს, კვიცი დაიტოვეს. „ქარფეხა“ ღიბგადმოგდებულმა ვაჭარმა კოტოშამ იყიდა. ისე არ ჩამოივლიდა შალიას ცხენზე შემჯდარი გულქვა კოტოშა, რომ ფერანას არ შეეკვივნა, არ შეეტირნა ხმამალლა და ვაჭარი არ დაეწყევლა:

— უღმერთოვ, რად გვიკლავ გულს, სხვა გზით ვეღარ გაივლი?

— კიდევ ჩამოიარა უწყალომ? — ყოველ დღე კითხულობდა ჩახტაურა.

„ვამ, სიშორეო გზისაო...
წასვლაო, აღარ მოსვლაო
ლაშქარს წასული ძმისაო“.

— ვინ იცის, ორბის კლანჭმა სად გადააგდო შალიას ძვალის კანტალი! რომელ ხის კენწეროზე დარჩა, — წაიდუღუნებდნენ მეზობლები.

ბოლოს, როგორც იყო, დაიბარეს, დააჯერეს ჩახტაურა შვილის შინმოუსვლელობაში.

ხმავე არ ამოუღია... ჩუმად ბრუნდებოდა შინ, გულის ძარღვებ-ჩაწყვეტილი, ფერგადატეტკილი.

— მზე გაშავდა! ჩვენი ბელი დაიწვა! მეხმა შესწყვიტა

ჩვენი კარი! ჩვენი სიმაგრე დაიქცა! გათავდა, დაიმხო ჩვენი გეარი, ჩვენი სახელი! ვაი, სახლო, უკაცურო! — მხოლოდ ამას დუღუნებდა კარიბჭესთან გარეტებული დამეწყრილი, ცნობამიხდილი ჩახტაურა...

— აჰა, ღმერთო, ეს გაბუნებული ლეჩაქიც მომხადე, მეტი რა შემარჩინე! წაიღე გაძჩენო, ესეც შენ! — მოწყლული გულით შესძახებდა ხელებგაწვდილი მწუნხარე დედა, ლეჩაქს იხევდა, დროდადრო კარიბჭეს ბოძს თავს ახლიდა.

— სად გამოვუდგე სიკვდილს, სად დავეწიო უწყალოს?! მარტო ხელისა ვარ! ვაჰ, ქარო, ქარისა მავალო!

მთელი დღეები მუნჯივით იჯდა: ამ ქვეყნისა აღარა ეყურებოდა რა... შალისა სულში ჩაისვენა... მხოლოდ ეს უკვირდა, როგორ მოერია სიკვდილი მის შვილს, ანუ როგორ ვერ დაემალა შალისა სიკვდილს.

— არა, ვერ იკადრებდა დამალვას! — მიუგებდა თავის-თავს...

სიკვდილსაც კი არ ნატრულობდა ჩახტაურა....

მხოლოდ, ხანდახან, შუალამისას, გაშავებულ ხატს შეეკენესებოდა, — ღვთისმშობელო, სიმართლის მზეო! ეგ არი შენი სიმართლე?!

IV

დიდი ხანია აღარ მენახა შალისა მწიაღებელი ჩახტაურა, თვალს ვარიდებდი, ძალზე მეცოდებოდა... თანაც, მე ხომ ქალაქში ვსწავლობდი. მხოლოდ ერთხელ, სააღდგომოდ არღადეგებზე რომ ჩავედი სოფელში, კიდევ მოკვარ თვალი ჩახ-

ტაურას „სახელის მილოცვის“ დღეს, მერე აღარ მინახავს, მომკვდარიყო დაბრმავებული, თვალეში დარდისაგან შავ-წყალჩამდგარი...

* * *

ძველად, ჩემ სოფელში, ერთი საოცარი დღე იყო, „სახელის მილოცვის“ დღე.

გაზაფხულზე, აღდგომა კვირას, სოფელი საფლავებზე გავიდოდა, — პურით, ღვინით, საკლავით, ხორაგით, ცრემლიანი დაღადებითა და სამქებრო სიტყვით, სახელს ულოცავდნენ გარდასულთ, — ყველას კი არა — ვინც რამე სახელი დასტოვა! თან ცოცხალ გმირებსაც ადღეგრძელებდნენ...

მამულის დამცველი ბევრი გაუზრდია ჩვენს სოფელს ძველად თუ ახლად. ზოგს „თათარში“ უსახელებია თავი, ზოგს — იაპონიის ომში, ზოგს — პირველ მსოფლიო ომში, ზოგს, — ჩვენებურ მწყემსს, თრიალეთზე — ყაჩაღებთან... იყვნენ... აღარ არიან...

წასულან გმირები, გარდამავალი წვიმებივით. როგორც ქარიშხლებს უბობოქრიათ, უგრგვინვიათ, ბოლოს, დაყუდებულან მყუდრო საყუდარში. ხალხს ჰგონია, ისევ გამოვლენ სამარიდან, თოფსა და ხმალს კიდევ იხმარებენ, თუკი სამშობლომ შესთხოვა.... უკვდავება შეესაკუთრათ... მათ საფლავებზე. ზოგან ია მოსულა, ზოგან ავშანი, ბარამბო, ჭინჭრისდედა, დილილო, ზოგან აბზინდა, ზოგან სეინტრივით ბალახი ამოხეთქილა... უამარი მწვანეა გაზაფხულზე, თითქოს მათმა სისხლმა აღმოაცენა სხიენარა ყვავილები; თითქოს საფლავში უხარიათ, რომ მათმა მკლავებმა ასეთი ლამაზი მიწა დაუტოვა შთამომავლობას, რომ უფლება მისცა ამ სილამაზის

ყურებისა! მართლაც, ჩვენ რომ ლაჩარი წინაპრები გვეყოლოდა და სილაჩრით ჩვენი მამული დაეთმოთ, მტერს გაჰქცეოდნენ, ვინ იცის, ახლა სად ვისხდებოდით ქართველები?

აი, სოფლის ძველი სასაფლაო ველტყიანზე, ძეგლებად კლდე-ტინების ნახეთქები ძევს, განა ძეგლწერილები?.. თუმც, აქა-იქ, იშვიათად, მიწაში ჩასმული, გადაცვეთილი ბრტყელი ქვებიც მოსჩანს, გადაკორიკებული წარწერებით. ზოგან, ძეგლად ქვაში გამოკვეთილი, შეკაზმული ცხენი დგას, ზოგან — რქაჩაგრეხილი ვერძები, ზოგან — ქვაზე გამოსახული ხელადები, ყანწები, ჯამები, ჭიანურები, ჩანგურები, გუთნის ნაწილები!

ხავსი და მობიბინე ბალახი ჰფარავს გმირთა საფლავებს...

ირგვლივ ფრთაგაშლილი გაზაფხული ფრიალებს...

— სახელი მომილოცნია, შვილო! — ყუჩად დასტიროდა შაოსანი დედაბერი ჯაფარაული საფლავს და დედაკაცებიც ზედ ზუზუნს აყოლებდნენ:

— განა შინ მოკვდი, ომის კარს მოკვდი ხელთ ხმალი გეჭირა!

ხალხი მოვიდა, ღვთისოხ ჩოქით სახელი მიულოცა.

— ჰაი, შე უდროვოდ გათავებულო, შე გამარჯვებულო, მადლობელი ვარ შენი სახელისა — ჩასძახოდა პაპა ედიშერი მწყემს გაგნიას, — სვეტი ნათლისა დაგადგეს!

— ერთი მოიმწყვდიეს ოცთა და ოცდაათთა, მაინც არ გატყდა, არ შეეპოვა! თამარ მეფის მიჯნაზე მოჰკლეს, მაინც შინ მოვიდა! — ლაღადებდნენ დედაკაცები. მწყემსი შორს, ჯიქიანის მთის საძოვრებზე მოეკლათ და ამხანაგებს ხურჯინებით ჩამოეტანათ აკუწული.

— სულ კვერცხი ვაგროვე, იმით ვიყიდე თოხლი და წირ-
ვა კი გადავუხადეთ, — დასძენდა დედა.

— სახელის მოყვარული იყავ, იორამ. სახელს გილოცავთ!
კიდევ დაზარდოს შენისთანები ჩვენმა მიწამა! — და ასწლის
მოხუცებულმა სეხნიამ წითელი ღვინით სავსე ჯამი ასწია.
ჩამორიგებით მიულოცეს სახელი გმირ იორამს.

მალე ყველა საფლავზე გაიშალა სუფრა და ისევ სიცოცხ-
ლემ აჯობა სიკვდილს!

სამშობლოსათვის სისხლდათხეულებს ცრემლითა და ღე-
რით იგონებდნენ. ვაჟკაცთა სულთქმა, საქები სიტყვა, დედა-
კაცების ცრემლიანი ზრინვა გაზაფხულის დილის ნიავს მიპ-
ქონდა მწვანე ხასხასა-თავანკარა ჯეჯილებსა და კვირტგამო-
სულ ვენახებში, თითქოს ამ სევდის ბოლში იხსნებოდნენ ვა-
ზისა თუ ხეხილის კვირტები. ცა იყო ნაზი და წმინდა, სიყვა-
რულივით...

გაჰკრა ჩონგურმა და აალაპარაკა საფლავში მწოლარენი—
ხმლითა და ხანჯლით აჩეხილები, მახვილით გადასერილ-
გადმოსერილნი, „ტყვიით მთვრალეები“, ამშრალნი წვეთნი მა-
მულის სისხლისანი, ისმოდა ზარის დამცემი, გულის შემძვრე-
ლი, ცრემლში დასველებული, მაინც კაჟიანი, გავარვარებული
სიტყვები.

აი სახელიან მათიას სახელი მიულოცეს სანგარზე მკვდარს,
იერიშის დროს. მისი საფლავი უპატრონო იყო. გმირის საგვა-
რეულო მთლიანად ამოწყვეტილიყო, მაგრამ უჭირისუფლო
გმირთა საფლავებს სოფლეურად ტიროდნენ. ყველასი იყო,
მისი დატირება, სამარეზე მდულარების გადმობნევა სოფლის
უწმინდესი მოვალეობა იყო.

— დღესაც შენი დათესილი ბარაქით გამოვდივართ, ცხონდეს შენი სახელი! — ერთხმად ჩაძახა ხალხმა ცნობილ გუთნისდედა ნინიას საფლავში, — შავუხა და თავთუხი შენსავით ვის მოჰყავდა? წახველ და ბარაქაც თან წაიყოლე! მარჯვენას გილოცავთ, დაგელოცოს მარჯვენა!

სულხანა გმირი არ იყო, მაგრამ ჭირნახულის ამავდარიც გმირად ითვლებოდა.

— რატომ სიმღერა აღარ არის ქვეყანაზე? — იმიტომ რომ შენ აღარა მღერი! — მიუტირეს სოფლის პირველ მომღერალ მარჯანას საფლავს. მარჯანა სიკვამლეშივე მომკვდარიყო, „სიმღერისაგან დაიწვაო“, მარწმუნებდნენ.

ერთი დახავსებული საფლავი მოჩანდა ბებერ რცხილის ქვეშ, მეომარი ლაგაზი უომრად მომკვდარიყო!

— ღამე ამოდის ლაგაზის აჩრდილი და ჩივისო, — ვაი, რა ძნელი ყოფილა ულაშქროდ სიკვდილიო! — იმასაც შეუხდო ხალხმა უხმლოდ სიკვდილიო! შეუხდო იმიტომ, რომ ჩვენი სოფელი საზღვარზე იყო, მტერი ბევრი ესხმოდა თავს, მეომარი სოფელი იყო. ამიტომაც თავისით სიკვდილი თითქმის სიმხდალედ ითვლებოდა, ჩვენებური კაცების უმეტესობა ძველად ომსა და ბრძოლაში იყო ნაჩენი! ცოცხლებშიც ბევრი შეგზვდებოდა თურქე კოჭლი, უფეხო, უხელო, ცალმკლავა, სახეჩამოსერილი, ჩამოღარული ხეიბარი.

... უეცარი კივილი გაისმა:

— სიკვდილს ნუ მისდევ, შეგვიბრალე, დაი აღარ გეცოდება? მაშ, ძმის იმედი აღარ უნდა მქონდეს?! — ბლაოდა გიშერწარბიანი ფერანა, შალიას და. ჩახტაურა ჩუმად იჯდა, ვეება, გაბარჯლული მუხის ქვეშ... — სად მოუსავლეთში, სად

მხვიანმა ქარმა წაიღო შალიას მტვერი, სად, რას იწვა შალია, დედა და დაი კი აქ დასტიროდნენ ქაბუკ ლომს, ვითომც აქ ეძინა ამ წყნარი მუხის ქვეშ. „ნიშანი“ გაეშალათ — შალიას ქუდი, ჩოხა-ახალუხი და ხანჯალი. ქარფეხას კვიციც აქვე დაე-ბათ, ვითომც საფლავზე აბიას! უგუნური კვიცი ხტებოდა. ტორებს სცემდა მიწას, თითქოს შალიას ეძახდა და გიშერ-თვალებს შემკრთალი ავლებდა სამგლოვიარო სანახაობას.

— ადე, შვილო, თათლით შედედებულო, ადე, თვალებში გაკოცო, სახელი მოგილოცო! — ჩაქცერით მიწას ელაპარაკე-ბოდა ჩახტაურა. დედაკაცები მდულარე ცრემლით სტიროდნენ, ისე, როგორც ქრისტეს გარდამოხსნახე.

— ვაჰმე, სად დაჰქნა სივადის ყვავილი? რამ გაანედლოს დამწვარი საჯიშე კვირტი გვარისა, ჩემი უბის სითბოთი გა-მოზრდილი.

მწუხარების ანძალზე აცმული დედა უღრუბლოდ იმდულ-რებოდა. ნაწლავი ეწოდა... ძუძუ სტკიოდა... მოწყლული გული ოდნავდა უცემდა...

ცრემლით დაებანა შალიას ახალუხი...

— ვაი ოქროსძარღვო, სახელდებულო! მიწაში ჩადებუ-ლო! — გმინავდა ჩახტაურა.

— ვაჰ, ბრალი ვეფხვის დედისა! გვერდით წამოიოხრა ბერმა სეხნიამ. ბედისწერით ანუგეშებდა ზოგი: განა უღვთოდ ხეს ფოთოლი ან შესხმია ან გასცივინიაო? ადამიანის სიცოც-ხლაც ასეაო! არ დაგცალდა საწყალო, საქორწილო პურის ცხობაო, დანანებით ეუბნებოდნენ ჩახტაურას.

აქ მეჩონგურემ ცეცხლი ცეცხლს შეურთო, როდესაც დაამ-ღერა:

შალიას სიკვდილისთვის
მადლა ღმერთს მოსწყდა წელი!
მთვარემ ჩაიკვა შავები,
ვარსკვლავთ არ ეღო ფერია!

... და თითქოს უცბად გამოფხიზლდა ჩახტაურა; წამოდგა მინაცრებული, ძველი ლეჩაქი შემოიგლიჯა, ქალარა თბა გაიწეწა, ორივე ლოყა ჩამოიხოკა სისხლის ნაკადულებით და შეიფეთა:

— ნეტავ თქვენ, ქვანო და კლდენო, რომ მოსვენებითა ხართ და ჩემი ცეცხლით არ იწვებით! ნეტავი თქვენ!

ქვასაც კი ენანებოდა დეიდა ჩახტაურა... ცრემლით ამობზარულ თვალებს აქეთ-იქით აცეცებდა, ხალხს კი არ უყურებდა. შემოეჯარა ხალხი. შალიას სახელი მიულოცა. ღვინო დაუღიეს, გარდაუღიეს. უეცრივ ჩახტაურა დაშოშმინდა, გაუყურდა... სახელს ულოცავდნენ მეზობლები — წინ ცხრანი გაიმძღვარაო! ამაყად წარმოსთქვამდნენ; განა გლოვობდნენ შალიას, დარჩენილ სახელს ეალერსებოდნენ და თითქო შორს მდებარე შალიას საფლავში კიდევაც ჩაეკჭირათ, დაენახათ; უჭკნობ ყვავილებში გახვეულიო...

ჩახტაურა მადლს იხდიდა...

შუადღის მზე გადაიწვერა... ხალხი დაიშალა... გულისღვარეული ცრემლი დაწურა და იკმარა...

თავდაღმა დაეშვა სოფლისაკენ.

მკაცრი სახეები გამოსჩანდა... თითქოს თვითუღლის გამომეტყველება ამბობდა: სალის კლდეებით არის დამაგრებულ საქართველო! შემოგვხედეთ, ჩვენც გული ბასრი ქვისა გვაქვსო, მუდამ სმლით ვიდექით, ვინ მოედავება ჩვენს მიწასო.

მალე ცის ნაჟინჯლი დაგვეცა თავზე. ცაში წამით გრგვინ-
ვაც გაისმა. დედაკაცებმა თქვეს: როსტომი ზურაბსა სტირისო!
ქარცივი აქროლდა. ცაში შემოწალიკდნენ წერონი, თითქოს
გმირთა სულელები დედამიწიდან ცაში მიემგზავრებოდნენ. ახლა
დალასტული ცისარტყელა გამოჩნდა, — დედამიწამ გადიგ-
ლოვაო!

ხელში ცარიელი დოქითა და კალათით შინისაკენ ლასლა-
სით ბრუნდებოდა ჩახტაურა. ფერანას კვიცი მოჰყავდა, ჩვენ,
ბიჭების ჯგუფს რა მოგვიახლოვდა, ჩახტაურამ წყნარი, მწუ-
ხარება-ნარევი ღიმილით გადმოგვხედა და კმაყოფილებით
წარმოსთქვა:

— რა სახელიანი შეილი მყავდა! დახე, სოფელმა სახელი
მიუღოცა! თქვენც კარგები დაიზარდენით, ტყემლის ბოყვებო!

ირგვლივ გაზაფხული გიჟმაჟობდა შალიასავით დაუდე-
გარი...

ჩვენ, ბალები, ამ უცნაურ სანახაობის მოწმენი, შემ-
კრთალები ვიყავით. ვგრძნობდით, რომ ამ დღის ცრემლითა
და კაჟით ჩვენი გული იწრთობოდა... ძვალი გვიმაგრდებო-
და...

დავფიქრდებოდით წამიერ: რისთვისაა საჭირო სახელი?
რა არის საჭირო სახელის მოსაპოვებლად?

სახელი... სახელი... კლდე ჩამოიშლება, ქვამყარი დაირღვე-
ვა, არ მოიშლება სახელი! — ასე გვასწავლიდა ეს დღე...

და სევდიანი ფიქრი გულს გვისერავდა — განა ჩვენც მოგ-
ვილოცავენ სახელს, დიდები რომ გავხდებით?

მაგრამ გაზაფხულის მწვანე ფრთის ქრიალი და მშობლიუ-

რი ცის ლაქვარდულობა ნებას არ გვაძლევდნენ ფიქრებში დაღრმავებისას.

და ისევ ფრიალოზე ჩამოკიდებული, ჩამოხავსებული ციხე და ზედ მომშვენიებული მთვარე მაისის ღამეს, ძირს ხეობაში ვარდის ჭალა, აყვავებული რქამაღალი ვენახები... რაღაც ვნებიანი სურნელი გარშემო, ციციანათელას ფანცქალი, ცაცხვის დაცვენილი ფანტელი და პატარა მდინარის მორცხვი როკვა თუ რაკრაკი...

შალის მერე ხვარამზეს აჩრდილი აღარ გამოდისო. ჩახტაურას ცრემლმა დააწყნარაო. — ასე ირწმუნებოდა ასი წლის დედაბერი ხვაშაჭი, ციხის უბანში რომ ცხოვრობდა.



ღ ვ ი ნ ჯ უ ა

თავი პირველი

ახალწლის მეორე დღეს შატროვანიდან სოფელ შვლის-
ყურში გადმოსულმა თაყამ ჩემს მეზობელ ღვინჯუა ფოთო-
ლაშვილს ნათლიაობა სთხოვა:

— ტყუპი ვაჟი მეყოლა, მომინათლეო! — ღვინჯუამ არ
იუარა, მირონზე უარტქმა არ შეიძლება, მაინც, ზრდილობი-
სათვის ურჩია, ნათლიად უფრო პატივსადები კაცი ამოერჩია.

— შენა ხარ ჩემთვის პატივსადები! ვარჩიე, ამოგარჩიე,
მირონს ნუ დამიჭერო! — შესთხოვა თაყამ, თან ჩოხის მასრა
ამოაცალა და ჯიბეში ჩაიდო ბედ.

— ხომ დაგიბევე? ნათლილებას უნდა მესტუმრო შატრო-
ვანში და ჩემს ოჯახში მირონი შემოიტანო! ხომ იცი, საუფლო
დღეა. არ გასცდები. ამ დღით ირემიც კი არ გაექეპება ხეს!

— ეგრემც იყოს! — კვერი დაუკრა ღვინჯუამ, თექის ქუ-
დი მოიხადა და თავი მოიქეპა...

ორივენი შეძლებული ოჯახიშვილები იყვნენ, სოფლის
თავკაცები, წინაკაცები, ქონებითაც ერთმანეთის მოთანაწო-
რენი, ორივენი პურისა და ღვინის მომყვანები; ორივეს უყ-
ვარდათ მტკაველზე აყრილი ჯეჯილი და ვაზგაჭედილი ვე-
ნახი...

ღვინჯუას ნათლიად მიწვევა უფრო მისი თამადობის ბრა-
ლი იყო, განთქმული იყო ღვინჯუას გლეხური მჭევრმეტყვე-
ლება... სიტყვის ჭახრაკები იცოდა, ამოძრახულ სიტყვას კი-
ლოს უპოვნიდა, ხან ისე დაადრმავებდა სიტყვას, გაჰკვირდებო-
დი! ენადკარგი იყო, არ იცოდა ენით მოფინფვლა! მამე-
ბელი არ იყო; სიტყვის მოზარბაზნეც არ გახლდათ! არ უყვარ-
და მაღალსამტკრევი სიტყვები და ფეხმოკლე ასრი!

— სიტყვა ვთქვათ. ხალხი დავაძარღვიანოთო!

არც ისე ბნელი გეგონოთ ღვინჯუა, ვაჟა-ფშაველას ლექ-
სები იცოდა! ერთხელ, თიანეთში კიდევ შეჰყროდა ვაჟას და
ღვინოც ერთად გადაეკრათ იქაურ დუქანში, რაც მუდამ
საამაყოდ ჰქონდა.

მკვეთრად ჩამრჩა მესსიერებაში ღვინჯუა. მაღალი, დათ-
ვურად ნაკვეთი, მკერდჯაგრიანი, მსხვილად დაყრილი უღვა-
შები... ბარაქიანი ცხვირი... სუფთა, სათნო, ძაღოვანი, გულო-
ვანი. ღონით ძლიერი...

ყველას მისთვის უყვარდა ღვინჯუას თამადად მიწვევა, რომ სიტყვამზიანობასთან ერთად დაუთრობელიც იყო.

„საყველაწმიდოს“ უსათუოდ იტყოდა, ისე არ წამოდგებოდა სუფრიდან. სუფრის ლელოს ბოლომდე გაიტანდა. ეს იყო მისი მთავარი ღირსება, თორემ რამდენი თამადა მინახავს რომ ღრეობის შუაგულში სუფრას აპშლის, მასპინძლის ამდენი სამზადისი და პურ-მარილი მთლად წყალში ჩაუყრია! დაუთრობელი თამადა ბევრსა ნიშნავდა! განსაკუთრებით „საყველაწმიდოში“ უნდა გამოჩენილიყო ღვინჯუას სასადილვანშმო მქვერმეტყველება, სიტყვის ალიანობა. აქ საბოლოოდ უნდა მოეხიბლა სტუმარ-მასპინძელი, უნდა დაემკვიდრებინა მოაზროვნისა და მქვერმეტყველის სახელი!

ეს ბოლო სადღეგრძელო ძალზე უყვარდა ღვინჯუას და მით თავს იწონებდა. ამიტომ საგანგებოდ, იკლიკანტურად იტყოდა ხოლმე „საყველაწმიდოს“. იცოდა თაყამ, ვინ მოჰყავდა თამადად, იცოდა!

ყოველთვის ახალი სახელი მოჰქონდა სუფრიდან ღვინჯუას!

— ვინც ბუდექართველია, უამსადღეგრძელოდ არ უნდა აღგეს სუფრიდან! ჩვენი ქვეყნის პატივია რა ნება გვაქვს მამა-პაპური ანდერძი გავტეხოთ? მარტო შვილებსა და შვილიშვილებს კი არა, ბოლოქართველებსაც უნდა გადავცეთო!

იმდენად ღვინო კი არა, ნადიმი და ლხინი უყვარდა ღვინჯუას. ზედმეტი სმა არ იცოდა.

— ღვინო, როგორც ვარდი, ისე უნდა იდგეს მინაში წყლის დასხმა როგორ შეიძლება ღვინოზე! ჭიქა არ უნდა შეაჭანჭყარო, რომ ღვინო არ გაფუჭდესო! ყველაწინმე გულ-

პუჰყიანი, აფურუკული, ძმობის გამტეხი, პურუხვედრი, არ არის ღირსი ღვინის სმისა! ღმერთმა ღვინო სალხინოდ მოგვცა, სანადიმოდ, სამეგობროდ, განა ჩხუბისა თუ კაცის კვლისათვის? ღვინო ქართველი კაცის ხმალია!

თითონ ღვინჯუა თამალობას დიდად აფასებდა: კაცის სიმაღლე ეგ არიო! ამით მთელ საქართველოში მცნობენ, მიტომ სალამი არ ჩამომელევაო!

თავმოწონებით მეტყობდნენ: რამდენი სადღეგრძელოც გეთქვას, იმდენი იცოცხლეო!

აი, ერთი მისი სადღეგრძელო:

— ამ ყანწითა და ამ წმინდა ქართული გულით, მინდა გადღეგრძელო, იცოცხლე. იმდენი ხანი, ვიდრე კახეთის საწუნახლებსა და ქვევრებში ღვინო იწურებოდეს; ვიდრე დედამიწა ისე გაცვდებოდეს, რომ ადამიანის ფეხის სიმძიმეს ველარ უძლებდეს; ვიდრე დედამიწაზე წყალი დაშრებოდეს და დედამიწა უწყლოდ იწვებოდეს! ერთსაც გეტყვი,—როგორც ცას ცისარტყელა ამშვენებს და რამდენიმე ფერით დედამიწას დაჰყურებს და ახარებს, ისე გემხიარულოს!

როგორც დედამიწას მზის სხივი არ მოეშალოს, ისე შენი სახელი არ მოგვიშალოს ღმერთმა!

როგორც მე ამ ყანწს ჩამოვცილი, ისე შენი მტერი დაიცალოს სისხლიდან! იყავ მზეგრძელი, იცოცხლეო!..—გადაჰკრა—ესე მტერი დაგეცალოსო!

ასე იტყოდა მოწაფებულნი ყანწის სარდალი, ღვინჯუა, — დიდკაცურად, დიდმაჯურად!

— კარგი თამადა სახლს პატივად შეემატება! — ფიქრობდა შატროვანისკენ გზად მიმავალი თაყა.

ღვინჯუას ახალი ნათლიმამა, თაყა, მხნე, გულძალი, ჩა-
ლის ფერულვაშა, ფიცხი ხასიათისა იყო, ამბობდნენ, მეტად
ჯიქი ქალი მოიყვანა ცოლად, მაგრამ სახრით მოარზი-
ლაო!

თაყა ვენახიანი, ბარაქიანი მეკომლე იყო. ქვატა ჰქონდა
და ქადაც! სარჩოცა და საბადურიც! წრეულს ღვინის დიდი
მოსავალი მოუვიდა, პირთამდე აივსო ისედაც სავსე კაცი. მი-
სი ოჯახის ბარაქის ნიშნად მეზობლები იმასაც იტყოდნენ, თა-
ყას მამას მეწველი ირემი ჰყავდა მოშინაურებულიო.

ოჯახიშვილი თაყა არ იყო თავკერძა. მეპურმარილეს —
სტუმარი უყვარდა, მამის უტკბესად იღებდა სტუმარს! არა-
ფერს ზოგავდა: აკი ცოლიც უჯავრდებოდა: — იქმარე, ნუ
დაანელე ოჯახი შენი პურმარილითაო. სუფრაც უყვარდა
თაყას, სუფრის ლაზათიც, ამიტომ თამადის არჩევას დიდ
მნიშვნელობას აძლევდა. თამადა ხომ სუფრის ჯავარი!

— კარგმა თამადამ ხორციანი, ბედაური სიტყვა უნდა
იცოდეს!..— ოცნებობდა მომავალ ღრეობაზე თაყა.— ენა თაფ-
ლით უნდა ჰქონდეს სველი, ოქრობაგეთი უნდა იყოს; ბორ-
ჯღლიან გულზე დამბოლავ სიტყვას უნდა ერიდებოდეს. რა-
განდარა მიზეზით, სუფრა არ უნდა აშალოს, არ ჩაამწაროს
პურტკბილობა. უნდა ასახელოს თემი და სოფელი!

— არ უნდა გამოსწიროს, — სამთელქვეყნო, საყველა-
წმიდო, სამწყვდეო, სატალახო, სუფრა ბოლომდე უნდა მი-
იყვანოს!

თუ თამადა კარგია, — მასპინძელიც გულდადებულია. ჩვე-
ნი ღვინჯუა მართლაც გამორჩეული თამადაა: ყელმოჭედილი,

ქუამომატებული, მართებული კაცი! სწორედ კარგი არჩევანი მომივიდა! — დასძინა ფიქრებში კმაყოფილმა თავამ.

დადგა წყალკურთხევის დღეც. მზიანი დარი გამოვიდა, ნამდვილი საკაიდლეო, სამოყვრო ამინდი..

იცი რა არის სამოყვრო ამინდი?

არა?

პატარა თოვლი რომ წამოვა ფინფლებად, მიწას რომ ოდნავ წაქეირსლავს ნელა, ტბილად, თბილად, უზრუნველად, მაშინ, თუ სოფლად ხარ და უკვე აკრეფილი გაქვს მიწის ზურგიდან მოსავალი და მარან-ბელელში დაბინავებული, შინ რაღა უნდა გააკეთო, ისიც ასეთ ამინდში? და უტბად, შეგახსენდება, რომ ამდენი ხანია, რაც არ გინახავს შენიანი, ზაფხულ-შემოდგომის საშრომელმა არ მოგაცალეს. ახლა კი წყურვილით მოგწყურდება მოკეთის, მოყვრის ნახვა. წახვალ და მონახულებ, გაუზარდება, გაგიზარდება! აი, რა არის სამოყვრო ამინდი, ალერსის დღე!

ღვინჯუა სასტუმროდ მოირთო: ჩაიცვა დაწინწკლული ახალუხი, თავისი „საწუთროს ნახევარი“ ჩოხა, გადაიცვა ცხვრის ტყაპუჭი, თავზე დოღბანდურად შემოიბორბლა ყაბალახი, ხელთ იფნის ობოლი სახრე აიღო, გაუდგა გზას და... მალე მიადგა კიდევ ნათლიმამის კარს შატროვანში.

აგერ, ეზოში. გამოკოდილი მუხა, წათოვლილი ლედენარი... წვრილფეხობა-მოზარდები გამორბოდნენ ნათლის სანახავად! დათოკილმა ძაღლმა ჯერ იყეფა, მერე კი მიხვდა, მოკეთე მოსულაო და ჩაჩუმდა.

თაყას ოჯახი მორთულიყო... ბავშვებს ჰყეტელა ჩითჩუ-თები და ბამბაზიები ეცვათ. დიასახლისს თავზე შეურცხვენე-

ლი ლეჩაქი უფრიალებდა. აქა-იქ მოსჩანდა გახუნებული ლეჩაქებიც მეზობლიანთ ქალებისა:

აი, დამტკბარი ვარდი ხათუთა, აი, უსნისფერა ბუხრიას ქვრივი, თმადაშვებული ძმაზე, პირანთებული, ამოფუჩფუჩებული თავთუხა; თვალნათლიანი, კაშკაშა, ბაირადის ფარჩასავით მხიარული თათია, ფურფუტანთ ქალი ტაშდარიკო, შვიდმაისა, ნაზიკა—ნაძრახი ქალი, ფერცემული ნუშო და სხვანი იერის ასულნი, ზოგნი წვეულნი, ზოგნიც მომხმარე მეზობლები...

ზოგი სუფრას შლიდა, ზოგს ნათხოვარი ჭურჭელი, სკამი თუ სკამფეხა შემოქჷონდა ეზოში. ფუსფუსებდნენ, ნათლობის ღრეობა იმართებოდა, კახური პურობა, მაძლარი ჭმეულობა, სმეულობა, — ოჯახიშვილის, შეძლებული მეკომლის ოჯახში!

თაყაც გარეთ იყო, ხართუთას ქვეშ, შავს კუნძზე დაფუფქულ ღორს აფეშხავებდა სათონეში, ეზოში თონიდან ამოვარდნილი თბილი პურის სუნი ტრიალებდა. ორკეცი ალი ცას წედებოდა... ცეცხლზე მდგარი დიდი შავი ქვაბი თავს იკლავდა, სხვა თანგირა ქვაბებიც შიშინით მღეროდნენ, თავს შავყვითელი ქაფი გადასდიოდათ: ზოგში ღორის ლურთები იხარშებოდა, ზოგში ძროხის ხორცი, ზოგში — მომსებელი, ჩაკვერცხილი დედალი, კოჭობიც კი არ იდგა ცეცხლზე უსაქმოდ, შიგ დანიგვზული შეჭამანდი თლუხთლუხებდა... ორივე ძალი — ხვნეშია და ჯაგია ქვაბებთან შორიახლოს მიყრილიყვნენ, ხორცის სუნით დაბნედილები.

ნათლია ღვინჯოს გულტკბილად შეეგებნენ. ძველი წესით, ჯერ მარანში შეიყვანეს. გოდრებში ჩაყრილი ვაშლი და კომ-

ში საამურ სურნელებას გამოსცემდა. სხვენში ყურძნის ჩხები, აკიდოები, ხახვისა და ნივრის გალები ეკიდა. უზარმაზარი, ამოფუღრული ხის ნაგი შავად გამოიყურებოდა, შიგ გოგრები და კართოფილი ეყარა. იქვე ქვევრის სარცხები ეყუდა. კუთხეში, ქვამარილის დიდრონ-დიდრონი ზოდები ელაგა...

წითელი ღვინო ამოედოთ, ახლა „ვარდის ქვევრი“ რომ ერქვა, იმას მოჰხადეს.

შიგ იდგა ქარვალალი.

— თაფლია თუ თაფლღვინო? რძეც არის და თაფლიც, ერთად შეზავებული! — მოუწონა ღვინჯომ, ჭაშნიკი რომ იგემა.

მეორე ნათლიაც მალე გამოჩნდა, მთასავით ვაჟკაცი, გაურანდავი, მგელხარი. დიდი ხანჯალი ერტყა, თავზე ჩამობანჯგლული ქუდი ეხურა, კერატვიით დააბოტებდა. ღვინჯუა და მგელხარი ერთმანეთს გაეცვენენ, თათები გადააწოდეს:— დღეიდან მირონის ძმები ვართო!

— ეს წითლისა, ნამდვილი ზიარებაა! — აქო მგელხარმა.

სახელდახელოდ პატარა ლურჯი სუფრა გაიშალა მარნის ბაქანზე, ცხელი მწვადი ახლიჩეს, სასიყვარულო სადღეგრძელოები გადაჰკრეს! ხომ ნათქვამია — დილის საუზმე ცოლის მზითევს სჯობიაო!

თაყაც, ღვინჯუაც, მგელხარიც დარწმუნებული იყვნენ, რომ პირველად ღმერთმა ნათლია გააჩინა:

„პირველ ღმერთმა გააჩინა;

ნათლია და მირონ-ზეთი!“ — აკი ამბობს ხალხი! განა ღმერთმა არ იცის თავისი საქმე? მაშ, ქვეყანა რაზე უნდა მდგარიყო, თუ არა მირონზე? უმაღლოდ დარჩენილი ხომ

დაიღუპებოდა? ამიტომაც ეკლებოდნენ თავს ღვინჯუასა და მგელხარს, რომელთაც ოჯახში მირონი შემოჰქონდათ!

— მცხეთის სამირონეს გეფიცები, მაშ, სვეტიცხოვლის დამქცევი ვიყო, თუ გიღალატო! — ეფიცებოდა ღვინჯუა ახალ ნათლიმამას.

— ქართველების ღმერთს გეფიცები და კერის ანგელოზს, შენი გულის ძმა ვარ! — შეჰფიცა მგელხარმა თავას.

— დღეიდან თქვენი შესამატი და სამჯობინარი გამიხარდება, თქვენი მირონი ჩემს სახლს პატივად შეემატებაო! — თავის მხრივ დასძინა მასპინძელმა თავამ.

სასწრაფოდ ჩამოილოცნენ და გარეთ გამოვიდნენ. ნათლებს დაატარეს ეზოყურე, აჩვენეს ბოსელი, — ჩატრუკებული საქონელი, მზევარდა კამეჩი, ირმა ზაქი, ძროხა დემფილაც.

თავას ეზოში თავს იყრიდა სტუმრეულობა: ნადობი, ნაძმობი, განაყოფი, მოსადევარი, კარის მეზობელი, — ყველა მოსულიყო უკლისად... პურად მასპინძელს დღეს სუფრაზე დაჟლაგებინა ხვავი, რთელის ბარაქა, საზრდელი, ნაშრომი, ნაწალმართევი: პური, ღვინო, ხორავი, — სისხლით ნასუქი მიწის ამაგი.

სუფრა იმართებოდა, ჭურჭელი მწკრივდებოდა, ყვილაფერს და მით უფრო სუფრას, უნდა თავისი რიგი და წესი! თორემ აგერ, მელორე ყოტალა ღორის აფესვაში რომ ეშველებოდა თავას, — ხელთუყარი, წელიწყვეტია, გამონიჭული, განა იმისთვის არ დარჩა უცოლოდ, რომ სუფრის ნაწესობა არ იცოდა?! ჰკითხეთ ქალებს, გაამბობენ; ყოტალას თურმე ქალი არ მისცეს, მიზეზად ზნეობის უცოდინარობა მოუდეს! პირველად რომ მისულა სანიმამროს ოჯახში ქალის გასასინჯად,

სუფრა გაუშლიათ, სასიძოსთვის. მოხარული დედალი შიურ-
თძევიათ:

— დასჭერიო!

— არ ვიციო!

აბა, საწყალ მელორეს საიდან ეცოდინებოდა? კეთილ სა-
სიამაროს, მოხუც მელორეს, ჩემად უკარნახნია: ჯერ ბარკლე-
ბი ამოსჭერიო. მაგრამ თავგამოუბმელ ყოტალას ვერ გაუგია.
ვერც მიხვედრილა, ვერც ქათამი დაუჭრია. იმ ღამეს კი პური
აჭამეს, დილით გამოუცხადეს: ვერა, გეთაყვა, ქალს ვერ მოგ-
ცემთო!

ასე გაბათილდა ყოტალა, ახიცი იყო მასზე! ხუთი ბატი
რომ მიგებარებინა, ექვსს დაჰკარგავდა, დაბმულ ვირს ვერ
მოუვლიდა! სუფრის წესი ან რიგი საიდან ეცოდინებოდა?

მზე კიდევ გადაიწვერა... როგორც იყო დასხდნენ, კი არ
დასხდნენ, ცივად დაბრძანდნენ სტუმრები.

სუფრის ზემოთავში, სახლისუფალი — პირბამბა-პაპა დას-
ვეს. — ამირანა. — მყუდრო კაცი, სიბერით სავსე, ასი წლი-
სააო! ნაჯაფარი, ნამაშვრალი, შვილთა, შვილიშვილთა და
შვილთაშვილიშვილთა გამზრდელი. ოჯახის თავმომყრელი.
მოჭირნახულე პაპა, ახლა მხოლოდ სულის საქმეზე და პატარა
საზედაზე ვენახის გაშენებაზეა ზრუნავდა, რათა მისი შე-
სანდობარი დაუყვედრებლივ დაეღლიათ!

— როგორ ბრძანდები. პაპავ? — ეკითხებოდნენ წვეულები.

— ძველ ჯავარზე ველარა ვარ, შვილებო, მუხლები და-
მიწყლიანდა. ცალი თვალითაც კარგად ვერ ვიხედებიო; ეხ.
სიბერე. — სიბნელეაო! სიკვდილს დავლონებივარო. მაინც

წუთისოფელს ვესურვილებიო! — და თან ბალამწარას ყალი-
ონს სწუწნიდა...

პაპა გახედავდა დარაზმულ სუფრას, დაზვინებულ ხო-
რავს: წააგონდებოდა რა თავისი უკბილობა, უძლურება, წა-
მოიოხრებდა: ვაპ, გულო, ვაპ, გუნებაო! და თან ლვინოში
პურს ალბობდა.

ტახტზე ყარყუმივით იჯდა პაპას მეუღლე. ცხრა შვილისა
და თორმეტი შვილიშვილის ბებო მარადია, სიბერით გადალ-
წეული, შრომაში გადამდნარი, გაცვეთილი; ქმართან ერთად
ერთ მუთაქაზე დაბერებული. ნაზბალიში ედო მუხლებზე.
სუფრაზე ჯდომის არაქათი აღარა ჰქონდა, თითქოს გაქვავე-
ბულიყო, უხედავი გეგონებოდა, თუმცა მის გამჭრიახ თვალს
არა გამოეპარებოდა რა და ტახტიდან რძლებს თადარიგს აძ-
ლევდა. კარებთან ბერი-ქედანივით იმზირებოდა მეორე, უმც-
როსი ბებო, — თანანა, თავპირჩამოღრუბლული, ხომ გაგიგო-
ნიათ:

დედამა ჰკითხა მზესაო, — ქვეყანაზე ბეჩავი რა გინა-
ხიაო?

— გასათხოვარი ქალი სახლშიო და სიდდარი სიძის კარ-
საო!

ასეც იყო...

„მობრძანდის კაცი“, ანუ მოპატიყე, — თლოშიაური, გუ-
შინ, მთელი დღე ხუსხუსით დარბოდა, დაპატიყებულთ ეძან-
და. ნათლობაზე მობრძანებას სთხოვდა, თუმცა ხვეწნა და ჰი-
მილი არავის დასჭირებია.

გაიცანით, მუცელდმერთა თლოშიაური: სუფრის მუსუსი.
ლეშის მოყვარე ყორანი! როგორც ბუზი ჯიგარს. ისე გაკყე-

ბოდა სუფრას ვისიც და სადაც გინდ ყოფილიყო. მუდამ სხვისი სუფრის მოჭაშნიკე, სხვის პურ-მარილზე ჩაპურებული, ჩასუქებული! თლოშიაურზე ამბობდნენ დედის მუცლიდან კბილიანი დაიბადაო!

— დილით რომ გამოვალ სოფელში, ბუხრის საკვამურების ბოლზე ყნოსვით ვიგებ, ვის სახლში დღეს რა კერძი და შეჭამადი იხარშებაო! — იკვებინდა მსუნსაგი თლოშიაური.

როცა თლოშიაურმა პაპას ჩაუნუსხა წვეულთა ვინაობა, პაპამ ბრძანება გასცა:

— ქაჩას დამიძახეთო, ჩემი კბილისააო, ცოდოა, ერთი კარებგამოხურული კაციოა!

საწყალი ქაჩა, აღარავინ ჰყავდა, ამოწყვეტილიყო.

ერთი ყომრალი ვირი ებოგინა ტყისა და წისქვილისათვის, ისიც კლდეზე გადასჩეხოდა; მის მერე ერთი მისანდოლა ჰყვანდა ამ ქვეყანაზე — ბოთვერა ძალლი — იმაზელა იყო მითვალული ამ წუთისოფელში!

ბოთვერა კი აღმასა იყო. მის მშიერ კბილებს ვინ გადაურჩებოდა!

ქაჩა სოფლის განაპირას იდგა, სულ ბოლოს, მიუვალ კლდოვან კონცხზე, უკეთ, კონცხის ქიმზე. ამიტომაც, ცალკე იმ კონცხის მიუვალობისა გამო, ცალკე ბოთვერას შიშით, მოსაქმენი, ხარჯისა და გამოსაღების ამკრეფნი, მეხარკენი, ვერ უდგებოდნენ და ქაჩა, საწყალი ქაჩა, თითქოს დამოუკიდებელ სამთავროში ცხოვრობდა მარტოდმარტო! ამიტომაც ეზარებოდა გასივსივებულ თლოშიაურს მიუდგომელ ქაჩასთან წასვლა, მაგრამ პაპამ ისეთი მბრძანებელი თვალით გადახედა შეყოყმანებულ, სულმოკლე თლოშიაურს, რომ თლოშიაურმა

მაშინვე მოცხრილა ქაჩას დასაპატიებლად... მიდიოდა ფეხტეხით საძნელო გზაზე, მაგრამ მუცელგადმოგდებულ თლოშიაურს ნათლობის სუფრაზე ღორის მსუქანი ლურთები აგონდებოდა და მხნედ მიაბიჯებდა...

აი, ოქროს ქოჩრიანი ბაიებიც დანათლეს მღვდელმა ოხროხინემ და დიაკვანმა აზარიამ. მადლი და კურთხევა დატოვეს სუფრაზე, მაგრამ თითონ მღვდელს შინ სტუმრები ჰყოლოდა და მალე წავიდა. დიაკვანი აზარიაც უღვდლოდ ხომ ვერ გაბედავდა სუფრაზე დარჩენას? არა უშავს რა, — ერთი ხურჯინის თვალი ხორავი და ღვინო თაყამ სახლში გაუგზავნა და მით სული იცხონა!

დამავიწყდა მეტქვა, რომ პაპამ სანათლო წყალი საგანგებოდ „მიმინოს წყარო“-დან ჩამოატანინა, რომ ბავშვებს მიმინოს სიმკვირცხლე დაენათლოთო; პირველ ბიჭს გელა უწოდეს, მეორეს — არსენა! თუმცა პაპა ერთს ღრინჭოლას ეძახდა, მეორეს კოკროჭინას!..

ვინღა არ იყო წვეული?

ვინ არ გინდა, ისიც სულ გასახელებული ხალხი, ნათლობის სახელი თითონაც რომ აღარ ახსოვდათ!

— დევკაჟი, ფოლადგულა, ნათლია მგელხარი...

ტყავის ფეშტემალაფარებული ელამი კალატოზი ყიჭალა, სულ მთვრალის კედელს რომ ამოიყვანდა, უეცრივ ზემოდან ჩამოსძახებდა: „მეეცათო!“ და მართლაც ნავაგლახევი კედელი ან პირდაპირ წამოვიდოდა, ან გვერდზე გადმოინგრეოდა.

სოფელი მაინც მადლიერი იყო ყიჭალასი: — სხვა არც მაგ სიკეთეს გვიზამდაო!

კალატოზის გვერდით იჯდა შავსევედიანი, მუშტრის ავ-
თვალდაკრული, გაკოტრებული მეწვრილმანე ჩანჩუხა, რომე-
ლიც ხშირად შეურევებით ამოიგმინებდა: ავაიმე, გავკოტრილი!

ქვემოთ, სოფლის დალაქი, თავბერა, მიკვირია კაცი, რო-
მელზედაც სოფელში იტყოდნენ: ეშმაკები რომ ჯოჯოხეთში
შილაფლავს ხარშავდნენ, პილბილი მაგის მოყრილიაო!

კიდევ ქვემოთ: კეთილის მოწადე, მოხატრე, ყველას შემ-
წყნარებელი, თავანკარა კაცი, — გუთნიდედა თარიმანი.

მეზვრე ჯიმშიტა — ძვირუხსენებელი.

ბერდიკი — კარგი მცელავი, მთიბავი.

ღრეული — ყანის მესვეური — ფაქიზი კაცი, ბედლოვლა-
თიანი.

ტროყია — მეტყეური, — ანუ ტყის მცველი, გაურანდავე
კაცი, თვალხუჭია, ტკეპნით მოლაპარაკე.

ულვაშის მრხეველი, მეშუშე კლიკო, — შემპარავი, ავის
მდომი, გაზვერა, მტყუარი და ცრუ მოწმე, შემწვანებული
სახისა — კაცი კი არა, აბლაბუდააო! — იტყოდნენ.

ენამძინარი, ღეჭია მეველე — ყრუჩა, გადაბარჯღულ ხეს
რომ ჰგავდა! თვალჩაჩხი, ჯულურა.

თოხიტარა — ნალევა კაცი, ჟღლეურა, უფრთიანო, უვარს-
კვლავო და კიდევ რომელი ერთი? „გადაბმულიც“ იქა ბრძან-
დებოდა, — მაღალი კაცი, თითქოს ორი კაცი ზედისზედ გადა-
უბიათო!

ლობემძვრალა, ასკინკილა, წიპრუა, — ნაცარწაყრილი, გა-
ბათილებული ცალკე სიღარიბისა, ცალკე აშარი ცოლისაგან.

მეღორ-ხბოვე — ცხვირგატეხილი ბაჭყურა.

უენო, უტყვი კოსინე — ძეძვის მჭრელი, დაძონძილ ჩო-
ხაში.

და განა ვინგინდავინ ან ყველავინმე? არა, სულ ნარჩევი, დარბაისელი ხალხი! — რუმბია, ყლარტია, ბოტი, ბანჯურა, ლაჩინა, ხლართია, ზაქუტა, ოდოქა, ფუმფლა, ყლინწო, ქვიშ-რაფა, ლინტალა, ბატატა, ხიწვა, ყბალია, ტარაკუქა, ლოპო, წვერიკმაზია, ლიტრიძირი!

კიდევე:—ბაქიჭაური, ტიტლია, ბრაცანა, ციცილია, ჩვენი თლოშიაური—სუფრის ჭირი და ყოტალას ვინდა დააკავებდა?

ჰო, კიდევე ერთი, არ მახსოვს კარგად, ბოყო ერქვა, ყეყე თუ ყოყო! და ბოლოს ვინმე პირიქითელი, ტყიდან შემოხე-ტებული მონადირე, გოდერძი... და ტალიკ-ტალიკი ბიჭები!

გულისხმისმყოფელს რომ თვალი გადაეგლო სუფრისათვის, გაიფიქრებდა: ადვილია დევთა შეყრა, მაგრამ გაყრა გაძნელ-დებისო! ამოდენა მგლის ღმუილი, უამბოდ არ გადაწყდებო!

ხარობდნენ ლიტრის კაცები, რომელთაც მსხვილი კისერი-ცა ჰქონდათ და მსხვილი სამამულე რქაც! ბელელი და ჭურმა-რანი საესე!

სუფრის მეორე ნახევარში დამცრობილი, უყოლელო, უქო-ნელი, უპოვარი, უბარაქო გლეხები დამსხდარიყვნენ — უხა-როები, „მჭადი-აყვირეები“, ფიცგაწყვეტილი ღარიბები, — ფარაჯებში, დაკონკილ ახალუხებში, ამერიკოს ლურჯ განიერ შარვლებში, ტყლაპჩადებული ქალამნებით. რა მისაჩემი იყო ეს სუფრა მათთვის?

ამიტომ ცოტა დამკრთალები იყვნენ. მუდამ უსაკმარონი, შიმშილის კარს დაბმულები, თავს უხერხულად გრძნობდნენ სუფრაზე, სადაც ქონის ღვარი დიოდა. ნათლიდედის ხონჩაზე თონის ნამცხვარს, შოთსა, გადაკეცილ ლავაშს, ნაზუქს რომ

უმზერდნენ, შინ პირმოხეჩილი ქერის პური აგონდებოდათ და სუფრისა ეხათრებოდათ, სალუქმაპურო ფიქრებში გართულებს, ცოლ-შვილი ეცოდებოდათ.

პაპა, მახსოვარი ძველი კაცი, ძველ ამბებსა და თავის თავგადანაყარს ფგონებდა. უამბო კახეთში შამილის შემოსევა, ჭავჭავაძიანთ ქალების გატაცება წინანდლიდან. მღევარში პაპაც გაეწვიათ. სულ ხმალზე ვიყურებოდიო, გულადი ვიყავიო!

პაპამ ისიც უამბო, თუ როგორ გამოეცხადა პაპის პაპა, საომრად რომ მიდიოდა ლეკეთში. განა სიხმარი იყო, ბაღში ვიჯექიო, ჩვენ კაკლის ხეს ვემშვიდობებოდიო, იქნება ველარც ვნახო-მეთქი! უცებ, რაღაც განათდაო. დღე იყო, მაინც ასინათდაო. ვხედავო, მოაბიჯებს, მრავალღონე, ახოვანი ვაჟკაცი შუახორცად, ლეგა ჩოხაში, ხმალი მიწაზე სთრევდაო, სულ შუქი გადასდიოდაო, მკაცრი სახე ჰქონდაო! ჯერ ვეება კაკლის ხეს ძირი მოურყიყო, მერე წინ დამიდგა, — პაპის-პაპა ვარ შენი, — თორელიო! — ბიჭო, არ შემარცხვინოო! სახელი სჯობს ქონებასაო. დაჭრილობა და ჭირნახულობა სჯობია ტყუილად ხეტიალსაო! მტრის გამბრუნებლები ვიყავითო, ხმლით გვეჭირა მამულიო! საქართველოზე ხელი არ აიღოთო! ენით ნუ ჩქარობთ, საქმით იჩქარეთო! და უცბად, გაუჩინარდა, განქარდაო. მას მერე, რკინის გული ჩამედგა; აღარაფრისა მემინოდაო; როცა სხვები ფერხთ იხდიდნენ, მე მაშინ ვიცვამდიო!

— გვიამბე, პაპა, როგორ ეომე შამილს? — ეკითხებოდნენ ომსმოწყურებული ქეჩიოიანი ბიჭები.

— ომში ველარ მოგვიხდა წასვლაო, მხოლოდ მღევარში კი ხშირად ვყოფილვარო! ერთხელ, ყაჩაღებს გამოვეკიდეო,

მესროლესო, ტყვია ზედ ჩოხის მასრაზე გადამემტვრაო; ჩემს ხორცს ტყვია არ ეკარებოდაო!

გულმართლად უამბობდა პაპა და ყველაფერს ზედ დაატანდა: — შენმა მზემ და ჩემი სულის ცხოვრებამაო!

— გვითხარი, პაპა, შესაგონარი რამ! — ყელგამოწევით ეხვეწებოდნენ მოსხეპილი, საქორწილო ბიჭები.

— შეწყალება, შეწყნარება, სიმართლეო! იქეიფეთ, შეილებო, იმხიარულეთო, ჩვენ წავალთ, სხვა დარჩებაო, ქეიფი შეგვრჩებაო! მხოლოდ, არ აგრიოთ დიდმა ნდომამ, პატიოსან ლუკმას დასჯერდითო; შრომა, ოფლი და ამაგი ყველაზე დიდი სიმდიდრეაო! ეშმაკის ნატეხი პური ნუ გინდათო!

მსუქანი, მაძლარი სუფრის დანახვით გამხიარულებული გლეხები ერთმანეთს ეხუმრებოდნენ:

— ეს რა მოგსვლია კაცო, წინათ დაბალი იყავი, ეხლა მაღალი მეჩვენებო! — ეუბნებოდა „გადაბმულს“ დიდი ხნის უნახავი გლეხი მეზობელ სოფლიდან.

— ვერ მიხვდი, ბიჭო, ეშმაკებს გაუწევიათო!

— ჰაი, შე დაუწებავო, შე ქვაფქვიავ!

— ჰაი, შე კეტურავ, ჰაი, შე გოჭისკუდავ! — აღერსობდნენ ქიმუნჯისა და წიკპურტის წაკვრით...

თამადად ღვინჯუა აირჩიეს ერთხმად, არც იუარა... ყველამ იცოდა, რომ ეს ასე უნდა ყოფილიყო. ტოლს ვინ დაუდებდა, სად იყო მისი ფანდი?

გულმა გულში, სულმა სულში ჩაიხედა!

ხომ ქართული სუფრა იყო.

— თქმა იყოს და გაგონება!

გასუნთქულები უსმენდნენ თამადას; ისეთი სიჩუმე დად-
გა, როგორც უფრინველო ტყეში!

თამადამ სიტყვა ჩასო მარგალიტში! ახალნათლული ტყუ-
პები აღდგერძელა. სადღეგრძელო მოაჩარჩოა: პატარები ხარ-
თო, მაგრამ რკოდან დიდი მუხა ამოდისო; თან ჯვარანგელო-
სი, ხატიცხოველი და საქართველო დაალოცა...

ტყუბის ცალი სულ ტიროდა, არტახებიდან მკლავებზე
ამოეყარა. დედა ჩიოდა, ნაკიანიო, მეორეს კი მამიდა თა-
ნუშიამ ძუძუ ჩაუღო: — მამიდამ რომ მოაწოვოს, მომღერ-
ალი გამოვაო!

ბებია მარადია სულ მთვარის ამოსვლას ელოდა და
მთვარემ ვერცხლი რომ გადმოშხეფა, შვილს აუტყდა,—
ნაკიანი ბიჭი მთვარეზე გაიყვანე, მთვარეს შეუძახეო: —
მთვარევ, მთვარევ თუ შენია, წაიყვანეო, თუ არა და, შენ-
სავით გაავსეო!

თაყამ იუარა, — ძველი, აჯამი ხალხი ხომ არა ვართო, შეს-
ცივა და უარესი დაემართებო!

— ბავშვი კი არა და, მოდი, წიპრუა გავიყვანოთ მთვა-
რეზეო, იქნება მთვარემ გაავსოსო, თორემ სანამდის უნდა
იაროს ასე დალეულმა და გამოჩხიკვეულმაო! — იხუმრა კალა-
ტოზმა ყიჟალამ და ქალ-რძალი გააცინა. ბიჭები კიდევ მიიწევ-
დნენ წიპრუას გარეთ გასაყვანად, მაგრამ წიპრუა სუფრის
ქვეშ შემძვრალიყო და იქ გატრუნულიყო...

გაიშალა საუბარი... სიტყვამ გაინავარდა! კისერყანგიანები,
ჭირდათმენას ჩვეულები კოყანდარა ხელით გაკაქებულ ყა-
მირს რომ აპობდნენ, ახლა გაძმობილდნენ. ერთმანეთის ტო-

ლის დამდებნი ერთად ისხდნენ, ამხანაგურად. თუმცა მათი ერთადერთი ამხანაგი შრომა იყო.

— გუშინ იმდენი ვიმუშავე, ძაღლის სული ამოვიღეო!

წრევანდელ მოსაველს აყივნებდნენ:

— ხორბალს მაწივრობა არა აქვსო, ყინვამ მოთუთქა, ლოჯი ვერ გაიტანაო, ჭიოტა, გულაფშუტა მოერიაო, ყანები აჩაღაო!

გაზაფხულზე ყინვამ კვირტს წელი შეუშინაო! ამ ზაფხულს ღრუბელი დახმაო! შატროვნელები კი ღვინის მოსაველს აქებდნენ, ჭურჭელი არ გვეყო.

კარგუნახაეები, გულდათოვლილები გმინავენ: — სიღარიბე ძილსაც გვიშლისო! შეუკურთხეს ცოდვიან ხელმწიფეს, მის რჯულსა და სამართალს! შეაჩვენეს ჯვარზემცმელები, ჯიბეგასუქებულები, შემბოჰავეები, სოფლის სათოკე კაცები... დაასკვნეს: სიღარიბე ღვთიდან არიო!

ორივ აკლდათ: პურიცა და მზეც!

— ღმერთო, შენითა! — დაიძახეს და ღვინოს მიეძალნენ მზემწყურვალნი.

ისმებოდნენ მიწის ნაწური, მზის მონაყური, მათი ნაოფლარი — ივრის ღვინო, ივრის წვენი...

თავიდანვე სიტკბო და გულითადობა გამეფდა. მოდიოდა გამტკიცული სიტყვა, სულ შაქრის დენა იყო.

გული გაითათლა... წყლები წყლებს ესართებიან, კაცი — კაცს!

— ჰეი, ძმაგულავ, ეგრე მომები გულზე, ეგრე შემიტკბე! — ეთანადებოდნენ ურთი-ერთს!

— გულისათვის გული ჩამიდეო!

— ერთმანეთისაანი ვიყვნეთ, საერთმანეთონიო!

ხალხი დამწყემსდა...

პურწმინდა დიასახლისის პირზე ვარდი ეშლებოდა... გაზარატებული კაკლისა და თელის ხონჩები შედიოდ-გამოდდიოდ-ნენ; ჯამი, კათხა, ჯიხვები, ჭიჭლიყურა საღვინე, გოზაური თახჩებიდან იყურებოდნენ და თამადის გამოძახებას ელოდნენ.

თამადა იჯდა მორკმული, თავგზიანი... დამყარებული, დადგინებული, თამადობა-დაკურთხებული, შეერთხმებული სუფრასთან.

ოქროს ქოჩრიან ბაიებს მკლავები ამოეყარათ ხოჭიქიდან...

უეცრივ, სუფრაზე ცისარტყელასავით შემოეღვარდა, შემობრიალდა პატარძალი დუღღუბა, — ცოლი თაყას უმცროსი ძმისა, რომელიც ახლა რუსეთში სალდათობის ბეგარას იხდიდა, ამ ზაფხულს წაიყვანეს. ბებო მარადიას რუსეთიდან მოწერილი შვილის წერილები ბალიშქვეშ ედო და ცრემლით ასველებდა. ახსოვდა კი პატარძალს? — არ ვიცი! მხოლოდ ქალები ტუტუნებდნენ: უმაქნისოა!

პატარძალი—გაცინებული მაისი! ლალი და ბროლი! გადადღადებული სახე, ჩაბნელებული შავი თვალები... შოლტივით ოთხი დაწვნა თმა სადრეკამდის ჩამოდიოდა, ფარშავანგულად იარებოდა, ყაყაჩოსავით წამოწითლება იცოდა! ფერხორციანი, — ნამდვილად მზის გამონაყოფი! თვითვე გრძნობდა თავის ძალას, — აბა, ჩემსავით ვინ გამოსულაო! ახალვარდი ვარდკაბაში იყო... ყველას უხაროდა პატარძლის შემოცქერა! — ამოშვებული ალვა! მისი ვარდული. შედიმება, ჩაკდემით დგომა; — ხომ გაგიგონია გლახური ნათქვამი: დედაკაცს დღეში სამი სიტყვა ეყოფაო! მისი ხოხბური რონინი,

ყველას აგიჟებდა. შენ მზეს ელოდა თვალი, ამასლა იტყოდ! მაგრამ სუფრაზე არავის უფიქრია, ნეტამც ერთი მაკოცნი-ნაო! — ყველა ლამაზი ცოლის დაა! — ეს ახსოვდათ კარგად.

თამადა ღვინჯუამ იმედები გაამართლა, პირიდან ოქრო სცვიოდა, სიტყვით ზღვა გადააყენა, ზღვაზე ხიდი გადო; ცაზე კიბე მიიღვა, მზესთან აღიოდა-ჩადიოდა, მართლაც, სწორ-უპოვარი თამადა იყო, უტოლუმბაშესი! სუფრაზე ვარდმანანა სწვიმდა...

— რათ არა ლხინობ დარბაზნო, დარბაისლებით სავ-სეოა—მჭახედ შეუძახა პაპამ ჯერ მოკრძალებულ სტუმრებს, ჭამაში გართულებს. ის-ის იყო ღვინჯუამ პირველი ჯამი გაავ-სო და... კარებში შემოყო თავი შარვალგამოღადრულმა თლო-შიაურმა, შეშინებულმა, უფრო იმით, ვაი, თუ სუფრას თავ-შივე ვერ მიუსწროო, ხორცის პირველ ნაჭრებსო მან თავ-მომწონედ უჩვენა მასპინძელსა და სტუმრებს ძაღლისაგან და-გაზული წვივი; ბოთვერა ძაღლს ჭიშკარშივე დაეგლიჯა. ქაჩასთვის ხმა სულაც ვერ მიეწვდინა, ისე გამოქცეულიყო უკან. პაპამ დასცინა: — აბა, შენ გაგზავნიდა ნეფე ერეკლე საომრათაო!

კაცებმა მაშინვე ჩვრითა და აბლაბუდით შეუხვედს მსუბუ-ქი ჭრილობა და შუაში ჩაისვეს, როგორც ნასახელარი გმირი და ღვინით სავსე ჯამფიალა დააღვივინეს, რის შემდეგ დაქი-მიტებული თლოშიაური გლემურჯივით ეცა ღორის მცხინვა-რე ლურთებს! ცხიმისაგან თითები და ლაშები უბზინავდა... დიდხანს იჯდა ჩაგინძრული, რბილი გადაყლაპა, ძვალი ჩატ-კვერა, და წარმოიდგინეთ, სახე კიდევ გამოუპირგვალდა! სუფრაზე მუცელპირმიდგმულმა პირწმინდად მოტვლიბა ყვე-

ლაფერი, მაგრამ ვერავინ შეამჩნია. მერე სამზარეულოში გაჩნდა; აქ გაღვივებულ ცეცხლთან ჩაცუცქული მწვადებს ხანხლავდა. მწვადის დამდნარი ქონი რომ ნაკვერჩხალს შიშხინით ეღვენებოდა, ის უყვარდა, ახალი მადის საღერდელს უშლიდა...

ღვინო დარუვდა... ადღეგრძელეს გლეხკაცის ყოველი საფიტარი: ღმერთი დაუსაწყისი, ცამზე, დედამიწა უღვეელი, უშრეტელი, ყანის მუხლი, ვაზის დედა, მებაღის ნობათი, ხარის ქელი, აკვნის ფიტარი, წისქვილის დოლაბი, სიმინდის ფრჩხილი, ახალ-ნერგი; რქადახვეული ყოჩი, მინდვრის თარგი, აბრეშუმის ქია, ქარფეხა ცხენი, ფუძნარი გუთანნი და ხმალი! ჰე ვინ იცის, კიდევ რამდენი!

ღვინჯუა ჯამს ხელადას დააჯახებდა, გადააწვდიდა თაყას და ეტყოდა:

— იყავ ჩემი ნებისა!

თაყა მორჩილად მიიღებდა ჯამს და შეაგებებდა:

— ვარ შენი ნებისა!

თავის მხრივ, თაყა სხვასთან გადადიოდა ალავერდს და სუფრას ამაგრებდა, აძლიერებდა.

— მამულზე რომ ობოლი დადგება, იმას გამარჯვებო!

— მამა-პაპის ძვლების ნაცარს გაუმარჯოსო! — ასწია თამადამ ყანწი. ახორხორდნენ გლეხები, — გაუმარჯოსო!

— ორბთ-ხელმწიფის შვილს გაუმარჯოს! — ისევ დასძახა თამადამ, თუმც არავინ იცოდა ვინ იყო ორბთ-ხელმწიფის შვილი, ან რატომ სვამდნენ მის საღღეგრძელოს, — მაგრამ არწივი გულში ყველას უყვარდა!

ბუხარი ცეცხლის ბურჯღლებს ჰყრიდა... პატარძლის

ლოყებივით გაქონდა ღაღღადი... იწვოდა რცხილის კორჩხ-
ლები, უტბად, გაკვირვებულმა წიბრუამ შეჰყვირა: ხალხნო,
ცეცხლმა გაიცინაო! ღმერთმანი, ჩემი თვალით დავინახე, რო-
გორც ლამაზი ქალი, ისე იცინოდაო!

პატარძალმა შეიკდიმა...

ყველას უხაროდა ბედნიერების ნიშანი!

გახარებულმა თაყამ კიდევ წაუჩინჩხალა ცეცხლს; ბუხრი-
დან ბროწეულივით ნაკვერჩხალი გადმოვარდა. თაყამ ფეხით
მოსწია.

— არ ვარგა, შვილო, ფეხით ცეცხლის მოწვევა, საიქიოს
კბილით მოგაწვევინებენო! — შენიშნა ბერდელამ, რომელიც
აქამდე ისე გახევებული იჯდა, თათქოს ვერაფერს ჰხედაყ-
სო!

სწორედ ამ დროს, კარებში გამოჩნდა კოკობზიკა მეჩან-
გურე ცანგალა თავისი ჩანგურით. ის იყო მისი ცოლიცა და
შვილიც! შეზარხოშებული იყო, — პირნაყვავილარი, დაკენკი-
ლი, ქერაქოჩრიანი.

— განა ეგრე იქნება? საგანგებოდ მოგიწვიე და ესე კი
დაიგვიანე! საყვედურით მიმართა თაყა მასპინძელმა.

— რა ვქნა, რომ აღარ გამომიშვეს?! — თავი იმართლა
ცანგალამ. საგარეჯოში, სხვის სუფრაზე გატყბვლებულიყო!

— აი, გაქრეს შენი სარჯულავი! — ერთად მიაძახეს მე-
სუფრეებმა და მიესაყვარლნენ სიმღერების მწყემსს.

— კაქკაქო, კარიოქელო, ენაზე კორძი არა გაქვს, ამოთქვი
და ამოთქვიო!

თამადამ დაგვიანების ჯარიმა დააღვეინა ცანგალას სამი
ჯამი და მერე უბრძანა:

— გამოთქვი და შეგვაძვეო!

— ქერონა ჩიტი ვარ, სიმღერების ამომღები, მეტი არაფერი! — ზარხოშულად იღიმებოდა ცანგალა, — რასაც გულიდან ამოვიტან, იმას ამოვლექსავ, თქვენ სამქებროდ როდი მცალიან!

და გულშეფრთხილებულმა თვალი შეჰკრა პატარძალ დუღღუბას:

— ხატულავ, ჩემო ხატულავ, ჩემო ედემყვავილო! ადუღდა გულში პირველი სიყვარული ძლივს არ მოვიტავხელე? სად გამოუთხოვებიათ, რამდენი ვეძებე!

— დახე, ამ მაწანწალა-ჩიტირეკიამ, ამ ბუხუნძელა ჭიამ, სად მომაგნო?! — წყინობდა უღვთო ლამაზი — თავი მტკიოდა მაგის შაირებისაგან!

დამლექსებელმა ყველას მიუღიქსა, გაგულისებულნი ატრილებდა ჩონგურის ყელს:

— სუყველას ლექსს გამოუთქომ, რაც მოხდეს ქვეყანაზედა!

— ნეტავი ზოგი გავყიდო, ლექსი რათ მინდა ამდენიო!

— ვაჟა-ფშაველას ავჯაბრდი, აკაკის — იმის ძმასაო!

მანც არ შეუწყვარდებოდა პატარძალს მოშაირე, როგორც არ გათეთრდებოდა ტურფას შავად შებურული წამწამი!

კვნესოდა, კი არა მღეროდა ცანგალას შეთელილი გული, შესეტყვილი სიყვარული.

მოქნილი ყბების პატრონი, ქვეყნის მალხინებელ-მაამებელი; თუმც ბაქიაობდა, მაგრამ ეს, გარეგანი, ზერელე ბუნება იყო მისი; შიგნიშიგან კი ცანგალას სული სევდით იყო მოქსოვილი! გულს უწყვავდა გასრესილი ბავშვობა, უწყალო დუღ-

ღუბას სიყვარული. გაცრუებული წადილი, ამოფხეკილი იმედრი! ბედნაკლები მოშაირე ახლა ჩონგურის სიმებით ემოციქულებოდა ღუღღუბას დაკეტილ გულს...

— ვაჰმე, რა ტკბილი ღამეა, ნეტამც არ გაათენაო!

— ვაჟკაცური გვითხარ, საგმირო! — შემოსძახეს აქეთ-იქიდან მეჩონგურეს.

ცანგალამ ძალა მოიკრიფა და დაამღერა:

— ვაჟკაცს თუ ემოქნარებიან,
ან ჰშიან, ანა სწყურიან;
მოუვლის ომის ხალისი,
გულის ფიცარნი სტკივიანი!

აქ, მონადირე გოდერძიმ მკერდზე დაიკრა ხელი და პატარძალმა მის განიერ მკერდზე მიყრდნობა ინატრა.

სუფრის ბოლოში, კარებთან ახლოს, ღურგალი „დაღამდა“ იჯდა მოწყენით, — ოქროს მარჯვენის, განთქმული ხელოსანი, თუმცა ღარიბი, რადგან სხვა სოფელში სამუშაოდ არ დადიოდა ათქვირებული, მკერდელა ცოლის, ტატლაშას გამო. ეშინოდა, მასთან ერთხორცობა არ შელახულიყო. მუდამ მოქუშული, სახეჩამომტირალი, გულდაბურული... არასდროს არ გაეცინა, აკი ახლაც ეხვეწებოდა ყიჟალა:

— ოღონდ ერთი გაიცინე, მამა არ წამიწყდება, ცხვარს დაგიკლაო!

„დაღამდა“ ფიქრით შინ იყო და სუფრიდან ბარე ორჯერაც გაიპარა ცოლის შესამოწმებლად. მეზობლებმა იცოდნენ მისი ხასიათი და ხათრით ვერას უბედავდნენ, თან კიდევ იმიტომ, ვინ იცის, ქალი ეშმაკის ქისააო, ვინ დახარჯავს, სად

დაიხარჯება, რას გაიგებო? როცა „დალამდამ“ მესამედ მიატოვა სუფრა, გამწყვრალმა პაპამ ბრძანა:

— გეთაყვა, ძალი დააბით სუფრაზე მაგის ადგილასაო! დაღვინიანდნენ...

ონავარ ცანგალას ჩონგურზე გადაჰქონდა თავისი გულის ნაცეცხლავი:

— მოუტკბილე, მოუშაქრე! — დასძახოდნენ აქეთ-იქიდან.

— ეგრე შეუნედლე, ეგრე! — აქეზებდნენ მოშაირეს გულშესრულებული მოქეიფენი.

— სახელის ქნაზე დავდივარ, განა ჰამა-სმაზე! — პატარძლის გასაგონად კვეხულობდა სახედასხივიანებული, გულში ჩასინათლებული ცანგალა და ხან სავესე ჯამს ჩაჰყურებდა, ხან სავესე მთვარეს, — გაფუებულ ღუდღუბას.

პატარძალი კი... ჩაგიშრული თვალებით მონადირეს ჩაშტერებოდა. ღუდღუბას მარტო მონადირე ესურვილებოდა... ირმებსა და დათვებზე შეყვარებული რეგვენი მონადირე კი, ვერ ამჩნევდა პატარძლის ყურადღებას.

მონადირე გოდერძი ისეთი ლამაზი ვაჟკაცი იყო, რომ ქალები მასზე თურმე ჩუმაღ წილს იყრიდნენ: წელში გამონაკვეთული, მხარბეჭიანი, ჯილა-თვალემა, შავად დაბუჩქებული ქოჩორი,—მართლაც, მოსაწონი იყო ირმის ნაფრენის მღვევარი.

კლდეზე ავიდოდა უკიბოდ, თვალი ვერ გაეკიდებოდა!

— ბეჩავი, ნისლებს უწვება მთაში, მარტოდმარტო!

ეცოდებოდა პატარძალს, ის კი არ იცოდა, რომ წკირის წვერზე დაბადებულს, წკირზე სიკვდილი ურჩევნია! შავ-მთის მონადირე ჰყვებოდა თავის მონადირულ თავგადასავალს:

უსიერ, დაუბოლოვებელ ტყეებში სიარულს, დათვებთან შეხვედრას; თუ როგორ აიარა ჩამომძვლეული კლდეკიბური; თუ როგორ დაინახა მწვერვალზე ჯიხვის ხრო განთიადური შუქით განათებული; როგორ დააფრთხო ვეძაზე ნამარილევი ირმები და როგორ დააწვინა ცხელი ტყვიით ქორბუდიანი!

თითქოს კვებნა არ უყვარდა მონადირეს, მაგრამ მაინც ამბობდა: ტყიდან ნადირი არ გამივალ! აგზნებული ხელს იშვერდა ფანჯრისკენ და ვნებიანად გაიძახოდა:

— ა, იმ თეთრ მთას გაჰხედე, იქ, ჩემი ნახოცის კვალია! ახლა, ამ შავ-მთას გამოჰხედე, ჩემი ნასროლის ნასისხლი დღე-საც ეტყობა საჯიხვე ბილიკებსაო!

პიროქრობრწყინვალე პატარძალი დუდღუბა მონადირეს ეკერძებოდა, მონადირეზე ეცვიებოდა თვალეზი... ცანგალა კი თვალეზს პატარძალზე იმრუდებდა, ლექსით ცაში აპყავდა, რათა მას ვარსკვლავისთვის მოეხვია ხელები, მაგრამ დუდღუბას არად მიაჩნდა ცანგალას სიტყვები.

აღტრფობილი ცანგალა მონადირის შემხედვარე, თანდათან სულით ეცემოდა. ძნელი იყო მზეთვალას გადაშორება გულიდან, ჯავრით გული გაუცხელდა, აღუღებული რკინის ჟანგის ფერი გაუხდა სახე! არც არავინ უთხრა კარგობა, — ჭირიმე შენი ყბებისაო, აღარც სიმღერა სთხოვეს; იგრძნო პატივკლება და მოიღრუბლა...

— მადლობა ღმერთს! ძლივს არ დაჩუმდა წისქვილის სარეკელა, მოვისვენეთ! — მონადირის გასაგონად წარმოსთქვა პატარძალმა, თუმცა მონადირეს არ გაუგონია, ან სად ეცალა უკ, რამდენი ხანია, თურმე რაც თეთრი მთის თეთრ ირემს დასდევს მხოლოდ ორჯერ ჰყავს ნანახი! ერთხელ, თვალეზი

აება მის დანახვაზე, მეორედ ნახვისას კიდევაც ესროლა, მაგრამ მყისვე მკლავი დაეხუთა!

— იქნებ წმიდა გიორგისაა! — შეეჭვებით იკითხა პაპამ.

— ალბათ, ეშმაკია ირმად ქცეული — დამტკიცებით სთქვა თავებრა დალაქმა და კალატოზმა ყიჟალამაც კვერი დაუკრა.

— როგორ იქნება ეშმაკი ეგრე ლამაზი? ახ, როდის იქნება ხელთ მოვიგდო? — ამბობდა აგზნებული მონადირე და ოცნებით აგიზგიზებული თვალები უელვარებდა.

— ხვალ ინათებს თუ არა, თეთრ მთაში უნდა წავიდეთ!

— არ წახვიდე, არა! უშენოდ გავნიავდები! ქოჩორზე მოგებმევი! ჩოხას დაგიქსოვდი, ახალუხის საყელოს დაგიკრელებდი, ოქროს წყლით ფეხებს ჩაგბანდი! — დნებოდა ძარღვებ-გაცხელებული ღუღღუბა.

— ახ, ნეტავი შენი წარბის ფერთლი მქნა, წამწამზე დაგეყრებოდე!

ზარხოშობა შეიქნა...

— ძმასაც, ისეთი ძმა უნდა, როგორც რო უსიპს ჰყოლია, ბადრი კლდეს გადავარდნილა, უსიპიც გადაჰყოლიაო — მოულოდნელად და უთხოვნელად დაჟღელილი ხმით წაიმღერა პაპამ, რომელიც თურმე ოდესღაც სიმღერას ჩემობდა.

— ყველა გულისძმა და ძმაკაცი გიცოცხლოთ! — წარმოსთქვა პაპამ, — მთისა და ბარისა, ზენაური, ქვენეური, გალმაური, გამომლაური, გიდღეგრძელოთ! — გამოცალა ხარის რქა და წამოდგა ვაგლახით:

— ეხლა კი, მშვიდობით, შეილებო, მეტი აღარ შემიძლიანო, მადლი მომიხსენებიაო! — შეილიშვილები შეუდგნენ მხარში პაპას და ლოგინთან წაიყვანეს დასაძინებლად.

ცანგალამ ჩუმი ღიღინით მიაღძვნა: „დაბერებულხარ, ბიძაო, აბჯართა ველარ ჰზიდაო“!

ბებო მარადიას ისევ ჩასთვლიმა...

ახლა პატარძალი უფრო გათამამდა; უფრო თავისუფალი მოძრაობა დაეტყო. ყელყარყარაობდა, თითქოს ვარდი იდგა მზის კამკამში!

თამადას სიტყვები და აღ-აქრული პატარძლის ლოყები ანათებდნენ სუფრას. ენამძლავრი არავინ იყო სუფრაზე, მაგრამ უეცრად, ყველა ენამზიანი შეიქმნა! მასპინძელი არას იშურებდა, ჩიტის რძის ყველსაც კი ჰპირდებოდა წვეულებს.

ბროლნათელა პატარძალი ჭურჭლის შეტანა-გამოტანისას, იქ, მეორე ოთახში, ხშირად სარკეს ეგრიხებოდა. ალესილი თვალთ მზვერავეი დედამთილი მიუხვდა პატარძალს! ბებომ განმკაცრებით გადმოხედა ტახტიდან, ექვი დაიმართლა, გააღმასდა.

— დაბეთ, შეყვარებული შემომიყვანა სახლში ქალი—ემმაკის ბარტყიაო! — წააგონდა ბევრჯერ ნასმენალი... ისიც კი მოელანდა, თითქოს, მონადირემ ვედრებით შესძახა პატარძალს.

— ჰეი, სახელგემრიელო, ჰეი, ოქროს-ყელავ, მოდი, კაბის ნაწიბურზე გემთხვიო! — ბებოს დამშხალულ სახეზე ნაოჭები ამოძრავდნენ.

— აბა, ერთი გაბედე! სულ კაწაწებით გათრიო! — აღმოიქმინა სიკაპასით.—საწყალი ჩემი ბიჭი! ვინ იცის, რა დუხჭირშია ყინულეთში და ეს კი აქ კვანწიაობს! — გული ეწვებოდა ნაბოლარა შვილზე, სალდათად რომ იყო გადაგდებული ჩრდილოეთში პატარძალმა მყისვე იგრძნო ტანზე დედამთილის ნაწ-

კებლარი, და კრძალვა დაიმჩნია, დაკმინებულმა უკვე წარმო-
იდგინა ხვალინდელი წაქიდება დედამთილთან და წამით შეძრ-
წუნდა.

ღრეობა გახურდა... ყველაზე მეტად თაყა ლხინობდა — კა-
ცი რომ იხარჯებოდეს, აღარას არგებს ღრეკაო! — ხუმრობდა
თავის თავზე. სახლიდან თქართქარი, ღრიანცელი გამოდიოდა.
სიმღერას შეუკიდეს:

— ჩვენ ვაჟი დაგვბადებია,

ღუშმანსა ქალი ჰგონიაო! —

გუგუნებდა სუფრა, ღულუნებდა ბუხარი...

სიმღერა და გარეთ ძაღლების ღარღატი ერთმანეთში ირე-
ოდა...

რა ტყუილად ემართლებოდა ბებო შეწამებულ ღულღუბას!
ნათვალევი პატარძალი სულაც არა ფიქრობდა ხორცტკბი-
ლობას! არა, ეს მხოლოდ ნამცდარი ოცნება იყო! გალალდა
დათოკილა ზვირთი, აფრინდა, ერთხელ ეწია თავის ნებას,
ნისიცი გულდანამალად. ხომ გახსოვთ:

— თერთმეტი უღვაშ-კოკობი,

ქალმა მე მოვკალ იამა,

განა თავს რამე შევმატე?

ცოტა რამ გულზე მიამა!

და მეტი არაფერი, ღმერთმანის!

— განა ლეჩაქი სითბოსთვის გვხურავს, ჩემო რძალო?
ნამუსისათვის! ეს დაიხსომე! — და ბუს წითელი თვალის ნა-
კვერჩხალივით ელავდა დედამთილის მრისხანე თვალი.

ნაკვერჩხალმა მოსუსხა, მოსწვა, მოთუთქა პატარძლის
მზეტანი!..

— ჯვარი აქაურობას! — კაპასი ქარივით შემოვარდა,

შემობრაცუნდა, დაუპატიუებელი ქათათა, ნაარაყალი. გამტყვ-
რალი, ღვინის აღმური ასდიოდა.

ჯოჯოხეთს კიდევ ერთი მუგუზალი მიემატა...

წვრილი, შამფურივით გამხდარი, ცხვირი მამლის ბიბილო-
სავეით გალურჯ-წითლებოდა, ზედ ქლიავივით მეჭეჭი ეყარა,
ჩოხა მხარში ჰქონდა მწვანე ნაჭრით დაკერებული; დარღლი-
ანი, ღირწი, ღლეტურა, კამეჩების მარჩოლარი, ყველას მოძა-
გებულის

— ხევრე და ხევრე, სულ ხევრე! — სიცილით წაიძახეს
გლეხებმა. — ისე გვინდა ახლა შენი თავი, როგორც მელას
მონადირის კვამლი სოროში.

მეზობლები კი შიშით ლხინშიაც არ იკარებდნენ განთქმულ
ჩხუბისთავს, რადგან სუფრიდან ადგომას ველარ ახერხებდა,
და კიდევ იმიტომ; დაპატიუებას მიეჩვევა, ხელს აღარ
აიღებსო!

— ვერ წავალ დაუთრობელი, გინდაც გამაგდოთ ძალი-
თაო! — ქათათას დათრობას კი არა ეშველებოდა რა! მუდამ
არა ჰყოფნიდა ღვინო, ხანჯლით მივარდებოდა ტიკქორას,
თუკი მასრიდან ღვინო იკლებდა:

— პატარა იყავ ტიკქორავ, მოგიკვდეს გამტყავებელი! —
და ბევრჯერაც აუფუქია! ახლაც ისე მივარდა ღვინოს, თით-
ქოს ნათმენი, მშიერი ხბო დედის ჯიქანზე მიუშვესო!

— ვენაცვალე, ვინც ბლომად დალია! — მაგრამ, თამადამ
ნება არ მისცა თვითნებობისა: — დაიცა, გაგიცნოთ ვინა ბრძან-
დებით, თამადა ვარ, მომისმინე, ძმაშვილურადაო, კითხვითა და
ნებადართვით უნდა დალიოო!

ქათათამ გაკვირვებით შეჰხედა:

— ეს ვინ არის, ჩემი დამჩრდილველიო?

— დალიე ნათლულებისა—უთხრა მკაცრად თამადამ, თან ყანწი გადააწოდა.

— რომ არ დამპატიეხს, მაინც დავლიო?!

— კარგი ქვა კედლიდან არ გამოვარდება! თამადამ დაიურვა უბელო, მოჭიხვინე ცხენი.

ქათათას კიდევ შეხვდა ჯამი: — სადღეგრძელო მასპინძლისა. დალიე და დაგვეწიეო!

ქათათამ ნარგები ჯამი აიღო: — ეჰ, ყისმათი არა მქონია, ისევ ჯამი შემხვდა, რას იზამ, დავლევ, როგორც სახარებაში სწერიაო!

მესამედაც ჯამი მიაწოდა თამადამ: — ნათლიებისა!

ქათათამ ხელთ იპყრა ჯამი: — სამი სახარება შეგეწიოს, მეოთხე ზეიღამ დაგყურებსო! ე. ი. მეოთხეც დამალევინეთო! მაგრამ, დარბაისელმა თამადამ მეოთხე ჯამის უფლება აღარ მისცა. ქათათა გაგულისდა, ბოროტად შეაცქერდა თამადას.

— რა გინდაო?—წყნარად შეეკითხა თამადა.

— რა მინდა და... საფერავით ავსებული ჯამი! დამალევი-ნეთ ნება-წადილობით!

— ჯერ რაც დალიე, იკმარე!

— პიტნავ, გიცნობ, რაცა ხარ, მიძევიხარ წინაო! — დაე-ძუქრა ქათათა ღვინჯუას.

— დიდი ზეავი ხომ არა ხარ, რას ხორხორობ, კაცი ხარ, მოკვდავი, ხვალე ნაცრად იქცევი! ხვალე მიწა დაგაფასებსო! — ეუბნებოდა თამადა.

— მიაშავე, მიაშავე! — ეხვეწებოდა თაყა, მაგრამ თამადამ არ მისცა დასტური.

— დიამც იყოს, დიამც იყოს! — ჩაიხარხარა გაიძვერა ქათათამ.

გაიმარჯვა თამადამ, მწყობრში ჩააყენა თავხელი, მოსპო ურჩობა!

ყველას დაავიწყდა მათი შეკამათება. ლხინი გაგრძელდა. ჯამებმა აიარ-ჩაიარეს... შეღვინიანდნენ... ოროველა, ურმულიც და „გურჯანელნიც“ შემოსძახეს. საღერღელ-აშლილი ქათათა კი ქაქანებდა, როტავდა:

— მე იმიტომა ვსვამ, რომ წუხელ პაპაჩემი მეხვეწებოდა სიზმარში: — არიქა, ბიჭო, ნამამასახლისარს ცოდვები მერევა საიქიოში, ჩემი შესანდობარი მალე დალიეო, ან აქამდი რათ დამიგვიანეო! თანაც ჩემი გვარი ზედაშიძეა, — აბა, როგორ არ დავლიო ბიძაის კაცო: თორემ ღვინისათვის სად მცალიანო?!

ყაყანებდა, ყბედობდა დაუპატიებელი ხაპირა; ღვინისაგან შებუღბუღებული ჯამს ეძალებოდა, ყველას მჯიღავდა.

ბოლოს ღვინჯუას შეეთამაშა სიმღერით: — ან ღვინო გვასვი, ან წყალი, ან თოვლი შემოგვიტანეო!

თან შესამეცნებლად დასძინა: ხელადა არ უნდა გაშრესო! ...და შემოდირა სველ-სველი ხელადები, ჩარეკები, საღვინე გოზაურები, ივსებოდა ლიცლიცით ჯამები, ჯიხვები...

ცეცხლისმყრელი პატარძალი დუდღუბა ტბურ თვალებს აელვარებდა. მზეზე ლამაზი ვარო! შეღერებული, მოსხებილი ბიჭები ღვინით ძლივს იჭრობდნენ პატარძალის თვალთა ნაპერწკალს, თორემ ისე დაიწვებოდნენ თავიანთ ჩოხებიანად, რომ ფერფლიც აღარ დარჩებოდა მათი!

ის-ის იყო, თლოშიაურმა შამფურზე ღორის მოშიშხინე მწვადი მოართვა გალაღებულ თამადას, რომ განძვივებულმა

ქათათამ სუფრას ღონივრად დაჰკრა მუშტი და ჯანყურად გამოიქუხა:

— თამადა გამოვეცალოთ, გადავაყენოთ, გადავადგინოთ! — ქათათას უხამს ყვირილზე მთვლემარე ბებოსაც კი გამოელვინა.

— ეგ რა ცოდვის კითხულია? დაიწვას მაგის აკვანის ვინ შემოუშვა გზაძალი, ღვთის გარეგანო! ცეცხლი ჰამოს და გენიაო! — იწყებდებოდა, თან ერთი თალია კიდევ გაუხარდა. რადგან ჩაძინებულს პატარძლისა და მონადირის დაზვერვის ძაფი უნებლიეთ შესწყვეტოდა!

ქათათას სიტყვა მართლაც იყო კლდის გამხეთქი თამადას მოეჩვენა, სახლს ჰერი აეხადაო, ცისქცევა მოხდაო რაო? რა სთქვა ამ გასამტვერებელმა? გულში გაივლო და ჩაჰკიდა ქალარა თავი. გაფუჰდა კაცი! ცხენს რომ ძარღვი დაუშინდება, ისე!

ღვინჯუა ყურებს არ უჯერებდა, ისე იყო ნაერთბაშევი ქათათას უხათრო სიტყვამ გული შეუღეწა. მზად იყო ნიგუზარი ესროლა.

და მართლაც, მთელი სიცოცხლე თამადობს და ასეთი უჰაცრაული და უჯერო არავის უკადრებია! ისიც ასე უცხადებულესად! — აი, ჭირსაცემი! აი, უღვთობა!

სიტკბოიანი კაცი გაამწარეს! სუფრის ნებიერი! წამით, კიდევაც დააპირა ფრთხილად სიტყვა გაეტარებინა: სიტკბო და სიყვარული არ მომიკლია, შრომა და გულისმოდგინეობაო! მაგრამ, დარბაისლურად თავი შეიკავა, გული დაუღო ნებას...

— გადავაყენოთ ჩემი წადილიაო! — ყვიროდა, კრჩხია-

ლებდა ღვინისაგან შევად აღანძული, გაათრებული, თამა-
დის მწუნობარი ქათათა.

— რათაო და რითვინაო — შეუბედა თლოშიაურმა, რო-
მელიც ახლა ღორის თავს მისჯდომოდა მყუდროდ და გუნე-
ბიერად, მაგრამ სიტყვა უცბად შესწყვიტა, ისევ ღორის ყბამ
გაიტაცა.

— ეგ როგორ შაიძლება! ჩვენი არჩეულია, შენი ხომ არაო!

— შენ ვინა გვითხავს, აბუჩა სტუმარი ხარო! — შეუყვირა
ყიქალამ და ჩინჩხვარივით მკლავები გაშალა საჩხუბრად.

მეცხვარე მგელხარს გაელიმა...

მთვრალ ქათათას აღარ ეყო ღონე იერიშისათვის, წამოი-
წია კი — ჰაი, შე ქონდარივით ამოსულოო — ესლა უთხრა და
დაჯდა... დამუნჯდა... დიდხანს ანჯღრევდა სუფრაზე მეზობ-
ლებს, არავინ დაუჯერა და მალე ხვრინეაც ამოუშვა...

თამადა ჯერ კმეხად იჯდა სიტყვა-მშრალი, ბოლოს თავს
მოეგო, თვითონვე გაივსო ყანწი და გაბზარული სიტყვით
წამოსთქვა: — ერთმობას გაუმარჯოსო!

— შენ შემეფარე ძმობის ჩირდილო-ო! — ხმის თრთოლვით
ამბობდა გამონაძალ, გამონაწვეალ სიტყვას, კინალამ გასამარ-
თლებული, ახლა სირცხვილს გადარჩენილი, თუმცა სუფრის
მხარდაჭერით გამხნეებულნი თამადა.

მაგრამ, სირცხვილი ხომ დიდი ქვა არი! ამ ქვამ დაუბეგვა
გული! ამ წუთიდან ის ღვინჯუა აღარ იყო, რაც წინათ მისი
სულის დროშა ძირს დაეშვა! თითქოს ფრთებიც დააჭრესო, —
აღარც წადიერება, აღარც რიხი! გახსოვთ, წელან, რა დაკრია-
ლოსნებით წარმოსთქვამდა ჩამარგალიტებულ სიტყვებს!

— უყურე, რა ხლინკი მიგდო, ეს რა აქლემი გამიკეთა?

მორჩა საყველაწმიდოს დავლევ და წავალ, გავმორდები! მე ამათთვის ვიტანჯები, თორემ, ნეტავ რა მრჯისო — ჩიოლა ღვინჯუა...

გული მოუკლეს თამადას...

მადლი და მფარველობა მოაკლდა სუფრას, ლხინის ნათელი ჩაქრა რიგი და წესი აღარ იყო; ირგვლივ ყაყანებდნენ, ყვიროდნენ, თითქოს წისქვილში არიანო; თითქოს ერთმანეთს ხმაურით ეძებდნენ ყარყატის ტყეშიო!

— დავლიოთ, კიდევ დავლიოთ, შევიდეთ ღრეობაშია! — ყვიროდა წიპრუა.

ღვეის სისხლი გაჯდა ძარღვებში! სუფრა გამოცოცხლდა, შეადანდგარა გლეხების ხრომ, ამღერდნენ, აღმუვლდნენ... გაჩნდა ცეცხლზე გაფიცებული მოქლრიალუ დაირა... უცბად გადმოხტა - მონადირე, ჩაილეკურა და პატარძალს თავი დაუკრა, დუღღუბაც თითქოს ელოდაო — გულის ფანცქალით გადმოერია აშოლტილი, თვალუქცეველი, გაღწხიბლავი... ხორბალივით ტრიალებდა... წითელი ხოხობი ქვეყანას აყვედრიდა თავის სილამაზეს!

დაირა უფრო გაფიცდა....

— რა ლამაზი ხარ, ხოხობო, რა კარგი რამ ხარო! — უკრავდნენ ტაშს.

რა ბედნიერი იყო!.. მაგრამ ბედნიერება მაშინ გათავდა, როცა მონადირის მაგიერ პატარძლის წინ მგელხარი აძუნძულდა მწყემსურად, გეგონებოდა ზვავი ზანზარებსო.

— რას ამეყუდა, დალოცვილი, თითქოს მზის ნაცვლად ღამე დამიდგა წინაო!

წიპრუამ, ტარაკუქამ, თლოშიაურმა ჩარფუზანა დააბეს,—

იღანცალეს, იბრაცუნეს, თავი ვერას გამოაბეს და ისევ სუფ-
რას დაუბრუნდნენ...

გაბუტული თამადა განზე გაჯდა, უსარბიელოდ...

— აუმატე, აუმატე, თამადავ! — ახლა თითონ ეხვეწებოდ-
ნენ ღვინოსმულები ღვინჯუას, მაგრამ თამადა ისე გაჩუმებუ-
ლიყო, გეგონება, წისქვილს სათავე გადაუგდესო.

— აბა, ეგრე იცის, ერთი წუნწლიანი თავგი მთელ ქვევრს
წაბილწავსო! რა ყურს უგდებ მაგ ტვინგადაბრუნებულს,
ზღვასა ჰხნავს და ქვიშას სთესავსო. რა ვქნა, ხომ ვერ დავი-
თხოვო, ხვალე კი, ვნახოთ რასაც ვუზამო! — ემუდარებოდა
თაყა თამადას...

თამადას კი გული მოსდიოდა, რატომ მასპინძელმა მაშინ-
ვე ხელი არ დასტაცა, ჭკუაცეტი ქათათა ფანჯრიდან არ
ისროლაო! რატომ ყველანი არ აუჯანყდნენ და ქათათა ფე-
ხით არ გათქერესო?

— პურის ვარდის სადღეგრძელო დამალევინეთო! — იხვე-
წებოდა სუფრის არეულობაში შემთვრალეული გუთნიდედა
თარიმანი, დასტურს კი არავინ აძლევდა.

— აწყაფუზ დევი ვარი — ჩემობდა თვალებგადაპრაწული
წიპრუა, გაზაფხულის მელასავით რომ გასწვრილებოდა კისე-
რისი კაი ქარი მართლაც წააქცევდა!

— აზამბარში, აზამბარში! — ბუხუნებდა მგელხარი.

— დალიე, თავმადლიანო! — ვილაცა ეხვეწებოდა ვილა-
ცას.

ტარაკუჭა წიპრუასთან გადადიოდა ალავერდს, სვამდნენ,
თან ილღუნებოდნენ, ერთმანეთს თავპირი ჩამოაცალეს...

გულდაკეტიტ იჯდა გაფასებული თამადა... თაყა ეხვეწე-

ბოდა გამხიარულებას: — რა მოგივიდა, წკიპურტი პანღტრად გეჩვენაო!

თამადას ესმოდა, რა გრიალ-გრიალით წამოვიდა კვარცხლბეკიდან მისი დიდება და დაენარცხა მიწას....

ვინ ააყენებს დაცემულ სახელს?

— არა, წავალ და თან წავიღებ ჩემს თამადაობას! მე კი ბრალი ამიყრია, როგორც უნდათ, ისე დალიონ... — მასპინძელმა შეამჩნია, რომ სუფრას გამოთიშული თამადა სთვლემდა, ჯამი დააჯახა ხელადას და ახლა თითონ თამადას გადააწოლა:

— იყავ, ჩემი ნებისა!

— ვერა, ვერ ვიქნები შენი ნებისა! — აი, საყველაწმიდოს დავლევ და გავწევ კიდეც შინისაკენ, დროა, თორემ შინ ჯალაბი შემიღონდება! — ეუბნებოდა თამადა მასპინძელს და თვალბის ფშვნეტით ძილს იგერიებდა.

— ამ ქვისხეთქელა სიცივეში სად გაგიშვებო?

— ამინდი აირიო, — წუწუნებდა გულნაზუქა დიასახლისი.

— არა უშავს რა, მე ძანძახისა არ მეშინიან!

აიღო კიდეც ყანწი, საყველაწმიდო დააპირა და ის-ის იყო სადღეგრძელო უნდა დაეღია, რომ შესძახეს:

— სამირონო, სამირონო დაგვალევინიო!

დაღია სამირონოც! ახლა უკვე მწყობარში ჩააყენა, დარაზმა დიდმნიშვნელოვანი სიტყვები საყველაწმიდოს წარმოსთქმელად, რომ წამოიძახეს: რატო საქალეთის სადღეგრძელო არ დალიეო! — უმაგათოდ არ ვარგივართო! შეილის გამჩენები, პურის ჩამკვრელები, დამრეცხავები ეგენი არიანო! ალერსიანად ამბობდნენ შეზარხოშებული, გულაჩუყებული გლეხები.

ძარღვდაშინებულმა თამადამ გადასწყვიტა საგმირო ნაბიჯი გადაედგა და ერთი კიდეე ვეაჟკაცა წასვლის წინ, მერე ბოლო სიტყვას იტყოდა და თავის გზასაც გაუდგებოდა!

თამადამ აიღო ღვინით სავსე ჩაფურა, დიდი ქებითი სიტყვა წარმოსთქვა, დამსწრე ქალები ერთობლივ ადღეგრძელა, ნახევარი გამოსცალა და თაყას გადააწოდა... თაყამ ჭურჭელს ძირი მოუმშრალა!

ფათერაკი მწყერის ფერიანო, უცბად წინ ამოგხტებო! ისევ გამოიღვიძა ჭირვეულმა ქათათამ, გეგონება, დაფეთებულმა ცხენმა საბელი გაგლიჯაო! რომ შეჰხედა ღვინჯუას ისევ ჯამით ხელში მდგომარეს, გაღეჭებულმა შესძახა:

— ისევ ეგა თამადობს? — გადავაყენოთო, ყვიროდა ქათათა, ყვიროდნენ ქათათას მოერთჯამენიც თამადის ამდენი ხნის მღუმარების გამო უღვინობით დაზარალებულნი.

სიტყვა გალორდა: ზღვის რყევა დაიწყო; ერთ პირზე როდი დგა წუთისოფელი?

ხმლის ენაზე ალაპარაკდა სუფრა:

— მკვდრებს აკლიხარ, საიქიოს ნისიაე! — თამამად ჰკიცხავდა წიპრუა ქათათას — განა შენგან ეკადრება პატივდებულ თამადას! მაგრამ ბოროტი აგებულობისა ხარო!

— ჰაი, შე სტუმარშინმიუყვანელო, კიწიმწვარავ, თვალე-ბიდან რომ წიწაკა გამოგდისო!

— დახეთ, რწყილიატყავეს, ეს რა სიტყვა გამიქდარუნა!

— ჰაი, შე ნახშირის ჯოროო, ჰაი, შე ძაღლის კბილო! — და უცებ დაეტაკა ქათათა წიპრუას, ზედ შეაფრინდა და ჩაბღუჯა.

— გამიშვით! — იერიშზე გადასვლას იხვეწებოდა ქათათას მკლავებში ჩამწყვდებული წიპრუა.

— ზოგი შენ ხმალსაც აპატიე! — დაცინვით ეუბნებოდა ქათათა და თავის ჩინჩხვარა მკლავებიდან არ უშვებდა წიპრუას.

ქონში მთვლემარე თლოშიაურმა ცალი თვალი გაახილა. მაგრამ მალე ისევ დახუჭა.

წაძიძგილავდნენ. შეიქნა ზედახორა, ჯღეხა. ერთმანეთი დაქოჩრეს, აბუმბლეს, სუფრა დაარიალეს. სუფრის ბოლოში იგრილა ჭურჭელმა, დაიფშვნა, ჩანაქუჭდა ერთიანად. ფრთხილმა სტუმრებმა იჩქარეს, — გაცლა სჯობსო, — ხელერთპირად გარბოდნენ, თითქოს ფული მოუპარიათ და ეშინიათ ზედ წასწრებისაო!

— ღმერთო და აღდგომის მადლო, შენ მიშველე! — გმინავდა ამრიზებული დიასახლისი, თან თვალებზე ხელს იფარებდა, რომ ზარალი თავის თვალით არ დაენახა! მეორე ოთახშიც გავარდა. თაყას აღვიძებდა, — მიშველეო, მაგრამ გონებაში ვერ ჩაეგდო.

— ვერა, ვერ დავლევო! — წამოილულლულა თაყამ, ალბათ ეგონა, ჯამით თავს ადგა თამადა და ღვინოს აძალებდა.

მაშინ უმწეო დიასახლისმა მუდარის თვალით შეჭხედა ნათლია მგელხარს, რომელიც თავისთვის მშვიდად იჯდა და... მგელხარმა გამეტებით სტყურუშა ყურის ძირში ჯერ ქათათას, მერე წიპრუას; ერთი იქით ისროლა, მეორე აქეთ მიაწყვიტა.

— შენმა მარჯვენამ იხაროს! — არ დამალა დიასახლისმა.

დაწიოკებული სუფრა... დაქოჭებული ღვინის წამონა-

ლექი...

წიპრუამ თავს უშველა, თავგის სოროში გაძვრა, სუფრის დამშლელი, მაქცეველი და მავნებელი ქათათა ძირს ეგდო ღვინით შესვარული... პირზე შეჭმობოდა თავისი სისაძაგლე. შეურაცხყოფა მიიყურისისხლა, მითამ აღარც ახსოვდა, ნაძალადევად იღმიჭებოდა,—ღვინის ნაჟური დამალევინეთ, მაშინ წამოვდგებიო!

დამწყაზრებული პატარძალი იდგა, როგორც აღმასცხებული ყაყაჩო, მაგრამ ამ ალიაქოთში აღარავის ეცალა მისი სილამაზისათვის, თითქოს ყველა დაბრმავებულიყო, ველარა ჰხედავდნენ მის ელვანა შემოხედვას და ახლა, უასპარეზოს, გული მოსდიოდა... ღარიბი კაცის ბედელივით დაცარიელებულიყო დუღღუბას გული.

— თამადა?

თავხრილი, გაკიდურებული იჯდა თაფლერბოიანი სიტყვის პატრონი! თავმართალი ვერ გაეგო!

აკი დაეტყო კიდევ სუფრას დაკლებულობა, დაუწყნარებულობა, აღარ ისმოდა სიტყვის გება, კარგგამომტემელობა; აღარ ჩანდა თამადის თანაშეერთება სუფრასთან.

— სადა გყავს, ღვინჯო, დასამხრისი, სულის თვისტომი? გული ნაცრით გაიმშრალე!

— დაბერებულხარ, ბულბულოო!— იძახდა ქვეგამხედვარი.

— ჰაი, ოქროს ენავ, ტყუილად დახარჯულო, დაშაქრულო ენათქმავ, წყალში გადაყრილო ვინ დაგაფასა ენამძლევარი? ჰაი, უმადურობავ, კაცის დაუფასებლობავ!

მერე, ვინ დასცა ღვინჯუას დიდება? ვინ შეეჭიდა სახელგასულ კაცს? ენამთვრალი, ლიკლიკა როხილა, თავაქარა, ყალბანა ქათათა და განა მარტო ქათათა?—მისი ამღევრებიც!—

ყვიციანი თავბერაც ხმას აწევდა ქათათას! გულნამცეცა, ფილ-
თაქვიანი ცხვირის პატრონი,—ბაქყურა, ცხვირი რომ ვერ მოუ-
ხოცია, ისიც ქათათას მიუდგა, დახე, როგორ ყვიროდა,—
გამოვცვალათო!

— გვისამართლეთ, გამიგონეთ სარჩელი პატივდებული
კაცისა!

მაგრამ სად-იყო გამგონე! ეპ, გული გაუხიეს და ის არი!

— განა ღირს ჩხუბი, ისიც სუფრაზე? ჭამეთ, სვით, გაი-
ხარეთ! — ქადაგობდა წამით გამოფხიზლებული ღვინჯო, თან
დაწყნარებას იხვეწებოდა: სიბრძნის დედას ნუ დავკარგავთ,
თაროს ანგელოზი დავატკბოთო! — ნაქადაგარი არავინ შეის-
მინა!..

ღარიგება კი წარმოსთქვა, მაგრამ ისევ მიელულა თვალები.
ჩაფურამ ყინწი მოსწყვიტა თამადას და მასპინძელსაც! სუფ-
რაზე აქა-იქ მოჩანდნენ მოსამკალ თავთავივით თავდამძიმე-
ბული სტუმრები...

თაყასაც ღვინჯოსავით თავი ჩაექინდრა. მალე ორივენი
თვლემში შეცურდნენ....

მარტო ღვინო რას დასჯაბნიდა ღვინჯუას, გულზე წყენის
ჯანღი რომ არ შემოჰხვეოდა! და გაჯავრებული კაცი ხომ
მალე თვრება! თაყამაც ღვინჯოს ხათრით გასწირა თავი და
თუმცა ნათქვამია „საბძელი რო გეწოდეს, ხელი მოითბეო“,—
მაგრამ, დაქანცულიყო! სუფრის შემზადებას ხომ რამდენი
დავიდარაბაუნდა!

ორივენი დაბანგულელებით ისხდნენ. ღვინჯოს კი თითქოს
ხელი თბილ ბალიშისთვის შემოუხვევიაო და იქიდან ამოღება
ეზარებაო.

დიასახლისმა ჯერ მთვრალი თაყა წამოაყენა დიდის ვაი-ვაგლახით და წააბრძანა სამზარეულოში საძილედ: — აქ დაეგდეო! — მერე გამობრუნდა და ღვინჯუას მიმართა: წამობრძანდი, ნათლი, თაყასთან მოისვენეო! ჰკვიანი ქალი ატყობდა, რომ სათამადო პირი აღარ უჩანდა.

— ვერა, შენი ჰირიმე, შინ უნდა წავიდე, ჯალაბი შემოიღონდებ! აი, დაწყენარდებიან, საყველაწმიდოს დავლევ, ისე ხომ ვერ წავალო, — და დააპირა კიდევ წამოდგომა ჯამის ასაღებად, ბურანითა და სითბოთი შეპყრობილმა, — მაგრამ, ახ, სულ ჩაფურას ბრალია, — ვერც ხელი გაშალა და ველარც ფეხის ისევ სანეტარო თვლელაში და ნეტარყუჩობაში წავიდა!..

პატარძალმა, მონადირის ხათრით, ეგებ ისიც დაარჩინონო, ტკბილად მიმართა ღვინჯუას: — რა გეჩქარებო, გარეთ ცივაო, გამოიშუშე, ისე წაბრძანდიო, თან ისე ნაზად ისე ნარნარად უთხრა ეს სიტყვები, რომ ღვინჯუას ბანჯგვლიან ყურებს არასოდეს გაუგონიათ...

— არა, შენი ჰირიმე, საყველაწმიდო და... გზა ყივის წამავალისაო!

ბუხარს ემატებოდა და ემატებოდა რცხილის კორჩხლები, ღველფური ცეცხლი თაფლივით დნებოდა; სითბო და ღვინო ტკბილად უვლიდა ძარღვებში, გარეთ კი ვარსკვლავებივით მოჟიკჟიკე, გარაკრაკებული ცა უეცრივ გაპირბნელებულიყო, შეჯანღულიყო.

ღია კარებიდან სუსხიანი ქარი შემოვარდა, თოვლის ნაგუნჯალი შემოიტაცა.. ოთახში გამქრალიყო თბილი და ნეტარი მყუდროება.

შემოქროლილმა სიცივემ დაჰკრა თამადას! ტვინზე ნისლ-
მოდებული მაშინვე გამოფხიზლდა, დაავლო ქუდსა და ყაბა-
ლახს ხელი და ის იყო კარებთან გაჩნდა, რომ რომელიღაც
მოჩხუბარის შემთხვევითი მუშტი მოხვდა გოგრაში მუშტმა
მთლად გამოათხიზლა,—ღმერთმა გიშველოსო,—კიდევაც წა-
იდუდუნა და გავარდა ბნელში, სადღაც წაეფეთა, მაინც უმა-
ღურ სუფრას თავი გააღწია წასვლა ვერავინ შეუტყო.

დრო ჩამოიძაფა... სმა, ლხინი, გახარება წარმავალია. დარ-
დუბალის კიდობანიც დაცარიელდა... დარიალებული სუფრაც
მალე დაიშალა. ყაყანი, ყარყაშიც მისწყდა.

პატარძალი ჭურჭლის ნამსხვრევებს ჰკრეფდა იატაკიდან.
აი, სადამდე დამდაბლდა მისი მშვენება!

დიასახლისი გულკლებით ჩიოდა, ახსენებდა ძველებურ
დაძმურიან სიყვარულს, სიყვარულიან პატივისცემას და ჰკი-
ცხავდა ძმობისა და მოყვრობის გამტეხს! — დღევანდელ ვაჟ-
კაცებს გული პილპილით აქვთ გატენილიო!

ღვინოში მიხლილ-მოხლილი მგელხარი ახლა ჯონჯოლს
მისძალეზობდა. ჭიან ტყემლადაც არ მიაჩნდა წედანდელი გა-
წამაწია. ჯამზე ღვინო დაუშვა და რომ არავინ იყო სადღე-
გრძელებელი,—შენ ეი, თავგიჭერია, შენც გაგიმარჯოსო! კარ-
გად მოუარე აქაურობასო! — ჯამით მიელაციცა ციცას, რომე-
ლიც ნაბუარ, ნაოხრალ სუფრაზე სადავლოდ გამოსულიყო და
სიამოვნებით კრუტუნებდა...

პაპა და თაყა დიდი ხანია ხვრინვით ებრძოდნენ ერთმა-
ნეთს...

გარეთ ამინდი არეულიყო: ქარი ხეებს ეჩხუბებოდა...

სოფლის წნური ორღობიდან გამოვიდა ღვინჯუა და მტკიცედ დაადგა დიდ შარას.

— ახლა დაზომე გზა! — უთხრა თავის თავს. მოდიოდა კმაყოფილი, რომ სუფრას დააღწია, ისე იყო დატკობილი, გეგონებოდა ტკბილოსნის მინდორშიაო თუ ვარდის ჭალაშიო! და სულაც ვერ შეამჩნია, რომ ამინდი შეცვლილიყო, ცა შავად ჩაღრუბლულიყო, შეგრაგნილიყო. ირგვლივ ჯანღი ბუღრაობდა, ქარი იღრინებოდა, უცბადვე თან აჰყვა ნისლაურა; ცრიატი ნისლის კოტორი ხან წინ გადაუდგებოდა, ხან გვერდით მოუდგებოდა, ხან ქალივით მოეხვევოდა, ხან სუღარასავით; აღარც კი მოჩანდა თეთრად დაზეწრული...

გამოსცდა მოხრეკილ ხევს წყაროსთავის დაპირდაპირებით თუ არა, დაადგა აღმართის ჩახევებულ გზას. ქარის გზა ხომ აღმართია! უეცრივ ტყიდან, მთიდან, გამოვარდა ასპიტი, მარბიელი ელდაქარი კრჩხიალითა და წივილით. ნამქერმა თვალეზი აუბა ღვინჯუას. აღმასა ფიფქი თვალეზს სთხრიდა; თოვლის დათქრიალება, ნამქერი, ქარბუქი გზას არ აძლევდნენ...

— ღმერთო, შენ აუმართე ხელი ღვინჯუას!

თითქოს მხარგაბმით სეტყვა წამოვიდაო და უცბად, ვილაცამ ცხელი სილა დააცეცხლა და თან მუშტებიც დააყარა.

— ეს ვინა ხარ, რომელი ხარ? — უკან მიიხედა სახტად დარჩენილმა ღვინჯომ, თან სახრე მუქარით შეატრიალა.

— მე ვარ, მე! — გადიხარხარა გაონავრებულმა ქარიშხალმა და ყოჩის რქასავით დაეტაკა, დაეჭიდა ღვინჯუას, ჯერ

მოგვერდით, მერე კისრულით, ბოლოს სარმა გამოჰკრა და წააქცია, მაგრამ ფეხზე წამომდგარი მგზავრი არ შეკრთა და კიდევაც გამოემკლავა, — ვერ შემაშინებ, მაგისტანები მინახავსო! ბრღვეინავდა, მკლავძალობდა, ვეშაპივით ბრუნავდა უტეხარი, დამთმენი ღვინჯუა, — ღვინისაგან შეხუტებული და ქარისაგან შეშუშებული.

— რა ძალამ ამოაქანა? — ჰკვირობდა, ვერ გაეგო... მაგრამ, საზარელი ის იყო, თითქოს გვერდი-გვერდ ვილაც ჩუმად ატორღილებული მოსდევდა თან; — ავი სულია, ღვთის იასაული, ეშმაკი, ქაჯი თუ ქარის ანგელოზი! — ეკითხებოდა თავისთავს, აღონებდა ვილაცის უჩინოება. თმა ყალყზე ღებობდა, ებურძგნებოდა.

— ახ, ნეტავ მგელი მაინც გამოჩნდებოდეს, რომ მარტო არ ვიყო, — თან თავს იმხნევებდა: — დამაგრდი, ბიჭოო!

პატარა დაქნილი, დაკვერილი ბილიკიც კი არსად ჩანდა; თითონ, ღვინჯუას გზა აღარა ჰქონდა სულს იქით!

მაინც გულთან ეჭირა იმედი!

— რა დიდი გზაც მე მაქვს გასავლელი: ავივლი გძელას, ნატბეურას, შინდავაკეს და სახლსაც გადავხედავ! ააბიჯე — მთა არი, ჩააბიჯე — ბარი! — გაიმხნევა თავი.

გრივალეთი ზეიმობდა... ქარი ქარელი ბღღვირს აყენებდა, წიწმბატობდა, აფთარივით კბილებს აღრქიალებდა, შოლტებს იტყლამუნებდა... დალესილ აღმასის ფხასა და ცეცხლის ნაკვესის წინწალს თვალეებში აყრიდა ნათამადარს.

— მართალი გზის კაცი ვარ, ეშმაკო, ვერ მომერევი! — და მკერდით მიაპობდა ნამქერს... ცისა და ხმელთაშუა არა სჩანდა საზღვარი, თვალდასწავიერი. არაფერი ჩანდა აღარც თეთრად,

აღარც შავად; თეთრად ბნელოდა. ის კი ახსოვდა ღვინჯუას, რომ წინ, მთაზე, თოვლი გადმოწოლილიყო თეთრი ვეშაბივით.

ირგვლივ თითქოს დაოთხებული, დაგიჟებული ცხენები ჭიხვინებდნენ; ხან თითქოს მგლები ღმუოდნენ, ძაღლები ღავ-ღავებდნენ, ჟამიდაჟამ ეჟენები ჟღრიალებდნენ; წამიერად თვლებში ვარდი აყვავდებოდა; ხან თითქოს, აღიდებული, აღვართქაფებული იორის ხმა ჩაესმოდა და ამ გაგანიში, — ვერა გაეგო რა!

თოვლეთური ქარიშხალი მთებზე ჰკიოდა, ჰკიოდა, მინდვრად ზრიალებდა, ხრიალებდა, დგრიალებდა და მთის ხვლანჯებიდან, ორწოხებიდან ახვეტილ ხვავრიელ თოვლს ზედ აყრიდა ღვინჯუას.

მოკრუნჩხული, გაფიჩხული ხან სად ჩაეხეთქებოდა ნაპრალში, ხან თოვლგადავლილ ბუჩქნარებს, ბუწქნარებს, ჯღრღევებს გადააწყვდებოდა; ხან, რომელიდაც ხის ტოტს ჩაებლაუქებოდა, ჩაექანჩურებოდა... ოფლი დაასკდა, მუხლი გამოეთქვიფა... ქარიშხალმა კინალამ ქედი მოგლიჯა! თითქოს დაულონოვდა კიდევ; უარაქათო, დამონავებული, მაგრამ, ესტიზარგაუტეხელი, დაუღწეული გულის პატრონი ქარიშხალმა ვერ მოიმორჩილა. კიდევ ჩაიჩეხა, ჩაიფლო, კვლავ აქეთიქით მიაწყვიტა შემოტეულმა ქარბუქმა... მუხლები ეკვეთებოდა, ირგვლივ უკუნი იდგა... ეშმაკებისა თუ ქარის შხუილი აყრუებდა, თითქოს ზარფუში ჩამოახურესო, ტეხვრა სტეხავდა; ავაზასავით შემოფრენილი ქარიშხალი, სამუქარო, გასამტვერები ხმითა და საყივარით — ეკაპასებოდა, სარისხველი სიტყვით ეჩხუბებოდა და ღვინჯუამ კიდევ წარმოიდგინა თავი თოვლის სანგარზე მკვდარი! წამით, თავისი კუბოს სანთელიც კი ეჩვენა, — ჰეე ბეჩაე, შავბიჭო, საღ ილუპები?

— ხმელეთის გამჩენო, შენ დაკეტე ნადირის კბილი, შენ დააბრმავე ყორნის თვალი!

მაგრამ, ასეთ ამინდში რომელი ნადირი ან ყორანი გაბედავდა გარეთ გამოჩენას!..

— ეჰ, რად აიხირა სუფრიდან წამოსვლა?

— არა, საძაღლოდ გამხდარ სუფრაზე ჯდომას ისევ ქარბუქთან ბრძოლა სჯობია — ამბობდა ვიღაც ღვინჯუას გულში! წყალი თუ აიმღვრევა, კამეჩიც აღარ დალევსო!

მოდი და გაუძელი მოყინულ ნიადაგზე აგორებულ ქარიშხალს, ასპიტ ყინვას!

ბუქი ახრჩობდა, ხელჩართული ებრძოდა, კიდევაც მიაშკვდარა და მეტი არა?

ბორბალა ქარი უფრო ბასრმჩხვლეტელობდა, თითქოს მთელ ზამთარს მისთვის იკრებდა ღონეს, რომ ღვინჯუას დასტაკებოდა! ნაქარი თოვლი აღიყორა. სულ აირია ზემოეთი, ქვემოეთი, თითქოს ცისა და ქვეყნის შუა დაბორიალებდა გადაქაჯული ღვინჯუა ქასქანჯიელივით! ქვესკნელის ფსკერში ეგონა თავი! ღამის ბალანიც კი არა ჩანდა, არა თუ იძვრისი!

— ღმერთო, ერთხელ კიდევ დამანახვე საწუთრო, მზის-თვალი!

ახლა კი დარწმუნდა ღვინჯუა, რომ ქვეყნის შერყეულობა მოხდა; რომ შეიძრა ის ვეშაპი, რომლის რქაზედაც იდგა დედამიწა. როგორც იყო, გათოშილი თათებით პირჯვარი გადაიწერა და წმინდა გიორგის შველა შესთხოვა კერატის აღთქმით, — ციდან ჯაკვი ჩამოუშვი და აქედან გამიყვანეო!

ფეთიანი ქარიშხალი კი საქოლავს უგებდა: ყიოდა, წიოდა,

ეძახდა თავის უთვალავ ლაშქარს ღვინჯუას პირქვე დასაძარ-
ხავად!

კიდევ შემოურგვალა გრიგალმა, ცხვირი მიანაყა, ნახუნ-
გალით ამოუესო თვალები. რკინით შეკრულს დაამგვანა ყინვამ
საწყალი თამადა!

ღვინჯუა ადამიანს აღარა ჰგავდა; უღვაში მთლად დას-
ჭირხლებოდა, უღვაშს ვილა ჩიოდა, წამწამებზედაც ყინვის
ეკალი აჰსხმოდა. მოეხეტებოდა და თან ყინულს მოაჩხა-
რუნებდა.

— შეჩვენდი! — წამოიღმუველა ღვინჯუამ, როცა კიდევ
ერთხელ რაღაც ორმოსა თუ ჭაში ჩავარდა ყელთამდე და უბე
თოვლით ამოეესო! მხოლოდ ახლა მიჰხვდა ღვინჯუა, რომ
სუფრიდან გამოქცევის დროს მოშილიფებულად გადახსნილი
მკერდი ღელელა დარჩენოდა. ნათბილარი, ნაღვინარი, სად
შეამჩნევედა, ისიც ლტოლვის დროს?! ახლა, როგორღა შეეკრა,
როცა გაფიჩხული ხელის მტევანი აღარ ემორჩილებოდა. ხმე-
ლეთი, წყლეთი, სულ გაყინულიყო!..

მაგრამ უტეხარი ისევ მიაბოტებდა... კი არ მიდიოდა მუ-
ხა-ვაჟკაცი, ბრმულად მიცოცავდა. მუხის ფესვივით, ნელა
ზანტად, დაჟინებით, რკინის კვერივით მაგარი, გულგაუდ-
რეკელი.

ნამქერმა ისევ გამუშტა ღვინჯუა ისეთი სიმწარით, ლამის
თავპირი ჩამოაცალა. ხან, თითქოს ჭყანტობში იფლობაო,
ხან კლდოვან ლირლატიდან ფეხს ვეღარ ამოიღებდა, თითქოს
მუხლსა და ფეხში ათასი ალქაჯი ჩასჭიდებიაო. კიდევ ერთხელ
ამოყელყელავდა ღვინჯუა, კიდევ ერთხელ გულადად გადას-
ჭრა თოვლის გადანაკვეთი, კოწიაწობით გაძვრა ნამქერის

ხერელობში, თოვლის ღრმა მღვიმეებში, გარდავლო ქარისგან დიდნაგები ზვავის გალავნები და ზედ თოვლის კოშკებზე გადაფრინდა თავისი სახრით. ყინტიყორა გადადიოდა, თან ბრე ასდიოდა! უკან რჩებოდა დათვის ნაბოტარები! კიდევ კარგი, მონეტიალე მონადირე ვერ დაინახავდა თოვლებულ ღვინჯოს, თორემ ყელქედანა დათვი ეგონებოდა და ტყვიას ზედ დააკერებდა — რათ უნდა ლაპარაკი!

ფეხაკრეფით, ბარგანაობით იკვლევდა გზას კენტი კაცი, მარტორქასავით! არსად საყუდარი, არსად მეხიდური!

თოვლმა განა ჩამოიკლო, ბარდნიდა და ბარდნიდა, თუმცა ქარი ჰაერში ატრიალებდა... დაბელტდა თეთროსანი მარმარის ზოდები... ნაქარი, ნაყორი...

ისევ ზვინივით მიაბიჯებდა ყინვით შეჯავშნული, მუხლადი ღვინჯუა, ასჯერ დაცემული, ასჯერვე წამომდგარი! — გათოშილი, კრიქაშეკრული, ყურებდაგლეჯილი, დაოსებული, გამოძალული, გარეგანთხეული... გაჭირვების ყუაზე მიმდგარი!

კინალამ სული გასწურა! დამძლავრებულმა ქარბუქმა შეაზავთა, შეაყელთა გაშფოთებული ღვინჯუა! ყინვამ უფრო მოუჭირა ქახრაკი; კისერზე ჯაჭვი, ფეხზე უდრეკი ბორკილი დაადო! — არც ახლა გატყდები, ღვინჯო?

ღვინჯუა მაინც მყარკლდეობდა, — იბრძოდა... ისევ ებლოტებოდა... და ის იყო, სადღაც, სიმალღეზე წამომდგარმა და თოვლში ღრმად ჩაფლულმა, წამით, რაღაცა მოღანღალე შუქს შეჰქრა თვალი, რომ თითქოს ნათელი შემოადგაო — გაჰკვირდა, — კიდევ დაინახა საწუთრო.

— ეს ხომ მისი სოფელია, შვლისყური! აჰანდე, ესეც მახარიკანთ გორა, ძირში კი, სოფელი! შეიტყო მართლმავლობა

სწორი ვარაუდით, თუმცა ბეგიბეგ უვლია გზის ასწერივ! ისე შენ გაიხარე, როგორც ღვინჯომ გაიხარა!

ქვემოთ, ტაფობში, ბუნება გაბატონებულიყო, ბროლის სიჩუმე იდგა; იქ ისე აღარ გაისმოდა ქარის ხივილი! გადაჰხედა წათოვლილ მშობლიურ სოფელს და გულში ჩაიხვია, როგორც ოცი წლის უნახავმა. ვგონებ, თავისი სახლიც იაზრა დიდი ალვისხნის გვერდით. ღვინჯუასთვის რომ გეკითხათ, ისიც კი დაინახა, სახლიდან ლიფლიფას ოდნავი ნათელი რომ გამოჰკრთოდა. ჯალაბს არა სძინავსო! ალბათ, თითისტარს აბზრიალებს გაბეზრებული! მგონი ბუხარში მღვიძარი ღველფი, მღუღარი ნაკვერცხალიც კი შენიშნა...

ენა ამოიგნო... სანახევროდ დაავიწყდა ქარ-ყინვასთან ომი, დაუდგარი ბრძოლა და გამოჰიდება: ყინულის ფხით დაჩხვლეტილი თვალი გააღო, გაახილა!

— ყოჩაღ, ძმაო ღვინჯო, ყოჩაღ! ერთი შემოკვრით ხე როდი წაიქცევა!

ქარბუქთან გამარჯვებით ნასახლარი, ყინჩიყურად იდგა გაბოტილი, მიწას დამყარებული ილიმებოდა... დატკბა... დაშაქრდა... თვალწინ წარმოუდგა დატოვებული ქრელი სუფრა, — ბრძოლის პირველი ასპარეზი — თაყა, თანამეინახენი, რძენაწყენი ქათათა, რომელზედაც ახლა მხოლოდ გაეღიმა ქარიშხალთან დიდ ბრძოლაგადახდილს!

ერთხელ კიდევ შემოატარა გონების თვალი სუფრას, შეიხსენა თავისი ნათქვამი სადღეგრძელოები და თავიც მოიწონა... რა ვუყოთ, ქარბუქმა ჯვარზედ აცია, კინალამ სული არ ამოკვლიჯა ბოლოკივით, მაინც სახლ-ქარს ხომ მიაღწია!

— აგერ, წმიდა ესტატე, ჩრდილოთ, — წმიდა გიორგი!

ვალერსებოდა თავის სალოცავებს, — აგერ, დაბალში, კონცხზე — ღვთისმობელი! — და თვალი გაუშტერა ამაყ ნასაყდრალს... რამდენი საღვთისმობლო-საყველაწმიდო და... უცბად ვლდანაცემივით შეერთა, აფეთდა; რამ დაცეცხლა, რამ გაფათრა, რა მოუვიდა? გულში რამ გამოფეთქა?

— ეს რა მომსვლია, ხმელეთის გამჩენო! — მეხდაცემულივით იდგა ღვინჯუა და არაქათი აღარ ჰქონდა, რომ მუხლებზე დანანებით ხელი დაერტყა.

შელაშქრებული ქარიშხალი აგულისებდა ღვინჯუას, მაგრამ ღვინჯოს ქართან საბრძოლველად აღარ ეცალა, მან უეცრივ რაღაც უმერყეო გადაწყვეტილება მიიღო, ძლივს აიღო გათანგული ხელით სახრე, მოსწყდა ადგილიდან და... ისევ უკან დაბრუნდა და ისევ მგელივით გადაერია თეთრ ნამქერში.

გახარებულმა ქარიშხალმა სამპირად წამოუშინა და წამოუშინა! თითქოს კლდიდან ზვავები აგლეჯილან და ბარად ჩამოქანებულან ღვინჯოს დასანთქმელადო.

ქარს უხაროდა, რომ სამშვიდობოს გამოსული ღვინჯუა უკანვე გაიტყუა; გულს იოხებდა, ზრიალებდა, მთა-ბარს ატყობინებდა ძლევასა და გამარჯვებას!

— ახლა ვერ მომერევი, ვერა, ხომ შევიტყე მიზეზი! — შესძახოდა ქარს ღვინჯუა.

მიდიოდა შეფოლადებული, დაგულისგულებული, რკინის მთა რომ შეხვედროდა, გააპობდა! ტანში თითქოს ახალი ხერხემალი ჩაედგა.

ბევრჯერ ფეხი აერია, ბევრჯერ წაიფორხილა; კიდევ რამდენჯერ ჩაირეხვა ჩათოვლილ ღრანტეში, ძლივს ამობირტ-

ყდა, სული ძლივს ამოაღწია და... ცისკრის ზარი რომ დაირეკა შატროვანში, ღვინჯუამ მხნედ შეიარა თაყას ჭიშკარი, ეზო-ყურე და თეთრად წანამქრულ კარებზე მაგრა დააკაუნა, განა მორიდებით?

— ვინა ხარ?

— ნოეს კიდობნის ხურო ვარო! — ვითომც იხუმრა ღვინჯუამ.

აღარ დააყოვნა ნოეს მტრედმაც:

— რომელი ხარო?

პატარძალი დუღღუბა ნაზ მოსიზმრებაში მყოფი, მონადირეზე ტკბილი ფიქრებით შეფუთვნილი, შიშველ მხრებზე შალწამოგდებული, ნათბილარი, ათრთოლებული, კარებთან ნაზად ჰკითხულობდა:

რომელი ხარო, რომელიო, იმ იმედით, ეგებ, რაიმე სასწაულით მონადირე მობრუნდაო!

— ღვინჯუა ვარ, შენი ჭირიმე, თქვენი ნათლია!

პატარძალმა თუმცა ვერ გაიგო გაყინული კაცის პასუხი, მაინც ოდნავ გამოალო კარი, თითქოს უნდოდა, ჩუმად შეეპარებინა მონადირე და გულში ჩაეკრა, როგორც პურის გუნდა ეკვრება გახურებულ თონეს!

— მე ვარ... მე...

ნახევრად ბურანში მყოფ პატარძლის წინაშე იდგა თოვლითა და ჭირხლით შეხურხლული, შებორბლილი თოვლის ყორე, რომელიც... ადამიანივით ლაპარაკობდა. პატარძალმა შიშისაგან იქვე ჩაიკეცა.

— ნუ გეშინიან, ჩემო დაო! — ეხვეწებოდა დაფეთიანებულის თოვლის ყორე და თან ზეზე აყენებდა.

— არა, მითხარი, მართლა ვინა ხარ? — ეკითხებოდა გონს მოსული გულგადაფერებული ქალი; — მაშ, ავი სული არა ხარ?

— ავი სული რათ ვიქნები, კეთილი სული ვარ, თქვენს ოჯახში მირონის შემომტანი!

პატარძალი ძლივს დონეზე დადგა. კიდევ შერცხვა თავისი თავისა!

ღვინჯუა უღვაშებს იფშენეტდა, ყინულის ლულებს იმსხვრევდა თავპირზე და თან ლულლულდებდა:

— ღვინჯუა ვარ, შენი ჭირიმე, თქვენი ნათლია! ჩემი ცოდვით საყველაწმიდო დამვიწყებია, მახარეს გორიდან დავბრუნდი, ძნელია ღვთის ვალი ეგებ ან ჯამი ან რქა გამომაწოდო, რომ ჩემი ვალი მოვიხადო!

— შინ შემობრძანდი, უკაცრავად, ავი სული მეგონე. — ბოდიშობდა დუდლუბა.

— რა ბრძანებაა, მეჩქარებაო, შინ დაიდარდებენო!

— გენაცვათ, ეს რა ღვინის მსუნაგი ყოფილა, საიდან სად წამოსულა ერთი ჯამი ღვინის გულისათვის! — გაივლიო გულში მონადირეზე გაქარწყლებულმა დუდლუბამ და ორივე ერთად გამოუტანა, — რქაც და ჯამიც, ისე გალიცილიცებული, რომ ორიოდე შხეფი ზედაც გადელვარა, პერანგზე!

ღვინჯუა ეცა მწყურვალებით! ორივე სასმისი ხელიდან გამოგლიჯა.

— აი, აგაშენა ღმერთმა! ახლა კი მოვიხდი ვალს ღვთისა და ქვეყნის წინაშე!

— ღვთისმშობელო, მიშველე, შენ მაპატიე, რომ საყველაწმიდო დაუღვეელი გაგექეცი! აკი კიდევაც მომაყარე თოვლი და ქარაშოტი დიდება შენ სახელს უნებურად მომივიდა! მაპატიე, აღთქმას გაძლევე აღარ ჩავიდნენო!

პატარძალი გაოცებით შეჰყურებდა, — ეს შეშშიში რასა როტავსო!

— ღმერთს ვაწყენინე, პატარძალო, ღმერთს წინ გადავუღე, სიბრიყვით შევეთამაშე! იცი, რა მიყო? სიკვდილის ყბიდან გამოვძვერი! მთელი სახმელეთო ხომ დამცინებდა, უკან რომ არ გამოვბრუნებულეიყავ? ყველაწმიდა შეგეწიოთ! მისი მადლი სწყალობდეს ამ ოჯახს, — სასოებით წარმოსთქვა ღვინჯუამ, — რა ანგელოზიც მუშაობს ადამ და ევას აქეთ, ის შეეწიოს თაყას ოჯახს, ჩემს ნათლულებს, საქრისტიანოს, საქართველოს! შენც შეგეწიოს, პატარძალო! ღმერთო, შენ მაპატიე, სიბრიყვე! — ჩამოილოცა გახარებულმა ღვინჯუამ და ისე სულმოუთქმელად დაცალა ჯამიცა და რქაც, შიგნამიც არ გაუშვა. კარის ღირეზე დააწყო ორთავ სასმისი, რადგან ჩამომრთმევი აღარავინ იყო. პატარძალი შინ შებრუნებულეყო. თავდახსნილმა ღვინჯუამ ასწრაფებით გამოსწია შინისაკენ, ჯალაბისაკენ!

პატარძალიც მალე გამოჩნდა ხელში პატარა თეფშით, ზედ ღორის ლურთები და შოთის ნატეხი ელაგა ღვინოზე დასაყოლებლად, მაგრამ გარეთ აღარავინ დახვდა; ღირეზე ყანწს ფეხი წამოჰკრა, შეკრთა, თეფში ხელიდან გაუვარდა და ცივად შინ შეიხვეწა.

დიდხანს ცახცახებდა ლოგინში, თვალეზე საბანწახურული, ფანჯრისკენ მოხედვისა ეშინოდა.

— ნამდვილად ეშმაკი იყო! მაგრამ, ეშმაკი რომ არა სვამს ღვინოსაო?

იყო ძიებაში და ბოლოს დაასკვნა: — ალბათ უპატრონო, მშვიერი აღამიანის სული იქნებოდაო!

— ვინ იცის, როგორ მოსწყურდა ღვინო საიქიოში, წამოდგა მკვდრეთიდან, ღვინჯუას სახე მიიღო და სიკვდილს გამოეპარა, განა ქართველი კაცი უღვინოდ გასძლებს სადმე? დალია და ისევ ჩაეშვა საფლავში, სულთამხუთავმა არ გამიგოსო!

გამოცოცხლებული ღვინჯუა მკვირცხლად მიაბიჯებდა შინისაკენ. ივრის წითელ ღვინოს თბილად დაეგლო ძარღვებში, გაეტბო, აეჩქროლებინა, შეეხურებინა!

— ვერც ეშმაკი მომერია, ვერც ქარაშოტი და ვერც ქათათა! ზოგი ახლაც გადამაყენოს თამადობიდან! ღმერთი ახლა ჩემს მხარეზეა, თავი გავიმართლე, დავზავდით, შევრიგდით; თუ ეს ასე არ არი, — მაშ რად შეიცვალა ამინდი. რად გაკარგდა?

ანჯახი ქარიშხალი დამცხრალიყო, ქვეყანა დამყუდრებუ-ლიყო ღვინჯუას შენაცოდარის გამოსწორების გამო!

— როგორ იყო აბორგებული, აჯანყებული, დაონავრებული! იმიტომ რომ, ღმერთს ვაწყენინე!



თოვლიანი აღმასით ანაპერწყლებული, ნაწური ვერცხლით მოსპეტეილი გორები თავს უქნევდნენ გამართლებულ ღვინჯუას, მისი საქციელით კმაყოფილები!

დილის სული დატრიალდა...

ის იყო მზე ამოდოდა...

ღობებზე ყიყლიყო ყიოდა: მზე მე ამოვიყვანეო!
და ყველას სჯეროდა!



ღ ე ი ღ ა მ ა ი კ ო

აყვავებულ ვაშლის ხის ქვეშ, ახალგაზრდა ქვრივი დედა ეალერებოდა ყრმას, რომელსაც აბრეშუმით ხვეულ კულულებში ნიავისაგან მონაბერი ვაშლის ყვავილის თეთრი ფერფლი ჩაჰფენოდა.

— რა გითხრა ვარდის დედამა, დილილა დედილასა! — ძუძუმწოვარს ჩაესიტყვებოდა აკვანში.

ყრმა იცინოდა...

დედა ეტიტინებოდა, — გაიცინე, გენაცვალე, გაიცინე! შენს სიცილზე ღრუბლები იფანტებიან, შუბლს თუ შეიკრავ — შავად იკუმშებიან! გაიცინე, გენაცვალე, გაიცინე, ღრუბლები გადიკარგებან.

ჩემი დედა მაიკო იყო.

... დეიდას დედის სუნი ასდისო! მართალი ყოფილა. არას-
დროს დამავიწყდება დეიდა მაიკოს ალერსიანი შემოცქერა.

შანგაზრდილი იყო, მაგრამ გონებაგახსნილი, დიდად მეტ-
ეკლლი, მიყვარდა მისი ნაუბარის მოსმენა ზამთრის გრძელ ღა-
მეებში, თითისტარის ბზრიალში, ბევრი რამ „საღეთო“ ჩამრ-
ჩა ხსოვნაში იმ ღამეებიდან, ბევრიც ცხოვრებაში სახელმძღვა-
ნელოდ...

ახლაც გულზე მაქვს დაჭდეული დეიდა მაიკოს სიტყვები:

— თუ შენს გუნებას დილიდანვე მზის სხივი არ შეჰყვია,
ძნელი იქნება ცხოვრება! იმ პირველმა სხივმა უნდა მოგივარა-
ყოს გუნება! უნდა თან აგყვეს და შენც მას უნდა აჰყვე!
მაშინ ჰნახავ, — არასდროს არ დაღამდები!

უეცრივ იცოდა გაყუჩება: თითქოს აქაურობას მოსწყდე-
ბოდა, სხვა ქვეყანაში გადავიდოდა.

შევეკითხებოდი: სად იყავ?

— ნიავექარს მივდევი, ნიავეწანწალას!

— რადა?

— სათქმელი მქონდა!

— დაეწიე?

— ბოლოს, როგორც იყო!..

— სიტყვა გადაეცი?

— მოვასწარი!

ანდა:

— ჰოი, შენ კი გენაცვალე!

— ვის ეალერსები, დეიდა?

— ჰხედავ, ეზოში ცაცხვი როგორ მწვანედ ხასხასებს!

— მშვენიერო, სასურველო, ტკბილო და საყვარელო! აი,

შე კამკამა სხივით გაზრდილო! — იტყოდა და მოეხვეოდა ფანჯარასთან მდგომ წითელ ვარდს და წყალს დააპყურებდა.

— ხატულავ, ჩემო ხატულავ! — მიეფერებოდა ხბოს და აკოცებდა მშვენიერ თვალებში.

— აქ სად შემოსულხარ, მოუსვენარო! — დასწვდებოდა ფანჯრის შიგნით დაბორიანებულ ფუტკარს, გააღებდა სარკმელს და გარეთ გააფრენდა. — აგერ, შენი სარბიელი, გაინავარდე!

ჩიტების ენა იცოდა: — ჰხედავ ის კუდრაქა ღობეზე რას ეხუმრება დაბუას?

მოლალურს შესძახებდა: ჯერ არ მოსულა ჩემი ბიჭი გოგია სკოლიდან!

დეიდა მაიკოს ხმის სიტყბო დღესაც ჩამესმის. საოცარი აღერსები იცოდა:

— ჩემო სიცოცხლის ცისკარო!

— თავს შემოგვევლე!

— ჩემო გაშლილო იაო!

— შენი გულის ჭირიმე!

— საყვარელო, სასახელო!

— წამლად დაგენაყე, წამლად დაგედე!

— ჩემო სიყმის მზევე, შენ კი დაგენაცვლე!

— ჭირი მოგჭამე!

— ჩემო სულო და სიცოცხლე! ჩემო სულისდგმავ!

— შენი მუხლების ჭირიმე!

— ჩემო ცხოვრების ნიაგო!

— სანდომელავ, ჩემო ბალის კუნწულავ!

— ჩემო ათასნაირო!

- — დედის ოქროს შანდალო!
- ჩემო დამტირებელო, მშვენიერო თვალებო!
- შენამც დამაყრი მიწასა!
- უშენოდ ნუმცა ვარ ცოცხალი!
- იმ ადგილის ჰირიმე, სადაც შენ მომაგონდები!

და ვინ მოსთვლის ან სადღა მახსოვს? რა იქმნენ, სად წა-ვიდნენ ეს ალერსიანი სიტყვები, ძველად, ათასმა მაიკომ რომ იცოდა საქართველოში?

რატომ აღარ ვალერსობთ დღეს ამ სიტყვებით, რატომ ჩვენც აღარავინ გვეუბნება, რად გავიძარცვენით, ხომ გვცივა უამსიტყვებოდ!

რატომ აღარ ესმით ეს ტკბილქართული ჩვენს ბავშვებს, — შვილებსა და შვილიშვილებს?

რატომ დაჰკარგეს ჩვენმა ქალებმა ქართული საალერსო სიტყვები? ნუთუ დაყრუვდნენ მოკედნენ, გადაშენდნენ ეს სიტყვები? ნუთუ, ისე გახევდა ჩვენი გული, რომ ეს თბილი, მდებარეული სიტყვები აღარ არიან ჩვენთვის საჭირო, რად დაივიწყეს ისინი დღევანდელმა ქართველმა დედებმა? — მე სწორედ მათ საგულისხმოდ ვწერ ამას!

სულ ახალი ქერივი დარჩა დეიდა მაიკო, სამი უმამო ვაჟი-შვილით. მთელი დღე ფუსფუსებდა, ფეხჩაუდგმელი შრომობდა მეთაფლე ფუტკარივით, ათას საოჯახო საქმეში გართული თან ღიღინებდა, იღიმებოდა, ალერსობდა.

— ღმერთო მაღალო, ვინ გააჩინა ამდენი სილამაზენი? — ეს სხივნარა დილა, იისფერი ცის ღიმილი, დილის ოქროს ქრიალი, მზეკაბანის დელვა ყანებზე, ქვეყნის მამშვენებელი ვარდები,

ყოველთა მხედი ალვინსხეები, აყნოსებული ცაცხეები... ცივ-წყარო. ბროლა ნიავეი...

— გწყალობდეს ამომავალი მზის შუქი — მომილოცავდა მზის ამოსვლას, თან დასძენდა — მზე რომ ვარდივით ამოდის, ხომ გიხარიან? დილის სუნს რომ ჩავისუნთქავ, ამოსუნთქვა აღარ მინდა!

— თუ გუნებას დილიდანვე სხივი არ შეჰყვავ, წააგებ... იმ ერთ სხივზე უნდა ააგო მთელი დღის სიცოცხლე! თვალსა და გულში ოქროს დიელო შეიყენე და გაიხარე! იმ სხივს ენდეს სხივი წაიყვანს მთელი დღის შენ საქმიანობას!

ასე მარიგებდა დეიდა მაიკო და თან სარეცხსა ჰვენდა თოჯნე, მთელი დღე მოფუსფუსე, სახეამწვარი, ნაჯაფარი, გადაქანცული, შუბლზე ოფლმოსხმული, ამაგდარი, მაგრამ მაინც ლამაზი, ნამთევი ვარდივით, და მხიარული მერცხალივით.

— ჩიტის ხმა გამოდის, ბიჭო, დაანებე წიგნს თავი კოკორგახსნილი ყვავილი გეძახის! არ დაჰკარგო ოქროთი მოჭედული დღე! მზენიავეში გაცურდი, ცას აჰხედე, მიწას დაჰხედე! აგერ, ჯეჯილი აღაღანდა, ყაყაჩო წამოწითლდა, ატამი სთოვს, ვარდი კვირტში იღვიძებს! გეყოფა ამდენი კითხვა, გადი გარეთ, მზის მადლმა! წიგნს რა სჯობია, მაგრამ ყველას თავისი დრო აქვს! დაინახე ბუნების შეუზომელი სილამაზე! მადლიანობა! განა სულ საქმეს უნდა შეასკდე? ასე მტუქსავდა, მარიგებდა დეიდა მაიკო, რადგან მე დილით-საღამომდისინ წიგნებში ვიყავი ჩაფლული.

— დილის სხივს აჰყევ, ბიჭო! თორემ ცხოვრება გაგიძნელდება! მზის ჰიატი გწამდეს ყველაზე მეტად და ბედნიერი იქნები! — მიმეორებდა, მინერგავდა თავის რწმენას.

ასეთი იყო დეიდა მაიკო, — ნიავისა და ყვავილების მეგობარი, მათი თანამზრახველი.

— აბა, შეჰხედე, მართლა და სასწაული არ არის ეს აყვავებული, აბრიალებული ხეები? თამარის ოქროს დალალი და ეს გადაფეთქილი ატამი განა ერთი არ არის?

მაგრამ დაგლეჯილი პატარა მწყემსი რომ გამოივლიდა, მაშინ მაიკოს აღარ ეცალა ბუნების მშვენიერებისათვის.

— მოიცა, პატარავ, მოიცა, აქ მოდი! — დაუძახებდა და პატარა ხანს უკან შინიდან გამოუტანდა მთელ პურს, ზედ თაფლს წასცხებდა, ისე უთავაზებდა... და ისევ განაგრძობდა:

— მზე რას ლაპარაკობს, ვარდივით რომ ამოდის ცათა ბროლში, არ იცი? მე ვიცი! მე იმ სხივის სურნელიც კი მომდის! — სიყვარულით იტყოდა დეიდა მაიკო.

— ჩიტის თვალით უყურე ქვეყნიერებას, მზეს ელაპარაკე, სანამ ბუდისაკენ წავა, ჩანჩქრის შხეფის წინწყალს ესაუბრე, კამკამა ჭავლს, ხასხასა ყანას, ბროლის ნიავეს!

— ნიბლიას ჰკითხე რჩევა, ფერისულას, ენძელას, ატმის ყვავილს და იქნები მდიდარი!

— დედილა, დილილასა, დედილა, დილილასა! — თვალეში სიყვარულ-ჩამდგარი ეალერსებოდა აივნის სვეტზე ახვეულ გვირილას...

მანსოვს, ერთხელ მეტად ციოდა. თებერვლის ქარი უბერავდა. დეიდა მაიკო აივანზე გამოსულიყო, მარტოდ დაეგულებინა თავი, ეგონა, არავინ ჰხედავდა.

მაიკომ გაჰხედა ჯერ ისევ თოვლაულებელ სერებსა და დელეებს გაღმა, შუბლზე ხელი მიიღო და გასძახა:

— მალე მომიდი, გაზაფხულო, მალე მომიდი, მოგვეწყინა

ზამთარი, ხალხს პური გამოელა კილობანში, მალე მოგვიდი!—
და ისე შინაურულად ეძახოდა, ემუდარებოდა გაზაფხულს,
როგორც თავის ახლობელსა, თვისტომსა და მეგობარს.

და უცებ, მე რომ დამინახა, დაიბნა: დამნაშავესავით მეუბ-
ნებოდა:

— რა ვქნა, ბიჭო გოგიავ, უმზეოდ ყოფნა არ შემიძლიან,
მომბეზრდა ზამთარი! ახ, ნეტავ სულ ყვაოდეს, სულ მზე
იდგეს!

თუ ეს კრიალა ცა, ეს აყვავებული ატმის ხე, საჩუქრად და
ღვთის წყალობად არ ჩათვალე, არ დატყბი, არ გაიხარე, რაღა
ფასი აქვს შენს სიცოცხლეს, დედილასა!

— რად გინდა დარდი, გადააგდე, თუ ჩემი ხათრი გაქვს!
დარდი აბერებს! სიცილით იმუშავე, ვერ გაიგებ, დღე ისე
გავა! ცხოვრება ტანჯვისკენ კი არ გვეძახის, — სიხარულისკენ!
უნდა იმღერო, სიმღერა ნათელს ერთვის!

— ღმერთო მაღალო, ვინ გააჩინა ამდენი სილამაზე! მაგრამ
ვინ იცლის მის საყურებლად? აგერ, გზად მგზავრები მოდიან
და აბა, თუ შეამჩნიონ ღობეზე გადასული თეთრი ყვავილი
ან იგრძნონ მისი სურნელება? ბედშავეები!

მგზავრებს თეთრი ყვავილისათვის არ ეცალათ, თბილისი-
დან მოდიოდნენ დეიდა მაიკოს ნათესავეები, თან ომის ამბავი
მოჰქონდათ, იმ დღით ომი გამოცხადებულიყო! პირველი
მსოფლიო ომი!

— უი, დამიდგა თვალი, ვაი ჩვენს დღეს! მილიონი ადამი-
ანის სიცოცხლე გაჰქრება ერთ წამში, ჩალასავით დაიწვება.
ხანძრების ენით აღიგვება დედამიწიდან ადამიანის ამაღლარი

შრომა — მწუხარებით ამბობდა დეიდა მაიკო და მისი სული უკვე ნისლსა და თოფის კვამლში გახვეულიყო...

გაირინდა მაიკო. მისი თვალი აღარას ჰხედავდა, მის ყურს აღარ ესმოდა ბუნების ტკბილი ხმა, გულს—სიხარული. ახლა... თავისი ეზოც აღარ ესურვილებოდა. სტუმრებთანაც თავი შეიკრძალა, თითქოს ნათესავები კი არა, სულ უცხონი ესტუმრნენო, თუ წინათ ძალუა ჯერანას ალერსით მიესაყვარლებოდა ხოლმე:

— ყელზე დაგეხვევი, მუხლებში გემთხვევი, ძუძუებში შეგივარდებიო! — ახლა კი წასვლისას მშრალად გადაჰკოცნა, ისიც მასპინძლის მოვალეობით.

— ეჰ, რამდენი ახალგაზრდა დაიღუპება! — მუხლებში ხელებს იშენდა მაიკო.

მოხუცი ბიძა ლაშხია ანუგეშებდა: — რა ვუყოთ, ახალგაზრდობა ომში გამოიჯეკება, გამაგრდება, გაიწურთნება! უომრადაც არ ვარგა სიცოცხლეო!

— არა უშავს რაო! ქვიშანაჭამი ქათამი, — ქვიშანაჭამი ვაჟკაციო! უბირი, დაბღური ლაშხია ერეკლეს დროინდელი კაცის თვალთ უყურებდა ომს, როცა ლომდარი ვაჟკაცების ხმლით შეხლა სწყვეტდა ბედს.

მაგრამ მაიკოს არა ეყურებოდა რა... თითქოს მის ეზოში უკვე შემოსულიყო ვიღაც სასტიკი, დამძალავი და მისი ვარდით აყვავებული ეზოც უკვე მოსჩანდა ნატიალევი, ნაოხარი, წალეკილი...

დაღონებული სტუმრები მალე წავიდნენ, თავის სოფელში მიეჩქარებოდათ. ომი იწყებოდა, ყველა თავის ბუდეს ეშურებოდა. ალაყაფის კარებამდის მივააცილეთ.

— სიცოცხლე ძაფზე უგია ქვეყნიერებას! — შეტირებული ხმით წარმოსთქვა მაიკომ, მერე ხელი ჩაგვჭიდა პატარებს და შინისკენ გაექანა ფეხაჩქარებით, თითქოს წვიმას უნდა შეასწროსო:

— სიკვდილის ყეფა ისმის, ავღგეთ, წავიდეთ, სიკვდილს დავემალნეთ!

— რას ამბობ, ჩემო რძალო, — ეუბნებოდა დედაბერი ნანუა.

— ცოცხალი კაცი ვერც მზეს დაემალება, ვერც სიკვდილს! რაც ქვეყანას, ის — ჩვენ! — გულცივად დასძინა ნანუამ.

— მშვიდობით, ყვავილებო, ჩიტებო, სისხლით მოისვრება მიწის პირი, კვნესით აივსება ცის სიმაღლე! გაპქრება მზისობა, მწვანოსნობა, გაშავდება სახედველი!

— რად გინდა ცუდგუნებიანი სიტყვა? — დასძინა პაპა ლაშხიამ.

გამტყნარებული დეიდა მაიკო სდუმდა... თითქოს მისი სამყარო უცბად ვილაცამ დააბნელა, დაანგრია!

მოლამდა. აიძაგრა ღამის ბალანი. ადრე დაწვექით, ჩვენ, ბალები, შიშისგან მივეყუყენით ერთმანეთს. ტანაძაგრულები, შეშინებულები...



დაიწყო 1914 წლის ომი. ადგა ღორი გაუმადლოობისა...

— ცას სირცხვილი იჭერს, თორემ თავზე დაგვექცეოდა — ამბობდნენ დროული კაცები.

საღდათი აკრიფეს...

ყველგან საფლავის კარები გაიღო.

ღამე ვარსკვლავი ცვიოდა...

— მორჩა, ხმელეთი გადაბრუნდა! დროება შეინძრა! —
ზუზუნებდნენ დედაბრები.

— დიდი თადარიგი გვმართებს, პატარა ხალხი ვართ, საქართველოს მიწა შუბითა და ხმლით არი დახეული! ღმერთო, შეგვიწყალე! — ქუდი მოიხადა მოხუცმა ციციკორემ.

— წმიდაო გიორგი, მტრის ძალთა დამცემელო, შენ უშველე საქართველოს! ღვთიშობელო დედაო, ერთის შემხედვარის გულს ნუ ატკენ! ხორცი — ძვლამდე მოგვათმენინე ტკივილი, როგორც შენს შვილს დაუთმენია! — სასოებით შესცქეროდა ხატებს დაჩოქილი დედაჩემი.

ღეშით გამომტყვრალი ყორნები გვეზმანებოდნენ...

პატარა ბიჭები მუსრს ავლებდნენ ყვავებს, ყორნებს, ყიქალებს, ყვანჩალებს, — მაგათ უნდა ამოკორტნონ მამაჩემის თვალებიო?

მახსოვს, შარაზე მოღანცალე მთვრალი ჩიტურა, ომში მიმავალი, ეტანებოდა გოგოებს.

— ერთი მაკოცნიეთ, გოგოებო, იქნებ, ვეღარ დავებრუნდე უკან; იქნებ, ყორნებმა გამინაწილონ! ვინ იცის, სად ჩავყარო ძვლები! გოგოებო, მადლი ჰქენით, ერთი მაკოცნიეთო!

დამფრთხალი გოგოები აქეთ-იქით გარბოდნენ, თუმცა კი გრძნობდნენ ჩიტურას სიტყვების სიმართლეს.

სევდიანი დღეები დადგა სოფელში, კენესა, ზუზუნნი... ზედაც გვალვა მიემატა.

უბნები მიყუჟდა... მთვარიან ღამეში არ ისმოდა გოგობიჭების სიცილი. გოგოები მონწყენით ქსოვდნენ ფარდაგებს

და ზედ წითელ-ყვითელი ასოებით ამოჰყავდათ დანიშნულთა სახელები:

„გვიტიას მოსვლას გაუმარჯოს!“

„ლევანას მტერი დაუმარცხე“ და სხვა.

მალე გაზეთებში დაიგრიხა ვილჰელმ მეორის უღვაშები, ამაზე აღრე გამოჩნდა გასანთლებული სახე „ჩვენი ხემწიფისა“, გაისმა აქამდე არ გაგონილი სიტყვები: „შრაპნელი“, „ცეპელინი“, „მაკენზენი“ „ჰინდერბურგი“, „კარპატი“, „სარაყამიში“. გაზეთებიდან სისხლი მოჟონავდა. ცაშიც თვითეულ ვარსკვლავს თითქოს ნაღმი ჰქონდა მიცემული და უცბად უნდა აფეთქებულიყო, დაღეწილიყო ყოველივე.

— ტყვიის კურატად ვავუშვი ჩემი ბიჭი! — ორლობეში გმინავდა ბებია მარიამი.

მეორე თუ მესამე წყებაში მაიკოს ვაჟი ვახტანგიც წაიყვანეს ომში.

მალე ჩვენი სოფლის ეზოებსა და ორლობეებში გახშირდა წივილ-კივილი, ლეჩაქების შემოგლეჯა, შეტირება, მღულარების გადმობნევა, შავების ჩაცმა, ატირებული ბალები, გულჩაკლული მშობლები...

წიქარა თუ შინდა ხარებს ყელზე ჩამობმულ ზანზალაკებსა და ეყვნებს აჭრიდნენ, რომ არ ეწკრიალნათ და მით მგლოვიარეთა, ჰირისუფალთა გული არ დაეჭრათ მათი შემბმელის დაკარგვის მოგონებით.

ჰე დილიდან საღამომდის ვერ ავდიოდი ბრძოლის ველიდან მოსული წერილების კითხვას პატრონებისათვის და იქვე, საპასუხო წერილების წერას, რადგან წერა-კითხვა ბევრმა არ

ცოდა. ბრძოლის ველიდან მოსულ წერილებში კი ასეთი სიტყვები ეწერა:

— არ დაიდარდოთ...

— ჩემს სახელზე ჩემ ზურიკოს უყურეთ!

— ყანების დარდი გამოგვევა!

— ვაზი არ გამიტილოთ!

— ჩემს ცხენს მოუარეთ!

თან აიმედებდნენ ცოლ-შვილს: ნუ გეშინიათო: კიდევაც მოგივალთო და კიდევაც გაგახარებთო, ოღონდ ჩვენს მოსვლამდის გასძელითო.

დალუბულთა შესახებ ჩონგურზე ლექსებს გამოსთქვამდნენ; კვენისთ აგებდნენ სიტყვებს, ყველას გული დარდისაგან ჰქონდა გაცხელებული. ცრემლი ყელში ებჯინებოდათ.

იქ კი — კარპატებში, გალიციის ველებზე, ვარშავასა თუ არზრუმში, ერზინჯანში, ბელორუსიის ჭაობებში ჩალუბულთა სიკვდილი გულს ჰინკრით აღუღებდა; ძმას მხარს მოსტეხავდა, მოკეთის გულს დასჩაგრაავდა, მამას წელს მოსწყვეტდა, დედას — შავად ჩამოაბერებდა... თვალთაგან ჩამონადენი კურცხალი ჩონგურის სიმებს ალბობდა... ბევრის კუნწულა ცოლ-შვილი ობლად, ოხრად რჩებოდა... სოფლის ხატებს საღვთოებსა და სამპირ კელაპტრებს აღუთქმდნენ შინდარჩენილები, წასულთა მშვიდობით მოსაყვანად.

„შორ და მშვიდობით წასულნი“ კი, წერილებში ჩიოდნენ თავის სატანჯველს: ამხანაგების დალუბვას, უწყალო სიკვდილს, სანგრებში ჰუქყეს, წყლის გუბეს, აგურივით „არქანოი“ პურს...

— ვინ დაგვიტირებს, ვინ დაგვიჯდება გვერდით, ვინ დაგ-

კაყრის ცრემლებს? ყვავები თავს დაგვეტრიალებენ! ხის ჯვარი და ამოსული შამბია ჩვენი ბოლოო! — იწერებოდა ზოგი უფრო უცოლშვილო, უპატრონო: ღვინით მითხარი, ძმაო, შენდობაო, სიზმრად ვნახე, რომ ვარსკვლავი მოსწყდა მალლიდან, დაბლა დაენარცხაო, ვეღარ მოგივალთო და უმეტესად ვეღარ მოდიოდნენ „სისხლის არყით შთვრალები“.

მაიკო დეიდა იყო მგლოვიარეთა ნუგეშისმცემელი, თანამოჭირისუფლე, მათთან ერთად გულდამდნარი. თითონაც შიშითა და გულის ხეთქებით ელოდა შვილის წერილს. ბრძოლის ველიდან იმედლიანი წერილები მოდიოდა, მაგრამ ქვეყნის ცრემლი უგმირავდა გულს. რამდენი ღამე თეთრად დასთენებია!

და ერთ დღეს, — ხარება და გახარება მიადგა მაიკოს სახლ-კარსი ომში დაჭრილი და განკურნებული ვახტანგი მცირე ხნით შინ გამოუშვეს ბრძოლის ველიდან.

მთელი უბანი დღესასწაულობდა. მაშინვე პურობა გაიმართა, კოცნისაგან ლოყები გაუცვითეს ნაომარს.

მაიკოს გულს ღამე გაუთენდა, დანართვილარი გული მოუთბა. პირს შუქი ამოეფინა, მისი წილი მზე განათდა.

— კიდევ შეგხედო, კიდევ მიყურე, თვალი დამიტკბე! — არა ცხრებოდა დეიდა მაიკო და შვილს თავს ევლებოდა. ხან ტიროდა, ხან ელიმებოდა.

ვახტანგი გარდასხვავეებული მეჩვენა; ღიმილი სულ დაკარგოდა, სახეს მკაცრი იერი მისცემოდა. თითქოს ამ წუთს სხვაგან არიო. აბნეულად ლაპარაკობდა:

— ზარბაზნის ალზე ვერასა ვხედავდიო, მშობიარე დედა-კაცივით მოჰკიოდა ყუმბარაო, ყუმბარის ხმაზე არაფერი მესმოდაო!

განა იმას მოვიფიქრებდი, რომ პურმარილი კიდევ შემრჩებოდა? განა მართლა კიდევ ვზივარ სუფრაზეო?

— ქაშს რო ვკამდით, ვიტყოდით, — ის კაცი ქართველი არ არის, შინ რომ დაბრუნდეს და ომში დაღუპულის სადღეგრძელო არ დალიოსო! — ვიძახოდით, გვეღირსება განა, ჩვენ ქართველებს ჩვენს ქვეყანაში მისვლა და ღვინის დაღვებაო? — შე ვიტყოდი: კიდევაც მივალ და კიდევაც დავღვებ-მეთქი! აჰა, თუ არა!

ვახტანგმა ხელთ აიღო ჰვარტლიანი კათხა და სულ პირველად არდაბრუნებულები აღღეგრძელა, — იმათ გაუმარჯოს, ჩვენ რომ პატარა პურმარილი დაგვინარჩუნესო.

შენაჯგუფარი ღედაკაცები ტიროდნენ... ეკითხებოდნენ:

— როგორ გადარჩი?

— სიკვდილს გამოვექეცი! წმიდა გიორგიმ ცხენზე შემისვა და გამომაქროლა! მეტი აღარა მახსოვს რაო! — გულმართლად ამბობდა ვახტანგი.

ღედა მაიკო პირჯვარს იწერდა, წმიდა გიორგის და პირიღეთისას ახსენებდა, თან შალის ძველას ვიწრო მხრებზე იხურავდა, იწურავდა...

— კიდევ გვიამბე, კიდევ, — ეხვეწებოდნენ ვახტანგს. ისიც სიზმარნანახივით ჰყვებოდა წყნარად:

— ბრძოლის ველი? ნეტავ თქვენ, რომ არ გინახიათ! თუმცა მზეა, მაგრამ სულ ბნელაში ვართ, — ყუმბარისა და ზარბაზნის ბოლში! ზღვის შესაწონი სისხლი იღვრება. რა ცოდვას სჩადიან ეს ხელმწიფეები, დაიქცეს ამათი რჯული!

ღედაკაცებს შეაქრჟოლათ ამ უცნაურ და თამამ სიტყვებზე.

— მაშ, სანდალა ყუმბარამ დაგლიჯა, უცრემლოდ ჩავიდა საფლავეში?

— დიდი საძმო საფლავი ამოსჭრეს მინდორზე და ყველა შიგ ჩაყარეს, იმ ადგილის მეომარი! სანდალას ნაგლეჯებიც იქ ჩააყოლეს!

დედაკაცები გლოვობდნენ ჭაბუკი მეზობლის დაღუპვას. ზმუოდნენ, ზუზუნებდნენ, ძუძუებს იხოკავდნენ, თავში იშენდნენ.

— ასეთი ცეცხლი ჯერ ჰქვეყნიერებას არ უნახავს! — განაგრძობდნენ დედაკაცები.

— ეს ოხერი წუთისოფელი სულ არაფერი ყოფილა! — დასძინა ვილაკამ.

— როდის უნდა დაბრუნდე ომში? — შეეკითხნენ ვახტანგს, როცა ლაპარაკით გული მოიჯერეს.

— არა, არა! ჩემის ცოცხალის თავით არ წავალ! — წამოიძახა შემკრთალმა ვახტანგმა. — ტყეში გავვარდები, გინდ აქ გაუგლეჯივარ ნადირს, გინდ ომში — ყუმბარას! ჩემი მიწა მაინც დამეყრება გულზე!

— არ გაგიშვებ, გინდ თითონ ხელმწიფე მოვიდეს შენ წასაყვანად! — გადაეფარა მაიკო, რომლის სახეზე ერთად ისახეზოდა დედობრივი სინაზე, სევდა და თრთოლა.

— არ წავა, არ გავგზავნი! — გადაწყვეტით თქვა დეიღამ და ხელი მადლა ამართა, მაგრამ უცბად ხელი მოწყვეტით ჩამოუვარდა მწუხარებით შეძრწუნებულს:

— ეჰ, რამდენია ჩემი შვილისთანა, იქ, ტყვიის წინ?! განა ჩემი შვილები არ არიან? — ეს არის დასაკვენესარი! — დასძინა

ბოლოს, — რომ არ წავიდეს ვახტანგი, ქვეყანას ამით რა ეშვე-
ლება?!

მეზობლები და თვითონ ვახტანგიც თითქოს პირშეწბილე-
ბულნი მისჩერებოდნენ დეიდა მაიკოს, რომელსაც თავს შავი
ფიქრები დასწოლოდა, თუ თავნამქრიანი ღამე, შავკუპრი ამინ-
დი... და არსად იყო მოსაფონარი.

ვალა გავიდა. ნაძულები ვახტანგი ისევ ომში წაიყვანეს.
დედა-შვილი ბედს დამორჩილდნენ.

რალა დარჩენოდა დედას, გარდა მოლოდინისა და მღელ-
ვარებისა? იგი მხოლოდ სიკვდილსა და სიცოცხლეს შუა
სცხოვრობდა მუდმივ ურკვეულობაში.

კიდევ ზღვის შენადენის ოდენი სისხლი დაიღვარა, მრავა-
ლი დაიღუპა, ტყვემყოფელი ვახტანგი აღარ დაბრუნებულა;
სადღაც გადაითესა, ჩაიკარგა უნგრეთსა თუ პოლონეთში.

დეიდა მაიკო კი, ისევ ისე შრომობდა, ფუსფუსებდა სა-
ფუტკრეში, ბოსტანში, უძღვებოდა ოჯახს, ისევ გადაქანცული,
ნაცვეთი ხელებით, მკერდშეოფლილი, სახეამწვარი, მოჭირ-
ნახულე, შრომობდა და... უჩინრად დნებოდა. მზეშუქი აღარ
უხაროდა, ყვავილებს აღარ სთესავდა, სულ შეიკეტა თავის
გულში, რაღაც უნდოება დაეტყო წუთისოფლისადმი, თავს
მოტყუებულებით გრძნობდა ცხოვრებისაგან. აკი შავები აღარ
გაუხდია და აღარც ბასმაში გავლებულ ყვავილიან ლეჩაქს
ატარებდა ქვეყნისა და ბუნების დამგლოვიარების გამო!

ხომ ბუნების მეცნიერი იყო, ბუნებისა ყოველივე ესმოდა:
და ახლაც, როდესაც ცა წამოცრემლავდა, მაიკო დანანებით
იტყოდა, — განა არ გესმით, როგორ სტირიან მამებო დახო-
ცილ შვილებს?!

ხოლო მთებიდან ჩამოსული ჯანლები რომ დაედებოდა მიწას, დეიდა მაიკო ამოოხვრით გვეტყოდა: — ეგ ნისლი დედებისა და ქვრივ-ობლების ცრემლებმა დააყენესო!

კიდევ გაასურნელა მაისმა ქვეყანა, მაგრამ მაიკოსათვის ეს ქვეყანა მხოლოდ ჰვარტლითა და ბურით იკვამლებოდა. აღარ ჰქონდა ხალისი, მხოლოდ ჩიტთა ფაფობას, ნაფოტებზე წასმულ ფაფას უდგამდა ჩიტებს, ესლა იყო მისი ჩიტებთან საუბარი!

ცა ფირუშთვალა ბრწყინავს. ხე შუქით იბურება, ბალახი ბიბინებს, სიო ცეკვავს ლერწმის წვერზე, ვერხვი ვერცხლურად შრიალებს, ცაცხვი სურნელობს, ჩქეფს დაზვინული ტოტი მდინარისა, ბროლტანა ჩანჩქერი გრიალებს აღმასური მტკვრით. ამდგარა ძალა სიცოცხლის სულისა, სიცოცხლე მღერის! დეიდა მაიკო კი ჩაკეტილა თავის გუნებაში, თითქოს მისთვის უხილავი იყოს სხივნარა სამზეო, ლურჯი ცის ხასხასა მდელი, მოლი, ხევნარი, ხილნარი! თითქოს აღარას ეუბნებოდეს მას სავსე მინდორი, ბურვილი ტყეგუმბათი, ვაზისყვავილი, გულისმოსალხენი მწვანოსნობა, ფერობა, ფურცლიანობა, დილის ცვარდაცვარული მინდორი, — ხმატკბილობა, ფრთოსანთ ყრიაშული, ბუნების საწადელი ხმა!

რა უყვეს, სად მიმალეს მისი გუნება? დაქვრივებისას ამდენი არ უგლოვია! ომის ყოველი ამბავი, მეზობლის დაღუპვის ცნობა მის ნაზ გულს სდაღადა, სჭრიდა, ჰკეპავდა!

დიდხანს ელოდა დიდი მოლოდინით დეიდა მაიკო თავის შვილს, ელოდა და ბოლოს დარდით დანადგლებული, შავსახადშეყრილი, ვახტანგს ზედ გადაჰყვია...

მაიკო დეიდა აღარ არი ამ ქვეყანაზე, მაგრამ დღესაც ისევ

ჰყვავიან მისი ეზოს ხეები, მისს ღობეზე ისევ გადმოკიდულა ის თეთრი ყვავილი, და მე მგონია დეიდა მაიკოს ღიმილი ამ ყვავილებშია გადასული და იმ სურნელოვან სპეტაკ ფურცლებიდან მესაუბრება სიცოცხლის სიყვარულზე.

დეიდა მაიკოს სახლთან, შარაზე რომ გავივლი, ფეხს აეუჩქარებ ხოლმე, იქნებ, დეიდა გამოვიდეს ეზოს კარებიდან; მის ეზოში ნიავი რომ გამომიქროლებს, ასე მგონია, დეიდა მაიკო მეგებება ჩვეული ალერსით.

ახლა სხვა ცხოვრობს მაიკოს ეზოში, მაგრამ მაიკოსეულ ბოსტნის კვლები ისევ სიცოცხლით ხარობენ და საამოდ მფშვინვარებენ. სიცოცხლე ერთი წამითაც არ შეწყვეტილა, არ დამარცხებულა, ცხოვრებაც ისევ მიდის თავისი გაწამაწიით.

ისევ ბრწყინვალეებს მწყაზარი, ვარდმოფენილი, სინაზიანი, ციაგიანი, გამომცინარი დილა; ისევ ხასხასებს დაწმენდილი ფოთოლი. ისევ ელვარებს გაშალაშინებული ტბა, დაცვარული მინდორი — როგორც ბავშვის ტუჩები, დედის რძეშეფრქვეული.

სიცოცხლე უკვდავია, დაუმარცხებელი! განა ტყუილად ამბობდა დეიდა მაიკო:

— არა, სიცოცხლე სიკვდილის ყმა არ იქნება, არასოდეს! დილილა დედილასა!



სოფლის შარაზე

შუადღის სიცხე ანთია სოფელში. სიჩუმეს მხოლოდ ორობეში კრიჭინობელას დამღლევი კრიჭინი არღვევს... გზას სძინავს...

ყოფილი სემინარიელი, ანარქისტი იორამ, სოფლის შარაზე მოაბოტებს.

იორამს ლურჯი სატინის ხალათი აცვია, აბრეშუმის ფუნჯაღვედით შემოკერილი.

ზამთრობით პალტოს საყელო მუდამ აწეული, თავზე აუცილებლად შავი „შლაპა“.

ლაპარაკისას ქუდს იხდის და შავ ფაფარს უკან გადაიყრის.
ხშირად შევსწრებივარ:

მოპირდაპირე მხრიდან ზანტად მოაბიჯებს შუახნის მღვდე-
ლი ზირაქი, „სანთლიკულა“ დიაკვანთან ერთად.

მღვდელი ცერად იყურება და სოფელში „ცეროს“ უძახიან
ზედსახელად.

„ანარქისტი“ იორამი წინ გადაუდგება მღვდელს და თავისი
ბოხი ხმით, ისე, რომ ქვემო-უბანში ესმით, დაიწყებს:

— შენ ჰეი, მღვდელო, მითხარ, რამ შექქმნა ქვეყანა?

— ღმერთმა, უფალმა, — ფიცხად მიუგებს მღვდელი და
განაგრძობს: — აბა, ვინ შემოსა ცა ღრუბლით, ზღვა ვინ შე-
მოადგინა მიწას; ქვეყნის სივრცე, სიღრმე ზღვისა მაშ ვინ გა-
ზომა, თუ არა ღმერთმა?!

— კარგი და პატიოსანის მაგრამ ესეც მითხარ, მღვდელო,
ვინლა შექმნა ძონძი, ჭუჭყი, ქლექი, ტალახი, ხომ შენმავე
ღმერთმა, არა?

— ღმერთს სცოდავ, ჯოჯოხეთის ნახეთქო! გეყო ცეცხლ-
თან თამაში, შე ხანძრის მთესველო! — აენტებოდა მღვდე-
ლი.

— ნახვამდის, მამაო, მალე შენი თმიანი თავი გილიოტინის
ცულქვეშ მენახოს! — და ქუდის მოხდით, გესლიანი ღიმილით
დაემშვიდობება იორამი. შენაწყენებული მღვდელიც ბოროტ
სიტყვას დაადევნებს:

— ღმერთმა შეგასწროს შენს აღთქმულ სამეფოს — რძი-
თა და ერბოთი მჩქეფარეს!

ანარქისტი ქვემოდან შემოსძახებს:

— ღმერთმა მალე შეგასწროს გილიოტინას! ფრთხილად

იყავი! ხალხის გამარჯვება მზადდება, მეფენი საფლავში ეშვებინა!

— მთავრობისა მაინც გეშინოდეს, შე ანტიქრისტე, თუ სინდისისა არა! — მიჰყვირის მღვდელი.

— მზად ვარ, პირველმა მივიღო ბრძოლა კაცობრიობის თავისუფლებისათვის! კლდეზე გადავჩეხე თვითმპყრობელობას! — მიეწევა უკან დაბრუნებული ანარქისტი მღვდელს.

— რის იმედით, რის იმედით, იუდავ ისკარიოტელო?

— მძლავრ კაცს გული აწონილი აქვს, ბნელეთის ნალექო! რწმენით მთის დაღნობა შემიძლიან! — და ისევ გამოსცილდება იორამი, ზევითკენ წამოვა.

— სულმოკლე მანიაკო! — შესძახებს მღვდელი მით უფრო თამამ სიტყვებს, რამდენადაც მანძილით შორდება ქვემოთ მიმავალი ანარქისტი.

ხშირად გზის ყურეში იორამი დაიჭერდა ბავშვებს და თავისი კარნახით ამეორებინებდა:

— „ძირს მეფე, ბატონი, მღვდელი, პოლიციელი!“

მღვდელს არ ესმოდა, მაგრამ ტანით გრძნობდა და გულში ბურღლუნებდა:

— მოიცა, შენც ნელი-ნელ შეგწოვს ტვინის გამლაცხებელი სოფლის ცხოვრება, ცოტა დაიცა, ჯერ ახალი ხილი ხარ!

მომხვეჭი მღვდლის ხელში მუდამ დაჩაგრულმა დიაკვანმა, ახლა კი გულში იორამის მიერ მღვდლის დამცირებით დიდად ნასიამოვნებმა, მლიქვნელობით შეუქმია:

— ეჰ, მამაო, სადღა არის განკრძალვა ქვეყანაზე! რა უკადრისი სიტყვები გაკადრათ!

— მერე, რას შემეცილება? — ამბობს დიაკვანთან დარცხვნილი და ცეცხლმოკიდებული მღვდელი.

— რასა ბრძანებთ, — მლიქვნელის გემოთი იტკბარუნებს პირს დიაკვანი: — რასა ბრძანებთ, თქვენი სახელი ცამდის არის ამდინარი! ჯერ მე რა ვარ, რომ პირში გიჭკრეტთ და ის ურწმუნო რა ღირსია თქვენთან ტოლის დადებისა? — აღარათავეებს გუნდრუჯის კმევას კალთაჩახეული დიაკვანი.

— საშიში კაცია, დიაკვანო, ფარულად ყუმბარებს ამზადებს, ქვეყნის აფეთქებას აპირობს, ხომ იცი, ცოლ-შვილის პატრონი ვარ!

ანარქისტი მართლაც საშიში იყო...

მეტად ფიცხი, ფეთიანი ხასიათისა.

სემინარიის რექტორისთვის სილა გაერთყა და მისთვის გამოაგდეს „მგლის ბილეთით“ მეზუთე კლასიდან.

— უჰ, თავისუფლების სურვილმა შემომიტირა! — დაიძახებდა ზოგჯერ იორამი და თვალებს ააელვარებდა.

ერთხელ, მახსოვს აივანზე წიგნს ვკითხულობდი. გავარვარებული შუადღე იყო. ვხედავ აივანზე ამოვარდა აგზნებული, თვალებგაფართოებული იორამი და შემომყვირდა:

— კაცო, არ გესმის?

— რა?

— მიწის ქვეშიდან ხმა ისმის აბა, ჩამოდი ყური დაადე მიწას! — და ძალით ჩამათრია კიბეზე.

— აბა, ყური დაადე, როგორ გუგუნებს! ხომ იცი, რასაც კნიშნავს?

— რასა?

— იმას, რომ მოდის... მოდის!

— ვინა, ვინ მოდის?

— მოდის, გუგუნით, ჭექით, ძლიერებით მოდის — რევოლუციას!

მე გაოგნებული შეეყურებდი...

— განა არ გესმის? — გაცოფებული მღელვარება, დელგმა, ნიაღვრის როხი, ჰაერშიც თოფის წამლის სუნი ტრიალებს.

შუადღის სიცხე ანთია სოფელში და სიჩუმეს მხოლოდ ჭრიჭინობელას დამღლელი ჭრიჭინი არღვევს...

ბორგნეულ და მრისხანე ანარქისტს ყველა ერიდებოდა. მისი „ყუმბარებისა“ ეწინოდათ. ამბობდნენ, საბძელში ფარულად აკეთებსო და როცა მოინდომებს, მთელ სოფელს ააფეთქებსო! დედაკაცები ისე არ ჩაუვლიდნენ შარაზე მიმავალ ანარქისტს, რომ მალულად პირჯვარი არ გადაეწერნათ:

— ღმერთო მაღალო, ღმერთო ძლიერო, შენ დაგვიფარე უბედურებისგანაო!

მართლაც, საშიში და უცნაური იყო იორამი მე მინახავს იორამი აღიდებულ იორთან მდგარი და სწორედ მაშინ შემიცვნიდა მისი აბორგებული და დაუდგარი ბუნება!

...მოდის, მოჰყივის ვეფხვის კრჩხიალით აღვარებულა: გაზაფხულის პირზე განრისხებული, გაგიჟებული, ღვართქაფიანი იორი, თან მოათრევს ძირფესვიანად მოგლეჯილ ხეებს, ხერგებს, წისქვილის დოლაბებს, ორლობის ნამტვრევებს და მოლოკილ მიწას! მოჰყივის ველური ყივილით, განგაშით ჩაშაგებული, შესაზარი!

იორამი კი ნაპირზე იდგა იორის ცქერაში ჩამტკბარი, მთლად გალურსული, მის ნიაღვრიან სულს მეტად ეთვისებო-

და აღვართქაფებული იორი, არწივისა და მერნის ფრთებით რომ მოჰქროდა აბორგებული და ნაზავთარი.

იორში ჩამჩქეფარე გაცოფებული ხეები აძლიერებდნენ ზარსა და ზრიალს, მდინარეს ესართებიან, ქაფშეტყორცნით ეკვესებიან და აღელვებულ მკერდს უჩოჩქოლებენ...

როგორ უხაროდა იორამს იორის აღიდება! ეს იყო მისი ნამდვილი სტიქიონი!

— ფრთა გაუშლია იორს, დახე, რა ლამაზია! როგორ აფეთებს თვალებს, როგორ იყრის ფაფარს! — და უხაროდა იორის ღვარცოფი, მდინარის დაუტევრობა, მისი განიერი ფრთები. დელგმა და ზათქი!

მართალი გითხრათ, გავოცდი, როცა იერის პირად მარტოდ-მარტო მდგარი იორამი დავინახე აღიდებულ მდინარესთან მოლაპარაკე.

— ეგრე, ეგრე, შეაზვინე ზვირთი! მძულს მდორე და გუბე! ეგრე შეუღეწე მტერს გული! ყბები ჩაუმტერიე! გაწმინდე შმორი, გაასუფთავე ჰაერი! ვიშ, სიცოცხლის სუნი ტრიალებს!

— რა გენაღვლება, რომ წაიღო ჩვენი ბოსტნები, სიმინდები, ვენახები, სათიბები, ნერგი აღარ შეგვარჩინა და ვაზი! გაგვძარცვა, გაგვლოკა, გაგვატიალა! — შესჩიოდა მეზობელა გლეხი აღტაცებულ იორამს.

იორამს კი თვალი ვერ მოეშორებინა აზვირთებული მდინარისათვის.

— ეგრე, ვეფხვო, ეგრე იბობოქრე, სიცოცხლე მაგრძნობინე! უჰ, შენი ჰირიმე!

ხოლო როცა იორი ჩამოიკლებდა, დაწყდებოდა, და-

წყნდებოდა, დაპატარავდებოდა, პოეზიის მოძულე იორამი ასე ტკბილად, პოეტურად მიუალერსებდა:

— კიდევ გამოდი ძოვნად, ირემო. კიდევ მიჩვენე ფრთები, ქოჩორა მტრედო!

იორამს ის აწუხებდა, რომ მრევლი არა ჰყავდა.

თუ სოფლის სახარაზოსა და ღუქნის წინ დაიჭერდა სათავისოდ ორ-სამ კაცს, უფრო შიშით თუ ხათრით ყურისმგდებლებს, აგზნებით ჩაჰკირკიტებდა:

— ანარქიზმის მეტი არა გვიშველის რა! საერთმანეთო, სამთელქვეყნო, დიდი აზრი, დიდი ცეცხლი უნდა გავადვიოთ! კასპიის ზღვა შავ ზღვას ვჰკრათ! ძველი ქვეყანა უნდა ავაფეთქოთ დაუყოვნებლივ, რაღას ვუცდით!

შიშით ვერავენ უბედავდა შეკამათებას, რადგან ყველას სჯეროდა, რომ ანარქისტს ორივე ჯიბე „ბომბებით“ ჰქონდა გამოტენილი.

— გეყოფა, ძმობას, რა დროს აფეთქებაზეა ლაპარაკი, შე დალოცვილო! — შებედავდა ერთადერთი, ისიც უფროსი ძმა ძუნძგლი, — ხანში შესული, დამკრთალი, შესეტყვილი კაცი, დადუნებული ხელებით, თოვლივით გაწყალებული გუნებით. ძმებს ხშირად ჰქონდათ შეხლა-შემოხლა და კამათი.

ორივენი უცოლშვილონი იყვნენ შეძლებული მამის დანატოვარ სამკვიდროზე.

იორამი სემინარიიდან დაითხოვეს, ძუნძგლიმ ოცდაათი წლის წინათ დაასრულა სემინარია და მას მერე სოფლიდან ფეხი არ მოუცვლია. ერთთავად წიგნებში იყო ჩაფლული, ანარქისტი კი ყუმბარებს ამზადებდა სამყაროს ასაფეთქებლად.

ყველაზე უმეტეს ძუნძგლის მყუდრო, უშფოთველი ძილე

უყვარდა, თითქმის ქათმებთან ერთად იძინებდა, ქათქათა ლოგინი უყვარდა, ლოგინს გაასწორებდა, ჩაჰკუჭავდა საბნის ნაპირებს, ჩაიგებდა საბნის ყუას და სიტკბომიციემული, უკვე მწოლარე, ძმას ღიმილით გადმოსძახებდა:

— არ მიყვარს ხეტიალი და აჯანყება! ამას რა სჯობს, რა ტკბილია შენი სახლი — შენი საყუდარი! მივეყუდრები მონებებში და ვარ ჩემთვის, მზის მადლმა!

ერთხელ, მეც კვითხულობდი გერცენს, სპენსერს, კრაპოტკინს, მაგრამ... რა გამოვიდა? ეჰ, ესე სჯობია. ოცდახუთი წელიწადია ამ ტახტზე ვწევარ, მე და ჩემმა ღმერთმა! ყველას თავისი ღმერთი გვყავს. მე ჩემი ღმერთი მწამს.

ახალგაზრდობაში მხოლოდ თავისუფლების ოცნებას ვსდევდი, ქარიშხალთან მიხდოდა მეცხოვრა! ახლა... ღუღუნა ბუხარი! ცა გასკდა, დედამიწა ჩაინგრა, ბუხარი კი დარჩა! ბუხარი და ორი კაცი! მეტი არა, მესამე მყუდროებას დაგვირღვევს!

მართლაც, მხოლოდ საათის წიკწიკი არღვევდა მის სიმყუდროვეს. ბუხარი მტრედვიით ღუღუნებდა, კედელზე გაკრულიყო ცეცხლის ნათელი აჩრდილები...

ძმა გამოსძახებდა მეორე ოთახიდან.

— სიწყნარე მხოლოდ იალბუზზეა! მერე, განა შენ არა ბრდღვინავდი წინათ, ფაფარაყრილი? შენ არ იყავი, გიტარაზე რომ დამღეროდი:

„მოვედეთ ხალხს გულისთვისა,
ფურცელი ვართ მალღის ხისა!“

— რა ვუყოთ მერე, მე ახლა ჩამოცვენილი ფურცელი ვარ! ვინ დამღერება დაცვენილ ფოთოლს, რატომ არ შრიალებ

მთვარიან ღამეშიო! მე, ჩემო ძმაო, რაღა მესაქმება რევოლუციასთან? ნეტავი, შენც დროს არ ჰკარგავდე ტყუილად და მყუდროდ იცხოვრო! მშვიდობა და მყუდროება მიყვარს, ჩემს სახლში, ჩემს კერაზე; ჩემი ეზო და ნამყენი, ჩემი ქოცო! მიყვარს ბოსტნიდან რეჰანის სურნელს რომ შემომიქროლებს ნიაფი, მიყვარს, როცა კოჭობში ჩუხჩუხებს წითელი ლობიო, ქინძითა და შინდის ჩურჩით შეზავეებული. ზედ ცოტა ნივრის წნილიც... რა სჯობია?

რად მინდა ბრძოლა, ხმაური, განგაში, აურზაური, ყიყინა, რბევა, კაცის სისხლი? — იძახოდა ძუნძელი, — ხომ სულ წყალს უნდა მისცეს კაცის შრომა, ოფლი და ამაგი? განა, მიწისთვისაც ადვილია? მიწასაც უმძიმს...

— მაშ, ბრძოლა ხალხის თავისუფლებისათვის არაფერი ყოფილა? — რისხვეულად შეეტაკებოდა იორამი.

— დიახაც! მთა და ბარი არასოდეს გასწორდება! იორამი ჩაიქნევდა ხელს.

— მაგრამ, კანტი, მილლი, სპენსერი, პლენხანოვი, კრაპოტკინი...

— თუ გინდ კიდევაც მიუმატე ისო ზირაქი, სოლომონის ეკლეზიასტე, მაინც ყოველივე „ამაოება-ამაოებათა“, ჩემო ძმაო.

იორამი კი ბობოქრობდა, მზად იყო თავი შეეკლა თავისი რწმენის გულისათვის! არც თავის უფროსსა და პატივცემულ ძმას ერიდებოდა. ძმობა და სახლიკაცობის სიყვარული ითურგნებოდა.

ძმას ტკბილად, ნეტარყუჩობით მიეძინებოდა. ძილში ცხვე-
ბოდა... ცა ქათქათებდა, იასამნის ბუჩქი მთვრალ სურნელებას
გამოსცემდა... იორამი კი, მარტოდმარტო, აივანზე ბოლთასა
სცემდა... ირგვლივ მღორე ცხოვრება იშშუშნებოდა...

გულჩათხრობილ იორამს ჩუმი და ნაზი სიყვარულით შეპყ-
ვარებოდა მამასახლისის ქალი, ძუძუმეკერდა მერცია.

მერცია ლალი, ხორციელი, საღერღელ-აშლილი ქალი იყო, კალმახვიტ დახტოდა, უყვარდა სიმღერა, ჩაღეკურება.

იორამი უწმინდესი სინაზით და „აღსურვებით“ ეტრფოდა!

„ვნებათა ქვემდებარე კაცი — ვერ განმხედველი გონები-
საო“ — ძველი ნათქვამია!

მახსოვს, გკათათვის მთვარიან ღამეს, ჩვენი სოფლის ახალ-
გაზრდობას ორლობეში წინ მიგვიძლოდა იორამი და გვამღერებ-
და:

„აღსდგე, მშიერო, მუშათა კლასო!“

კალოებზე იღვიძებდნენ მთელი დღის ნამაშვრალეები, ძილ-
გატეხილები, მაინც სიამოვნებით ყურს უგდებდნენ ჩვენს სიმ-
ღერას.

ახლა მოვაყოლებდით „თამარის დროშა გაშალეს!“ ეს სიმ-
ღერა იორამისგან აკრძალული გვქონდა, მეფეზეაო, არ შეიძ-
ლებაო! მაგრამ ჩვენს რიგებში ჩამდგარი მერცია რომ ხმას
დააწკრიალებდა, იორამი სულ იბნეოდა, ლამის თავისი „ყუმ-
ბარები“ გასცივიწოდა ჯიბეებიდან!

იორამის ერთადერთი თავშესაფარი გარსიას სახარაზო იყო,
მისი ერთგული დასამხრისი. სახარაზო — იორამის კლუბი იყო,
მისი ფორუმი. აქ ქადაგებდა, აქ მძვინვარებდა. თბილისის გა-

ფიცებში გემოაღებული გარსია იორამის ერთადერთი და უკანასკნელი მოწაფე, ალტაცებით უსმენდა მასწავლებელს.

გარსიას ცალი ფეხი იაპონიის ომში დაეკარგა. მერე ხარაზობა შეესწავლა, ადელხანოვთან ემუშავნა თბილისში; იქ 1905 წლის გაფიცებისათვის გაეციმბირებინათ და ციმბირიდან გამოქცეულს ჩვენი სოფლისათვის შეეფარებინა თავი.

პირბადრი კაცი იყო გარსია, ზრდილი. სოფელში უქებდნენ უნგარობასა და სიმართლეს. ხუმრობა უყვარდა. შეკითხვაზე, როდის იქნება მზად ჩემი ფეხსაცმელიო, მიუგებდა:

— გოჭის ხუთშაბათსაო!

სწორედ გარსიას სახარაზოში ვუკითხავდი ხოლმე გლეხებს ჩემს ბალღობაში ილიას, აკაკის, ვაჟას, ყაზბეგისა და ეგნატე ნინოშვილის ნაწერებს.

— აი, გასძეხ კარგი მზითა! — მეტყობდნენ ხოლმე წაკითხვისას ისეთი მადლიერებით, თითქოს თავად დამეწეროს ეს წიგნები!

მაგრამ, ერთხელ, „ელგუჯას“ კითხვა რომ ჩავათავე, მოწონებითი სიჩუმის შემდეგ, გარსიამ თავი მალა აილო, აქეთ-იქით მიიხედ-მოიხედა, აგვათვალეირ-ჩავგათვალეირა, მერე თითბრის ყვითელი მუშტა საძირე ტყავს დაჰკრა და მითხრა:

— ვის ათბობს მზე და მთვარე, რატომ იმაზე არ გვეტყვი! აბა, თუ ბიჭი ხარ, „გილიოტინას“ წიგნი წაგვიკითხე!

მე განვცვიფრდი. თუმცა სიტყვა „გილიოტინა“ გაგებულნი მქონდა! სწორედ იმ ხანებში წავიკითხე ფელიქს გროს „მარსელელი“, მოთხრობა საფრანგეთის რევოლუციის დროიდან, — მაგრამ, მაინც ვერ მივხვდი, რომელი იყო „გილიოტინას“ წიგნი...

ამის შემდეგ „მარსელელებთან“ ერთად, ზოგი რამ სხვაც საფრანგეთის რევოლუციიდან წავუქითხე და აღფრთოვანებული გარსია მოწონებით იმეორებდა რევოლუციის დროინდელ ზოგ გამონათქვამს:

— როცა მეფე ცოცხლობს, ჩვენ ვისრჩევებით!

— თავისუფლების ხე ტირანის სისხლით ირწყვება, სხვა-გვარ ვერ გაიდგამს ფესვებს, ვერც აყვავდება!

გაუგონარი სიძულვილით სძულდა გარსია ხარაზს ნიკოლოზ მეორე, ერთი პატარა ლაქუცა ძაღლი ჰყავდა, „ნიკალის“ ეძახოდა.

მერცია გათხოვდა ჩაფარზე...

იორამი გამწარდა, მთლად მოღუნდა. ღონე და მოთმენა გამოელია.

ქვეყანა მისთვის ჯოჯოხეთად იქცა.

„ფათერაჟი ვანუა“ ახლა ორგვარად ჰზვერავდა იორამს, — როგორც „ბუნტისთავს“ და როგორც მეტოქეს.

მთლად გულაცრუებული შეიქნა იორამი ცხოვრებაზე. წინათ გაზეთებით მაინც ერთობოდა სოფელში, ახლა ისიც აკვეთა.

ანარქისტმა ერთხელ, ჩემთან, გაზეთი გვერდზე გადასდო, გადაისროლა, როცა შიგ ერთი ჩვენი გამოჩენილი პოეტის ლექსს შეჰკრა თვალი:

— აპოლონის ლილიპუტების ვის რად უნდა მათი ფეხმოკლე აზრები?

— აბა, ნახე, — სიმწარით შემომჩივლა, — რა სიტყვა აქვს, რა ენათქმა, რა აზრი აზრი კი არა — ლაფიანი წუნწლებია.

დაითავისეს ნიცმე, შოპენჰაუერი და თვალდაფქულ მკითხველს სჯერა ყოველივე!

ან რა ქვეყანა ვართ? — სამგლეთი, ფილისტერების ქვეყანა, მშიერმუცელაი ოხ, აქ ყოფნა აღარ შემიძლიან!

...შემოდგომის წვიმა სტრის ერთფეროვანი დაყინებით... აივანზე ზინტლიანი ძაღლის წუნწლები. ერთ ნაბიჯზედაც არაფერი ჩანს, ყველაფერი დაფარა შემოდგომის ბურუსმა! დედაშიწაში ჩამჯდარი მიწურები... ღარიბული ოთახი, ჭუჭყიანი, ჩამოდვარცლული კედლები. უბადრუკი, უნიჰო სინამდვილე. წინ — არაფრის სინარული, არავითარი სიახლის მოლოდინი... ირგვლივ — გუბე და მდორე ცხოვრება, ჩამპალი ჭაობი, დაგუბებული ჰაერის რა გაადვიძებს, თუ არა ყუმბარა, ამ უჩქეფო-უხალისო, უსიცოცხლო ყოფას?

წვიმა კი სტრის... სტრის... და სტრის...

იორამი მზად არი გარეთ გავარდეს და თმაში ხელებშეტაცებულმა იყვიროს:

— მიშველეთ, მიშველეთ!

მომენაგამოლეული, ქანცგაწყვეტილი ჩაქანდება თავქვე, ქვემო ვენახებში, დაერევა ვაზებს შლეგივით ამტვრევს, ლეწავს ჰიგოებს! თითქოს ვიღაცას ებულრავება! თვითონაც არ იცის, რას სჩადის, გულს კი იოხებს!

გარშემომდგარი ნისლი კი, შემოდგომის ზღაზნია ნისლი, გველუშაპივით მიიპარება ვენახში. მცირე ხნის შემდეგ აღარც იორამი ჩანს და აღარც ვენახის ყოველივე ნაცარა ნისლითაა გარმოხვეული!

და... აქეთ — იორამი, იქით — ნისლივით უმოძრაო და

უქმი ცხოვრება! არც ერთი თანამგრძობელი! ერთადერთი ღვიძლი ძმა, ისიც მისი აზრების მოწინააღმდეგე!

განა ყუმბარა ცოტა არ არის ასეთი დაგუბებული ცხოვრებისათვის?

— ო, რა საზიზღარია სიღარიბე... ქაობი... მიბრეცილი ქოხები... მობრეცილი ტვინი... რამ გააჩინა ასეთი ცხოვრება? ვინ გამოიგონა? — კითხულობდა გულისწყრომით იორამი და პასუხი არსაიდან იყო.

ალარც მიწის გუგუნი ისმოდა...

იორიც ძალზე ჩამოკლებულიყო.

რა ექნა?

ხანდახან მოხდებოდა, რომ ანარქისტი და მღვდელი, ასეთ ეინელლიან ამინდში გუნების ეინელიანობისა გამო მცირე ხნით „დაზავდებოდნენ“, მაშინ მიჰყვებოდნენ „ერთმანეთში სმას“. „დილის არყით“ დაიწყებდნენ. სვამდნენ მონდომებით და წადილით.

„ყუმბარის“ შიშით ჯერ მღვდელი უთმენდა, მაგრამ არყის მეოთხე ჭიქის შემდეგ გამხნეებული შეკამათებას შეუბედავდა.

მომთმინებიდან გამოსული იორამი ჯერ თვალებს შეუბრიალებდა, მაგრამ გაითვალისწინებდა რა მღვდელთან ბრძოლის უნაყოფობას და უმიზნობას, უღონოდ მიესვენებოდა ღუქნის შელაქავებულ კედელს, მზად იყო თმაში ხელი ეტაცნა და ეყვირა:

— მიშველეთ!

— მიშველეთ!

გარეთ ისევ ეინელლაავდა, ეინელლაავდა, უიმედოდ, გულის-გამაწვრილებლად, გასაწყალებლად, — ლამის წვიმასა და ღრუბელს ქვეყანა გადაებნელებინა...



ს ი ბ ი კ ო რ ე

სოფლის უფროსად მინდოდი,
 ამტანად ძნელ ამბებისა,

ხ ა ლ ხ უ რ ი

სოფელს ატირდეს დედანი, —
 სოფლის უფროსი კვდებაო,
 ნუ მოჰკლავ დამბადებელო,
 სოფლობა წაგვიხდებაო!

ხ ა ლ ხ უ რ ი

ჩვენი სოფლის შარაზე დარბაისლური, მხნე ნაბიჯით მოაბიჯებდა გრძელ, ჩერქეზულ ჩოხაში გამოწყობილი ახოვანი, ბრგე, სახიერი, თეთრულვაშა ციციკორე — სოფლის დარბაისელი, თავისი განუყრელი ურძნის ლიტაო ჯოხით.

ეს ჯოხი — ციციკორეს საერისმთავრო კვერთხი იყო. გა-
ჯავრების დროს მალლა შემართავდა, აზრის დასამტკიცებლად
მიწას დაარტყამდა დაჟინებით.

მოდლიდა ჩუმად და რომ არ გცნობოდათ, მაინც მაშინვე
შეატყობდით თვალსაჩინოებას!

დიდი ხნის უნახავს გაეხარდებოდა ხოლმე ჩემი დანახვა:
არადაღებებზე სოფელში რომ დავბრუნდებოდი, თუ საღმე
მომკრავდა თვალს, გაღიმებული მეტყვიდა:

— შენის ნახვით სამი წელიწადი და ერთი კვირა მომემა-
ტაო! ისწავლე, კარგა ისწავლე, ეგებ ნასწავლებმა ჩაუყენოთ
საქართველოს თვალიო!

ერთხელაც მხარზე ხელი დამკრა და რიხიანად მითხრა:

„შენი ბიჭობის სახელი
სვეტიცხოველზე სწერიას!“

რატომ ეწერებოდა სვეტიცხოველზე ჩემი სახელი, ვერ გა-
ვიგე, ვერც კითხვა გავუბედე, ისე კი ეს ვაჟკაცური ქათინაური
ძლიერ მომწონდა.

უშვილძირო იყო ძია ციციკორე.

— რათ მინდა შვილი, განა ცოტა მყავს მოსავლელი, მთე-
ლი სოფელი კისერზე მაწევსო!

მართალიც იყო! სოფელი ვინ? — ერთი კაცი! მთელი დღე
ტრიალებდა სოფლის საქმეებზე, ღამეც კი მის განკარგებაზე
ფიქრობდა. განა ტყუილად უყვარდა გარჯა, წვართულობა,
სოფლის მერჯულეს, გამგებელსა და მეუფროსეს! ყველას
ჭკუას არიგებდა და ყველა გმინავდა მისი არამკითხეობის კირ-
თების ქვეშ. ციციკორე იყო სოფლის მზრუნველი, მომვლელი,

მოჭირნახულე, თუმცა ხშირად ღიმილით შენიშნავდნენ, რომ სოფელი მისთვის არავის ჩაუბარებია: — არც ღმერთს, არც ხალხს და არც თვით ხელმწიფე-იმპერატორს! შეიძლება ეს იმის ბრალიც იყოს, რომ ციციკორეს დიდი პაპა იოთამი სოფლის ნაცვალი იყო ერეკლეს დროს და ციციკორეს მემკვიდრეობით მოსდგამდა სოფლის უფროსობა!

ციციკორე თავისას არ იშლიდა:

გულდიდობას, გულზვიადობასაც აბრალებდნენ, თავგაზიდიულიაო; გულრბილი, დამთმო კაცი არ იყო, მაინც კაცური კაცი იყო, ლმობიერი, სწორი მხედრობა ჰქონდა... მოყვრისათვის, რომ იტყვიან, სწორედ გულთაგული!

ყველამ იცოდა, რომ ციციკორე გულიდან იყო მხედველი, რომ პირუტყუარი შემოცქერაც ისეთი იცოდა, თვალთ განმცდელობა, რკინა დადნებოდა მისი მზერის ქვეშ. აბა, ტყუილს როგორ იკადრებდა!

დიდი ნდობაც ჰქონდა მოხვეჭილი სოფელში. სახლოსნობა და სისხლიანი საქონელი ციციკორეს მიერ გაიყოფებოდა ხოლმე, როგორც სანდო დარბაისელ გამრიგესა და თავკაცის მიერ.

გაზაფხულის პირას, აფუცუნდებოდა თუ არა დედამიწა; ამოყოყინდებოდა თუ არა ბალახი, სოფლის არამკითხე მოამაგე და ჭირისუფალი ჩამოუვლიდა სოფელს კომლ-და-კომლ; თან აფრთხილებდა:

— ცხენი არ აძოვო ყორიანის მინდორზე, ხომ იცი, იქაური ბალახი ცხენსა ჰკლავს, არც იქაური თივა აქამო, ისიცა ჰკლავს, ეს იცოდე!

— რა მიზეზია ნეტავი?

— რა მიზეზია და ჩემის ანგარიშით, მანდ ზომ დიდი ომები მომხდარა და ბევრი მტერიც არის ჩახოცილი და მტრის სისხლი იკბინება დღესაც, ახლაც არა ცხრება და მუშაობს ჩვენ სამტროდ! ამშრალა, მაგრამ ჰხედავ, არც ამშრალა, ისევ მიწაში დულს შხამიანი და გვსუსხავს, ახლა იქიდან გვებრძვის, დახე, ცხენებსაც გვიხოცავს! ჩვენ რომ ბალახსა ვჭამდეთ, ჩვენც ამოგვწყვეტდა!

ასეთი დაკვირვება კი ჰქონდა ციციკორეს. სოფელი მართლაც ერიდებოდა ყორიანის მინდორს!

— რას ბრაცუნებ ამ შუალამით? — ეტყოდა შემთხვევით შარაგზაზე შეხვედრილი დროული კაცი, — მასთან შეხუმრებული, — სხვა ვინ გაუბედავდა?

— სოფელს ირგვლივ შემოვლა უნდა, მტერი მოძალე, თვალნაცემი არ შემოგვეპაროს! ათი თვალი და ათი ყური მაქვს გამობმული! ხუმრობა კი არ არის სოფლის პატრონობა, — იტყოდა ციციკორე.

ციციკორე ბაქრაძე სოფლის მამობასა და მეურვეობას ჩემულობდა. იმის შინაგანი დაჯერება ჰქონდა, რომ გაჩენილი იყო რაღაც დიდი საქმის შესასრულებლად, ყველა ამბავში ერეოდა, რადგან თავისი პირდაპირი მოვალეობა ეგონა.

დიდი ზეგავლენაც ჰქონდა ხალხზე. ამიტომაც, არავის გაჰკვირვებია, როცა ერთხელ, მეზობელ სოფლიდან ავადმყოფი ბავშვი გადმოუყვანეს საექიმოდ.

— გვიშველეო, სულ ავადმყოფობსო, თანაც დაგოლვილია, არ იზრდებაო! ექიმებში ბევრი ვატარეთ, ვერა არგეს რაო!

— ჩემთან რა ხელი გაქვთ, ქალაქს წაიყვანეთო. იქ ბავ-

რატონის გვარის კაცმა სამი სილა უნდა გაარტყასო, ანდზე დადგებაო, ავადმყოფობა გაუვლისო!

— შენ გაულაწუნე, შენი ჭირიმე, ოღონდ მორჩეს... — შეევედრა ბავშვის მამა.

— როგორ იქნება, ერეკლე მეფის ჩამომავალი უნდა იყოს, მე ვინა ვარ? -4

— არც შენა ჰგევხარ ნაკლები გვარისასო! — ასიამოვნა ბავშვის მამამ.

ციციკორემ შეიფერა, მაგრამ ბავშვისათვის სილის გაწვნა მაინც ვერ გაბედა...

შკათათვეში, კალოობას, უთენებელზე, სოფლის დერეფნებში ჩხუბი გაიშლებოდა ხოლმე. დედამთილები მუჯღუგუნით, ჭიმუნჯით აღვიძებდნენ მძინარ პატარძლებს: ადექითო, ძროხებს მოწველა უნდაო, ნახირში გარეკვა, ქათმებს დაპურება, ძნას ჩაშლაო. ხომ გახსოვთ სოფელში გაგონილი: „მოჯამაგირის დღე გაჰქრეს, პატარძალის დილის ძილი, ადრიან წამოაგდებენ, ხომ დაუსივდება ცხვირი!..“

აი, ამ დროს გამოჩნდებოდა ციციკორე, — რძალ-დედამთილის დამზავებელი. ჯერ პატარძალს ეტყოდა: სიცილით მოსულო, რა გატირებსო? დაჩუმდი, დაჩუმდი, ცხრა მაჭაკლით მოყვანილო! ახლა დედამთილს მიუბრუნდებოდა: შე მადლიანო, შენი შეილის გვირგვინის ცოლია! ნამდომი პატივდებაში იყოლიე! მერე ცოტა ხმას აუმაღლებდა: — სულ ხომ შენ თვალქვეშ არ იქნება? ცოტა მოეშვი, მაგანაც გაიხაროს ამ ქვეყანაზე! ჰხედავ, სანაშენოდ რა კარგი ქალია, ოჯახი გაანაშენა, სამ წელიწადში სამი ბიჭი დაგიგორა! ქართველები ცოტანი ვართ, უნდა მოვმრავლდეთ! ვენაცვალე მაგის ბარაქას!

მერე ორივეს ერთად მიმართავდა:

— ერთმანეთს ია-ვარდად უნდა ეშლებოდეთ! ნებით, წაილითა და სიყვარულით იცხოვრეთო! — ასე დააწყნარებდა, თვითონაც გულს დაიმშვიდებდა სოფლის არამკითხე მესვეურნი და თავის გზაზე გასწევდა განუყრელი ყავარჯნით.

თუ თვალს მოჰკრავდა ლალად მიმავალ სოფლის თამამ გოგოებს, ხმას შეუშალლებდა:

— ერთი უყურე, აბა, ქალს ეგ უხდება? თავი უნდა დახარო მორჩილად და ნიავევით ჩუმად გაიარო, განა თვალეები უნდა შემომამბდღვრილო?

უშიშარ ციციკორეს მხოლოდ ერთი შიში ჰქონდა, — შიში უწესოებისა, ამიტომაც იყო, რომ ყველას მწყემსავდა, კმობღვრიდა. გარჯულვა უყვარდა, უფრო დედაკაცებისა. — დედაკაცს და ცხენს ნება რომ მისცე, სტამბოლს გადაცვივიანო! — თავჩაღუნულ, უშთაგონებო ადამიანს რომ დაინახავდა, დაუტატანებდა: — რას ჩასტირი მიწას, შე დალოცვილო? მიწაში ჩადებასაც მოესწრები! ცას შეჰხედე, მზეს შეჰხედე, ღვთის მოცემულს, გაიხარე, ღვთისნიერო!

— ერეკლე მეფის ძვლებს მცხეთაში მირონი ჩამოსდის, შენ კი, ცოცხალი ჰყარხარ, უსაქმურო! ორი გაწოვა დედამ, განა ერთი! — გაფიცებით არიგებდა ციციკორე წელიწევეტის, დაბღურას, დონდლოჩინას.

თვითონ მშრომელი ვერ იტანდა ზარმაცს, მცონარს, უსაქმურს, ცეცხლმოკიდებული ეძგერებოდა ჩრდილში მონებივრე გლესს:

— შე ენგიანო, სამძილა ზარმაცო, მიმკვდარებულო, ლოხო! განა არ იცი, რომ ქვეყანა საგარჯილოა?

ზოგჯერ ერთგული ცოლი ქმარს დაიფარავდა ხოლმე ციციკორეს წყრომისაგან:

— ხომ იცი, მაზლო, ჩემი კაცი უცოდველი, პატიოსანია!

— დიაღამც, უცოდველია, უცოდველი, როგორც ყაჭიღამ გამოსული ქია! — დაციხვით მიაგებებდა ციციკორე, — იქ მკვდრებს აკლია, აქ — ცოცხლებს აწუხებს!

— რა ქნას, ავადმყოფობამ დარია ხელი. — შეეჯავახებოდა ქინძურას ცოლი.

— ავადმყოფობამ? მაგას თეთრი ფურის რძის თეთრი ფაფა მიაართვი, რომ კბილები შრომით არ დაეღალოს! — ასე გააბახა ციციკორემ ზარმაცი ქინძურა, რომელიც შუა მუშაობაში ცოლის საალერსოდ ვენახიდან გამოპარულიყო.

ემართლებოდა კიდევაც!

სამართლიან და პატიოსან ციციკორეს არ უყვარდა არც ღლეტურა და, განსაკუთრებით, ქლარცი ენის პატრონი, ეჯავრებოდა ყბამოქნილის, ენამლესილის, დაუყენებელი ყბის იკლიკანტური ბრტყელსიტყვაობა. თვითონაც როდი იყო სიტყვა-მიუგებელი კაცი!

— საქმე სიტყვის წინამავალი უნდა იყოს! აი, ვაყვაცობა ამასა ჰქვიანო!

— რა ბედენაა, მოშაქრული, მოშარბათებული სიტყვები!

მოკლე სადღეგრძელოები იცოდა: მშვიდობა, მზეგრძელობა, კარგად ყოფნა, შვილიანობა, ვაჟით ვაჟიანობა, პურიანობა, ღვინიანობა, საქონლის გამრავლება, ხეხილის მსხმოიარობა! — ეს იყო და ეს!

სოფლის მეუფროსეს სიმძიმე ჰფერობდა, — მძიმე იყავ, წონაში მეტი მოხვალა!

მაგრამ ციციკორემ გამონაკლისებიც იცოდა, ყველა ზარმაცს როდი ემტერებოდა! აი, გინდაც, გრძელღვავა ფადლაურა. რა მოსალხენარი კაცი იყო, რა მომღერალი, ვერც კი ეტეოდა გრძელ კახურ მრავალყამიერში! მისი სიმღერის გაგონებაზე დაუდასტურებდი ბრძნის ნათქვამს: „ხან კაცი ღმერთსაც ემსგავსისო!“

ღედაც მომღერალი ჰყოლია! მოდი და ნუ დაუჯერებ ციციკორეს თქმულს: ღედის ხსენსა რაც ჩაჰყვება, სულს ის ამოჰყვებაო!

ამასთანავე ფადლაურა უსაშველო ზარმაცი იყო. სუფრის გარეშე არ არსებობდა. იჯდა საჩრდილობელ ხის ქვეშ და როცა ჰკითხავდი:

— როგორა ხარო? — გიპასუხებდა:

— ძველებურად: არც ვგრძელდები, არც ვმოკლდებიო!

ასე იყო: ქორწილიდან — ქორწილამდე, ნათლობიდან — ნათლობამდე... დაუკლისად სვამდა და მღეროდა, მღეროდა და სვამდა.

სხვა რომ ყოფილიყო ფადლაურასთანა, ციციკორე ნაცარტუტას აადენდა, მაგრამ ზარმაც ფადლაურას სიმღერისათვის დიდ პატივსა სცემდა და ერთხელ, როცა სოფლის სადალაქოში ყბედმა დალაქმა ლოჭომ ფადლაურა გაკენწლა, ყბაზე შეფიფქილმა ციციკორემ ლოჭოს მშვიდად უპასუხა:

— ფადლაურას ხმა ღვთიდან არი, პატივისცემა გემართებს, თავისი ხმით ემსახურება ქვეყანას, რას ერჩიო!

მხნედ შემოაბიჯებდა ციციკორე სახლში, ბჭეშივე ქულს შეიქნევდა და ძალუმი ხმით შესძახებდა: სახლო, ღმერთმა აგაშენოსო!

ახლაც, თითქმის ნახევარი საუკუნის შემდეგ, თვალწინ მიდგას ყავარჯენზე ნიკაპდაყრდნობილი ციციკორე — პირსუფთა, ახოვანი, ტანოვანი, მკეხარი ხმის პატრონი.

თუ ვინმე ყურს არ მიუგდებდა ან აწყენინებდა, ციციკორე ერთს ღრმად ამოიოხრებდა და დაატანდა:

— ვაი, თემო და სოფელი!

ერთხელ, მეზობელმა თათრებმა ჩვენი საქონელი წაასხეს. სოფელი მღევარზე გამოვიდა. ვინც მღევარში წასვლა ვერ მოასწრო, მათ ციციკორემ სულ ცეცხლი გადააყარა თავზე.

— ჰაი, თქვე ქალისპირებო! განა თქვენ გამამაგრებთ საქართველოსო?

თვითონ კი მართლაც მთელი ჩვენი სოფლის გამამაგრებელი და გამამხნევებელი იყო მუდამ.

განა დამავიწყდება ოდესმე, ერთ საშინელ ღამეს, თუ როგორ მოეპატრონა ჩვენს ოჯახს და გაგვამხნევა?

საშინელი, შავი ავდარი მოვიდა, ხორხოშა-სეტყვიანი. სულ ჩამორეგვა ყველაფერის ეზოები წყალმა აატივტივა. სოფელმა წარღვნა იფიქრა. ოდნავ რომ გადაიღო ღვართქათმა, ორლობეში გამოჩნდა თავზე ტომარაწამოსხმული ციციკორე და სახლებში ჩაკეტილებს მოგვძახოდა:

— ნუ გეშინიათ, გამაგრდით! გადაივლის ავდარი! ამისთანები უნახავს ჩვენს ხალხს! ნუ შეშინდებით, გამაგრდით! — აი, მაშინ კი ვიწამე ციციკორეს ბელადობა! მაშინ, ნამღვილ ბიბლიურ წინასწარმეტყველს ჰგავდა აგზნებული თვალებით.

ახლა მეორე მეკომურთან შევიდა, განსაკუთრებით ქვრივობოლთა უკაცო ოჯახები დაიარა, არ შეშინდნენო!

აი, რა გული, რა მხნეობა ჰქონდა ციციკორეს!

ახირებული ციციკორე ზოგჯერ სხვისი აზრების მასპინ-
ძლობას ვერ იჩენდა.

ერთხელ, შუა კამათში, ციციკორე მოკამათეს უეცრად
შეეკითხა:

— მოლალური იცი?

— ვიცი

— მტრედი იცი?

— ვიცი

— ყანჩა იცი?

— ვიცი

— იშხვარი იცი?

— არა!

— მაშ, იშხვარი არ იცი და მელაპარაკები? ჯერ წადი,
გაიგე, იშხვარი რა არი, მერე მოდი და მელაპარაკე! — ასე
დაამარცხა მოკამათე.

რა იყო ეს „იშხვარი“ და რატომ აძლევდა ასე დიდ მნიშვე-
ნელობას ციციკორე, ახლაც არ ვიცი; მგონი, „იშხვარი“
სულაც არ უნდა არსებობდეს ბუნებაში. ფრინველი „შხერო“
თუ ჰყავდა მხედველობაში! მაგრამ შხერო რომელი არწივია:
რომ მისი ცნობითა თუ ცოდნით თავი გამოიღო?

უცხო კაცი გაბედვით იტყოდა ხოლმე ციციკორეზე: კერპი
კაცია, ხერკინააო, სიტყვით მტეხელიო, მაგასთან ლაპარაკს
კლდის გლეჯა სჯობიაო! ნეტავ როგორ უძლებთო, მაგ შეუ-
პოვარსაო!

მართლაც, თავის ნათქვამა იყო ციციკორე.

ჩვენში თითქმის აღარავის ედგა მიწური სახლი, ციციკორე
კი ისევ ძველებურ, ბნელ დარბაზში ცხოვრობდა.

ეს დარბაზი თითქმის ერთადერთიდა შემორჩენილიყო მთელ სოფელში!

მეამაყება, რომ მოვესწარი ძველებურ ქართულ დარბაზს და დარბაზის გვირგვინში მერცხლის ბუდეს!

მეამაყება, რომ საკუთარი თვალთ მინახავს მოხარატებული დედაბოძი მზე-მთვარისა და რტომრავალი ხის გამოსახულებით. ზედ უსათუოდ გატყაპნული აღდგომის ჩანაქუჭებული წითელი კვერცხით, დედაბოძზე მიკრული შინდის ჩხა, ზედ რომ ციციკორეს სუფთა წინდები და პაჭიკები ეკიდა. საქარეში ზაფხულობით ნიავე სისინებდა, ზამთრობით — ქარი დმუოდა, მაგრამ ვერას აკლებდა, დიდი შეშის სათარი კერაზე იდო. საკიდელზე ჩამოკიდებული დიდი, შავი ქვაბი შიშინებდა...

განებივრებული ვყავდით ციციკორეს ცოლს — კონიას. ახლაც მახსოვს გემო და სურნელი მისი შემზადებული საკმელებისა და როგორ არ მოვიგონო მისი ხელით გაკეთებული: შინდისა და ღოლოს შექამანდი, ხირხიტო, ჭინჭარი, სატაცური და ქარქვეტის წნილი, ყველიერში — მახონი!

ციციკორეს დარბაზში ძალზე ბნელოდა. ხელის ცეცებით უნდა შესულიყავი და დიდხანს ვერც გაერკვეოდი სიბნელებში.

— რას იკლავ თავს ამ ბნელაში, შე კაი კაცო, გამოდი მზეზე, ერთი მზიანი ოთახი დაიდგი, რა გაგჭირვებია ისეთი, უშვილო კაცი ხარ და უხარჯო! — ეტყოდნენ ხოლმე მეზობლები.

— აჲ, ამ ბნელაში სიცოცხლე მირჩევნია თქვენს მზოუ-

რობას! — იყო ციციკორეს მუდმივი პასუხი და ცოლიც მაშინვე კვერს დაუკრავდა:

— გენაცვალეთ, აქ გავატარეთ მთელი სიცოცხლე, და ახლა რომ აქედან სადმე გადავიდეთ, სირცხვილია, ხალხი რას იტყვის?

ციციკორეს მართლაც შეეძლო ქვიტკირის სახლის აგება: მაგრამ ვერ ელეოდა მამაპაპურ დარბაზს.

— რა ვქნაო, უდარბაზოდ ვერ გავძლებ, სხვებმა შეიძლონო!

ძალზე უყვარდა თავისი მიწური და როცა სტუმარი მოუვიდოდა, თავისი ქოხის სადღეგრძელოს უსათუოდ დაალევიებდა და თვითონაც შეუმღერებდა ჯამით ხელში:

— ეს სასახლე ვან ააგო,
ვინ დახურა მუხის გული?
ამშენებლის მამა ცხონდა,
დამხურავის დედის სული!

სისუფთავე კი საოცარი ჰსუფევედა ძველ დარბაზში. თაროზე მიჯრით ეწყო დაკრიალებული, ძველებური ჯამ-ჭურჭელი — ჩინური თუ ქაშანური, კუთხეშიც მზითვის დიდი დაჭრელებული სკივრი იდგა, კონიასი.

უცნაური ზნე სჭირდა ციციკორეს. რაც უნდა ავად გამხდარიყო, ლოგინში არ ჩაწვებოდა.

— ქალი ხომ არა ვარ, ქვეშაგებში ჩაეწვე და მტერი გავახარო?! — ავადმყოფობა მის თვალში დიდი სირცხვილი იყო. სიცხიანი, თვალეზე ცხერის ქუდჩამოფხატული ზამთარზაფხულ სოფელს ჩამოივლიდა ხოლმე, რათა მტერს დანახებოდა და არ გაეხარებინა, — კარგადა ვარ, ჯანმრთელად

და ნებიერადო. „ვეფხვი ვინა სთქვა მტირალი?“ — შეუძახებდა თავის თავს და მართლაც, ვეფხვობდა!

იქნებ იფიქროთ, უშვილო ციციკორე უსაქმო ყოფილა, პირადი საქმე არ ჰქონია და მხოლოდ სხვის ჰკუთნის დარიგებას იყო გადაგებულიო. — არა, ციციკორე შრომაში იყო დამტკბარი მისი საყვარელი საშრომელი — „კარზე ვენახი“ ან კარის ბოსტანი იყო, სადაც საამოდ სურნელობდა ნაირ-ნაირი მწვანე ილეულობა; სადაც ლაღობდა შეფოთილი ვაზი, მსხმოიარე მტევანი, ათქვირებული კიტრი და ლობიო. ხშირად მინახავს პერანგა ციციკორე ოფლში გახვითქული, შრომით შეჯერებული და გახარებულიც.

მისი ცოლი კონია ქალური საზრიანობით განთქმული, ალერსით გულზე დაგეხვეოდა. მშიერ-შიშველი ეცოდებოდა, გულჩვილი იყო!

— დაეწვას საწერ-კალამი ახლანდელ სამართალსო, — იტყოდა ხალხის ჩაგვრის ყოველდღიური მოწმე ბერ-დედა.

ახალგაზრდობაში, ლამაზი ქალი ყოფილიყო, ახლაც ემჩნეოდა გადავლილი სილამაზის იერი. მეტად სუფთა დედაკაცი იყო. სიბერის სილამაზე — სიფაქიზეაო, იტყოდა.

ეზოში, სულ ვარდი ედგა.

სოფლის მეურნეობაშიც ფხიზლობდა ციციკორეს თვალი. ჯერ კიდევ ადრეულ გაზაფხულზე ჩამოივლიდა სოფლის მოლივლივე ჯეჯილებს, თვალს გადაავლებდა, შეისაყვარლებდა, შეაფასებდა და მათ პატრონებს ამბავს მიუტანდა.

მკაშიც დაჰხედავდა. ზოგი მომკელი ხელეურსაც მიაგებებდა.

ციციკორე თავთავს ფხაში გაჰხედავდა და გამოიცნობდა,

როგორი ხევი იქნებოდა წლეულს. ტყუილს არ იტყოდა ვინმე დასამშვიდებლად. სწორე უყვარდა. უხაროდა, როცა კარგი მოსაველის მთხრობელი იყო და მახარობელი.

სძულდა პირუტყეშმარტობა.

ღვთაებრივად სწამდა შრომის გამართლება:

— პატიოსან ოფლის თვითეული წვეთი თუ მარგალიტად არ იქცეს, მოღით და მარჯვენა მომკერითო — იტყოდა ხოლმე.

სოფლის ეტიკი, უანგარო და მამობრივი მზრუნველობით აღსავსე, ვითარცა გველეშაპს წმიდა გიორგი, ასე ებრძოდა ვაჭრებს, ჩარჩებს, სოფლისყლაპიებს, — გლეხის სისხლის წურბელებს.

ვაჭარ პინჩუხას არშინის გაცურება უყვარდა. ვერ იქნა და ვერ მოაშლეინეს. საკმარისი იყო ციციკორეს მკაცრად შენაგონარი სიტყვა, რომ პინჩუხას სამუდამოდ ამოეკვეთა ეს ურიგობა.

ციციკორე ცრუმორწმუნეობასაც ებრძოდა, შეძლებისდაგვარად:

ბოხვერა მებადურს ჩვენი უბნის გოგო ნინუცა შეჰყვარებოდა! ღამღამობით იორის ზვირთებში ელანდებოდა. ბადეს რომ მოსწურავდა, თურმე იქიდან კისკისით ამომხტარი ნინუცა ბადეს დაუხვევდა ხოლმე. უბირ ბოხვერას გულწრფელად სჯეროდა, რომ სწორედ ნინუცა იყო ის ბადახვევა ღამაში ქალი, იორზე რომ ეჩვენებოდა, სჯეროდა მტკიცედ, ურყევად. და მეორე ღლით, როცა ნინუცა სოფლის ღობესთან შეჰხედებოდა, სიცილით ეტყოდა: — შენ, ეი, ნინუცი, გეუბნევი, მომცილდი!

ნინუცა გაიღიმებდა...

— რა გინდა, გოგო, ჩემგან? რას მესაყვარლები იორ-ში?

ნინუცა ხითხითებდა...

ბოხვერას გული მოსდიოდა... თან უხაროდა.

როცა ციციკორეს შემთხვევით გაეგო ბოხვერას ამბავი, დაებარებინა:

— ბიჭო და... არა გრცხვენიან, შე ოტროველავ! მართლა გგონია, ბნელო კაცო, რომ შენს ბადეში ნინუცა ებმევა? თვითონა ხარ გაბმული იმის ბადეში! სირცხვილი არ არის, ტვინი ამოძრავე, რათ ეჩაგვრინები სისულელეს! ასე კი შეარცხვინა ბოხვერა სოფლის მეუფროსემ.

განა ციციკორეს გამარჯვება არ იყო, რომ მას აქეთ ბოხვერას ნინუცა ალივით აღარ მოსჩვენებია, მხოლოდ ღვინობისთვის, გვერდში ამოუდგა საქორწილო გვირგვინქვეშა?

დიდი გავლენა ჰქონდა ციციკორეს და მეშურნეთა მტრობაც დიდი ეხვია გარს. თავისუფლების ტრფიალ ხალხს სძულდა სხვისი ჯოხისა თუ სიტყვის ქვეშ ცხოვრება, სხვის მიერ ნაჩვენებ კალაპოტის მიყოლა ეურჩებოდა, ხშირად გამოჰკრავდა ხოლმე წყრომის ნაპერწკლებს, მაგრამ დაფანტული ცეცხლის ძალა იქვე ჰქრებოდა!

სოფელში, ზოგი ჩუმად უჩიოდა ციციკორეს იმ სუსხისათვის, რაც სოფელში დააყენა: — ვინ არი, რომ თავზე წამოგვაჯდომ! მაგრამ პირში ვინ გაუბედავდა ორიოდეს გარდა?

და აი, მხოლოდ ერთხელ...

სოფელში ცხოვრობდა მდიდარი გლეხი სავატელი, რომლის სილადეს ვერ იტანდა ციციკორე.

— რას მედიდები, ჯიბეგასუქებულო, ოქროსქამრიანო! სოფლისყლაპიავე — შესძახა მკახედ სოფლის შარაზე შეხვედრილ სავატელს, რომელიც საპირდაპიროდ თავაწეული მოდიოდა. სავატელმა აღარ დაახანა თავისი წყრომა და სცადა კიდევ ერთხელ ჩამოეხია ციციკორესათვის შარავანდელი.

— გასიბრძნებულო რათა ხარ სხვისი ჩხრეკია, სხვისი ცხვირის მზომელა, ყველას გამკილავი, გამკენწლავი? ნეტავ როდის ჩაგაბარეთ თავი, ან ვინ დაგადგინა ჩვენს მწყემსად, რომ გიყვარს ხალხის გარჯულვა? შენის შიშით კაცი ქალს ვერ დალაპარაკებია, ქალი — კაცს, ვაჟკაცს ღვინო ვერ დაუღევიანა, ქალს ვერ გაუცინია, ბავშვს ვერ უცელქნია! ფულიდა გვაკლია შენს სახელზე მოჭრილი

— დამნესტრე განა, სათოკე კაცო. — უპასუხა ციციკორემ და გულაგრილებით განაგრძო გზა.

— შენ ვინ ჩაგაბარა სოფელიო? ჩემმა სინდისმა, პატიოსნებამ იესო ქრისტემ ლერწმის წბილით ამიწონა ეს სოფელი და ისე ჩამაბარა, ახლა ხომ გაიგე! — ეკამათებოდა გულში ციციკორე სავატელს.

და განა მარტო სავატელი?

აკი ყველაზე საცოდავმა და ბეჩაევმა ბერიკაცმა, სიღარიბით გაწყალებულმა ჯაუნარმაც გაუბედა! ეტყობა, მის გათვლილ გულში კიდევ ეგზნებოდა თავისუფლების სიყვარული!

— რომ გიყვარს „გაგვიძეხ ბერო მინდიაო“, მერე? ვინა ხარ, რომ ერს გაუძღვე? თვითონ ქვეყანა არ არი მაღლიანად მომართული, ღმერთმა ვერ დააწყო და შენ გინდა დააწესრიგო? ეპ, ეპ, ბეჩაე-ბიჭო! შენ უნდა მისცე მცნება ცასა და დედამიწას? თავს დაგვდგომიხარ ხევისბერივით და გვექადა-

გები — ასე ამხელდა ქელეხში ღვინით აბორგებული ბერი-
კაცი ჯაუნარი.

— იცი თუ არა, ყველა კაცი რომ არ არი ღირსი კაცობის
სახელის ტარებისა იცი, რომ ზოგი ფრინველია — სჭამენ,
ფრინველია რომ ხორცს აჭმევენ! „კაცი არ ყველა სწორია,
დიდი ძევს კაცით კაცამდისო“, იცი, შე ბეჩავო, შე, ცარიელო
ჯამო!

ჯაუნარი ლასლასით გაიყვანეს კარში და მაინც იქიდან
შემოიძახა: ვინ მისცა მაგას უფროსობაო? ციციკორე იცი-
ნოდა.

ხალხს ესიამოვნა წამიერად შეუხებლის შეხება. ამ შემ-
თხვევაში ციციკორეს მცირედნი მაინც გაკენწვლა, განქიქება!

ერთხელ, დედაბერი მარადიაც შეება: „სულ რომ ბობოქ-
რობ, დამტკბარი გუნება როდისღა გაქვს? ადამიანს სიტკბო
და სიწყნარე აცოცხლებს, სულ რომ სჭექ და გრგვინავ, იქნებ
შენა ხარ მარტო ხმელეთზეით ხორციელი?“

ეჰ, ვის შესწევდა ძალა, გაეგო ციციკორეს ზრახვები და
მიზნები. ვის, ვის უნდა გაეზომნა მისი დღიური საზრუნავი,
საყოველღამო ფიქრები სოფელზე, მისი ფიქრის სიღრმეები
თუ მწვერვალები? — არავის! ვერცვის!

მაგრამ ციციკორე სოფლის გულთამხილავიც გახლდათ.

მაგალითად, მან იცოდა ის დღე, რა დღესაც დაბადებული
ბედნიერი ადამიანი იქნებოდა, ის დღეც იცოდა, როდესაც
დარგული ხე თუ ხეხილი იხარებდა.

იცოდა შელოცვებით ნადირის კბილის დაკეტვაც, ამაში
ტოლი არ ჰყავდა. თუ ღამეობით საქონელი გარეთ დარჩებო-
და, ციციკორეს შეალოცვინებდნენ და სოფლის რწმენით სა-

ქონელს არც მგლისა, არც აფთრისა და არც ქურდისაგან ზინი არ მოელოდა. ერთი სიტყვით, მისი საიღუმლო სიტყვა მგელს პირს შეუჟკრავდა, ქურდს — ხელ-ფეხს.

ცხენის საიღუმლოც იცოდა: როგორ უნდა გამოიყვანო ცხენი ბოსლიდან ხანძრის დროს ისე, რომ არ დაფრთხეს, არ აიგლოჯოს, არ გაგოედეს. მარტო მიცვალებულის ზარი უნდა იმღეროს იმ დროს პატრონმაო და იმ ზარსა და გლოვის ხმაში დამორჩილებულ ცხენს გამოიყვან, თუ არადა შიგ ჩაიბუგება ცეცხლშიო!

ერეკლე მეფე უყვარდა, იმპერატორი ნიკოლოზ კი მის თვალში არა იყო—რა, ჩალა-მეფეაო! ცხრაას ხუთი წლის მოძრაობას შეერყია მისდამი რწმენა!

— ღმერთი არ არიო?!

— ეგ როგორ თქვი, შე შავდლიანო, მწარე გონების კაცო, შე უნანელო? მაშ რაღა ქართველი ვარ, თუ ღმერთი არ არის?!

— ღმერთი არ არიო? მაშ, როგორღა ანათებს მზე? ხომ წაიქცა მთვარე და გადმოვარდა ციდან?

ხშირად მზის მყუდროში, ღობის ძირას მიმჯდარი ციციკორე, იქვე მოთამაშე ბავშვების სიახლოვეს წყნარად დანით ჩხირსა სთლიდა და თან ვითომდა თავისთვის, ღიღინებდა:

— ვინცა კაცაა, არანანო,
ჩოხა — ჯაჭვია, თარანანო,
ქუდი ნაბღისა, არანანო, —
— ჩაბალახია!

დაიღინებდა თავისთვის, მაგრამ ამ ჩუმ ღიღინსაც კი აღმზრდელობითი მნიშვნელობა ჰქონდა, გვესმოდა ბავშვებს და ძალაუხებრივ გონებაში გვებეჭდებოდა ციციკორეს საფაჟ-

კაცო სიტყვები, თუმცა მოხუცი სრულიადაც არ გვაგრძნობინებდა, რომ ჩვენ საგულისხმოდ ამბობდა.

წვრილფეხობის დამწყემსვაც უყვარდა.

— გაიგონე, რა გითხრა, საქართველოს ცხრა კარი აბია! ეს დაიხსომე კარგად! თვითთული კარის ყარაულად უნდა გამოდგე!

ციციკორე სარდლობაშიც იჩენდა ნიჭს: ბაღლების ომში ჩაერეოდა, ასე გეწვრთნიდა:

— რაზმი ეგრე დააწყეთ: ჯერ წინამავალი უნდა წავიდესო, მერე უკან ამყოლი უნდა აქყვესო: აქეთ-იქიდან მოკინკლავენი მოუდგებიან, რომ მტერი არ მოასვენონ და მერე მეუკანონი მიჰყვებიანო. ზედ უნდა მიხვიდე, ზედ მისვლა უნდა იცოდე! დავლური ომიც უნდა ისწავლოთ, განა მარტო მოგერიებთ! წინდაწინ შენ დაჰკარი, გული საგულეს დადგება! შენ შენი ეცადე, გამარჯვება კიდე ღმერთზეა ერთი არ დაიწყო: ომში სიმღერით უნდა შეხვიდე! ნატყვიარი არ ინაღვლო!

ციციკორეს, როგორც ყოველ ქართველ კაცს, სახელი ყველაფერს ერჩივნა!

— სახელი! არ დააგდოთ მიწაზე! — გვეტყოდა ზრუნვით ახალგაზრდებს. — სირცხვილი დიდი ქვა არის! სახელი არ გაასრესინოთ ამ ქვას!

ერთხელ, კუნძზე ჩამომჯდარ მეფანდურეს შეუტია: — რას გადასცემ და რას გადმოსცემ? კაი ბიჭები შეაქე, რომ ლაჩრებიც გაკარგდნენ!

— აწანწკარებ მაგ ფანდურს და ის კი არ იცი, რომ ჰკუხ და გონება მოეთხოვება შაირის გამომთქმელს! შაირია, განა

სიტყვის საგრძელებელია, შე ცუნდრუკო და უმეცარო! განა ცოტა გვყავს სადიდებელი და სასახელო, რომ გოგოებს უმღერო? გულის სიტყვები ამოთქვი, სავაჟკაცო რამ თქვი, რომ ხელი თვითონ დაეხას ხმლის ვადას და რაში თავისით გაფრინდეს, მათრახამოუწნავად!

— ვაჟკაცი კარგად უნდა შეაქო! ზომაზე მეტადაც შეაქე, ღირსია. სოფელი ასახელა! ლაჩრებიც შეეცდებიან! შენ კი ენის სისველე გაწუხებს! გულის ღარღლი კი არ არის, სიტყვაა, ღმერთს რომ მოუცია ჩვენთვის! სიტყვა ტყუილად არ უნდა დაიხარჯოს! სიტყვას ძალა აქვს!—და მკაცრად შეუტია მეჩონგურეს:

— „ლექსი მოლექსემ უნდა სთქვას, ვაჟმა, ვინც იზამს სახელსაო!“— და არა შენსავით ჩანჩურამ, ჭიასავით რომ დასცოცავ! ვის რად უნდა შენი ლექსი, შე ბუხუნძელავ, და ისიც სააშიკო! გადააგდე ახლავე ჩონგური და მეორეთ აღარ დამენახვო!

მეფანდურემ ჩონგური დააგდო და მოცხრილა...

აი, რა ძალა და გავლენა ჰქონდა ციციკორეს...

ერთხელ, ყველიერზე, ციციკორემ უშნო ლეთეთას ჩონგური გამოსტაცა ხელიდან და შეზარხოშებულმა უცნაურის ხმით წაიმღერა:

გიორგის ებრძვის სიკვდილი,
ელვა გამოდის ხმლისა,
შამაუქნია სიკვდილმა,
მარჯვენას მოაჭრისა,
შამოუქნია გიორგიმ,—
სიკვდილს შუაზე სჭრისა!

მახსოვს, ლექსში განსაკუთრებით გამახარა ადამიანის გამარჯვებამ სიკვდილზე. ასეთი რამ მანამ არსად გამეგო და ციციკორემაც ჩემს თვალში კიდევ უფრო აიწია, თუმცა არც მანამდე მემცირებოდა!

ჩვენი ციციკორე სიჭაბუკეში ცხენის გამხედნელი და განთქმული მონადირე ყოფილა.

— რამდენი ირემი მოგიკლავს, ციციკორე? — შეეკითხებოდნენ მეგობრები.

— ეჰ, ვინ იცის, რამდენი ჩავთოფე! — გააზვიადებდა ციციკორე, — საღ რამდენი ჩაიჩეხა კლდეში, ზოგი კლდეს რქით დაეკიდა, ზოგი ისეთ ღრანტეში ჩავარდა, მზის შუქიც ვერ ჩასწვდებოდა... ვინ იცის?.. ჩემი სიბერით ახლა ირემები ტკბილად იძინებენ!

ღარბაისელი ციციკორე ბაქრაძე ნადირობის მაკვეხარს იყო.

წოწრეს ეთქვა: ციციკორეს ირემი თვალითაც არ უნახავსო!

ეს რომ გაიგო, შეიუცხოვა: წარბშეკრულმა ჯერ წყნარად იკითხა:

— ეგ ვინა სთქვა? ვის მოუარაკებია? — მერე მკახე ხმა აუთრთოლდა: — როგორ? — და თან ხმას აუწია გამრისხანებით: — მე მოუვლი მაგას, როცა ამოვგლეჯე სახრიკო ენას!

ამის მეტი სიტყვა არ უთქვამს-რა. ეს იყო და ეს, მაგრამ ამბობენ, წოწრეს მთელი ღამეები შიშით არ ეძინაო! გაუჩნდა საჭოკმანები.

— ბოკოწინის დაუბოლოვებელ ტყეში, — გვიამბობდა ციციკორე, დიდი ვერხვის ქვეშ (ივრის წისქვილთან), — ირმის ხრო თოფის ხმას რომ არ გაეფანტა, მშვილდ-ისრით ვნადი-

რობდით. ჩემს ვაჟკაცობაში, უნდა მოგახსენოთ, ბევრს ირემს უზინდნია კისრით ჩემი ისარის ჩემი ანასხლეტი, ანაცდენი ისარი, ტყვია არ გაგონილა! თუ ტყუილს ვამბობ, მაშ რად არი ჩემზე გამოთქმული ლექსი:

ირემმა ირემს ახარა,
ბაქრაძე ავად გამხდარა!
თოფის ხმა აღარსად ისმის,
იქნება კედელს მამკედარა!
გამოსტყვრა თოფი ამ დროსა,
ირემმა ტლინკი აყარა:
— თუკი ბაქრაძე მამკედარა,
მაშ თოფი ვილამ მახალა?!

თუქცა ჩვენც კარგად ვიცოდით და თვითონ ციციკორემაც, რომ ეს ლექსი სხვა ბაქრაძეზე იყო გამოთქმული, განთქმულ მონადირეზე, მაგრამ თავისად შეიფერა, რადგან გვარად ბაქრაძე იყო და ჩვენც აღარ ვაცივდებოდით, ვიცოდით, სახელი უყვარდა!

მონადირეს, მეთევზეს, მეწისქვილეს, პოეტებს ხანდახან უნდა აპატიოთ ოცნების გადაღუღება!

რაც არ უნდა დიდი და სახელ-ნაქნარი კაცი ყოფილიყო, ციციკორე ერთს აჰხედავდა და დარიგების კილოთი ეტყოდა:

— ნუ გასდიდდები!

— ერეკლე მეფე ხომ გაგიგონია, ეგ ლომი საქართველოსი? — იმაზე დიდი ხომ ვერ იქნები! მაინც უნდა გითხრა ჩემი: განა მარტო ხმლიანი გმირი იყო ჯავრის ამომყრელი? არა, რატომ აღარ გაგონდებიან გმირთა აღმზრდელი ძუძუები? არც ესენი უნდა დავივიწყოთ! მარტო ხმლის ქნევა რა ბედენაა!

შერე ისიც ამ დროში მაინც, როცა ლეკი და თათარი აღარ გვაწუხებს? — ასე უთხრა ხმლითა და სახელით გადიდებულ, გამაყებულ თავბერას, სამი ყაჩაღი რო მოეკლა თრიალეთზე, როცა მისს ცხვარს მტაცებელთა ბრბო დაესხა თავს! — ნუ გასდიდდები!

— ვის ემალღები, ეთავდიდები! ღმერთზე დიდი, ხომ იცი, რომ არავინ არი მამ, რასა სდიდობ? მეტობა მოინდომე? გინდა რომ ღმერთს წინ გადაუდგე? — ქარივით დაეცემოდა, წამოფრენილ ვეშაივით დაეტაკებოდა ვინმე ლალ ვაჟკაცს, რომელიც შეუპოვრად მიაბიჯებდა გზაზე და სალამის თუ ქუდის მოხდით ციციკორეს შესაფერ პატივს არ მიაგებდა. გაკვირვებული გლეხი, თავის გზაზე მიამიტად მიმავალი, უკან დაიხევდა და ციციკორეს წყრომას მოერიდებოდა:

— დაძვირდა ვაჟკაცი! — ამოიოხრებდა ციციკორე. — კაცს ვერ გამოიცნობ ისე, როგორც გარედან ლებანს კირკიტ კაჯალში!

დიდი სიტკბოთი უყვარდა სამშობლო ციციკორეს, დიდი, გამოუთქმელი ალერსით.

ერთხელ, წავეუკითხე და ძალიანაც მოეწონა გრიგოლ ორბელიანის წერილიდან ერთი სტრიქონი: „ქვეყანაზე მხოლოდ ერთი საქართველოა და ისიც ჩვენიაო!“

— მაღადეცი! — რუსულად გამოსთქვა ორბელიანის ქება და თავისი აღტაცება ციციკორემ.

— რა ჰკვიანად არი ნათქვამი, აი, ბრძენი კაცი! მაგის მთქმელს გაუმარჯოსო! — ხშირად ახსენებდა გრიგოლს.

ციციკორე ვერ იტანდა გაყრას, დაცალკეევებას; ნუ იტყვიოთ,

ეს ჩემი წილიაო! გაუყრელი ოჯახი ყველაზე მტკიცეაო! ერთ-
ნი უნდა ვიყვნეთ, მაშინ იქნებით მაგრებიო!

ეს უბირი, უსწავლელი კაცი, საქართველოს ერთიანობის
დიდი ერთგული იყო:

— არა, განთვისება ნუ გვინდა! გეთაყვა, ნუ იტყვი, მე
იმერელი ვარო, მე კახელი ვარო, მე მეგრელი ვარო! ერთი ძუ-
ძუს შვილები ვართ! ერთმავე უნდა იყოს ერი, რათ ვარგა გათ-
ვითებული, განცალკევებულიო!

ზომ მკახე კაცი იყო, მკაცრი და ზავთიანი, მაგრამ დიდად
კეთილი და მშრომელიც.

თუ დაინახავდა უგერგილოდ, უნდილად მომუშავეს, ხელი-
დან ბარსა თუ თოხს წაჭგლეჯდა, თვითონ წაიმუშავებდა; თვი-
თონ დაბარავდა სხვის მაგივრად, ან მომკიდა, მოსცელავდა და
გუთანს მოეკიდებოდა, თუ გუთნიდელას გუთანი მარჯვედ არ
მიჰყავდა.

— ვიმუშაოთ, სოფელში დოვლათი დავატრიალოთო!

ისიც მინახია ჩემს ბალობაში, ციციკორე რომ სხვის თავ-
დანებებულ საქონელს აძოვებდა სოფლის პირში, რათა საქო-
ნელი ყანებსა და ვენახებში არ გადასულიყო და მოსავალი არ
წაეხდინა.

განსაკუთრებით ღირსახსოვარი იყო ციციკორეს საქციელი
მსოფლიო ომის დროს:

ერთხელ, შუადღისას, სოფლის შარაზე გამოჩნდა დედაბე-
რი თუბალაური, რომლის პატრონი შვილი ომში იყო
წასული და ყანა მოუმკელი რჩებოდა. გაჰკიოდა დედაბერი და
ტირილით ხელში ნამგალს ატრიალებდა:

— ბიჭო, ნამგალი დაგიყანგდა, მამხმარე არავინ არი, შენი
ყანა დაიწო! რა ვქნა, ომია, მომკელი არავინ არი! — თან ჰკიო-

და უბედური და თან ცრემლით ზუზუნებდა. ცალკე შვილი აგონდებოდა, ცალკე მოუშველი ყანა!

— ფეხზე დაგრჩა ყანა, არ გეცოდება, რომ ომში წახველი? ცოლ-შვილი დაგრჩა, მე დაგრჩი მოხუცებული დედა! ნეტავ ვის ეომები, რა გაქვს საომარი! — გულსაკლავად ზუზუნებდა თუბალაური შარაგზაზე და მისი სიტყვები გულს უკლავდუჯაცო სოფელს.

უცბად, შარაზე გამოჩნდა თავისი განუყრელი კვერთხით ციციკორე.

— ვაი, თემო და სოფელო! მერე, თუ კაცი გამოილია ჩვენს სოფელში? მაშ, მე ვაყვაცი აღარა ვყოფილვარ!

მეორე დილით ადრე, ციციკორე თუბალაურის ყანაში ჩავიდა, თან წვრილფეხობა წაიყოლა! თვითონ მკიდა, ბაღლობა ხელეურებს უკრეფდა, ულოს უგრეხდა. სუთ-ექვს დღეზე მოუშვა ბერმა ციციკორემ თუბალაურს ყანა და მართლა გააკვირვა სოფელი! განა თქმაღა იქნება, როგორ ემადლებოდა თუბალაური?!

ისიც მოსაგონარია, რომ თუბალაურის მამითადში, ყანა სულ ბაგაბუგით და ყიყინით უშკია, როგორც ძველად იცოდნენ.

მახსოვს, პირველ მსოფლიო ომში წასულები, საღვინით ხელში როგორ დალოცა ციციკორემ. გამაგრდით ბიჭებო, სიკვდილისა ნუ გეშინიათო, ვინც მოკვდება, დავმარხოთო, სხვა კიდევ გამოჩნდებო! ხმა და სახელი შორს გაგივარდებათ, მტერიც დაშინდებო. თუ ტყვიამ გაყოცათ, თამარ დედოფლისაგან ულუფა მოგივათო.

ასეთი სიტყვით გაისტუმრა თავისი სულიერი შვილები —

მერე იწაფა საღვინე და ახლა წამსვლელებს გადასცა — გზა გქონდეთ მშვიდობისა, დაბრუნებისაო! — ასე ომახიანად უთხრა მაშინ, როცა სხვები იცრემლებოდნენ და დედაკაცების წივილ-კივილისაგან ყურთასმენა აღარ იყო.

ციციკორეს თვალზე ცრემლი არავის უნახავს, მხოლოდ ერთხელ, როცა პატარა მწყემსი ბათულა მგელს დაეგლიჯა და მომკვდარიყო, — ამბობდნენ, იმ დღეს ენახათ ციციკორე ტყეში; თვალეზზე ქული მოეფარა და ისე ფარულად ტიროდაო.

ბათულას სიკვდილმა ისე იმოქმედა, რომ თავის უკანასკნელ ცხვარზე აიღო ხელი.

ზვარა¹ ჰყავდა შეყენებული წმიდა გიორგისათვის. მაგრამ ბათულას ღარიბ ოჯახს რომ არ ჰქონოდა რა საქელეხოდ, ციციკორეს აეხსნა თავისი ზვარა და მიეყვანა, — ეს დაკალითო! ბათულას სულს მიუვიდეს, უფრო მადლიაო! — და მართალიც იყო!..

მაგრამ ყოველივე ამას თავი დავანებოთ! უფრო ის მაგონდება მკაფიოდ, რომ ციციკორეს არავითარი სიახლე არა სწამდა ცხოვრებაში. არა და არა!

აი, გზის პირად მომავალი ციციკორე დაინახავდა ვენახში გულმოდგინედ მომუშავე გლეხს. გახვითქული გლეხი როსტია შაბიამანის წამალს ასხამს ვაზის ფოთოლს.

ციციკორე შედგება ღობესთან და პატრონის გასაგონად ჩაილაპარაკებდა:

— მაგ ვენახიდან არა გამოვა-რა!

¹ ზვარა — ზვარაკი, ასე ეძახიან ხატისადმი შეთქმულ ცხვარსა თუ მოზვერს. (ავტორი).

— რათა, ძია ციციკორე?

— რათა და, დაღუპე ვენახი აბა, ეგ რაღა ვენახია?

— როგორ? დღედაღამ შიგ ვტრიალებ, არას ვაკლებ, ახლაც ჰხედავ, რა ერთგულად ვსწამლავ!

— სწორედ ეგ არის განა შაბიამანი შეიძლება? არ იცი, რომ ზიარებას წამალი არ მიეკარება! ნაწამლი ღვინო და ზიარება, რაღა ღვინოა? — იტყოდა წარბშექმუხვნით სოფლის მესჯულე და თან დასძენდა:

— ვინც მორჩილია და გამგონი, ვინც უფროსის უფუკითხავად არას იქმს, ვისაც სახლისა, სოფლისა და მამულის უფროსი სწამს, იმის ვენახი ტურფად დაისხამს! უწამლოდაც საწინახელს აავსებს და ვისაც უფროსობა არ ესმის, იმას არც ვაზი უგდებს ყურს, არც თავთავი!

ციციკორეს არა სწამდა შაბიამნისა და საერთოდ, ახალი წესების სარგებლობა. ისიც უნდა ითქვას, რომ როსტიასაც არაფრად მიაჩნდა ციციკორეს ეტიკობა. აი, ეს გაუტარა სიტყვაში და აგრძნობინა სოფლის უფროსმა.

იმ ხანებში კახეთის რკინიგზა გაჰყავდათ და მოლოდინშიც სულ ამ რკინიგზაზე იყო ლაპარაკი. მთლად უნდა შეცვლილიყო კახეთის ცხოვრება. აყვავებას მოელოდნენ. ყველა ღიმით შეჰყურებდა იმ დღეს, როცა მატარებელი გამოჩნდებოდა კახეთის მიწაზე. მხოლოდ ციციკორე არ იზიარებდა საერთო სიხარულს:

— ხბოსავით კი ნუ კუნტრუშობთ! ჯერ დაფიქრდით, გაზომეთ და მერე ისე სთქვით, მართლა ეგერე-რიგად სჭირდება ხალხს რკინიგზა თუ არა!

— აგიჟინიათ მატარებელი, მატარებელიო აქებთ რკინი-

გზას და იმას კი არა ფიქრობთ, რა უნდა ჰქნას ხარ-კამეჩმა, ცხენმა? მაშ, ურმები უნდა გადაეყაროთ? მერედა უურმოთ ქართველი კაცი გაგონილა? ან ღვინის ქირაზე რით წავიდეთ, ან ცხენს რა ვუყოთ? ამას რატომ არ უფიქრდებით? — იტყოდა ნაღვლიანად და ალერსით გადაუსვამდა ხელს წაბლა ხარს გახრეშილ ქედზე:

— თუ ეს აღარ იქნება, ნურც მე ვყოფილვარ!

უფრო ხნიერი გლეხები ეთანხმებოდნენ ციციკორეს.

ციციკორე დაჟინებით გაიძახოდა:

— ხალხო, დაფიქრდით, იქნებ არც არი საჭირო ეგ რაღაც რკინის „მაშინა!“ ჰაერი გაფუჭდება, პური და მტევანი მოიწამლება, ხალხი იავადმყოფებს, უნამუსობა ჩამოვარდება! განა გოგოები ეგრე თავისუფლადლა გაივლიან? — და ხელი მიაშვირა პატარა გოგონებს, სკოლიდან რომ შინ მოცანცალებდნენ.

— ხალხო, ფრთხილად, ეშმაკს არ წამოვავლოთ ხელი რკინის გუთანზეც ასე არ იყო? გადაგვაყრევინეთ ხის გუთნები, შემოვიღეთ რკინისა და გაქრა ბარაქაც! ხის გუთანი ღრმადა ხნავს! ბარაქაც დიდი აქვს; რკინის გუთანი სუსტია, ერთი პატარა ქვა დააბრკოლებს, სადა აქვს მადლი! რათ გვინდოდა, მაგრამ ეშმაკმა მოგვახვია თავზე! ახლაც ისე მოგვივა!

— კარგად ჩაფიქრდით, ავწონ-დავწონოთ.

ახალ თაობას კი სიცილადაც არ ყოფნიდა ციციკორეს მოსაზრებანი.

— უხატოდ გაგიყებულა ჩვენი ციციკორე!

— თავისი თავის მიმდომელი!

ციციკორემ კიდევაც შეუჭება მასწავლებელს, — რომელი

„ალექსა“ მაკედონელი შენა მყევხარო, რათ ურევ ქვეყანასო!

მერე ქული მოიხადა, პირჯვარი გადაიწერა და განაგრძო:

— ღმერთო, შენ დაგვიფარე იმ ჯაღოქრებისაგან! ხომ გაგეგონებათ: ნუ დააგდებ ძველსა გზასა, ნურცა ძველსა მეგობარსაო! მამა-პაპას უთქვამს და კარგადაც! რა სჯობია გატყეპნილ გზას, ნაცადს, ნავალს! რათ გინდა ახალი გზა კლდე-ღრეში გაყვანილი, წამისწამ სახიფათო?!

— უწინ ჩვენს დალოცვილ დროში, ექიმი რას ერქვა — ვინ იცოდა! ახლა კი სულ ავადა ხართ! რათა, ვისი მანქანებით? ეს ეშმაკიდან მოდის, ქალაქიდან! აბა, დააკვირდით, ხალხნო, თუ მართალი არ ვარ!

ქვეყანა უპატრონო ნუ გგონიათ, ქვეყანას ვილაცა პატრონობს! ვილაცა უჩინარი და იმისი გეშინოდეთ, ნუ გააჯავრებთ!

ამ დროს, ხალხიდან გამოერჩია ქალაქიდან ჩამოსული ქარხნის ახალგაზრდა მუშა, თბილისის გაფიცვების მონაწილე გარსია და ციციკორეს სიტყვა შეუბრუნა:

— ძია კაცო, შენ ვინა გკითხავს სოფლის საქმეს, რა პირისა და პასუხის გამცემი შენა ხარ? ქვეყანა წინ წავიდა, შენ კი ადამის ჟამის ამბებს გველაპარაკები! ვისაც უნდა იცხოვროს ძველ ქვუაზე, წავიდეს სასაფლაოზე, იქ უქადაგოს მკვდრებს, ჩვენ კი ჩამოგვეცალოს თავიდან!

ასე, ერთი ხელის დაკვრით მოსპო გარსიამ ციციკორეს მპყრობელობა. მერე ვინ? ციციკორეს ნარცხადაც რომ არ გამოდგება. ქალაქში ნათრევი, ფეხშველა და თავშიშველა მუშა! ციციკორემ ახლა იგრძნო, რომ ძველი ცხოვრება წასულა დაუბრუნებლად, ახალი ცხოვრების სიო დაეტაკა ზედ მკერდზე.

იდგა დათუთქული ციციკორე და ხმას ვერ იღებდა გაოცე-

ბული, გაოგნებული, — როგორ გამიბედაო! ასე დაფასდა განა მისი ღვაწლი და მისწრაფება! ორთითზე დაბჯენილი გლეხები უსმენდნენ და ჰკვირობდნენ ციციკორეს მოთმენას, ეგონათ, სოფელი გულამა დასცესო! შიგადაშიგ ზოგი ფრუტუნებდა კიდევ ციციკორეს დამარცხებით გახარებული. ციციკორეს მეტად ემწეავა, ემწვიტინა. განა სავატელსა და ჯაუნარს არ შეუბრუნებიათ ხმა მის წინააღმდეგ, მაგრამ ახლა...

მიდიოდა თავისი ერთგული ჯოხით შინისკენ ციციკორე და თან გულში იფუფქებოდა. სამღულრე ცრემლი დუღდა მის გულში, მაგრამ შიგვე შრებოდა. როგორი უკაცრაული მკადრა? — ჩემთვის ასეთი უკაცრაული და სიკვდილი ხომ ერთიაო! ხალხში ჩემი სახელის ასე იოლად გამოთრევა ვინ გამიბედაო?!

ფიქრით სოფელი გადააბნელა. ახლა ციციკორე გამომტვრეული ნაპრალიდა იყო, ჩვენი სოფლის მეუფროსეს არავინ აღარ დაუჯერა არც რჩევა, არცა ჰკუა! გული სიბოროტის მტვერით აივსო! მაშ, რაღა ვყოფილვარ? განა მარტო სტომაქის ქვაბისათვის ვარ დაბადებული? გულს სევდის ლურსმანი დამსჭვალოდა და ვეღარ ამოეძრო! თითქოს ფრთასა და ბოლოს ახეთქებს დაკრილი არწივიო, — ექ რა ცოდვა დაედო თავსა, რა დააშავა? დაჩუმდა მისი შემქნაბელი ხმა. გულზე მოკიდებული აღმური სწვავდა.

— დიდება ძალთა ღვთისათა! — ერთი ამოიოხრა ციციკორემ სიკვდილმისჯილივით, მიდიოდა თითქოს სიციხისაგან ალაკრული, თითქოს ცხელი სილაგარტყმული!

შინ შევიდა ვითომდა მშვიდი და დაწყნარებული, თითქოს

პირზე რკინა ეკერა, გული კი ზღვასავით ბობოქრობდა.

— ვინდა იქნება სოფელზე თვალმიგდებით?

— რაც უნდა ჰქნან, უჩემოდ!

— მერე ვის ამწყურალებ სოფელს, სოფელმა რა ქნას? ბრალი სოფლისა, რომ თავისი სიმაგრის ტოტი თვითონვე მოიჭრას! ციციკორე ლოგინში ჩაწვა.

— როგორ ბრძანდები, როგორ გაისაძლისებ? — შეეკითხებოდნენ სანახავად მოსული მოკეთეები, მეზობლები. ციციკორე დინჯად, ჩამარცვლით მიუგებდა დიდი ჭირდებულებით:

— როსტომ თქვა: დღემც კრულია.

დაბადებისა ჩემისა, —

სიყრმე სიბერედ ვაქციე,

დღე ვერა ვნახე ლხინისა,

ვერ გავიხარე კისერი,

უღელი მედგა რკინისა!

და ამას ამბობდა კაცი, რომელსაც უყვარდა წინათ ამ სიტყვების გამეორება:

ჯავრო, არ მოგცემ ნებასა,

გულო, არ დაგაშავებო,

მტერო, არ შეგეპუები,

ხმალო, შენ გაგაფხავებო!

ერთი სიტყვით, ციციკორეს სულს შავები ემოსა! გულზე თოვლი ედო, ტვინს ნისლი ეხვია, უარსებოს დაემგვანა! გეგონებოდა სიტყვის საცეხვი გამოელიაო, კბილი დაკეტა. ნამდვილად, თქვენს წინ კაცი კი აღარ იდგა, არამედ დაკემსილი, გატრეცილი ღამე!

ამის შემდეგ დარცხვენილი ციციკორე სოფელში ველარ გამოდიოდა, გზაბაწარა, საცალფეხო ბილიკებითლა იარებოდა, სოფლის ირგვლივლა ტრიალებდა. მეთხე ბიჭებსლა ესაუბრებოდა. იმ საცალფეხო ბილიკებზეც სოფელზე ზრუნავდა, თუშკა მუხისა და თელის ანგელოზი დაიფიცა, სოფლის საქმეებს აღარ გავეკარებო...

ახი კი იყო ციციკორეზე, ყველას რომ თავის ნებასა და სურვილს აძალეზდა, ეგებ ზოგს საკუთნო სკამზე უნდოდა ჯდომა? ეგებ სხვასაც ჰქონდა ზეშთაგონების ძლიერება. სხვაც იყო გულთამხილაფიც, უდრეკი და გულადიც!

ოი, საოცრება! ერთი კვირის მერე, მახარე დორეულმა სახლის შენება დაიწყო და საძირკვლის გასკვნაზე რომ ცხვარი დაჰკლა, ციციკორეს არ დაუძახა!

მეორე კვირას ყოდალამ რძიანი ძროხა დაკლა, მგელს დაეგლიჯნა, არც იქ დაჰპატიეეს!

რას სჩადიან უგუნურები! გუნებაში იტყოდა მოხუცი.

ციციკორეს წარმოდგენაში ქვეყანა იქცეოდა! სოფლის გულაგრილებამ დაასულმოკლა ციციკორე. პირახსნით, გულახსნით აღარავინ ელაპარაკებოდა, თუ ასე ეჩვენებოდა!

ციციკორეს გულში ცხრა თონე იწვოდა, მაგრამ ვინ იყო გამნელებელი? — იმედს ვინ დამიდებს, გულს ვინ დამიამებნო?

აღარ ისმოდა ციციკორეს მჭექარე ხმა, არწივეული ყაშყაში აღმასის გამყრელი სიტყვა ახლა გარსიამ ჩააწყვეტინა.

საღლა იყო მპყრობელობა და განგება! საღლა იყო სოფლის მდეგი, ღვაწლის მძლე, ახლა სულიერი გვემით განცდილი შეძრწუნებული, შემუსვრილი?

უქნელი საქმე ქნა გარსიამ. გარსიამ თუ... ახალმა ადამიან-
მა, ახალმა ცხოვრებამ, ახალმა ძალამ. მის წინ ციციკორე
უმწეო გამოდგა.

ციციკორეს ეგონა, ხალხი გადმოიშლებოდა განრისხებუ-
ლი, აზავებულები, მკლავს მკლავზე გადააბამდა, დაიხსნიდა თა-
ვის წინამძღვარს და მისთვის მიყენებულ შეურაცხყოფას ასე
ადვილად არ შეარჩენდა ვიღაც „მოთრეულ“ გარსიას!

მაგრამ ჩქამიც რომ არავის დაუძრავს. ოი, სირცხვილო!

იღგა გულმელეწილი, გულდამსხვრეული, განა კაციდა
იყო? არა, — დამპალი ქვა ფშანტალა, ოდესღაც ღონიერი და
გამძრავი, გულმაგარი, ახლა დამკრთალი, თითქოს კიდევ და-
ლეულიყო!

სხვისი მფარველი, თვითონ დარჩა უმფარველო, თვალ-
მტკივნეულადაც არავინ შეჰხედა, გაგონილა?!

სიკვდილსდა ნატრულობდა ციციკორე და მართლაც ჰნახა,
როგორ არა ჰნახა სიკვდილი! ტანთ შავი ნაბადი ეხვია, თეთ-
რად ცელს აელვარებდა.

ციციკორე არ იყო გარეთ ნევალი კაცი. და ამას დიდ ნაკ-
ლადაც უთვლიდნენ. მიჰკვიდნილ-მილუტრსმული იყო თავის კე-
რასა და სოფელს.

— ჩემი ჭიბი თურმე კერას არი დაფლული, რომ სულ ჩემს
კერაზე ვიდგე და არ გავგარეულდეთ!

თბილისი ჯერ არ ენახა. არც ელექტრო, არც მატარებელი
და ეს ჰქონდა მარად საკვებარად.

— რა არი ეგ თქვენი ქალაქი! ათას საკვირველებას ამბო-
ბენ, მაგრამ მე არც მიკვირს, არც მეშინიან და არცა ენახავ! იქ
რა მესაქმება!

თუმცა ხმაში შეატყობდი, რომ სოფლის უმანკო წიაღში აღზრდილს, მისტიური შიში ჰქონდა ქალაქის ცივილიზაციისა, მაგრამ ამაყი არ ტყდებოდა.

სიბერე ლომსაც მორევიაო! მოერია ციციკორესაც. ნაბიჯი გაუძნელდა, შემდეგ გაცივდა, მაგრამ სიამაყით ავადმყოფობას არ დაუწვია და გადაჰყვა კიდევ თან...

...და 1915 წელს, კახეთის პირველმა მატარებელმა იორის სადგურიდან რომ შეჰკივლა პატარძელის მიდამოებს, სწორედ იმ ხანად ჰმარხავდნენ ციციკორეს.

მატარებლის ხმის გაგონებაზე მეზობლები გაკვირვებით ამბობდნენ:

— აკი ეშინოდა, დახე, რა დროზე გაეცალო!

ციციკორეს სიკვდილის ღამით, თურმე, არც ვარსკვლავები ჩამოცვენილა, არც წყლები შხიოდნენ, არც ქარი გრიალებდა, როგორც სცოდნია, ხალხის სიტყვით, დიდი კაცის სიკვდილის დროს. არც ძაღლებს უღმუფლიათ მთელი ღამე! არაფერიც არ მომხდარა ამის მსგავსი!

ღამე იყო წყნარი და გრილი, აღრეული შემოდგომის ღამე! დილაადრიან, ნახირის გარეკვისას, მეზობელი ქალები, ჩვეულებისამებრ, სოფლის გზაჯვარედინზე ერთმანეთს შემოხვეოდნენ:

— ვაი და ვაი!

— რა იყო, რა მოხდა?

— მაშ, არ იცი?

— რაი?

— მაშ, არ შეიტყე ჩვენი დასაკლისი?

— არა და არა!

— ჩვენი სოფლის ბურჯი წაიქცა წუხელის! ციციკორემ სული ჩააბარა გამჩენელს!

— ვაი და ვეი! — შეიცხადა მეორემ.

— ნეტამც არ გეთქვა! ახლა, რაღა გვეშველება?

ბევრი მართლაც გულით შეწუხდა. ხნიან ქალებს ცრემლიც კი გადმოუგორდათ დანაოკებულ თვალებზე.

სასაფლაოდან კაცები თავდადრეკილები მოდიოდნენ, რაღაც დაბნეულები.

— რა იქნება დაღმით-ჩადმართით? ავაი, ჩვენს უპატრონობას! რა დამწონი კაცი დაგვაკლდაო!

ოჯახებში ციციკორეს შესანდობარს სვამდნენ:

— ღმერთს ჩაბარდა ჩვენი ციციკორე, ახლა ცივი მიწის ტყვეა! წავიდა! სალამი მივცეთ, ბიჭებო, ღვინო დავუშვათ ჯამზე, — იტყოდა რომელიმე ტუხა, ბანა, ყოტა, ბირხლა თუ ბოხვერა და ჯამზე ღვინოს დაუშვებდნენ მოსაგონებლად.

— ვაი, რომ ველარ გავიგებთ ციციკორეს დარიგებას, გულშემატკივრობას!

საეატელმაც თავი მოიხარა, მივიდა, კუბოს ხელი დაარტყა და გულისტკივილით დასძახა:

— განა კიდევ გააჩენს ჩვენი სოფელი ამისთანა კაცსაო? თუცა მაღალი არ მოდრკა, დაბალი ვერ შესწვდა. აკი ამბობდნენ: ორი ყოჩის თავი ერთ ქვაბში ვერ მოიხარშებაო! ციციკორეს დამარხვის დღეს, ერთი მღიმარი კაცი არა ჩანდა მთელ სოფელში, მხოლოდ ჰაერში მაძლარი ქელეხის სული ტრიალებდა.

— ეჰ, ველარ ჩამოივლის ჩვენი ციციკორე სოფლის შარაზე ყავარჯნის ბჯენით!

— ველარ შეგვესხვავს!

— სიმართლე სუსხია? ისე ღმერთმა მე მიშველა, რამდენჯერ ყავარჯენიც აყვავებულა სიმართლით! ციციკორეს ამაგი მერე დაფასდება ოქროს წონად!

— დახე, რა გვიყო ტიალმა სიკვდილმა, კიდურზე მიგვიყვანა!

დამარხვის დღეს, დედაბრები იცრემლებოდნენ: დასტურ, რაღაა ჩვენი სოფელი, ციციკორეს მერე ნასოფლარი-ღააო! დიახ, ნასოფლარი, მაშ, რაღაა მას მერე, რაც მიწაში ჩაწვა ციციკორე!

ახალგაზრდებს ეღიმებოდათ...

ბებრები ტირილით აცილებდნენ ცხედარს.

ყოველთვის ასე ყოფილა, გულმდუღარებით მხოლოდ თავის თაობას დასტირიან წმინდა, გულწრფელი ცრემლით თანამედროვენი!



მ ა რ ი ზ ა

ვის არ უყვარს მზე?

მზეს ესწრაფვის დიდი არწივი, პატარა ტოროლაც, „ცანწავალო“ რომ წკრიალებს ყოველ დილით, აეჭანება ცისკენ მთრთოლარი ფრთებითა

პირველ რიგში ბროწეულს უყვარს მზე!

როგორ მწვავს ბროწეულყვავილის ნაელვები გამოსხივებანი!

მიყვარს ცეცხლური ყვავილი, მზიანეთის სხივმფენარა აღნაპადი ოქრომდნარი, სეფესანთელივით რომ ბღღვრია-

ლებს; მიყვარს მისი გულის ავსებულობა! თითქოს მზე საესებით შეუწოვიაო.

არა, არა მჯერა, რომ იგი სხვა ყვაველივით დასჯკნეს როდესმე, ჩამოცვიდეს, განქარდეს, ამტვერდეს! არა, არა მჯერა!

მზის ნაბადებია; მის კოკორში დაგუბებულა სხივთა ნაგალობარი; შიგ ჩაწერილია ანკარა სხივთა რაკრაკი; მზისობა უჩანს თვითეულ ნაკვთში.

ყვაველი კი არა, მზის ნაკადულის კამკამია! — ასე იტყვის გულისხმისმყოფელი!

ბუნების ასეთივე საჩუქარი იყო, ჩემს ოცნებას რომ შემოჰხვევია ბროწეულყვაველივით, — მარიტა! ნათლით საესე, დიმცისკროვანი ყვაველი ჩემი ყრმობისა!

მარიტა!

მარიტა — თითქოს მზეს ჩამოვარდნოდა!

ქალი კი არა, — მთვარის გამოახლება იყო!

მარიტა — ჩემი ყრმობის მეგობარი! ქალებში—დედოფალი.

— შენ „მზევარ“ უნდა გერქვას, „მზევინარა“, ბევრს უთქვამს მარიტასათვის.

მარიტას მერე, მე აღარ გამკვირვებია არც ყინცივისის ღვთაებრივი ფრესკა, არც არმაზელი ტურფა სერაფიტა.

— ვისაც ღმერთი არ გინახიათ, მოლით და ნახეთ მუხათწყაროში! გადამეტი არ გეგონოთ და მარიტას მშვენების სამზერად საგანგებოდ მოლიოდნენ მეზობელ სოფლებიდან. მოლიოდნენ და უყურებდნენ.

— რამ წარმოქმნაო, ჰკვირობდნენ.

მართლაც, ხეობის თვალი იყო მარიტა!

ახლაც, ჩემს თვალწინ დგას აღმასური სახე, მწყაზარი. მო-

ციმციმე ტრედონა, წყნარი, როგორც მაისის თეთრი წვიმა, ქალი — მტევანივით შემკობილი, ჩაკდემით მოსიარულე; ნაზი, როგორც ნიავი, ვერხვში შეხიზნული.

მართლაც, პირმეტყველი სამოთხე იყო, მარიტა!

გიოცნებია ნუკრის თვალებზე? გყვარებია მერცხლიანი თვალები? ძვირფასი სახის დამარმარება? მარიტას სახე — მართლაც სინათლე იყო! ბროწეულის ყვავილივით ჰყვარდა მისი სილამაზე!

მარიტა ცისარტყელასავით დადიოდა სოფლის ორღობეში, თუმც ორშაურიანი ჩითის კაბა ეცვა! რა უცნაურია ბუნება! როგორ იცის ზოგჯერ უხვად დასაჩუქრება!

მარიტას სულის მშვენიერება აღმატებოდა მისს გარეგან სილამაზეს! გულში ია ამოსდიოდა!

თვითონვე ჰგონობდა მარიტა ბუნების მიერ მომადლებულ ნიქს, გულში მადლიერობდა, რომ მშვენიერების ღირსი გახადა ბუნებამ და ამ ნაჩუქარ დიდებულ განძს, თავისი ზნეობითაც უვლიდა, ნაზად და სათუთად უვლიდა... იცოდა, რომ უხვად იყო დასაჩუქრებული! იცოდა, აფასებდა, უფრთხილდებოდა!

რამდენ ვაჟს უნატრია: ნეტამც შვილად გავჩენოდი შენს, დედამთილსო!

— ახ, ვინ ბედნიერი გაისაკუთრებს? ვინ იქნება მისი მკუთვნელიო?

— გლახის ქალი და ეგრე ლამაზი?

— განა ეთერიც გლახის ქალი არ იყო, უღარიბესი მეწისქვილის ასული, მეფისწული აბესალომი რომ ეტრფიალა?

ჩემი სახლის დასწვრივ მოჩანდა ჩაჩიკას ქოხი, ვეება ლელ-

ვის ხეს გამობმული! ამ ქოხის შვილი იყო მარიტა! — ჩვენი ნათლული და ჩემი მეგობარი; დედით ობოლი, დიდდა ლელაურის მუხლქვეშ გაზრდილი.

მაშინ ის პატარა გოგო იყო, მეც მისი ტოლი ბიჭი ვიყავი! ენკენისთვის მიწურულები იყო, როცა ყურძნები დაკრეფილია, ქვევრები ნიგვზის ფოთლებითა და აყალოთი ახლად არის წახურული, ეზოებში კი მოდებულია ბრელო ახლადმოჭრილი სიმინდისა. ამ დროს მოყვითლული დღეები კელაპტარივით იწვიან. ჰაერი გამჭვირვალეა, ცა ლურჯად ჩამდნარი, უციაგესი...

უჩუმრად იდგნენ ცივ-გომბორის მთები, ჩემი შშობელი მთები. ქვევით იორი ლაპლაპებდა ომში ამოღებული ხმალივით. ივრის ხასხასა ჭალები ნოყიერად შრიალებდნენ. უბნის გოგო-ბიჭები ჰაერში გაბმულ „ირმის დორბლებს“ ვიჭერდით, დავკუნტრუშობდით, ვმღეროდით.

უეცრივ, ჩვენს ეზოში შემოვიდა შუახნის, შექალაქავებული ცხენოსანი, უნაგირზე პატარა გოგო შემოესვა — მარიტა.

ყვითელი აბრეშუმით თმა-კულული... ლურჯი თვალები... ისე ვიგრძენი, თითქოს ჩვენს ეზოში ია შემოვიდა, შემოვიდა და შემოეფინა... მე შევდექი და გაკვირებულმა ცქერა დავიწყე, მერე მოწიწებით მივუახლოვდი, ხმის გაცემა გავბედე და... მალე ერთად ვთამაშობდით მე და მარიტა!

ახლად დაქვრივებული ჩაჩიკა ჩვენსას სტუმრად მოსულიყო თავისი დაობლებული პატარა გოგოთი. მალე მარიტას ნადედობიც გამოჩნდა — დიდდა ლელაური!

დღედაღეს ძალზე გაეხარდა ნათლულის ნახვა. კარგადაც დახვდა. მთელი დღე ჩვენთან დაიმყოფეს მარიტაანთ. მეორე დღეს, ჩაჩიკა სიდედრის ქოხში ჩასახლდა.

იმ დღიდანვე მუშაობას შეუდგა შრომამოუწყენელი ჩაჩიკა თავისი სიდედრის მამულში, თვითონ არაგვიდან იყო, ცოლი რომ მოუკვდა, იქ ველარ დადგა, ცოლის სიყვარულით მისს სოფელს შემოეხიზნა.

მშვენიერი ვენახიც გააშენა! სულ ერთთავად შიგ მუშაობდა! მეზობლები დიდ პატივსა სცემდნენ შრომისათვის:

— სირცხვილია, ჩაჩიკას ღვინო საქეიფოდ დაილიოს, წამლათ უნდა მიიღო და წვეთეულად იხმარო!

ღარიბი იყო ჩაჩიკას ოჯახი, თუმცა ჩაჩიკას გარდა დიდება ლელაურიც მხნეობდა.

წერა-კითხვაში გაწაფული მარიტა ახლა სხვას ასწავლიდა ანაბანას დიდის გულშოდგინებით. რომ წამოიზარდა, საოცარი ხალიჩის მქსოველი დადგა! გაზაფხულის ყველა ფერით ხალიჩას ჰქსოვდა, გამოცდილ ოსტატივით!

მეც იმ დროებში დავიწყე ლექსების წერა. ორივემ ვიგრძენით, რომ ხელოვანნი ვიყავით და ალბათ ამიტომ სულისთვისტომები გავხდით... შეიძლება ესეც იყო მიზეზი ჩვენი ასე დამეგობრებისა; მაგრამ, მაშინ რომ ჩემთვის გეკითხათ, გეტყოდით, რომ მიზეზი, — მარიტას უნაზესი ხმა იყო და კდემამოსილი სახე, თანაც უჩვეულო, ქალწულებრივი სიმშვიდე.

რატომღაც მარიტას ზედმეტად სჯეროდა ჩემი პოეტობისა:

— მომეცი შენი ლექსი, ამ ფარდაგზე ამოვქსელო! — მეხვეწებოდა, — აქეთ-იქიდან კი, ვარდებს ამოუქარგამო!

მაგრამ სად მქონდა ისეთი ლექსი, რომ ღირსი ყოფილიყო მარიტას გულისყურისა, თუ მისი თითების შრომისა?

ახლაც კი ვერ დავარწმუნებდი მარიტას, რომ მის მიერ ხალიჩაზე ამოქსოვის ღირსი ლექსი. ჯერაც არ დამიწერია!

ერთხელ, ჩემი მასწავლებელი, კომპოზიტორი ნიკო სულხანიშვილი ჩამაცივდა:

— ჩქარა „საქართველოს ჰიმნისათვის“ ლექსი დამიწერეო! მალე განვთავისუფლდებით და ჰიმნი დაგვჭირდებაო!

ეტყობა, სულხანიშვილს, მარიტასავით, სჯეროდა ჩემი ნიჭისა!

ცხადია, თავი ხიფათში არ ჩავიგდე და კისრად ვერ ვიდე მუსიკოსის დავალება, ისევე როგორც მარიტას თხოვნა.

ეს იყო 1916 წელს, რევოლუციის წინაწელიწადს!

საოცარია, როგორც მარიტა და ნიკო სულხანიშვილი მთხოვდნენ დაჟინებით ლექსს, ისე ჩემთვის აღარავის არ უთხოვია ლექსი, არც ერთ რედაქტორს, არც ერთ თაყვანისმცემელს!

საოცარი მშრომელი იყო ჰირდებული დიდება ლელაური, მარიტაც მას მიემგვანა, მასაც სწყუროდა ცხოვრების წმინდა წყაროს წყალი!

მარიტა შრომაშიც ფაქიზი იყო, მუდამ ფურფუშებით და ფანცი-ფუნცებით მორთული წინსაფარი ჰქონდა აკრული — მარწყვის ყვავილით მოჩითული.

საშინლად მეცოდებოდნენ „მეთავთავე ქალები“ თუ ბალები. მკათათვის სასტიკ სიცხეში, ტვინი უნდა აედუღებინათ ცხარე მზის გულზე! წაღუნულებს, სისხლდაწკრეტილებს, ნამგლისაგან გაბნეული, დანარჩენი თავთავი უნდა მოეკრიფათ. წინსაფრით შინ ეზიდებოდნენ.

ეს მათი წლიური სარჩო იყო, ხოლო თუ ქალს ქმარიცა ჰყავდა, ეს მონაკრეფი თავთავი მაინც მისი პირადი ქონება იყო, ქმარი ვერ შეეხებოდა, ამას მიუმატებდნენ კალოს გალე-

წილ ჯელჯს და ბოლოს საკუთრად ლეწავდნენ. ამ პაპანებაში, სიცხეში საშინელ ჯაფით შეგროვილ გროშებით, ქალს შეეძლო მეწვრილმანისაგან ქმრის დაუკითხავად ეყიდა თავი-ჩითი საკაბე თუ ბამბაზია, საკუთრივ ან თავის შეუმოსავ ბავშვები-სათვის.

მკათათვის დილიდანვე სამკალში გაშლილ დედაკაცებში ჩადგებოდა მარიტა და გულმოდგინედ ჰკრეფდა დაბნეულ თავთავს. მე ვერ ვიტანდი მარიტას სიცხიგულზე შრომას და ვეშველებოდი. ბევრჯერ დედაჩემი გამჯავრებია, მზე არ ჩაგვივარდესო, მაგრამ თავთავეებზე წახრილ მარიტას არ წავხმარებოდი, არ შემეძლო.

— წადი, გენაცვალე, არ დაისიცხო! — წყნარად მეტყოდა მარიტა და მისი უნაზესი ხმა უფრო მამამდა იმ ადგილს, სადაც მარიტა ჰკრეფდა თავთავებს, ვიდრე მზის შუქი ჩაიკრიფებოდა.

იწვოდა ღუბიანი, მზისაგან დამწვარი წითლობი, შორს ჰმშვენოდნენ გრილი ბღნარები, მაგრამ საგრილობელი, ჯავრიანი ხეები მარიტასთვის არ შრიალებდნენ.

სალამოთი, სახემტკბარი მარიტა გამობრწყინდებოდა თავის დერეფანში, სულაც არ ეტყობოდა მთელი დღის დაღლილობა. პირმოოქროვილი დიდედა ლელაური წადიერებით ეალერსებოდა საყვარელ შვილიშვილს.

— ჩემო სპეტაკო შროშანავ, ჩემო ბამბიქულავ! რად ვინდა მზითევი? შენი მზითევი — შენი აბრეშუმვიით გადავარცხნილი თმებია! — ეტყოდა დიდედა.

— შენი მზითევი — შენი იისფერი თვალებია!

— მთვარისპირავ, შენი გულმკერდის ნათელი — შენი მზი-

თევია! — და ეგრე უნდა ჩაჰყოლოდა ანაგებად, თავიდან ფეხის ფრჩხილებამდე დიდის ალერსით დამტკბარი ლელაური. კრძალული მარიტაც ჩუმად ნებივრობდა.

— შენთვის გაქარწყლდეს დიდედაშენი, ჩემო ობოლო, მარგალიტზე უთეთრესო! — განაგრძობდა დიდედა და თან ნაწნავს უწნავდა. წამოწოლილი მარიტა შველივით განაბულიყო.

— ვარდის ჩიტო, პატარა მტრედო გვიძინა! — არა ცხრებოდა დიდედა ლელაური.

— მზის ცისკარო!

ჩვენ დროს ბავშვთა ერთი ბედნიერი დღე „არიფანა“ იყო — საძმო სუფრა, — ყვავილთა დღესასწაული, ყრმათა პურმარილის შეერთება. არიფანას ყოველწლიურად, ვარდობისთვეში ვმართავდით უბნის ბავშვები.

შინიდან წავიღებდით წინასწარ დამზადებულ სანოვაგეს, ტკბილეულს, ტკბილ სასმელს, შერჩეულ ადგილზე გავშლიდით სუფრას, თავზე დავიდგამდით გვირილის გვირგვინებს. სუფრა კი ვარდ-ყვავილებით, ზიზილებით გვექონდა აყვავებულნი.

ვმღეროდით, ვლექსობდით, ვცეკვავდით, ვთამაშობდით.

კარგად მახსოვს, უკანასკნელი არიფანა ჩვენი ვენახის თავში გავმართეთ, დიდი სამასწლოვანი კაკლის ჩრდილის ქვეშ.

მე, ძველი არიფანების მონაწილეს, მიფიქრია, რატომ ისევ არ შემოვიღებთ ჩვენი ბავშვებისათვის არიფანას, — ამ მშვენიერ ძველქართულ ჩვეულებას, — ბუნების დღესასწაულობას ყრმების მიერ?

უკანასკნელ არიფანაზე განსაკუთრებით დამახსოვდა

მარიტა, არიფანას დიასახლისი! უკანასკნელის, ვამბობ, რადგან მაშინ უკვე საარიფანო ჰასაკს გადავალწიეთ, მოზარდობაში გადავდგივთ ფეხი, ერთი ჩვენი ტოლი გოგო იმ წელს კიდევაც გაათხოვეს.

და აი, უკვე სხვა თვალთ მეჩვენა მარიტა, — გარდასხვა-ვებული ჩემს წინ შედერებული, შედედებული, მკერდამო-ვსებული ქალწული იდგა თეთრმოვარდისფრო კაბაში!

არიფანას სუფრაზე მარიტა ტკბილი მზრუნველობით დიასახლისობდა, რიგს გვაძლევდა, დაგვზრუნავდა, გვეალერსებოდა. ოდნავი სევდა უკრთოდა თვალებში, ალბათ იმიტომ, რომ ჩვენსავით ისიც სამუდამოდ ეთხოვებოდა ბავშვობას, უკვე მოზარდობის ჰასაკში გადასული.

ისიც შეენიშნე, რომ ჩვენი მეზობელი, ჭაბუკი მეძროხე გედია ნათელიძე, თერამეტ-ცხრამეტი წლის ბიჭი, სუფრის თაღარიგში ეხმარებოდა; თან მოკრძალებითა და ღიმილით მისჩერებოდა; თითქოს რაღაცას ემუდარება, შეთხოვსო, ხან თითქოს კიდევაც ებუზღუნებოდა. ერთი სიტყვით, ისე მეჩვენა, რომ გედია ვერავის ამჩნევდა მარიტას გარდა. ის მშვენიერი ყვავილთა გვირგვინი, დიდის ეშხით რომ დაწნა გედია, სწორედ მარიტას დაადგა თავზე, ლეკურიც მასთან იცეკვა!

მარიტასაც ეტყობოდა უჩვეულობა, — უეცრად მოსწყდებოდა იქაურობას, გაიჩინდებოდა, თითქოს სხვა სამყაროში გადასულაო, და მის მშვენიერ, კამკამა სახისთვის თითქოს ნადველს თავისი ფრთა გაეკრა...

შესამჩნევი ბიჭი იყო მეძროხე გედიაც — რჩეულებში ამორჩეული! მაგრამ მარიტასავით ღარიბი, უქონელი, უყოლელი, უმამულო!

მალე ხმა დაირხა, მარიტა და გედია შეყვარებულები არი-
ანო! გედია აღარც მალავდა. ერთხელ ჩემთანაც წაიღიღინა,
ტყეში რომ ვიყავით, შინდზე:

„მომენატრები, მარიტა,
სული ამამდის ყელშია!“

გედია ზაფრადაცემულივით ტორტმანობდა, იკლავებოდა
სიყვარულით, მოუსვენრობდა, საქმეს თავს ვერ უღებდა; სი-
ყვარული შეჰსეოდა მისს თვითეულ უჯრედსა და ძარღვს.

„წყუელო სიყვარულო,
ვაი, ჩაგველებ ზელსა,
სულ ლუკმა-ლუკმა დაგუწავ,
მერე შეგიყეთებ ცეცხლსა!“

ბევრი სხვაც იყო მარიტას სხივოსანი სახით ელდადაკრუ-
ლი. თვალმცეცხლი ბიჭები ეტმაწნებოდნენ მარიტას. არა ერ-
თი ჭაბუკი მწყემსი, მევენახე, მენრე თუ მეძროხე.

მარიტას ბრალი იყო, ზოგს რომ ხბოები ეკარგებოდა, ზო-
გს სამუშაოზე ველარ მიდიოდა, ზოგი ღამეს თეთრად ათენებ-
და, ზოგი დღისითაც გმინავდა.

— გაძნელდა უშენობა!

შორიდან შესჩიოდნენ მარიტას აჩრდილს.

მაგრამ ყველაზე მეტად დაჭრილი მაინც გედია იყო.

მახსოვს, სიონობა ჩვენ სოფელში, დღეობა და ღრეობა.

მოზარდობა ფოლორცზე ორ ჯგუფად გავიყავით. ერთი
ცალ მხარეს იდგა, მეორე — მის პირისპირ.

ხელი ხელთ გვქონდა დავლებული. ჩვენ რომ სიმღერით

ჭიტყოდით, თან სკუპით წინ მივიწვევდით, მეორე ჯგუფი შეგ-
ვეპასუხებოდა სიმღერით და სკუპითვე უკან დაიწვედა.

ჩვენს ჯგუფში მარიტა იდგა, მეორეში — გედია.

გედიას ჯგუფმა ძველებურად მოგვიმღერა:

— ა, ნიშანი, მოგვეც, ქალო, თამროს გარდამაო!

ჩვენ ვუპასუხეთ: არ მოგცემთ და არ

ვიკადრებთ, თამარ კარგა გვყაო!

გედიას ჯგუფი: — მეძროხის ცოლად

ძინდოდა, თამროს გარდამაო!

ჩვენ: მეძროხე მოჩანჩალეა, თამარ კარგა

გვყაო!

გედიას აღმურმა აჰკრა, გედიას ჰკენწლავდნენ.

არა ცხრებოდა სიმღერა:

გედიას ჯგუფი: — მომე თოფი, მოვი-
ტაცებ!

მარიტას ჯგუფი: — ვერც მოხვალ და
ვერც ხელს ახლებ!

გედიას ჯგუფი: ნიშანი მოგვიტანია.

მარიტას ჯგუფი: არ გვინდა შენი ნი-
შანი!

გედიას ჯგუფი: — ასი თუმნის ფარჩა
არი!

მარიტას ჯგუფი: არც შაურის ძონ-
ძებია! სანახევზე ნაგდებია!

გედიას ჯგუფი: მოველი და მოვი-
ტაცე!

მისცვივდნენ მარიტას და გაიტაცეს თავის მხარეზე. მაგრამ მოწინააღმდეგე ჯგუფმა ისევ უკან გამოიტაცა.

ამნაირად, არ ემეტებოდათ მარიტა მეძროხე გედიასთვის.

შემდეგ ორივე ჯგუფი შეერთდა, გაჩაღდა ტაშ-გოგონა.

თავდავიწყებული გედია უვლიდა, ცეკვავდა და თან ლექსს შესძახებდა რაღაც უჩინით:

ლე, ლე, ლეჟურ-კაბა!

გოგოებმა შეუქილეს:

ღედამ კაბა შემიკერა, დარაია, შრიალაო!

აბა, ბიჭო, შემომხედე, როგორ მადგა ტანშიაო!

ბიჭებმა შეუძახეს:

ღმერთმა შენცა შეგარცხენი,

შენი კაბის არშიაო!

გედია მარიტა გაიწვია საცეკვაოდ, მარიტამ თვალი მიანათა და... შეცურდა წრეში, ცეკვავდა მარიტა და ყველანი მას მივსჩერებოდით... როგორ უხდებოდა ქალწულს თვალთა ნარნარება! თითქოს ნიავე ცეკვავს ლერწმის წვერზეო! ყველამ სული განაბა და როცა მარიტას ბოლო წრე უნდა შემოევლო, სწორედ ამ დროს, თვალი შეჰკრა საყდრიდან გამოსულმა ბერდედა ლელაურმა, ხელი ჩაჰკიდა და წრიდან გაიყვანა.

მარიტა დარცხვენილი იდგა დამნაშავესავით, თითქოს უჩინთვალმა გაუგო გედიასადმი ტრფიალება და აუკრძალაო.

— რა შენი ტოლია ეგ ჰირსაჰმელი! — ცალკე საყვედურით უთხრა მარიტას.

მარიტას პირველად დაეწვა გული...

მეზობელი ბიჭებიც გადამეტი სიყვარულისათვის დასცინოდნენ მგრძნობიარე გედიას. — სად არის ამდენი დრო, რომ მარტო ქალს შესწირო, ათასი საქმე აქვს სოფელში ადამიანს და თავშისაყვამი! გედია კი მარტო მარიტას გზას აღნობს თვალებსო!

— ეგრე არ უნდა შენ, ბიჭო,
ნიადაგ ქალთან სწორება.
ხან ხვევნა უნდა, ხან კოცნა,
ხანდახან მკლავზე გორვება,
ხანდახან კარზე გახვიდე,
უკან არ დაგრჩეს ცხოვრება!

განა ცხოვრებისაღა რამ ესმოდა გედიას? ერთ საღამოს შენიშნა გედიას დედის, ხათუთას სიტყვები, შეიღს რომ მუდარით მიჰმართავდა დერეფანში, როცა ძროხის მოწველის მერე, ფეხი წამოჰკრა ქვას, საწველელი წაექცა და რძე დაედვარა:

— დაგბერდი, შეილო, შრომა აღარ შემიძლია, თვალთ აღარ მიჰრის, ნისლი რო მეხვევა, სუღარა მგონია! ცოლი მოიყვანე, ცეცხლის ამნთები მინდა! მარიტა მოიყვანე, სანთლით ნარჩევი ქალია!

რა იცოდა ხათუთამ, რომ მის შეილს უკვე შმაგურად შეჰყვარებოდა მარიტა! მოყვანა კი არა, წამსვე ხელს დასტაცებდა, ციმციმ გამოიტაცებდა, თავსაც შეაკლავდა. ლელაურისა ეშინოდათ, თორემ მარიტას თანხმობა კიდევ ჰქონდა მიცემული! ავარდა სიყვარულის ალი! ავარდა და აგიზგიზდა!

მარიტასაც და გედიასაც ახლა შეეძლოთ „ვისრამიანის“

ენით ეთქვათ ერთმანეთისთვის: „ჩემგან კიდე საშენო სხვა აღარავინ იპოების და შენგან კიდე საჩემო! მე მაისი ვარ, შენ — გაზაფხული!“ ან ერთად ემღერათ:

„გინდ მოვიდნენ ცხრანი მზენი,
მე უშენოდ ვერ დამთბება!“

მარიტას „მისაფუძვლამდე“ შეერყია გედიას გული! მარიტა და გედია ერთმანეთის საფერისები იყვნენ, მაგრამ მათ, ბიდი გადაწყვიტა დიდდა ლილაურმა:

— გედია? ცუდი ბიჭი როდია, მაგრამ უარსებოა, ღარიბი! ჩემს ერთადერთ შვილიშვილს ვერ დავაჩაგვრინებ, ისიც გვეყოფა, რაც გვწეწა სიღარიბემ! — და თითისტარს ჩახვეულ ფარტენაზე (კრემლი დააგდო.

მაშინ მწყემსი შეთე დაუბეჯითეს და კიდევ მოიწონა.

— შეთე? — ცხვრის პატრონი, სიმდიდრით დამტკბარი! მისი ცხვრის ფარები თურმე თრიალეთის მთებს ღრუბელივით აშავეებს და წვიმასავით იწვევლებს!

— შეთეს ბელლებში კიბით უნდა ჩაიხედო! სავსე აქვს ქვევრი, ჭურჭელი, გოდორი! ჩემი მარიტაც გაიხარებს; სიღარიბის პატარძლობა არ უწერია, სულ ვარდი უნდა აყაროს ცხოვრებამ; მზით უნდა იყოს გადანამქრული! ამის ღირსია! — წარმოსთქვა უმერყეო ბერდელამ.

ამ სიტყვებს წინ ვერა დაუდგა-რა...

თუმცა კი ჩაჩიკამ გაიკმარა საოჯახო თათბირზე:

— რათ უნდა უსიყვარულო სიყვარული? კალთაში ჩაეშლებათო! ოქროთი ვერ მოიგებ ბედნიერებას! — მაგრამ ვერც სიღარიბის დასასუსხად გაიმეტა და თანაც სიდედრის მკაცრმა კილომ გააჩერა:

— ჩემი შვილის უბედურებაც მეყო და ისიც, აქამდის რაც ვიწვინეთო!

აგრე შერთეს მარიტას უნდომი, უნდო, უყვარული ქმარი შეთე — მლაშე, ზვიადი, ყომრალი კაცი, მგლისფერი!

პირანთებული მარიტა მიემკვდარა, რა შეიტყო თავისი ბედი, მაგრამ რას იქმოდა? ბევრჯერაც თვალებს დახუჭავდა, წარმოიდგენდა თავს გედიას გვერდით! დიდი იმედები გამტკერდა!

ვარსკვლავმა გვირგვინი ჩამოიყარა... ლალის საყურე გაშავდა...

ქორწილი რომ გათავდა, მარიტასა და შეთეს საქორწილო გვირგვინები ხმლითა და ხანჯლით აჰხადეს, ვითომც უომრად. უბრძოლველად, უხმლოდ და უხანჯლოდ ამათ ვერაფერს გაყრისო. მარიტასთვის ნისლისფერა ცხოვრება დაიწყო...

შეთე, ნამშრალი, გოროზი, ყველასაგან უყვარული და ყველას უარისმყოფელი, დასარბებული იყო ცხოვრებას. დღეში ათჯერ დასთვლიდა თავისს ცხვარს და კიდევ არ ეკმავებოდა.

არ უყვარდა ღარიბი თანამომძენი: გაბოტილი იდგა და ჰკილავედა.

ერთხელ ასეთი სიტყვა გათალა:

— თანატოლები რათ უნდა ვიყვნეთ ქონებული და უქონელი? — თან შავი აღმური ასდიოდა სახეზე.

მარიტას გულზე მჩხვლეტავი ნემსებივით ექედებოდა მგლის ნაკბილარით შეთეს სიტყვები.

გედია? გარეგნულად არ შემკრთალა, წარბიც არ შეიდრიკა სიამაყით, მას ეგონა, თუ ქალმა გასწირა! ფერ სულაც გაჰქრა სოფლიდან, მერე ორჯერ-სამჯერ ჩაიარა შეთეს ახალი სახ-

ლის წინ დათოვლილი ნაბდით, მარიტასკენ არც კი გაუხედნია დრო გადიოდა. ესე ამბავი ყველას დაავიწყდა, გედიას და მარიტას კი — არა!

ოი, სასწაულო, არ ვიცი, ვისი რჩევით, შეთემ გედია ნათლიად მიიყვანა, როცა ბიჭი ეყოლა. ბოროტი ენები მარიტას აბრალებდნენ.

გედია ისე იქცეოდა, როგორც ყველა ნათელ-მირონი, ეტყობა შეთემ არა იცოდა-რა, ან რა უნდა სცოდნოდა?!

გედია და მარიტა ცალ-ცალკე, უჩუმრად ებრძოდნენ გრძნობას და ვერ შორეოდნენ.

...და ერთხელ, როცა შეთე თრიალეთზე იყო, ხოლო მისი დედა გულიზარი ამიერ ქვეყნიდამ გასულიყო, გედია ჩავიდა შათს ოჯახში სამძიმრის სათქმელად.

მარიტასთვის სამძიმარი უნდა ეთქვა ნათლიას, მაგრამ ნამდვილად კი, მარიტას ღიმილი სწყუროდა! სულ ერთი სიტყვაც რომ გაეგონა მისგან, მთელ წელიწადს იკმარებდა ბედნიერებისათვის!

მარიტა შემთხვევით მარტოდმარტო დახვედროდა ოჯახში.

— გაუმარჯოს იმ ორ წვეთ თაფლს, რომელიც დღეს ერთ სიტკბოდ შეერთდება! — კისკისებდა სიო.

ლოყაწითელი მაისის იასამნის მიბნედილი სურნელი მხიარულობდა...

ასე შეხვდნენ ერთმანეთს — ახალი ტარიელე და ნესტანდარეჯანი...

მეზობლის შინაბერა ბალბალუკას, — „ნემსიპარის“, კივიტ მოსიარულეს, არ გამორჩა გედიას სტუმრობა. კევილე-ჭიამ გამოაქვეყნებდა ყოველივე.

სოფლის ენაქეციათ ნაზი, ქლარცი ენით მკმევარჳა კრძა-
ლული და თავაზიანი ლაპარაკი იცოდა. და ამ ნაზ სიტყვათა
გადაცემა-გადმოცემაში, თავისი ვითომდა კდემამოსილებით,
მთელ სოფელს ამცნო გედიას და მარიტას ვითომდა საცოლ-
ქმრო შეყრა.

ბალბალუკას ნენენვი, ჳორშესხმული ამბავი მივიდა სოფ-
ლის მეუფროსემდის.

— განა სოფელი ბრმა არი, განა გულზე გახერეტა მეტი-
ლა იქნება? — რისხვით ამბობდა ციციკორე.

— არა, ლობესაც თვალი აქვს, კედელსაც, ჳამ-ჳურჳელ-
საც!

— ქალი ეშმაკის თვალია! — წარმოსთქვა ციციკორემ და
ხმის ამოღება ვერავინ გაბედა.

ცეცხლმოკიდებული სოფლის მეუფროსე ციციკორე თავზე
ციე წყალს ისხამდა. გმინავდა, თრთოდა, ტენი გაუფიცხდა.

— მირონი დააქციეს, ტალახში შარიეს, ქვეყანა შეგვიგი-
ნეს, გაუგონელი ამბავია, ძნელად დასაჯერებელი, ქვეყნის
გადაჯიშების ნიშანია სწორედ! მერე ვის დროს ხდება: ჩემს
ხელში! ღმერთიც მე მომთხოვს პასუხს, ქმარიც, სოფელიც,
ჩამამავლობაც!

— ვაი, თემო და სოფელო! — ბობოქრობდა ციციკორე.

— დამიძახეთ ელიას, ზაზას, გორიას, სოლომონს, ყანდლუს,
ზაქარას! — განკარგულებას იძლეოდა.

შუალამისას სოფლის თავკაცების ფარული თათბირი გაი-
მართა ცეციკორეს საბძელში. დიდი სჯა-კამათი იყო. ციცი-
კორემ გულის ბოღმა-ვაება წამოცალა. თავისი დაიყინა; ზოგე
კი წინაღუდგა, მაგრამ გავლენიანმა სოფლის მეუფროსემ

შინც თავისი გაიტანა, და ვინც კი თავდაპირველად გაიკმარა, ბოლოს იმანაც კი ციციკორეს მხარი მოაბა მკაცრ გადაწყვეტილებათაში..

... ზაფხულის ნაცრისფერი დილა გათენდა, ნაწვიმარი, ნაცივარი, წუხანდელი წვიმის ღრუბლების ნაფლეთები კიდევ დახეტილობდნენ ჩვენი სოფლის ცაზე, თითქოს ცაც იყო შეციებული, შეტალახებული, გამურული, ჰაერიც უგემური, წუხანდელ ნაწვიმარზე. წვიმით მტვერგადარეცხილი ძეძვის ორღობე უფრო ჩაშავებულიყო, ჩუმი წვიმის წვეთები ცრემლებივით ცვიოდა.

დილაადრიან, უეცრივ რაღაც ყრუ გუგუნმა თუ ზრზენამ გამომადვიდა... ლოგინში ვნებიერობდი და ნათბილარს წამოდგომა მეზარებოდა... გუგუნი იზრდებოდა, ჩვენს სახლს უახლოვდებოდა...

მაშინდა ვეცი ფანჯარას.

ახლაც თმები მებურძენება იმ სასტიკ სანახაობაზე.

სოფლის ბრბო უხმოდ მოდიოდა ღვარამოდენით, ჩოჩქოლით, გაონავრებული, გაძლიანებული...

აღრენით ღელავდა ბრბო, მრისხანებდა, გმინავდა, კვნესოდა, ჰბორგავდა, თითქოს გულის ნაღველს იწურავდა, ნიშნისმოგებით უხეაუროდ ზეიმობდა რაღაცას. მოდიოდა ღვარცოფულად, მაგრამ მუნჯად...

პერანგა ქალი უკულმა შეესვათ ვირზე...

ახლაც მაგონდება იმ ქალის კუნთების თრთოლა. ეტყობოდა, სციოდა და სტკიოდა, სცხელოდა და იგმირებოდა, ალბათ, ენატრებოდა სიკვდილი, მაგრამ სიკვდილი არსად ჩანდა და მისი ტანჯვა კი ძნელი იყო, ვითარცა სიკვდილი!

იმწამს იგი ათჯერ მოკვდა და ისევ ათჯერ ძალით აცოცხლებდნენს..

...მოპყავდათ სოფლის წამებული, თითქოს დედოფალი მოპყავთო, და მთელი სოფელი მისი ამაღა გამბდარიყო.

თრთოდნენ ქალის ანგელოზური მხარები და ბრბო კი ტალახსა და საქონლის ფუნას ესროდა თეთრ პერანგზე, რომელსაც თანდათან თავისი ფერი ეკარგებოდა.

არც ერთი ხმა...

არც ერთი შეძახილი... ეს იყო გასაკვირველი...

მაგრამ სიჩუმე საზარლად ხმაურობდა, ჩანჩქერივით გრიანობდა და თან იხვევდა ყველაფერსა და ყოველივეს.

წამებული ერთ წერტილს მისჩერებოდა, თითქოს იქით, სიცოცხლის გადაღმაა, და ამწამის ტანჯვას არცა ჰგრძნობსო და უცბად, როცა მოსახვევში შეუხვია პროცესიამ, მაშინ ვიციანი ის ქალი

ჩვენი მარიტა! მინაცრებული, გამტკნარებული. — მარიტა ყოფილიყო მანისის გამონაყოფი მარიტა!

დედაჩემი სულ კანკალებდა. თვალებზე ცრემლი ჩამოსდიოდა, გაოგნებულს თითქოს ფეხქვეშ მიწა გამომეცალა ბრბო კი ჩუმად, უჩინრად მიჰქუხდა, როგორც ღვარცოფი, და მის წინაშე უძლური იყო თვით ღმერთი!

იმ საშინელი დღის შემდეგ გაუკაცრავებული, დამცრობილი მარიტა აღარავის სჩვენებია!

მარიტა მოკვდა სოფლისათვის!

თითქოს, სადღაც, უჩინრად გარდაიხვეწა...

ყველა უხერხულობდა მარიტას სახელის ხსენებას. ბავშვიც კი შეყოყმანდებოდა ხოლმე, ხოლო თუკი ენაზე მოადგებოდა

ეს სახელი, ენის ტარზევე შეირჩენდა და არც კი წარმოსთქვამდა...

ჩუმად იყვნენ მარიტას ნამეგობრალეებიც... ყველა მიჰხვდა თავის შეცდომასა და ბოროტებას, ყველამ გაითვალისწინა სოკუთარი დანაშაული...

გულგამირული გედია გადაიხვეწა ყაზახში, თათრებში, და იქვე მოედო ბოლო უსაშველო დარდით, თავზე ხელადებული ვილაცას შემოჰკვდომოდა.

სოფელმა იგრძნო თავისი ნამხეცავი, ნაპირუტყვალის აწყენინა თავის საუკეთესო შვილს, უმანკოს და უნაკლულოდ პატიოსან ადამიანს!

.მარიტა ზეზეურად დადნა და სულ მალე უთქმელი სევდით გადავიდა ეთერის ქვეყანაში!

გაიგო რა მისი ცოდვის მზიდველმა სოფელმა მარიტას სიკვდილი, საშინლად იტკივილა მთელი სოფელი მოჯარდა მარიტას ეზოში.

მარიტას უხრწნელი სილამაზე — მთვარის საშუბლე, პიტალო ვერცხლური სახე, დამარმარებული ყელი, — სიკვდილშიც კი მომხიბლაობდა!

სოფელმა ზღვიერის ცრემლით დაიტირა თავისი მზეჯავარა. კუბოსთან ყველა წყაროსავით იღვრებოდა.

მხოლოდ გულჯავრიანი ციციკორე, ამაყი და გაძაგრული იდგა. ჩაღრუბლული, მძიმე ფიქრებში შესული, განა შემნანე, ხან ყავარჯენს დაებჯინებოდა, თითქოს სასტიკი მზერით ამოწმებდა, მართლა მოკვდა თუ არაო? საოცარი იყო, ციციკორე — მარიტას სიცოცხლის ხელმყოფელი, სოფლის ამტირებელი,

სულაც არ იტანჯებოდა, მას მართალი ეგონა თავი! მან ხომ სოფლის ძველთაძველი ზნეობა დაიცვა, სირცხვილი არავის შეარჩინა! მხოლოდ ნორჩი „გაუხარელი“ ქალი ენანებოდა, როგორც ადამიანს და თვითვე უკვირდა თავისი ძალა და გავლენა:

— სად დავკარი და სად გავარდაო!

„გამაძლო მე სიმწარითა, დამატრო მე ნალველითა“—ცხოვრებამ... ბედმა... — შეეძლო გაემეორებინა მარიტას.

გლოვის კვამლით სოფელი გაშავდა...

სოფელს თავისი თამარ დედოფალი მოუყვდა... ხეებიც კი სტიროდნენ...

...და სამარის პირად, როცა დადგა უკანასკნელი წუთები გამოთხოვებისა და მიწის მიყრისა, იმ წამს, კუბოსთან მიჯრილმა მარიტას შეურაცხყოფელმა ხალხმა, ახლა შეშინებულმა, უეცრივ უკან დაიხია, თითქოს ამაზე სხვა რამ უფრო საზარი დაინახა, კინაღამ ერთმანეთი გადათელეს და გათქერეს... რადგან ერთი მუჭა მიწის მიყრა ვერავინ გაუბედა ამ ღვთიურ სილამაზეს. ვერავინ... ვერავინ...

თვით უშიშარმა დოღენჯიმ, ბიჯიც ვერ წადგა, რომ მისაყრელი მიწა პეშვით აელო დასაყრელად.

იდგა ხალხი და გულამომჯდარი ქვითინებდა.

ბოლოს, ისევ ციციკორემ გამოიყვანა ხალხი ბურანდან.

ისიც ფეხის ბორძიკით მივიდა კუბოსთან, დაიღუნა, აიღო ერთი მუჭა მიწა და კუბოს მიაყარა...

უცბადვე დასწვდა ნიჩაბს და წავიდა მიწა ხრიალ-ხრიალით.

ეშველა ხალხს. გულს ეფონა... თორემ ცრემლი დაახრჩობდა!

კლდეთა ამონაყარ მიწაში ჩასვენდა მარიტა.

მიწას არ შერცხვია, მაგრამ ბალახი მიწაში ჩაძვრა სირცხვილით.

უცბად მზე გაჩაღდა, აბრიალდა, თითქოს ჰისი ნაწილი მარიტა მასვე შეუერთდა.

მარიტას სიკვდილმა, როგორც ხალხი იტყოდა, — მთები გადააბნელა, ქვეყანა დააცარიელა, ქვა დააღწო, კლდე დაშალა...

ხალხური ლექსი იტყოდა: მარიტას სული პეპელასავით გაფრინდა და ანგელოზები ზარის რეკვით შეეგებნენო!

იმასაც იტყოდნენ, ზეცაში მტრედი აფრინდა მახარობლადო — მარიტა მოდისო!

საიქიოში — ოქროს სკამი მიართვესო, დადლილსაო.

ღვთისმშობელს ეთქვა თურმე: ფერზე გეტყობა, ძლიერ დადლილხარ, დაჯე, შვილო, შორიდან მომავალი ხარო!

იესო ქრისტემ კი ხელმანდილი ამოიღო, შუბლზე უნდა მოესვა, რომ გაეცოცხლებინა, მაგრამ ისეთი ლამაზი იყოო, მიწაზე დასაბრუნებლად ვერ გაიმეტაო, მოინდომა, სულ გვერდით ჰყოლოდა, ახლაც გვერდითა ჰყავსო ვარსკვლავადო...

მთელი წელიწადი უწვიმარი იყო... ყანები ჩაიწვა. ვენახები გადახმა. ყანწი ვერავინ გაასველა!

დაშრა ჭური და საწნახელი!

ამ უბედურებას მარიტას უსამართლო სიკვდილს აბრალებდნენ, რომ სოფელმა უბრალოდ გასწირა მარიტა!

მახსოვს, დიდხანს იყო ამაზე მითქმა-მოთქმა, საუბარი. შერე ვიღას გვეცალა?!

მარიტა უკვე წაფერფლა ცივმა ღრომ და გრილმა მიწამ! ვისღა ახსოვს?

მხოლოდ შემსწრენი და მახსოვარნი დაუჯერებელ ზღაპარ-ამბავივით გავიხსენებთ ხოლმე მარიტას სახისა და გულის სილამაზეს, ისიც ჩვენს შორის!..

ამ გაზაფხულის პირზე ვინახულე ჩემი სოფელი და მარიტას ნაეზოვარიც.

ირგვლივ ყოველივე დამუნჯებულიყო. ნამოსახლარზე მარიტას სახლის ნაკედლარებიც კი აღარ ჩანდა.

იქ, სადაც მარიტას მამისეული სახლი იდგა, ახლა ქერის ბურღო ეყარა და ქათმებისაგან გარს მტვერი და ბუნგალი ირეოდა.

ყოველივე წალეკილი იყო „ზვირთთაგან მღელვარისა ამის მიუნდობლის საწუთროსათა“.

აღარც ერთი ხე აღარ გადარჩენილიყო მარიტას ეზოში. მხოლოდ ძველი კერის ადგილზე, თავისით ბროწეული ამოვარვარებულიყო.

ჩემს წინ, ახლად აყვავებული, ცეცხლისფრიანი ბროწეულის ყვავილი მიღიმოდა, მარიტას სახესავით ალაკრული!

გუყურებდი მხიარულ მზიან ყვავილს და არა მჯეროდა, რომ მარიტა აღარ ამშვენებს დედამიწას! არც ის მეჯერებოდა, რომ ამ მტვერსა და ნაგავში ასეთი ბრწყინვალე ყვავილიანი ხე ამოსულიყო თავისით!

მართლაც, საიდან მოდის სილამაზე? ან სად მიდის? სად იკარგება, თუ ღროებით მიეფარება?

ვინ იცის?!



ჩოჩიხი

სკოლიდან მხიარულად გამოცვივებულ ბავშვებს სოფლის დიდ ცაცხვთან დაგვხვდებოდა ჩორეხი და როგორც ბატკნებს მწყემსი, ისე გადაგვარჩევდა რამდენიმეს და გვმოძღვრიდა, გვწვრთნიდა, გვრჯულავდა, გვასწავლიდა...

ჩვენი ნამდვილი მასწავლებელი მართლაც ჩორეხი იყო და არა ჭროლა ლონგო, რომელმაც თავისი გაკვეთილების მეტი არაფერი იცოდა!

დარბაისელი ჩორეხის საგანი ერთადერთი იყო — საქართველო და მისი სიყვარული

და აი, ახლაც, ცაცხვის ქვეშ, გვიკითხავს „საქართველოს ისტორიიდან“ თევდორე მღვდლის თავდადებას და ბოლოს ლოცვასავით ჩაგვიკითხავს ზეპირად, როგორც გულში გადამდნარ საკუთარ გულისთქმას, და ჩვენ ხმამაღლა გაგვამეორებინებს „კალმასობიდან“:

— „ქართველნი წინაპარნი ჩვენნი, იყვნენ თუმცა კირთებასა შინა სხვათა და სხვათა მპყრობელთა მიერ, — მაკედონელთაგან, რომაელთაგან, ბერძენთაგან, ეგვიპტელთაგან, სპარსთაგან, სკვითთაგან, ოსმალთაგან და ჩინგიზთაგან, მაგრამ სიყვარული მამულისა და სიმაგრე სულისა ვერა დაატოვებდეს, იძლევიდნენ და სძლიეს, იღევნენ და განღევნეს და ესრეთ მოიგეს უკვდავებისა სახელი!“

ამ სიტყვებზე ჩვენ ვბორგავდით, ვბობოქრობდით, აღარ ვიცოდით, სად წაგველო ხელები.

რა გვაწრთობდა მაშინდელ ქართველ ბავშვებს? — „დედა ენა“, „ჯეჯილი“ და რუსთა მეფის სიძულვილი!

მამულის თავისუფლების აზრის ცეცხლი იძვროდა ჩვენს სულში, მან დააალმურა ჩვენი გონებაც და უკვე მოზარდები. მამულის სევდით სახე-შეკომლილები დავდიოდით. ეს სევდა გვაკაუებდა მაშინაც, უღვაშის გინგლი რომ დაგვეტყო, როცა „ყოველივე ფერმკრთალდებოდა ოცნების წინაშე“!

თუ აქამდე ჩვენ გვწამდა „წმიდანნი ზეცისანი“, ახლა შემოგვესხივნენ „წმიდანნი ქვეყნისანი“, — ჩვენი ქვეყნის მამულიშვილები, — ვახტანგ გორგასალი, დავით აღმაშენებელი, თამარი, გიორგი ბრწყინვალე და, როგორც ჩორეხი იტყოდა, „ხმალშეუხსნელი ერეკლე“!

ერეკლეს სახელს ჩორეხი უსათუოდ ოხვრით დაატანდა:—
ა, ბეჩავ, ბაგრატიონო

ბაზალეთის ლერწმოვანები ჩვენთვის საიმედოს მღეროდ-
ნენ და ყურიც კარგად არჩევდა შორეულ მუსიკას.

„უკეთუ დაგივიწყო შენ, იერუსალემ, დაივიწყენ მარჯვენე
ჩვენი“! — ეს იყო ჩვენი პირველი აღთქმა მამულისადმი, აღ-
ქმის საყვარელი გამოთქმა!

— ემთხვიენით ქართულ მიწას! — და ჩვენც ვემთხვე-
ოდით.

— აკოცეთ წარსულის ნაშთებს! — ჩვენც ვასრულებდით
ჩორეხის ბრძანებას და ძველი ტაძრის თუ კოშკის ხავსიან
ქვებს დაჩოქილები ვეამბორებოდით.

ბავშვი ისე არ გაეტირება თავის დედას, როგორც ჩორეხი
მისტროდა საქართველოს წარსულ დიდებას.

გაშლიდა რუკას, შემოგვისხამდა გარს, დაადებდა თითს
რუკაზე:

— მესხეთი, — შეეალერსებოდა, თან ღიმილით იტყოდა, —
ჩემი გვარიც იქიდან არი! იქიდან ვართ წამოსულები!

— სამცხე, აჭარა, შავშეთი, ტაო, კლარჯეთი, ერუშეთი,
სრულიად ქანეთი, — აი, საქართველოს ნატამალი კუთხეუ-
ლი მხარე! არ დაივიწყოთ საქართველოს მოჭრილი ძუძუ!
ჩვენი აკვანი! ქართული სალამით ამოდის იქ მზე, იქ გამოი-
გონეს ქართველებმა პირველი ფოლადი; იქ დაარტყა პირ-
ველად ურო თუბალაურმა!

„აწ მტკრად აღგვიღან იგი ძალი და იგი ღონე“!

თითებს შემოატარებდა ჩვენს წაგლეჯილ მიწა-წყალს და
მთრთოლვარე იტყოდა:

— იქ, ჩვენი ქედ-წაგრეხილი მოძმენი ცხოვრობენ, ქართველები. გადაწვეს ჩვენი ტაძრები, ციხე-კოშკები, სულ ნალმებით ააფეთქეს, ბევრი იმაგრა მესხეთმა, ომში გადადნა, მაგრამ ძალამ აღმართი მოხნა, ბევრი სისხლი გვაქვს გამოშვებული!

— მეცოდება ჩემი სამშობლო — საქართველო ნაქარალი, ნაქორალი, გაგლეჯილი, გამოგლეჯილი, — დაჭრილი არწივი, ვეფხვი უსულოდ დანარცხებული!

მოსთქვამდა და მოსთქვამდა:

— ეპ, როდის აიკუწება წიბონი გველეშაპისა? ვაი, მამულო, ნაჭირნახულევო, სისხლით შეღებილო, აკლებულო, დამწვარო, ტყვექმნილო, იავარქმნილო, ვაი, — ძნელბედო, ვაი, მამულო, გამესამედებულო!

ჩორეხი თვალნათლივ ჰხედავდა საქართველოს ჭრილობებს, თითქოს ხელს ურევს ამ წყლულებში და იქიდან იღებს გამოუღეველ ძალას ბრძოლისას, სიყვარულისასო!

ეს იყო მისი გულის ნალარი.

უცბად დაეცემოდა გულის სიღამე:

— ვაი, ნაოხრობას, დაქცეულობას! არ გესმით ნანგრევების ლაღადისი?

— იმარხება საქართველო, იმარხება ქრისტეს კუნძული!

— ღმერთო, შენი მაქვს იმედი! ფეხზე ააყენე ჩვენი მამული, ჩვენი შემფერხებელი ისტორია, მოგვეც განახლების ძალთა ღონიერება! ღმერთო, შენ დაამხე ჩვენი მტერი ქართველთ-ყლაპია!

— აღსდევ, საქართველოვ! — თან ფეხს ღონივრად და-
არტყამდა მიწას.

— აღსდევინ, ღმერთო, და განიბნინენ ყოველნი მტერნი
მისნი და ივლტოდეს მოძულენი მისნი პირისაგან მისისა!

— ესე არს დღე იგი, რომელი ქმნა უფალმან! ვიხარებდეთ
და ვიშვებდეთ ამას შინა! — თითქოს წინასწარ ზეიმობდა
ჩორეხის სული! — მალე გავიგონებთ მომავლის ხმას, მალე!

მაგრამ უეცრივ მოიღუშებოდა მისი შავი და მკაცრი
სახე:

— შავ ზღვაში ჩავარდა მზე საქართველოსი! რაღა ამოი-
ყვანს?

— რამ შეგადარდა, ჩორეხო?

— რად დაჩუმებულა საქართველოს წიაღი, რად? მესსია
რად იგვიანებს? — გმინავდა ჩორეხი.

— პატარა ერი ვართი ეჰ, რაც მკლავზე სისხლი დაგვდე-
ნია! სულ სისხლმა იავდრა ჩვენს მიწაზე! აი, ეს მარწყვიც
კი, — ჩვენი წინაპრების სისხლის წვეთია. — იტყოდა ჩორეხი,
როცა მარწყვს მოსწყვეტდა.

— ქალალზე მეოცნებეთა დრო წავიდა! საქმეა საქირო,
საქმე! — და თვალებში რომ სევდას შეგვატყობდა, გაგვაძხნე-
ვებდა: — ისევ დაისხავს ჩვენი ვენახი, ისევ დაგვებადება რუს-
თაველი, აღმაშენებელი, თამარი! ნუ გეშინიათ!

იმედის დაოქროებაც კარგია! რა ვქნა, რა ვუყო ამ სიყვა-
რულს, სათქმელად რომ დუღდება გულში!

— ქულზე კაცი ქულზე კაცი გამოვიდეს და დავიხსნათ
ვაშული! — შესძახებდა უცბად აგზნებული ჩორეხი და თვა-
ლები ცეცხლით ევსებოდა.

— ქუღზე კაცი—ყვიროდა ჩორები და ცოლი ორივე ხელს პირზე აფარებდა:

— დაჩუმიდი, კაცი, არ გაგიგონ, არ დაგველუპო!

და ღონემიხდილი ჩორები უღონოდ მიეშვებოდა ტახტზე.

— ო, ყური მომიგდეთ, რა არის თქვენი სამშობლო და კარგად დაიხსომეთ! — გვეტყოდა ბავშვებს და თვითვე მიუგებდა — „გარნა არს ქვეყანა მშვენიერი და ნაყოფიერი ყოვლითა ღვთისა მიერ“!

— „ნაყოფიერი ყოვლითავე, ვენახ-ხილითა; თესლ-მარცვლითა, ფრინველნი მრავალნი, გარეულნი და შინაურნი, ზამთარ თბილი და მშვენი, ზაფხულ შეზავებული. წყარონი ცივნი, მშვენი, ქალა-ტყენი, ბალახნი და ყვავილნი მრავალნი“-ო, აი, ჩვენი სამშობლო!

კარგი რამა ხარ, ჩემო ქვეყანავ,
ლამაზად მორთულ და მოკაზმული.
მაგრამ რამდენად მშვენიერი ხარ,
იმდენად უფრო მიკვდება გული!

ჩამარცვლით დააყოლებდა ლექსს და იქვე შეგვასწავლიდა...

— დიდი მშრომელი ხალხი ყოფილა ჩვენი წინაპარი ქართველობა! შეხედეთ, ჩვენ სამშობლოში პატარა გორაკიც კი არ არის, რომ ზედ არ იდგეს ტაძარი, ციხე-კოშკი, სიმაგრე! დიდი ოფლია დაღვრილი, დიდი ეს უნდა გვანსოვდეს. მარტო ყანწის ტრიალი კი არ ვიცოდით!

სამაგალითოდ გვაჩვენებდა ძველ, საგვარეულო ხელნაწერს მისი პაპის პაპის მამამზეს მიერ ერთი კალმით გადაწერილს.

წიგნის ბოლოს მართლაც ეწერა:

„მოიხსენეთ, რომელ, ერთის გამოჭრილის კალმით დამიწე-
რია, რომ არ გამომიცვლია კალამი და ჩვენ შემდგომ, ვინც
ეს ასე მწერლობა ეცადნოს, საქებელ იყავნ“!

ჩორეხი ზელს დაჰკრავდა წიგნს და იტყოდა:

— აი, ვინ იყო ჩემი პაპა! მათი სული კიდევ მუშაობს,—
ბაზალეთის ტბის ძირას ოქროს აკვანი დადგეს და არწევენ ახ-
ლაც, ამწამს, შიგ ოქროს ხუჭუჭთმიანი ყრმა წევს, ჩვენი შო-
მავეალი, ის ყრმა გაიზრდება და გაანთავისუფლებს საქართვე-
ლოს!

ასე სწამდა ჩორეხს, სასწაულით ხელგაუნძრევლად თავი-
სუფლების მოპოვება. გაიზრდება და გაანთავისუფლებსო!
ჩაგვიკითხავდა ლექსს ბაზალეთის აკვანზე და შემპარავი სიტ-
კბოთი ეოგვიყვებოდა: ბაზალეთის ტბის ძირას ძვირფასი
ოქროს სახლია თურმე! ჰერი ვარსკვლავებისა არის, იატაკი
თვალმარგალიტით არის მოქედილი, შუა იატაკზე ოქროს აკვა-
ნი სდგას თვლებითვე მოქედილი. ზედ მტრედი ზის და არწევს
ამ აკვანს... ის მტრედი, თამარ დედოფლის სულია!

დღევანდელ ცხოვრებისა ჩორეხს ბევრი არა გაეგებოდა
რა, „არა შეესმოდა“, შოთას თქმისა არ იყოს, „სოფლის გაღმა
გაებიჯა“. იგი მხოლოდ წარსულში იყო შელტოლვილი და
იყოცა მისი მძევალი!

თვით მისი მეზობელი სოფლის მღვდელი ზირაქი, — სუ-
ლის კაცი, — ისიც კი დასძენდა: — არც მეტის მეტი განტევება
უნდა ცხოვრებისაგანო. ნათქვამია, ეშმაკი რომ სახლს აგებ-
დეს, ერთი ქვა შენც დაადეო!

მაგრამ ჩორეხი მხოლოდ წარსულით სუნთქავდა.

როცა წარსულზე ჩამოვარდებოდა საუბარი, პირველად

თამარი უნდა ეხსენებინა. გზნებით აღიგზნებოდა: — ჯერ გული გავიწმინდოთ, სიტყვა მოვილამაზოთ, მერე ისე ვახსენოთ ჩვენი ლამაზი დედაო, და დაატანდა მამია გურიელის ლექსს:

თამარი — ვინ იტყვის რა იყო,
მეათასელსა ნაწილსა!

თან დაადიდებდა: „დიდი თამარი, საქართველოს დედათა პირის წყალი“!

თამარის ნაწადმართევი საქართველოს ყველა გორაკსა და მწვერვალზეა დარჩენილიო, აბა, შეხედეთო! არ ასვენებდა თამარის ასხივებული დიდება:

— სიცოცხლითვე დედამიწას არ ეკარებოდა ერთ ადლზე მალლა დადიოდა მიწიდგან.

— მაშ, შეილი როგორღა ეყოლა?

— როგორ არ იცი, მზის სხივის მიერ ეყოლა ვაჟი! — ისეთი დარწმუნებით გეტყოდა, რომ შეუძლებელი იყო, არ დაგეჯერებინათ. ძალიანაც აწყენინებდით.

თუ რამეს დავაშავებდით ბავშვები, დაგვაშინებდა, — დიდი პირიმზე გაჯავრდება, თამარ მეფეო!

ერთხელ, ერთ მორჩილს, საფქვილვე გუდაში ბლომად ფქვილი რომ ჩაუყარა, ჰკითხა:

— რომელ წმიდანს ემსახურები?

— თამარ ღვთისა სწორის სამლოცველოს!

— სად არი ეგ საყდარი?

— გომარეთში, ხევ-გალმა, დვალეთთან!

ადარ გაუშო მორჩილი. მთელ დღეს დასვა, ასადილა, პატი-

ვი სცა. ფულიც აჩუქა და ბევრიც ელაპარაკა თამარ შეფეზე. მეორე კვირას, შეჯდა თავის კავშა ცხენზე და გაემგზავრა გომარეთს, თამარის ხატის სანახავად და დიდადაც კმაყოფილი დაბრუნდა.

შინგაზრდილი მწიგნობარი ჩორეხი „ვეფხისტყაოსანს“ „შოთას ძღვენს“ უწოდებდა.

— ნეტა ჩემს გახარებასა! — და გაშლიდარუსთველის წიგნს:

— შენ პირს შაქარი, ოქროს ნისკარტო! — შეელხინებოდა, თითქოს ოქროს ბულბულს იჭერს წიგნის თითოეულ კაბადონზეო კვირაძალზე შოთას სურათს სანთელს უნთებდა, როგორც წმიდანს და ოთახში ჩაკეტილი, მარტო, ხელაპყრობით ავედრებდა საქართველოს.

— დიდო რუსთველო, ლექსთა მამაო!

— ოდეს ენანი დადუმდეს და არავინ ღალადებდეს, მაშინაც რუსთველის სიტყვა იუღერებს მხოლოდ! შოთას ლექსის წინაშე ყოველი საქმე დადუმდება!

დიდად მონდომებულ იყო ჩორეხი წასულიყო რუსთავს და ჩოქით, თაყვანისცემით შემოევლო რუსთავის მიწა-წყალი!

— რა წიგნია! რა მადლად და მშვენივრად თქმული! საქართველოსი კი არა. მარტო, სამთელქვეყნოა! ტყუილად არ უთქვამს თვითონ შოთას:

სხვა ჩემებრივ ვერა კპოვო,
ცათამდისცა ხელი აყო!

— ნეტავ, რა გულია უნდა შერჩენოდა შოთას, როცა თავისი გული ასე მძლავრად გადააღწო თავის ნაწერში.

ტკბილად ჩაიკითხავდა:

„ანუ არის ბრძენი ვინმე, მაღალი და მაღლად მხედი, არცა ლხინი ლხინად უჩანს, არცა ჭირი ზედა-ზედი, ვით ზღაპარი, ასე ესმის, უბედობა, თუნდა ბედი, სხვაგან არის, სხვაგან ფრინავს, გონება უძს, ვითა ტრედი!“

შოთას ამ ლექსში ჩორები უპირველესად თავის თავს ჰგულისხმობდა, დღიურ საქმეთაგან განდგომილსა და შორეულ ოცნებაში გარდასულ საკუთარ პიროვნებას. და მისთვისაც საგანგებოდ მოსწონდა შოთას პოემის ეს ადგილი. შოთას კითხვით დამტკბარი, აღფრთოვანებული ხელს მაღლა აიშვერდა და იტყოდა:

— რით არის სახარებაზე ნაკლები? — მიაჩერდებოდა მღვდელს და თან დასძენდა: — შემრისხენ და შემიწყალენ, მამაო, ვითხოვ მეოხებას!

მაგრამ მღვდელს არცა სწყინდა, არც ეცალა რუსთველისათვის. ის მეტად მიწიერი კაცი იყო და ხვეჭაში გართული.

— ვკითხულობ და გულს ძვერა ემატება! — განაგრძობდა ჩორები, განა ასეთი თაყვანისმცემელი და ტრფიალი სხვა კიდევ იქნებოდა რუსთველისა?

— მიღწვიან, მომიგონებენ, დამლოცვენ, მოვეგონები! ტყუილად კი არ უთქვამს დალოცვილს!

მაგრამ რუსთველის ლექსის გარდა, მამულიშვილ ჩორებს კიდევ უყვარდა ბიბლიიდან ეს ადგილი:

„მდინარეთა ზედა ბაბილონისათა დავსხედით და ვსტიროდით, რაკამს მოვიხსენიეთ ჩვენ სიონი!

...ძეწნთა ზედა შორის მისთა დავკიდენით საგალობელნი ჩვენნი.

...უკეთუ დავივიწყო შენ, იერუსალიმ, დავივიწყენ მარჯვენე-ცა ჩემი!“

დადიოდა ქედდარეკილი, გულშეძრული მამულიშვილი, ოხრავდნენ მისი გულის ბაგენი და გმინვანი შორს ისმოდა:

— ვაი, ძუძუ უწოველო!

— ვაი, ფრთამოტეხილო არწივო! ბოლომოჭრილო ხობობო! ვაი, ქართლო, საქართველო!

მორწმუნე ჩორებს სრულიადაც არ სჯეროდა, რომ საქართველო ღვთისმშობლის წილხდომილი იყო:

— ღვთისშობელო, თუ შენი წილი ვართ, შენი წილდებული და ხელდებული, რაღათ ააოხრებინე ლექსა და თათარს საქართველო, ეს ვერ გამიგიაო!

— არა, ძმებო, თუ ღვთისშობლისა იყო საქართველო, განა თავისს მამულს ვერ მოუვლიდა?— იტყოდა გაკვირვებული.

სულ ერთთავად დადიოდა, ან შარავნაზე უნდა გენახათ, ან ტყე-ღრეში იარებოდა აწოწილი, წვერულვაშიანი, სათვალეებიანი, გამხდარი, ახოვანი ჩორები. მკაცრი შესახედაობისა, თმაგაბურძგნული, უქუდო, მტკრიანი, გაოფლიანებული. ძველებურ მასრებიან ჩოხაში, ხარაზულ წულდებში.

ყოველდღიური ხეტიალისა და წანწალისათვის მუდამ ჩანთით, წერაქვითა და კოგრით მავალს, წანწალოსანს უწოდებდნენ:

— მოდის ჩვენი წანწალოსანი!

სოფელში აღმაცერად უყურებდნენ. თუმცა პატივს სცემდნენ უანგარობისათვის.

— ნეტავი, დღეს რა გათხარა, სად რა ხაზინა იპოვა? — ჰკითხულობდნენ მეზობლები, მეგობრები, დასცინოდნენ. მაგრამ როცა მოუახლოვდებოდათ, პატივისცემით შეეგებებოდ-

ნენ, ისიც გააცნობდა თავის ახალ აღმოჩენებს, წყნარად, დამაჯერებლად.

ლამეობით ჩორებს ერთთავად ვახუშტის ისტორია თუ გეოგრაფია ედო წინ და მის შემოწმება-შესწავლაში ათენებდა ღამეს.

— ვეყო, ნუ მისცემიხარ უქმსა და უსიცოცხლო არქეოლოგიურ ოცნებებს! გეყო გუნდრუჟის კმევა წარსულისადმი, სულს ნუ იჭუჭყიანებ წარსულის მტკვრით! — შესძახებდა მეგობარი.

— ერის დაცემა იწყება იქიდან, სადაც თავდება წარსულის ხსოვნა! — უპასუხებდა ჩორები და განაგრძობდა: — ჩემი გონების მანათობელი ჩემი ქვეყნის წარსულია! მისი შუქი მესხივნათელა! იცი, რა ტკბილია წარსულზე ოცნება!

მართლაც, წარსულზე ფიქრით იყო დაფერფლილი და მით სამშობლოზე მტლედ შემოდებული ჩორენი.

— აფსუსს, რა ბიჭი იღუპება ქვეყნისათვის! — გულმტკივნეულად დასძენდნენ მეზობლები.

დიდი ფიქრი ჰქონდა ჩორებს ნატვირთავი, დიდ სევდას ატარებდა; მისი არავის ესმოდა და ასეთ განდგომასა და ხვაშვიადის კრძალულებას ზოგი ზვიადობაში ართმევდა.

დილით გასწევდა ტყისკენ, მთისკენ. ახალ-ახალი ისტორიული ნაშთების საძებრად. ხელით გადასწევდა დაბურულ შინდსა თუ თხილსა, კუნელსა თუ წითელ ასკილის ტოტებს, ტაძარს რომ გარსმოჰხვეოდა. გულმოდგინედ ეძიებდა ფრესკებს და უსურვაზიან ქვებზე ამოკვეთილ წარწერებს. სევდით ივსებოდა, გული ეტირებოდა, როცა ნანგრევებთან იხილავდა

გადაჯიშებულ ვაზს, — ველურ კრიკინას, ზოგჯერ მხარს რომ ძლივს შემოატევი.

შინგანსწავლული აზნაური ჩორეჯი უშვილუძირო იყო.

შავი გურანა თითქმის ძალით შერთეს, რომ გვარი არ ამოვარდნილიყო. უსწავლელი იყო გურანა, ძლივს იცოდა ყვავისფრჩხილოვანი წერა.

უმეცარმა და უწყინარმა პატარძალმა გურანამ მალე გამოაჩინა მიმალული ჭანგები. ტყე-ღრეში მოსიარულე ჩორეჯს უსათუძვლო ეჭვებით სტანჯავდა, საყვარელთან პაემანზე ხომ არ დადის ტყეშიო! ბევრი დღე უსამართლოდ გაუმწარებია ჩორეჯისათვის, მაგრამ რომელ ქმარს არ გადაჰხედია „ესე ამბავი“ მგრძნობიარე ცოლისაგან?

ჩორეჯმა ძილში ლაპარაკი იცოდა, და პირველ ხანებში აღქატი გურანა ჩუმად ხაშხაშს აპარებდა, აძინებდა და მთელი ღამეობით სულ თავთ ეჯდა ქმარს, ეგებ საყვარლის სახელი, ანუ საქმე წამოსცდესო! გაფაციცებით ეჭირა გულისყური! გათენებამდე ფხიზელსა და ღამენათევს, მხოლოდ დილით ჩაეძინებოდა. ასე ნებაყოფლობით იწამებდა თავს ბედკრული ქსანტიპა, ახალმა სოკრატემ კი არაფერი იცოდა.

რა უნდა წამოსცდენოდა ხეტსა და ოლოლოს თუ არა — ნადარბაზევი, ნაპალატევი, ნაქალაქარი, ნაკოშკარი, ნარუჯები, ნაოხრები, ნალეწები... ბევრი ღამე უთია მძვინვარე ცოლმა მშვიდად მძინარე ქმარს და ბოლოს მიაწება თავი. ახლა კი ჩორეჯს. გინდაც ათი საყვარელი მოეყვანა, სულაც აღარ ენალვლებოდა გურანას. ერთი კი სჭირდა, საღამოობით, ნაშთების ძიებიდან დაღლილი, ტყე-ღრეში ნახეტიალეები ჩორეჯი შინ რომ დაბრუნდებოდა, გურანა უსათუოდ ცეცხლზე წყალს და-

ასხამდა, ეგონა, ძველ კოშკებიდან, ეკლესიებიდან, აკლამებიდან ჩორებს უსათუოდ ქაჯები, ეშმაკები და ავი სულელები მოჰყვებიანო და შემოყოლილ ეშმაკებს ოხშივარი გარეკსო ახლა იმათ ებრძოდა გამწარებული, ქმარი არ მიმიხიბლონო, არ წამართვანო! აი, ასეთი თანამოაზრე მეგობარი ჰყავდა საბრალო ჩორებს...

ერთხელ, ნაქალაქარის ტყის ნატაძრალიდან ძველი ხატი ჩამოიტანა. ზედ გამოსახული იყო წმ. გიორგი, ხუტუჭთმიანი, ალისფერ ტანისამოსში, თავზე ჩაჩქანი უელავდა, ხელთ შუბი და ფარი ეყრა. ძირს, წმიდანის ფერხთა ქვეშე ხმლით დასისხლული, კბილებდარქენილი ვეშაპი გართხმულიყო.

— ერთხელ ვეშაპი დაამარცხა, ახლა კი წვიმის წვეთებს დაუჯაბნიათ! — შეწუხებული ხმით მეტყოდა ჩორები წმიდანზე და თან დასძენდა:

— ნაწვეთს უდენია ზედ ხატზე! ეპ, რამდენი ძველი დახატულება იღუპება. წვეთი რო დასდით, თვითეული წვეთი მე გულს მიდარავს; გულს მიხვრეტს, დამეებით არ მეძინება, ტანჯვაში ვარ, გამოუთქმელ ტანჯვაში! იღუპებიან ჩვენი სიძველეები ყოველწამიერ, შეიძლება ჩემს სიცოცხლეში სულაც წაიშალონ იღუპება, ჩემს თვალწინ იღუპება! — გმინავდა ჩორები, გულთ ეყრებოდა და წამალი ვერსით ეპოვნა.

— რათ გინდა დაობებული ხატები? — შეკრებილებაში შეეკითხა ახალგაზრდა კნეინა. სჯობდა კი, რომ არ ეთქვა, ისე მრისხანედ შეჰხედა ჩორებსმა.

მასხოვს, იმავე შეყრილობაში ამბობდა გულმობრუნებული ჩორები:

— ვენაცვალე საქართველოს! რა მომცემი მიწაა! რძეც

წასდის და თაფლიც! ჩვენი ბუნება ერთი ხელით ოქროსა ჰყრის, მეორეთი—ვერცხლს! ლალიანი მიწაა, მაგრამ თვითონ ჩვენ, ქართველობა, რათა ვართ გადამწირული?

ჩვენი ქვეყნის ეკონომიური ვითარებაც აფიქრებდა წანწალოსანს. ამიტომაც, ძველი ნაშთების გარდა, ხეტიალის დროს დეღეებსა და ხევებში მადნებსაც ეძებდა. დიდი სისათუთით ჰქონდა პარკებში შენახული ოქრონარევი ქვიშა, მომბზინავი რიყის ქვები და სხვა მინერალები, როგორც დიდი მადნების ნიშნები და დიდ იმედებსაც ამყარებდნენ მათზე, — მომავალი მოდგმისათვის.

ნაღვლიანი ჩორეხი მთლად იმედიანი გახდა მას მერე, რაც ერთხელ, ნანახი სიზმრის შემდეგ, უცნაური ქვა აღმოაჩინა საჩვენოში. უჯარმის ნანგრევებში, სწორედ იმ ადგილას, სადაც სიზმარში ეჩვენა, ქვემო კოშკის ლიბოში.

მეც თვითონ მსმენია ხალხში, რომ უჯარმის მფლობელი ვახტანგ გორგასალი ხელთ ოქროს ბურთს ათამაშებდაო.

აი, ამ ბურთად მიიჩნია ოცნებით მთვრალმა ჩორეხმა ეს მართლა ბურთივით მრგვალი ქვა, სხივნარა, ოქროს ზოდით მომბზინვარე. ზედმიწევნით სჯეროდა ჩორეხს, რომ სწორედ ის ოქროს ბურთია, გორგასალი რომ ხელთ ათამაშებდაო! რაკი სიზმარმა უთხრა, რომ ეს ქვა კარგი ნიშანიაო, ჩორეხმა დიდი იმედების ნიშნად, პირდაპირ ეროვნების სამლოცველოდ გაიხადა ეს ქვა. ზან უჩოქებდა, ზან ემთხვეოდა, ზან გულში იკრავდა. მართლაც, სწორედ აგზნებულ ქადაგს ჰგავდა შაშინ ჩვენი ჩორეხი!

სულ გამოიცვალა, რაც მოიპოვა ელვასავით გამომ-

კრთალი, ბრწყინვალეობით აელვებული ქვა; მას ეგონა, ქვის ოქროს კრთომა თავისუფლების ღვთის კრთომა იყო. არც ერთ მპყრობელს არ ჰქონდა ამქვეყნად ასე დანივთებული სიმდიდრე, როგორც მეოცნებე ჩორეხს.

— ნეტავ, სადმე კიდევ იმეჭონება ასეთი განძი და შესამკობელი? — იტყოდა გულში სახემტკბარი.

ახლა კი ეშველა საქართველოს! გულში გალობა და ზატიკობა უნდოდა...

ეს ყოველივე მისი ფიცხელი ოცნების ნაგონარი იყო და მეტი არაფერი! ჩორეხს ნამდვილ ეგონა, რომ ეს პატარა ქვა უცილოდ ზეგარდმო ნიშანი იყო სიკეთისა.

ბოლოს იხმო მღვდელი, დიდი საიდუმლოებით სახარების ფიცით გაენდო, ქვაც უჩვენა, თუმცა ხელი არ ახლებინა, როგორც სიწმინდეს, და ფიცის ჩამორთმევის შემდეგ დაავედრა, წმიდა ქვა ტრაპეზში დაეკრძალა, მთავრობისაგან ფარულად, შთამომავლობისათვის გადასაცემად. მხოლოდ წელიწადში ერთხელ უნდა ეხილა ეს ქვა თვით ჩორეხს, — სახელდობრ, აღდგომა დამეს, ლიტანიის შემდეგ.

გორგასალის ქვა დაგულისგულებული ჰქონდა ჩორეხს, — მისი ღარდების მოსაფონარი.

ახლა ქართლოსის საფლავი და ქართლოსის ძეგლის ოქროს თავი აიჟინა.

— უნდა ვიპოვოთო!

— წმიდა ნინოს ლოცვით, სეტყვამ არმაზი კი არ დაამსხვრია, არამედ ქართლოსის ოქროს ძეგლი! ქართლოსს ოქროს თავი ჰქონდა გამოქანდაკებულნი, ბრწყინვალე! სეტყვის

და ქარიშხლის მერე ის თავი იქვე, ხეებში ჩაგორებულა, იქ უნდა ვეძიოთ, იქ არის სადღაც ჩამარხული, უნდა ვიპოვოთ და ისევ იქ დავდგათ ქართლოსის ძეგლი, საღაც უწინ იდგა!

მსმენელები იღიმებოდნენ — მოზღაპრე გახდაო!

ჩორეხი კი შეუპოვრად მისდევდა თავის ოცნებას. ვიდრე, ერთხელ, ჩვენდა საოცრად, სრულიად არ გამოიცვალა, რაღაც დარღმა მოიქვეშია, მაგრამ ვინ იყო მისი ახალი დარღის თანამხილველი?

ოდესღაც მტკიცე და ლალი, ახლა რაღაც შესეტყვილი, მოღვედილი გეგონებოდათ.

რა დაემართა, რა ჩაქრა ჩორეხის გულში ან საიდან გაჩნდა ამ კაცის გულში ნაცარი? რა სევდის ზღვა შემოადგა გულზე? ვერავინ ვერა სთქვა! იყო სიტყვების გადაკოწიწება, ნართაული სიტყვები ჭორელებისა, ფარული გაღიმებაც, მაგრამ კვანძი ვერ გაიხსნა, ვერა და ვერა!

— რა მოხდა? — საიდუმლო მერე ძლივს შევიტყვეთ, როცა მოვისმინეთ ჩორეხის აფოთებული ლაპარაკი. წირვის შემდეგ ვეება ცაცხვთან, ცეცხლმოკიდებული შეეძგერა ზირაქ მღვდელს, პირში წყრომის ალი ამოსდიოდა.

— ქვა მოუპარიათ, გორგასალის ქვა! მოიპარა მღვდელმა, რათა დაწინაურებულიყო მთავრობაში, ანგარმა, უძველეს ტაძარში ძველიდანვე დახიზნული ნივთეული, ხელნაწერები, საძნე ურპით ჩაუტანა თბილისში რუს ექსარხოსს, ზედ გორგასალის ქვაც მიაყოლა ტრაპეზში ჩამალული!

— ერის ქვა! ინდოეთიდან მოტანილი!

— რა პასუხს გასცემ ერს, შე უკეთურო, შენ ხომ გასძარცვე ქართველი ერი! მზეზე გაშავდა შენი სახელი! დაილუპა

დიდი განძი, გორგასალის ქვა! საოცარი, იმედის ქვა, რომელსაც სითბოცა ჰქონდა, ცეცხლივით შუქსაც იძლეოდა. განა ოქროს სჯობდა? უოქროესი ქვა იყო, წმიდა ქვა, დალოცვილი, შელოცვილი. გორგასალის ხელით! — ჩორეხმა ხომ მღვდელს ჩააბარა შესანახად, ვიდრე „მამულის გამოხსნის დღე“ დადგებოდა.

ახლა კი....

გულაზავთებული, გულდამსხვრეული, ცეცხლმოკიდებული ეძგერა მღვდელს:

— რა უყავ ჩემი დიდებული ქვა — საქართველოს სიმტკიცე, წმიდა ქვა! ფესვი მოათაღე ჩვენს სიმაგრეს და მტერს მიართვი, შენივე ხელით ჩააბარე! — მღვდელს კი არაფერი ესმოდა, — რა გესაწყენარა? — ჰკითხავდა მღვდელი.

— და ნუთუ არ იცი, რა მნიშვნელობა ჰქონდა გორგასალის ქვას ანუ ვინ იყო გორგასალი? — შე ღვთის გარეგანო, ურჯულო, უკეთურო, მწარედ ცოდვილო, გაქსუებულო, საქართველოს დამშლულო, დამაქცეველო! ჩემი ცოდვის პასუხი შენ გაეცი! — თითქმის თავზე ნაცარი გადაიყარა...

ზირაქ მღვდელი გაშტერებული იყურებოდა; სად ჰქონდა შესაქციელი, შესაგებარი სიტყვა? მას ჩორეხის რისხვისა არც ეშინოდა, მხოლოდ ენანებოდა, რომ სცდებოდა, საქმეზე მიმავალს უგვიანდებოდა და ჩორეხის პატივისცემით იღგა მის წინაშე, მეტი არაფერი!

მაღალი, ქერა, აწითლებული, ამოგანგლული, მუდამ ანაფორაშემოკეცილი, სოფლის ამოებაში გართული ქვრივი ზირაქ მღვდელი, მეტად მიწიერი ადამიანი იყო, თუმცა სულის მხედრობას ეკუთვნოდა. მას წირვა-ლოცვისათვის არ ეცალა,

ერთგულად მუშაობდა თავის საოჯახო საქმეებზე და სხვასაც ამუშაებდა თავის გასამდიდრებლად.

სად ეცალა გორგასალის ქვისათვის? — ჰყავდა მოჯამაგირეები, მწყემსები, მეღორეები, მეჯოგეები. ჰქონდა საკუთარი წისქვილი, ჰყავდა ცხვრისა და ღორის ფარები, ვაჭრობდა ტყით, ჯონჯოლით, თაფლით, სანთლით, პურიით, ღვინით, სინდისით; ჰქონდა საკუთარი ეტლი ანუ „დილიჯანი“, თბილისში რომ დაჰყავდა მგზაურები, ჩუმად ჰხდიდა არაყს და ფულს ასესხებდა დიდი სარგებლით, ჰყავდა საყვარლები და ჩუმჩუმადვე კიდევ მაჭანკლობდა.

აბა, ასეთ მოუცლელ კაცს. სად ეცალა გორგასალის ქვაზე საოცნებოდ?

დიდი და პატარა მღვდელს ემორჩილებოდა სოფელში. უიმისოდ არც ერთი საქმე არ ისკვნებოდა: არცა მამულის სყიდვა-გასყიდვა, არც საძირკველის ჩაყრა და მით უფრო, არც ქორწილ-ძეობა-ნათლობა, სახლის განათვლა, სიკვდილი, საღვთო და საერო საქმე, სულისა თუ ხორცისა!

ყოველივე და ყოველიფერი ზირაქ მღვდელს უნდა დაელოცნა.

მრავალი ქორწილი ჩაშლილა მხოლოდ მისთვის, რომ მღვდელს სასიძო ან საპატარძლო არ მოსწონებია. მრავალი გონჯი ქალი გათხოვილა კობხტად შეღერებულ ბიჭზე და მრავალი უსახური, მაგრამ შეძლებული ვაჟი, მღვდლის იმედით, ლამაზი ქალის პატრონი ხდებოდა! ამ ნიადაგზე მღვდელს მრავალი მომღურავიც ჰყავდა სოფლის მზეთუნახავებში! მაგრამ ვინ შეაბამდა „სულქონიან“ კატას ექვანს?

ხშირად, ქრთამაღებული მღვდელი ასე ლოცავდა შებერებულ, შემკვნარ პატარძალს: „გამრავლოთ, ვითარცა აბრამ და სარა, ვითარცა იაკობ და რახილი“-ო!

არ უყვარდა მღვდელს ბერწი, უშვილო, უნაშენო ხალხი, რომელთა საგულისხმოდ წამოიტყოდა ფსალმუნიდან: „ნეტარ არს კაცი, ვითარცა ხე დანერგილი, თანაწარსადინელსა წყალთასა, რომელმან გამოსცის ნაყოფი მისი ჟამსა თვისსა და ფურცელნი მისნი არ დასცივიენ“!

აივანის დაპირისპირებით, ეზოს ყურეში, შემოწნული იყო საქონლის ბაკი, იქ მღვდლის საქონელი ება. ბაკი სავსე იყო ნეხვითა და ყვითელი, ჩაგუბებული წუმპით. შებინდებისას დაეყრებოდნენ ნახირიდან მობრუნებული კამეჩები, ხარები, ძროხები, განარებული შავი ბულა. ისმოდა თქერა, დგრიალი, ხენეშა. ქვრივი მღვდელი იჯდა აივანზე, სვამდა ჩაის და თან პურისმცხობელ მარინეს ეაშიკებოდა.

აბა, მითხარით, სად ეცალა ზირაქ მღვდელს გორგასალის ქვისათვის?

გავიდა დრო, მღვდელმა არ აპატია და ჩორეხი დაასმინა. გაფითრებული ჩორეხი ჩუმად იდგა განრისხებულ ექსარხო-სის წინაშე, როგორც მთაწარის წინააღმდეგ დასმენილი ჰეამბოხე. ჩორეხს ხმაც არ ამოუღია... ციხეში ჩასვეს, რამდენიმე თვის შემდეგ გამოუშვეს, რადგან ხელმოსაკიდი ვერა უპოვნეს რა.

დაბრუნდა შინ ჩორეხი, მოტეხილი, მობერებული, მომჩვარული. თითქმის არავის არ სცემდა ხმას. მხოლოდ ჩიოდა, იმდენად ციხემ არ მომტეხა, რამდენადაც ქართველი კაცის ღალატმაო! მას ვერ წარმოედგინა ზირაქ მღვდლის საქციელი

ამიტომ ცხოვრებაზე ხელჩაქნეულა დადიოდა... ბოლოს ლოგინში ჩაწვა. სულის დროშა დაკეცა... ჩუმად დნებოდა, ჩაწვა, ჩაიმუშლა. ვერ შეებრძოლა უცნაურ სენს, არც უნდოდა...

შემოდგომის წვიმიან ღღეს სოფლის დუქანში რამდენიმე კაცი „შესანდობარს“ სვამდა.

— რას წვალობდა, წანწალობდა ამდენს საწყალი?

— რა წაიღო, არაფერი! — სტქვა აზნაურმა დოლამ და თვალი შემოატარა სავესე სუფრას და კიდევ დასძინა:

— პურის მადღმა, არაფერი!

— რა უნდა წავიღოთ წუთისოფლიდან?

— არაფერი თქვენმა დღეგრძელობამ! — დაიძახა ძველი-ფამ.

— არაფერი! მამი თქვენის მზემ, არაფერი! — სტქვა კაპლომ და კვერი დაუკრა წვერიკმაზიამ.

— მაშ, დავლიოთ, — და აზნაურმა დოლამ დიდი ჯამი გაავსო ღვინით და ჩამოარიგა: — ღმერთმა შეიწყალოს ჩორეხი და სულით გაანათლოს!

— რა უნდოდა საწყალ ჩორეხს, არც ჩვენ გვიღებდა თავს! მთელი სიცოცხლე ნანგრევებსა და ხაზინის ძიებაში გაატარა! ეცხოვრა, ჩვენსავით ღვინო მაინც ესვა, არ ერჩივნა? ღმერთო, შეუნდე!

— ეჰ, იაროს ირმის ნატერფალზე, ახლა იქ ეძებოს ქარიფანტიამ ხაზინები, თამარ დედოფლის ნაქოშარი! — და ჩორეხი გულით შეიწყალეს, თუმცა ორიოდე შხამური სიტყვაც დაადევნეს...

ზირაქ მღვდელმა დამარხა. სიტყვაც კი შეაწია.

— უსყიდი კაცი იყო, გარდაუწვეველი მოსამართლეო, თუმცა ფიცხი და ექვიანიო მშვიდობის ანგელოზმა დაამშვიდოსო იმქვეყნად! მადლი და მშვიდობა ვუსურვოთ ჩორების სულსაო, თუ რაც უსჯულოებანი და ცოდვანი ჰქონია, მაღალმა ღმერთმა აპატიოსო! — ეს იყო და ეს!

სოფელი არ შეძრულა... კუბოს გარშემო არ ისმოდა საღმობა, სულთქმა-მწუხარება... თმები არავის გაუწეწია... პირი არავის არ ჩამოუხოკია სისხლიანი თითებით. დასაკლისი ვერ გაიგეს. გურანა დაღვრემილი იდგა — ამდენი ჰირღებულება გამოვიარეთ ერთად, ახლა მარტოს რადა მტოვებო!

ანდერძის მიხედვით, ჩორებმა კოტმანის წმიდა გიორგის სამრეკლოს ქვეშ დაიმკვიდრა საფლავი.

ასე წავიდა ამ სოფლიდან კეთილი, თუმცა ძველმანი ადამიანი, დახავსებული თვალებით, დაღამებული გუნების კაცი, რომელიც მხოლოდ წარსულის ღამეში ცხოვრობდა, რადგან არ ჰქონდა აწმყოს მხედობა; იყო ცალმაგი, ერთმაგად ნაქსოვი ადამიანი, ერთის თვალით მხედავი!

— ახლა შენ გაიხარე, ჩორების მემკვიდრევი!

— ჩორების ნებაწადილობით შენ დაგრჩა მისი მამული — სახლი, კარი, მთა-ბარი, წისქვილი, ვენახი, სახნავი, სათიბი, მარანი, ბალი, კალო, საბძელი, კარ-მიდამო, — მიჰმართა დიდი ჯამით წვერიკმაზიამ ახალმოზარდ ოფიცერს — მამრიკა ჩაღლაღაძეს — გურანას ძმისწულს, — ჩორების კეთილი სახსოვარი, შენ — კარგად ყოფნის სიხარული! შენ იცი, დღეიდან, როგორ კარგი მეზობელი გვეყოლებიო!

მამრიკა იღიმებოდა, თითონაც არ იყო ჯერ გამორკვეული, რომ ასე უცბად ხელთ ჩაუვარდა ამოდენა მამული, და დაბნეულიყო.

— ტომბახი ჩამოგვისხი, შენც მოილხინე, ხუმრობა ხომ არ არის ამოდენი მამული მოიგდე ხელთაო! — მიმართავდნენ ღვინის ნათლულები და მამრიკაც უხვად იხარჯებოდა მიცვლილი ჩორეხის ხარჯზე...



მთელი სიცოცხლე ჩორეხმა ვახუშტის შესწავლასა და სიყვარულში გაატარა! რამდენი ღამე დასთენებია ზედ, ვახუშტის გამო, რამდენი წყრომა გაუგონია ცოლისგან! ისე მოკვდა ჩორეხი, რომ ცოლმა ვერ შეიტყო, ვინ იყო ვახუშტი, ან რა ფასი ჰქონდა მისს ნაღვაწს.

ჩორეხის სიკვდილის შემდეგ გურანამ მოკრიფა მისი მონაპოვარი თუ შენაძენი ძველი, არქეოლოგიური ნივთები: ქოთნები, სურები, მძივები, სამაჯურები, ჟანგშეჭმული ხანჯლები, მახვილები, მათთან ერთად სამადნე პარკები და მთლად გადაყარა, — „ნასაფლავარიაო!“ — ეზიზღებოდა, ეშინოდა. გოგონებმაც კი არ წაიკარეს მისაჩუქრებული ნამკვდრევი მძივები.

ხოლო ვახუშტის წიგნები, თვითონ ჩორეხის ნაწერები და წერილები გურანამ ხელიერთპირწმინდად გასახვევ ქალაქად მიჰყიდა ისაკა ებრაელს. დარჩა მხოლოდ ვახუშტის სურათი, თვით ჩორეხის მიერ ფერადი საღებავით დახატული.

გურანამ სცადა სურათის გაყიდვაც, მაგრამ არავინ იყიდა, როგორც იყო, ჩარჩო გაასაღა, მაშინ გაძარცული სურათი გატეხილი მინის მაგიერ ჩასვა სარკმელში!

ჭუჭყიან ფანჯრიდან სევდიანად იყურებოდა დაღვრემილი ბატონიშვილი ვახუშტი... თითქოს ჩორეხის დაკარგვასა და თავისს ბედს დასტიროდა გურანას ხელში!

გურანას კი უკვირდა, რომ მისი მეუღლისაგან არავითარი საქმე და დოვლათი არ დარჩა. მართლაც, — აბა, რას უჯდა მისი კაცი მთელი სიცოცხლე?

ამ წიგნების იქით, ამ ძველმანების გადაღმა, გურანას კიდევ რაღაც „დიდი“ ეგულვებოდა და ეს „რაღაცა“ რომ ვერ აღმოაჩინა, რომ მას ხელი ვერ შეახო, — ეს ძალზე უკვირდა...



აღარ არი ჩორეხი — სამშობლოს ბედით მუდამ მკმუნვარე, ჭირნანახი, სევდით გულდაღამებული, მხოლოდ წარსულის ტრფიალი, კეთილშობილი, თუმც უღვაწი კაცი, მაინც დიდი მოწადინე და სევდით ნაჯაფარი...

გულჭირიანს და ფესვმოკვეთილს, ღრმა ძილით სძინავს თავისს შავ სევდასთან ერთად...

მის გარშემო აღარ ტრიალებს ეჭვები და ჭორები.

რატომღაც მგონია, რომ ჩორეხი არ არის მკვდარი; და რომ სადღაც, შავს ტყეში თუ ძველ ნანგრევში არის შეხიზნული! თითქოს მისი ხმაც კი მომესმის მკაფიოდ; ხან ბინდი-

სას, ვხედავ შარაგზაზე აჩქარებიდ მიმავალს, თმადაბურღულს, აქეთ-იქით თვალის მაძგერებელს.

და ისევ ისე წრიალებს ჩემს ფიქრებში წარსულზე, — პირაკვამლებული, ჩანაცრული, მწირი ჩორეხი, სამშობლოს დარდით მოავადე.

ვერ მოესწრო ნასურვილარის გაცხადება, ვერ იხილა სამშობლო გაცისკროვნებული; არ ეღირსა თავისი ქვეყნისა და ხალხის კარგადყოფნის სიხარული...

და მე მიყვარს მისი სულის ჭალარა ყვაველი...



ნ ი შ ა რ ძ ე უ ლ ი ს ნ ყ ა ლ ი

როდესაც რომელიმე კრებას თუ საქმიან თათბირს ვესწრები ხოლმე და ფიცხი ორატორების გამოსვლას ყურს ვუგდებ, მაშინვე ჩვენი ფორე მომაგონდება!

ფორე! გუგულიანი საათი რომ გამოიწერა ვარშაეიდან ნათლად მახსოვს ის დღე, როცა მან ჩემი დასწრებით ამანათი გახსნა და ყუთიდან ამოღებულმა საათმა ფორეს ხელშივე „გუგუ“ დაიძახა!

ფორე! რომელმაც 1910 წელს, ლევ ტოლსტოის სიკვდილზე სთქვა, რუსეთის მზე მოკვდა, მე რომ ფული მქონდეს, მთელ რუსეთს შავებს ჩავაცმევდიო!

ფორემ, პირველმა სოფელში, სამკალი მანქანა შემოიტანა, მთელი სოფელი ზედ დაეცა გაკვირვებული. ალბათ ასე ალტაცებული იყო ადამიანი, როდესაც პირველად წყლის წისქვილი გამოიგონეს და მძიმე ხელსაფქვაების ბრუნვისაგან გაანთავისუფლა მონა ქალები.

ეს ის ფორეა — ქრისტეფორე თამარიძე, რომლის ოთახის კედლებზე ეკიდა რუსთაველის, შექსპირის, სპენსერის, ოუენის სურათები. გორის საოსტატო სემინარია ჰქონდა გათავებული, მაშ, რა გეგონათ!

სწორედ ის ფორეა, რომელმაც მღვდელს შენიშვნაზე, — რათა სკამ მარხვას, სულს გაუფრთხილდიო, უპასუხა: მეც იმიტომ ვკამ, ცოცხალი ფერზე დავრჩე, სული არ დამემშესო! რით იყო სახელდებული ფორე?

იგი იყო დაუღალავი წყლისთვის მებრძოლი, მეცადინე წყლის ჩაყვანისა თავის უწყლო სოფელში!
აქედან დაიწყო მისი გასახელება!

ქვეშარიტად საყვარელი იყო ფორე, წყლის ტრფიალი, წყლის სიყვარულით გაშმაგებული! მთელი სიცოცხლე მეცადინეობდა, რათა მრავალქაფა ნიშარძეულის წყალი ჩვენს სოფელში ჩამოეყვანა.

სოფელში ფორეს სახელქება ისმოდა, მაგრამ არავინ არ ეხმარებოდა, მხოლოდ ორიოდ მეზობელი ტკბილი სიტყვით აქეზებდა ამ წმინდა საქმეზე! გაწყალბებულ პატარა სოფელს, სიღარიბის ბურტყლი რომ ასდიოდა, რა დახმარების გაწევა შეეძლო მეოცნებისთვის? ვინ გამოიღებდა ხელს? არავინ! ამიტომაც შერჩნენ ერთმანეთს მარტონი, — ოცნება და ფორე, ფორე და სოფელი!

თითქმის ყოველ კვირას ნიშარძელში ადიოდა ფორე, იქ ჩანჩქრის ჩქროს ესაუბრებოდა, ესაყვარლებოდა, ელაციცებოდა. მართლაც და, უპაემნო რა კაცია? უმიჯნურო სიარული რა ცხოვრებაა!

წყლის მხურვალე მაძიებელსა და გამომძიებელს გახრიოკებულ სოფელში შემრგო, სუბუქი, გემრიელი და იაფი წყალი შემოჰყავდა! რა იყო ამაზე კეთილშობილური საქმე? და აი, ზრუნვაში გართული ფორე ძიობდა წყლებს ჩვენი მიდამოების ტყესა თუ ღრეში. ჰსინჯავდა წყაროებს, ნაკადულებს, წყაროსთვალს, კოდას, ხევებს, სჩხრეკდა მათ სათავეებს, — სათაურებს, უსინჯავდა ფესვებს, ნიადაგს, ეძებდა მოკლე სადენ-გზებს, გეზებს, ჰსახავდა გეგმებს, ჰხაზავდა მიმართულებას; დღემუდამ ჩოთქი ეჭირა ხელში, წყლის გამოსაყვან ხარჯთაღრიცხვას ანგარიშობდა; კიდევ კაპიკებს სწურავდა, მომჭირნებოდა.

ფორეს ჰნახავდით ტყის შეუვალ ტევრში, კლდის რქაზე, უძირო ხევებში, ჩამორიყულ ხევწვრილებში, ჭალებში, მწვერვალებზე.

ოცნების მიმდევარი, ხალხისათვის ბედნიერების მაძებარი, ხელში წერაქვით, ქაფჩით, რალაც შინგაკეთებული საზომებით, მუდამ საწვიმარგადაცმული; გახუნებული ქუდით, ტალახიანი, მტვრიანი ფეხსაცმელებით, შეჭალარავებული, შუბლდანაოჭებული, სევდიანი, საქმიანი, მზისაგან ამწვარი, გარუჯული, სიცოცხლის აღმურადენილი, ზეშთაგონებული! აი, ფორეს მაშინდელი სურათი!

გაზაფხულდა, მწვანე ნერგი აყვავდა...

აპრილის ბალახი ნიავეზე სივსივებდა. ვენახის დედოფალი — ატამი ყვავილით ბრწყინვალეობდა.

თაფლატყეში, შხეფით სოველ კლდეზე იდგა ფორე და ნიშარძელის ჩანჩქრის სამყვირალო ხმას ისმენდა. თითქოს ჯიხვების ჯახანი ისმისო. უყურებდა პიტალოზე აღმასგადმოფანტულ ჩანჩქერს.

და თითქოს გულში შესძახოდა:

— მე დაგიმორჩილებ! მე შენზე ღონიერი ვარ!

მთაში ნაშობი თეთრ-ლურჯი ქაფი, თითქოს რძის ათასი აუზი გადმოსჩქეფსო გრიალით, ჩადიოდა ჩახევებულ ღრანტეკლდეებში და მერე ჯურღმულებში იკარგებოდა.

ბროლით ამტვერებული გარდმოსაქანელი, შვიდ-წალიკად ჩამოდიოდა. მთების ძუძუს წყარო პიტალოზე შეხვდა და ბუნგალს იტყორცნებოდა...

უყურებდა სიხარულით მოჩქმული ფორე წყლის მჩქეფარებას, კაშკაშს და ჩანჩქერის სიფიცხე მის სულს ემატებოდა. ფორე წყალს დაშტერებოდა, თითქოს ცხენთა ჯოგი დგრაალეებსო, და ფორეს უნდა ქამანდი ესროლოს, რომ ეს ათასობით თეთრი ქურანი გააბასო.

სანახაობამ დაბანგა...

— ჰეიდა, გულს აღარ უნდოდა შემოცდა! პირდაპირ ჰსურდა, ახლავე შესდგომოდა მდინარის დაურეებას; მოცდა, მოსაათება ეძნელებოდა...

— ჩაიყვანე სოფელში და გააძღე წყლით მიწა!

ჩანჩქერი კი... იფრქვეოდა და კლდე იწველებოდა, როგორც სიმამღრის ძუძუ და ვერცხლის ღვარს მოჰქონდა ლოდნარი, ქვაყრილი, ძელყორე...

უსაღვთოესი, მყოფადი ოცნება ახლა თითქოს ხორციელდებოდა. ფორეს გონებაში ამ წყალს სოფლის ვენახებსა და ხოდაბუნებში ჰხედავდა უკვე. ორივე ხელი გაეშალა და არ ვიცი, მღეროდა, თუ ჩანჩქერს შესძახოდა:

— მე დაგიმორჩილებ, დაგიურვებ, მე ხომ შენზე ღონიერი ვარ!

ჩანჩქერი, რომ იტყვიან, ღმერთში აღიოდა შეუწონელი ძალით.

რაღა უნდა ენახა ფორეს — დასიცხულ, დაგვალულ სოფლის შვილს, ამაზე უსანატრესი, უტკბესი?

— იცი, რა არი ნიშარძეული?

— ოქროს ჯიღა!

ზემო მთებიდან მომავალი გლეხი წაადგა ფორეს კონცხზე მდგომარეს, ნეტარების ბურანში დაბანგულს, მოხატრე გლეხმა გაუბედავად შეახო ხელი:

— მოგწონს?

— განა რომ საყვარელია? — უპასუხა ფორემ.

— როდის გახდება ჩვენი ნიშარძეული? — შეეკითხა გლეხი ჩანჩქერს.

— ხვალ! — მტკიცედ უთხრა ფორემ.

ეს იყო დიდი ხნის წინათ...

კაი სახელებია: ვარდისოფელი, ვარდიგორა, ოქრობაგეთი, ოქროწყარო, მაგრამ ჩემი სოფელი მუხათწყარო მეკერძებოდა: თუმცა აღარც მუხა იდგა, აღარც წყარო მჩქეფარებდა. სიპოხეგამოწოვილი მიწა თვალცემულივით ბერწობდა.

— მოხრეკილი ხევი, მშრალხევი, გოხნარი, ნაწყაროვალი, ნატბეურა, ნარუალი, ნაჭაღევი — ასეთი სახელები ერქვა ჩვენი სოფლის მიდამოებს და აქედანაც კი ჩანდა უწყლოობა, თვალის რომ არ გადაგვევლოთ უხეტყეო, მაგრამ ოდესღაც ნატყევეარი მიდამოებისთვის.

ბავშვებს არასდროს არ ენახათ არც ჩანჩქერი, არც ჩახრილა, არც შადრევანი, არც უხვი წყლით გახარებული ბაღნარი, არც მტვენის ძუძუ, არც მზის ყანა!

ბავშვობიდანვე ებრძოდნენ მეზობლები გვალვას, სიცხესა და მტვერს, შესთხოვდნენ კმასაყოფელ წყალს, წვიმის მომცემელ ლაზარეს — ქვეყნის ნაყოფით გამომზრდელს და ცხოვრობდნენ ნაკლულად, მწყურვალედ!

ეჰ, რა უსაწყურვილესი იყო სოფელი! ოჰ, რა ბრეს აღენდა ხორშაკი ქარი! სოფელი მტვერში ეხვეოდა; რასაც დასთესდნენ ბოსტანში, თიბათვის დამდეგ აიფშრუკებოდა, მკათათვეში ამტვერდებოდა.

— რაღადა სთესო? — შევეკითხებოდი სოფლის დედაკაცებს.

— მაშ, რა ვქნათ, სოფელს ხომ არ გავაციებთ, სირცხვილია!

ერთადერთი ნუგეში წვიმაღა იყო, თუ ავდრიანი გაზაფხულ-ზაფხული იქნებოდა, ჩვენი ბოსტნებიც დაღანებდნენ, ხეხილიც მხიარულობდა. ვაი, რომ უფრო გვალვა იცოდა ჩვენს მხარეში! გაქვავებული ნახეთქი, უხალისო, გამშრალი მიწა, აბუზული ხეები სევდიან სიჩუმეს გამოსცემდნენ. სოფელს

თვალეები ცაზე ყურებით სტკიოდა შავ ღრუბლის ცვარის მოლოდინში!

ჰხედავდა ფორე სოფლის არემარეს, ამპირ-იმპირ გადამწირულს, გადაბუგულს. წარღვნის წყალი არ ეყოფა ამ ნამშრალ მიწას! იტყოდა გულში:

— ახ, ბედი გაიხსნებოდეს! ახ, შეიმარეშოს აქ წყალმა მაღინარმა!

ბოლო ხნის გვალვების გამო, სოფელში რაც წყაროები იყო, ან დაშრნენ, ან დამოკლდნენ. ჩვენი უბნის წყაროს ნაწრეტი წყალიც ნეკის სისხოდლა მოღანცალებდა. აღარ ისმოდა მისი ცქაფი ჩქრიალი, ყრმობისას რომ სიმღერასავით მომესმოდა.

წყაროს თავზე მდგარი ნაგალი ხეც ჩათუთქულიყო, დაღობული ტოტები ჩამოეყარა: უხალისო ფოთლები სევდიანად შრიალებდნენ.

— ახ, ერთი მენახა ჩემი სოფლის მიწა გასველებული! წყალგამჯდარი! ჰყანტი იდგეს, ბეანტალი ნიადაგი მენახოს! და როცა ხალხზე ზრუნვას უქებდნენ,—ბარაქალა, ფორე!

— რა დროს ეგ არი? — შეაწყვეტინებდა გაღიმებული. — წყალი გამომაცვანინეთ თქვე უღმერთოებო, დამეხმარეთ, მიშველეთ!

...და ისევ უღრან ტყეში, სოფლიდან დიდად მოშორებით გადმომჩქეფარე წყალს ჰზვერავდა, ზვირთებს უთვლიდა შინ, კი ისევ ანგარიშობდა, ჰხაზავდა, დაფიქრებული ჩაჰყურებდა ნახაზსა და ციფრებს. ჯიქურად წინ დასდგომოდა პირდაპირ შეუძლებელ საქმეს, წამიერად კიდევაც ხედავდა სოფელში

ჩამოყვანილ წყალს და იმ წუთას იგი ახალგაზრდებოდა, ცმუ-
კავდა, კიდევაც ღიღინებდა.

თუ ჩვენს კუთხეში შემთხვევით ინჟინერი ან ტექნიკოსი
მოხვდებოდა ან სტუდენტი შემოვივლიდა, ხელს ჩაავლებდა,
წაიყვანდა, დაატარებდა, საწყლო ადგილებს აჩვენებდა, თავის
აზრს გაუზიარებდა. რჩევას ჰკითხავდა და კიდევ ერთხელ აღი-
გზნებოდა, იქაურობას დააკორიანტელებდა!

მაგრამ მხარს არაეინ აბამდა! მარტო იყო ფორე თავისს
საქმიანობაში!

ბოლოს გადაწყვიტა თავდაპირველად ხარჯი თითონ გაე-
ლო. დაინახავენ, მომიდგებიანო! გაყიდა ცხენი, გაყიდა ფუტ-
კარი, გაყიდა პატარა ვენახი, სამიოდე თხა, ათი კოდი პური
შარშანდელ მოსავლიდან შემონახული და ყოველივე ფულად
აქცია! მაგრამ არ იყო საკმარისი მუშაობის დასაწყებად. ახლა
მან გაბედა უქნელი საქმე. ერთ დილას იგი მიადგა ჩვენი და-
ბის წმიდა გიორგის მღვდელს და მაზრის ბლადოჩინს მამა
თევდორეს, — მდიდარს, შეძლებულს, ძუნწსა და ხელმოკე-
რილს.

ფორემ მოურიდებლად სთხოვა ფულით თანაშეწევნა და
დაჰპირდა თავისი მამულის გირაოდ მიცემას.

თევდორე მღვდელმა, რომელიც ფულს სარგებლით ასეს-
ხებდა ხოლმე, მოიმიზეზა წმ. გიორგის საყდრის შეკეთებისა-
თვის შემოწირული ფულის უკმარობა.

— მე მხოლოდ წმ. გიორგის მოვალე ვარ! — განაცხადა
ბლადოჩინმა.

— თუ მართლა წმიდა გიორგი გიყვარს, მაშინ მისი საქმე
გააკეთე!

— რა საქმე?

— ხომ იცი, რად გეწამს ქართველებს წმიდა გიორგი მთავარმონაწივე? რად არი ჩვენი თავსალოცავი? თუმცა შენ ჩემზე მეტი უნდა იცოდე, მოგახსენებ... გველესაპმა ხალხს სასმელი წყალი შეუქრა, თავის მყრალი ტანით ზედ გადაეფარა წყაროსთვალს, კლანჭებში ჩაამწყვდია. ხალხი უწყლოდ იხოცებოდა. გმირი და მხედარი გიორგი შეებრძოლა ვეშაპს, ჩასცა შუბი, სული გაანთხევინა და სახალხო წყალი დაიხსნა! ამ გმირობისათვის იწამა წმიდანად ქართველმა ხალხმა, თორემ წმიდანი არა ყოფილა! და თუ შენ, წმიდა გიორგის მოსავე ხარ, დაგვეხმარე წყლის გამოყვანაში; გახდი წმიდა გიორგის მიმდევარი, წყალი მიეცი ხალხს!—უკვე ფიცხად შეუძახა ფორემ მამამთავარს.

ბლადოჩინს მხოლოდ წყნარად გაეღიმა მემამიტ ფორეს ახალ დებულებაზე წმიდა გიორგის შესახებ... ეს იყო და ეს...

როდი იცოდა ფორემ შეპოება! მან იყიდა სამოციოდე მილი და ეზოში დაალაგა, არხი კი ჯერ არ იყო გათხრილი! ეშმაკები ტიკებს ალბობდნენ, ღვინო არსად იყო!

დიდი ფიქრის შემდეგ ფორემ გადაწყვიტა ნიშარძეულის ფონდის დაარსება გაზეთში და ამ მხრივ შეწირულების მოგროვება. ამ გამოგონებაზე ისევ გაუთბა გამყინვარებული გული, ისევ შემოიქროლა იმედმა, ისევ ეჩვენებოდა, რომ დაიმორჩილა ჩანჩქერის წყალი: ეჩვენებოდა თითქოს ნიშარძეული მერანი იყო და ქეჩოზე ხელწავლებული მოჰყავდა და მერანიც მშვიდად მოსდევდა სოფელში! ხან თითქოს ფორეს კვერთხი ეჭირა და მისს კვერთხს უკან მოსდევდა, მოსთრევდა წყალი! რას არ ჰხედავდა, რას არ წარმოიდგენდა! საორავუ-

ლე ფაცხებს სდგამდა მდინარის ტოტში, შიგ მურა კალმახს იჭერდა!

მაგრამ გრივალ-ქარივით ატყდა მსოფლიო ომი და ყოველ კეთილ დაწყობილებას მიეცა თავისი აღსასრული! ბევრი მწარე გაკვნიტა ხალხმა!

გავიდა დრო, ჩვენი ფორე მობერკაცო გახდა, სამოცს გადასცილდა, — მობერდა თავისი აუხდენელი ოცნების გაცამტვერებით. ფორეს შუბლი დაეღარა გუთან-გავლებულ მინდორივით, წვერ-ულვაში გადაეთოვლა, სახე შეუქქნა, მის ღიმილს მადლიანი ეშხი გაუქრა, მოწუწუნეც გახდა, მწვავედ ჰგრძნობდა, რომ ხელიდან უსხლტებოდა ის ერთადერთი ნათელი ოცნება, რითაც იგი აქამდე ჰსუნთქავდა, სცოცხლობდა, მოქმედობდა!

მაინც ვხედავდი ნიშარძეულის კლდის ქიმზე ზევიდან გადმოშირალს! უყურებდა ტანშევერცხლილ ჩანჩქერს, ეალერსებოდა მის თვითეულ ზვირთს; ჩანჩქერის თვითეულ წვეთში იყო ჩამწვარი ფორეს ფიქრიც და ოცნებაც!

სულ პირუკუღმა მიდიოდა ფორეს საქმე. წყალზე დაადნა ფორეს თვალგული მაინც არაფერი გამოვიდა! არავინ წაეხმარა! ომმა სულ მოფშენიტა სოფელი, ვინ იყო მხსნელი?

— დაიწვას ცარიელი ჯიბე! — წაიკვნესებდა ბერიკაცი.

უფრო დაბერდა ფორე, სამოცდაათს გადასცილდა. „ძია ფორე“ „პაპა ფორემ“ შესცვალა, მაგრამ წყლის საქმეს არა ეშველა რა!

ახლა სიტყვითაც აღარავინ ეხმარებოდა წყლის მებრძოლს, თანაგრძნობაც სამგორის ქარს გაებურთავებინა! სოფელში უკვე ლაპარაკიც ეზარებოდათ ნიშარძეულის წყლის გამოყვა-

ნაზე, როგორც გარკვეულად აუხდენელ ოცნებაზე და ფორეს კიდევაც აღმაცერად უყურებდნენ.

— თავში იწყვიტოს, ფორე უცოლშვილოა, შესანახი არავინა ჰყავს, ნება აქვს ქარიანობისა, ოცნების აყოლისა, ჩვენ კი— წერილშვილებს რაში გამოგვადგება ფორეს აყოლა?!

ასე ფიქრობდნენ ზედმიწევნით ფორეს მეზობელი გლეხები, რომელნიც სიღარიბით ისე დაიხელთნენ, რომ ვერაფრით ვერ შეეწივნენ სოფლისთვის მარტომბრძოლ ფორეს!

ხანიერმა, სახენაცვალმა ფორემ ერთხელ კიდევ შეუტია სოფელს ცეცხლოვანი მოწოდებით:

— ძმებო, გავიდეთ კლდის გამკაფველებად, ბელტის მკრელებად, რუსხმულის მკეთებლებად, არ დავზოგოთ უკანასკნელი კაპიკი, კალაპოტში ჩავსვათ ჩვენი გიჟმაჟი ნიშარძეული და სოფელში გამოვიყვანოთ! რომ იცოდეთ, რა შემარგო წყალია, რა მსუბუქი, თამარ-მეფეს აუწონია ლერწმის წბილით!

ახლა ამის პასუხად სოფელში თქვეს: ფორეს ტვინი უფრინავს! ურგები კაციაო! სალექსედ გახადეს.

დანართვილარი გული კიდევ ემხურვალეობდა, მაგრამ აღარავინ არ გამოეხმაურა, ყურიც არ მიუგდეს! მობეზრდა სოფელს უქმი საქმე, სიტყვა უსაქმო! დრო მიდიოდა, ფორე თითონ უძღურდებოდა, მუხლში სიბერემ ჩაიბა ფესვი, გულს მყინვარი შეეპარა! მხედველობა მიუსუსტდა და... ამაზე უბედურება რაღა იქნებოდა, ნიშარძეულის სანახავადაც კი ველარ მიდიოდა, გულჯავრეული, ბლუნვით მავალი! ჩამოძენძილი ჩონით, ჩამორღვეული პაჭიჭებით მოსიარულე.

რაღაც სასიცოცხლო მოაკლდა ფორეს, თითქოს მისი არსება გამოიფიტა, გამოშრა, თითქოს სამოთხეს მოსწყვიტეს!

ვერც ვერავის ანდობდა თავის სევდას და ხვაშიადს. ჩაიკეტებოდა თავის ოთახში, თავის გულში და თავის მზერაში და ისე, უნახავად ჰხედავდა ნიშარძეულის ჩანჩქერს გახურებული გულით, შუბლგაცხელებული, გაფაციცებულ!

მტკიცედ გამოფიცული, უცვალებელი ოცნება მაინც ცოცხლობდა ფორეს მკერდქვეშ.

ამ ღროს ფორეს გული ნაღვერდალს ისროდა! მაგრამ ღამეობით იყო ძნელი! ვეღარ იგებდა ფორე, თუ სად იყო, შინ თუ ნიშარძეულზე? გახელებულ ტრფიალს ხშირად ეჩვენებოდა ქაფიანი ჩანჩქერი და გულს უხოკავდა შმაგური სიყვარული!

ეს იყო ფორეს საკვებელიც და გულის სატკივარიც!

აი, უეცრივ, ძილში თითქოს არწივთ გუნდმა იხუვლა მთიდან და ფორეს ეზოში ჩამოვარდა, მზის ჭიატმა ციალა შუქით შეანათა ფორეს გამოხუნებული, მოგოლვილი კარმიდამო.

მოხრეკილს, მტვრიან ეზოში მიწიდან სცემდა და სცემდა აფეთქებული შადრევნები, დაბროლებული, მარჯნით ნაელეები ჩქეფები; შიგ მიჰვრიტანული კდემით სრიალებდნენ ელვამდგარი ცისარტყელები, ჩაცრილი ოქრო, ლურჯანა, ნარგიზფერი — ერთად.

ვერცხლურ ღვარიდან მოსრიალებდნენ ცისფერი ბაღდადები, მარმაშა ზვირთებში წყობისად იდგნენ დასხმული ვაზები, ვაშლ-ატამის ბრიალა ტოტები, ყვავილნარი, ხევნარი, კორდი, მდელი, მტილი, მოლი, ირგვლივ შემობურვოდა კაკლის ჭალა. ნიგვზნარის ხასხასა შრიალი საამოდ ელამუნებოდა ფორეს გაბადრულ გულს.

თითქოს ირგვლივ დაჰქროდნენ ფრთალაქვარდული ჩიტები, ფირფიტები, თოლიები; თითქოს მოჟუჟუნე ქალები გალობდნენ ტკბილად საგალობელს და მრგვლივ საყნოსავი ყვავილსურნელება იდგა და მღიმარი ყვავილები უმწიკვლო ღვარებში ეღვარებდნენ. უთეთრესი, უბროლესი, ულურჯესი და უოქროესნი, ანკარა, თაფლისა და რძის ნიაღვარშხეფი გამოსჩქეფდა თქართქართ. ნაღმივით ავარდნილი, დამძლავრებული შხაპი მარგალიტს იტყორცნებოდა, მცინარი ლალის გამოსხივებანი გულს ანათებდნენ, თვალეში უსრიალებდა საფირონისა, ფირუზისა და ბადახშანის ციმციმი. დაჩითული კალმახები მიმოქროდნენ ზვირთებში! ფორე სიხარულით ჰბორგავდა ძილში. როგორ შეაყელთა უწყლოობამ, რამდენი იტანჯა, იწვალა და აჰა, თითონ ჩამოსულა წყალი სოფელში, გაურჯელად!

აუსრულდა ფორეს უსაწადლესი ნატვრა!.. სახეატკრეცილი, გაგანიერებული თვალეზით, ხარბად შეჰყურებდა წყლის კაშკაშს, ბროლის მცვრევას და თვალს როდი უჯერებდა უეცარი სანახაობით მონადირეებული! თითქოს ტრფიალი და სატრფიალო ერთმანეთს შემოჰხვდნენო! მაღლი, მშვიდობა, სიხარული ჰსუფევდა ეზოში! — სანატრელი სახილველი!

ჰქუხდა ჩაქუხა ჩანჩქერი და ემადლებოდა ფორე მოულოდნელ სიხარულს.

ვაგლახ, ნაგონარი გამოდგა, მეოცნების ფიცხი გამონაფიქრი!

გამოიღვიძა, თვალშეხედული მოჩვენება განქრა! გვერდით მდგარ ლიტრაში ისევ დუბელა წყალი იდგა ნადულარივით. თითონ სიცხესა და სიზმარს დაედუნებინა, ფორეს მკერდზე

ხვითქი სდიოდა. ისევ უყვარული სინამდვილე... ისევ ურწყული, უძძქური მიწა... ამტვერებული შარა... გამხმარი ხეები. მიმჭკნარი ბოსტანი, უღიმღამო დედაკაცები, სევდიანი ბავშვები... ოცნების უსაზრდელობა...

სადღა ბროლის ტბორები, შუშხუნასავით მფეთქავი ტანბროლა შადრევენები?!

ისე დააქმუნვარა ფორე, ისე შეარყია ამ ცხადივით ჩვენებამ, რომ მთელი დღეები გარინდებული იჯდა დერეფანში. აღარ საქმობდა, მხოლოდ იმ ადგილებს დაჟინებით უყურებდა დერეფანში, საიდანაც სრიალა შადრევენები სცემდა სიზმარში, კვიპაროსივით ასული, მაშხალასავით ცაში შეტყორცნილი!

სად წავიდნენ? ცაში თუ ავიდნენ დაუბრუნებლივ!..

მართლაც, სად წავიდნენ შადრევენები? სად წავიდა ახალგაზრდობა, ღონე, იმედი? — დაფიქრდებოდა ღამენათევარი, როცა მთვარე თეთრად დაანათებდა ბალიშს და აღარ აძინებდა მოხუც მეოცნებეს.

— სად წავიდა ოცნება, სიყვარული? ახალგაზრდობის ჩოხა გაცივთა, გული, გონება, შეძლება თავისს ოცნებას გარდააგო და რა უეცრად გაეცურდა თითებშუა ყველაფერი, რა ძნელია, რა ძნელი ყველაფრის გაქარწყლებანი?

და სულ პირველად, ფორეს თვალზე კურცხალი დაიწურა, თითქოს მისი ცხელი ცრემლი ნიშარძეულის ჩანჩქერს შეუერთდა, მისივე ხმელი გულისა და მისი მშობლიური მიწის მოსარწყავად!


წყალს შეაღია ფორემ თავისი ახალგაზრდობა, ოცნებას დააწვევინა! ქვასა და კლდეს შეაცხო თავისი სიცოცხლე, მაგრამ მარტოდმარტომ ვერ დაიმორჩილა ვერც ჩანჩქერი, ვერც

ვერავის გული! ერთი საქმიანი თანამგრძობელი არ მისცა
ბედმა!

ფორე სანახევროდ კიდევაც დაბრმავდა! ეზოშიც კი ვერ
იარებოდა უჯოხოდ, მაინც დიდ მეოცნებეს სჯეროდა, რომ
ნიშარძეულის წყალი სოფელში უსიკვდილოდ ჩამოვიდოდა!

და აკი ერთ ღამეს, თითონაც გადამდნარიყო იმ ოცნებაში!

ნიშარძეული კი მხოლოდ წრეულს ჩამოვიდა მუხათწყა-
როში.



ჭ ა მ კ უ რ ა

გარეტყვიდან ვბრუნდებოდით სანადიროდ წასულები, მე და ჩემი ძმობილი ბათხო. ვერაფერი მოვკალით, ვერც ვერაფერი ვნახეთ. ვნატრობდით, არავინ შეგვხვედროდა, რომ არ დაეცინა,—აბა, სად არი თქვენი შველი, ირემი, კურღლელო!..

ხელცარიელები, გატლექილები, მთის იქეთიდან მთის აქეთში მოვჩანჩალვდით.

ახლა გზა აგვებნა ბურვილ ტყეში. ცა აღარა ჩანდა. ბევრი წოწიალის შემდეგ, როგორც იყო, მესამე დღეს, ტყის ტევრს გამოვალწიეთ და დაბა თეკენას წავადექით თავზე, ბექობზე გამოვსულიყავით. ბექობზე კი გზა შეგვიწყდა,—აქ უკვე სა-

სოფლო სასაფლაო იყო გადაქიმული ძეძვიან ჯაგნარებში. ქვე-
მთ იორი ადიდებულიყო დიდწყლობაში—სეტყვა-თავსხმა-
ნიაღვრისაგან, ბორანი გაცოფებულ მდინარეს წაელეკა,
გაწყვეტილი ბორნის ჭაპანი საბრალოდ ქანაობდა.

უკან ველარ დავბრუნდებოდით უგზობის გამო, წინ იორი
არ გვიშვებდა.

გარიყულებს გუნება დაგვიძმარდა.

მძვინვარედ გვშიოდა. უკანასკნელი ლუკმა გუშინ შევქა-
მეთ! ბევრიც არა წაგვიღია რა შინიდან; ხომ არ ვიცოდით,
გზა აგვერეოდა, ამდენ ხანს დავბანდდებოდით ერთი დღით
წასულები?

და აი, ახლა ორ ნაბიჯზე ვხედავდით ველზე გადაქიმულ
პურიან-ღვინიან-თევზიან-დუქნიან თეკენას და ჩვენშუა გვე-
ლეშაპივით გაწოლილი, აღვარებული ხეთქების ღვართ მღრი-
ნავი იორი კი გვიკრძალავდა შიგ ბიჯის წადგმას.

თან მარილკენიწიცი არ გვედო წინ, ლუკმის უპოვარებს!

მზეს ვემუდარეთ, ვემეოხეთ, არა გამოვიდა რა...

მუდამ ტკბილად შესამქვრეტელი, ფირუხთვალა, მტრე-
ღივით გასუნთქული იორი, ახლა დაძალეებული მოჰქროდა,
ფეთი დაჰმართოდა, ზღვიერად მოიგრაგნებოდა, ნაპირებს ბას-
რი ჭანგებით მოჰკაწრავდა; ზოგან ბალ-ვენახი პირწმინდად
მოელოკნა.

ეს დღეები აქეთკენ სეტყვა-ღვართქაფიანი, ელვა-წვიმები-
ანი ყოფილიყო. მთაში წვრილხევეები გაცოფებულიყვნენ და
ახლა ყიჟინით ყირამალა გადმოდიოდნენ იორში! თან კლდეს-
აგლეჯილი ქვისნათალი სიპები მოჰქონდათ, ქვებს მოაქანებ-

დნენ — თითო სახლის ასაშენებელ ლოდსაკიდურად გამოდგებოდა... იორი რაღას იზამდა?!

რა გვექნა? წინ ჩამოცხვირული კლდე გვეყუდა. მდინარის უვალი ნაპირყურე, ნაღრანტებით, ჯღრედებით შემოციხული ლიტაო, ლიპი კლდეები. ხაფანგში მოვემწყვდიენით, ქვეყნის განაკიდეს შევრჩით. შევკრთით კიდევაც, იღუმალი შიშიც ვიგრძენით, სევდა, ტლუობა, თავს ნისლის კოტორი დაგვტრი-ალებდა ძერასავით.

რამდენი ვწყევლეთ გიჟი, დამთხვეული იორი, ჩვენი უგუნურობა, მიუხვედრელობა, რომ პირიქითიდან პირაქეთში ჩამოვრუყდით! დაბა თეკენა კი თითქმის ჩვენს წინ იღო, ჩვენთვის მიუწვდომელი და სანატრელი! ისე ახლოს იყო, რომ წყალგალმაველთა ლაპარაკიც კი მოგვესმოდა. სამზირალი ხომ კარგი გვექონდა!

აგერ ყოტი მღვდელი გლეხებს დაჰყიოდა ნიშნის მოგებით, — ხომ დაგსეტყვათ, დაგსეტყვათო! ეს იმიტომ, რომ უქმე დღეებსა სტეხავთო!

ვინმე თამამად მიუგებდა: — შენ საქმის დღესაც უქმადა ხარ და... რატომ შენ...

დუქნიდან გამოვარდა თეთრ კიტელში აყლაცუნდა ბოქაული და ვიღაცას სხაპასხუპით მიაყარა:

— გაგმუშტავ, მოგჩექმავ, დაგანიავებ!..

მგონი, სილის ტკაცანიც გაისმა!

ლაპარაკი კი არა, წყლის გაღმიდან საჭმლის სუნიც კი მოგვდიოდა. არ დაიჯერებთ, მაგრამ ზედ იორზე მღვარ ქოჩორას დუქნიდან ახალი თევზის სუნი გვეცა, დუქნის წინ შედგმულ ვეება ქვაბებს ოხშივარი ასდიოდა, შიგ ნარიყი შეშით თევზს

ხარშავდნენ. ეზოში დაწყობილ ლასტებზე მოხარშულ ჭანარს ალაგებდნენ.

თევზის დანახვაზე შიმშილმა ორკეცად შემოგვიტია, გადამღვრძალები, წადიერებით აღგვაგზნო! გავბედეთ, ჩაველით იორზე, გასვლის გზები მოგვესინჯა, მაგრამ დალაღებულმა ტალღამ ხვალი ლომის ძალით დაგვათხრიალა და უკანვე გვაქცია.

ვისხედით „მდინარესა ზედა ბაბილონისა“ და...

— ჰაი, მოყუდებულო ჩარექავ!

— ჰაი საესე ხონჩავ!

— ჰაი ლობიოს ჯამო, თავმობმულო! — და სწორედ ლობიოს ქინძის დამათრობელი სუნიც მყისვე ცხვირში გვეცა.

— სად წაუვიდეთ?

— სად არი მენიღური? — ერთხმოვანი წყლის ჩქრო გულს გვიხვრეტდა.

— ახ, რა გემრიელია ივრის თევზი! ზედ წითელი ღვინო! — ცოცხალ თევზს წყალი. უყვარსო, მოხარშულს წითელი ღვინო! — აკი გვეტყოდა მოხუცი ლოჭო.

— ახ, ქინძმარავ, შენ დადაგე ჩემი გული! — ნდომით წამოიძახა ბათხომ და თვალი დახუჭა.

— ეს არი და საკვნესარი! — დავსძინე მე.

— ტაბაკა რომ გაგიტკებება, ძვალი რომ ჩაღნება პირში, ჰა, რას იტყვი? — შემომაჩერდა ბათხო.

— ჯერ ქადისგულა უნდა ახსენო, მერე ფშაური ხინკალის

— მსუქანი გელაქნურები? მუცლიანი ზუთხი, ტარადანა ხიზილალა?

— დედალი ნიორწვენიტ?

— ზაქის მწვადები?

— ბროწეულივით გაწითლებული შემწვარი ინდაური?

— თუ ასეა, მოდი, რიგით მოგაყოლოთ. დავთანხმდეთ იმ პურ-მარილზე, რაც შარშან ზაფხულში ბაქარაიანთ (ჩვენი კუთხის შეძლებულები) ჰქონდათ. მეც ხომ ვიყავი დაპატივებულნი. აი, მათი სადილის რიგი: ჩიხირთმა, კუბატები, ფლავი ხოხბით, ღურაჯი, მწვადები, კალმახი, ზუთხი, სუკები, ძროხის ბეჭი ცივად, ზედ მწნილები, საუზმეული, ლობიო, კაპარი...

— შეწყვიტე, შე უღმერთო, გაჩუმდი; ცოდვა ვარ, შემობრალე!

იმუდარებოდა ორი დღის უჭმელი, სულმოკლე ბათხო.

მეც დავჩუმდი... მაგრამ მალე თითონ ბათხომ წამოაყრანტალა: — ერეკლე მეფემ რომ ინატრა დეკაზე ნახუნი მწვადი და ზედ თოვლის ნაჟური? აქ მაინც იყოს ის მწვადი და ის დეკა!

ნაჟურის გახსენებაზე, ახლა წყალი მოგვწყურდა, პირი გვიშრებოდა, ყელი ამოგვეხახა, მაგრამ საშველი არსად იყო. ნიაღვარს ვერ შევსვამდით, სასაფლაოზე წყაროს წყალს რა უნდოდა! წინ კი, ნიაღვრიანი ხმოვანსავესე, ლომდარი იორი მრისხანებით მიიზავებოდა, მიგრილებდა, თითქოს მთა აწყვეტილა მიწიდან და შურისძიებული ვილაცას უკან დასდევნებიაო. მშიერ-მწყურვალეები ისევ საფლავის ქვაზე ჩამომსხდრები, უიმედონი, უსასონი ერთმანეთსლა შევეცქეროდით.

— გვეყო ამდენი შეცქერა, რამე ვილონოთ! — და გადავხედე მგელივით ატროვებულ ბათხოს.

— რა უნდა ვილონოთ? რამდენიც გინდა, უმზირე მშობ-

ლიურ ტატნობს! სწორედ ჩვენზე უთქვამს ვაჟა-ფშაველას: —
სთქვა ბათხომ, სოფლის დუქანზე თვალმომსკვალულმა:

„გამოდმით მე ვარ, გაღმა შენ,
შუაზე მოდის მდინარე,
ხიდი არ გვიძევს წყალზედა,
ფიქრი გვეკლავს მოუთმინარე,
მინდა გაკოცო, მაკოცო,
შენ სახეს ვხედავ მღიმარეს,
მაგრამ ვერსაით გამოვედ,
ამ სატიאלო მდინარეს...“

— მშველელიც არვინ გვიჩნდება,
არც ციდან, აღარც ძირითა... —

დაეუმატე მე.

მართლაც, უნუგეშო ყოფნა იყო: ჩვენს წინ მდინარე შავად ინჩქეროდა. იქით დაბა-დუქანი — შემრგო თევზით, ცხელ-ცხელი მწვადებით, წითელი ღვინით, აქეთ კი — შიმშილი, წყურვილი, სასაფლაო!

ორივენი მზესუმზირასავით თავჩაქინდრულები ვისხედით, რომ უეცრივ ბათხომ შესძახა:

— ამას დამიხედეთ! მოგეშოდა, მაშ რა იქნებოდა, აგერ, თურმე ჭამპურა გვიყურებს! — და ბათხომ ჯოხი მიაღო მოპირდაპირე საფლავის ქვას და ზედ აკი ჭამპურას სახელი და გვარი იყო გამოჭიმული! თან ლექსი ჰქონდა დართული:

„სიკვდილო, შე დაწყევლილო, უცაბედად მიგღე მახე,
პურმარისის ტბილი მამა რა უქმელად დავიმარხე!

ასე ეწერა საფლავზე. წარწერას აქეთ-იქიდან ქვაზე ამოჭრილი შოთი პურები, ყანწი და ხელადა ამშვენიებდა.

— თქვენი ჰირიმე, რაღა ჭამპურას გამოცხადება გვინდოდა! — დაიძახა ბათხომ და მეც გულიანად გამეცინა.

— მახსოვს, ჭამპურამ ერთ ჯერზე, ზეზეურად ბიჭა-ბატკანი გაათავა, ბოტიტანას სანაძლეო რომ მოუგო? როგორ უყვარდა საკვებელი?

— ერთი აზოსუნთქვით ორყურა რომ დაცალა მეღვარობის დღეობაზე, გახსოვს?

— ბოზბაშს რომ აკეთებდა დუმიტა და ფილტვით!

— მოიგონე, სანაძლეოზე რო სჭამდა, მთელი ცხვარი ზურგთუკან ედო და ზურგიდან ხელებს ატანდა, ისე სჭამდა, რომ თვალი არ გამიძღესო! ახლა სად დასახლკარებულა, აქ როგორ უნდა გასძლოს?

მეყანწიშვილი ჭამპურა (ნამდვილი სახელი — სოლომონი) ჩვენი ბავშვობის მოგონება იყო, ჩვენ რომ თბილისში ვსწავლობდით, მაშინ მომკვდარიყო და მისს საფლავს ახლა პირველად შევხედეთ! დიდქამის მკვდარი იყო.

— ლობიოს ჯამს რომ მიესაყვარლებოდა ხოლმე: ახ, შე სულის შემტაცებლოო! სიმინდის ფაფა რომ უყვარდა, ლორის ქონით... „შემოგხედე, დაგინახე, დავდნი ღორიპ ქონივითა“. — ზედ რომ დაატანდა...

— გახსოვს, ლობიოსადმი ჰიმნს რომ წავაკითხებდით ხოლმე?

— „ლობიოს დაუჯდომელი“? — და მშვიერმა ბათხომ უთხონელად თითონვე წარმოსთქვა ლობიოს დაუჯდომელი, ჭამპურას რომ ათქმევიენებდნენ ხოლმე საგანგებოდ:

„ჰოი, ყოვლად ნოყიერო, გემოთი საამო, ყნოსვის დამატკბობელო შეჭამანდო სამეფოო, ფასდაუღებელო, ლობიო

ქართლისაო დიდ არს' ღვაწლი შენი, წინაშე ერისა ქართველისა, რამეთუ შენგან იზრდების და იკვებების ქართველი თვითეული, უმეტეს სხვათა საზრდელთა შორის, სიყრმიდგან ვიდრე სიბერემდე.

„დიდ არს სახელი შენი ივერთა ქვეყანასა ზედა და ხმოვან არს ძახილი შენი! ჩვენ, ყოველნი დადგრომილნი ფერხთა ზედა წინაშე შენსა კოვზითა და ციცხვითა ველით აჩუხჩუხებასა და ამოზელასა შენსა სახმარებლად ჩვენდა და ხმით დიდითა გილაღადებთ შენ: დიდება მრავალფეროვნებასა შენსა, დიდება წინწყლებსა ჩუხჩუხისა შენისასა! დიდება ლაბასა წვენისა შენისას! დიდება ქოთანსა, რომლის შინა დამკვიდრებულ ხარ და ძირსა მისსა, რამეთუ ძირი მისი არს ტახტი შენისა ძლიერებისა და ნოყიერობისა!

„დიდება ბუხარსა მალალსა, რომელმან გიტვირთა შენ, დიდება კეთილსურნელოვანსა ქინძსა შენსა, ყნოსვისა ჩვენი-სა დამამტკობელსა; დიდება დანაყილსა ნიგოზსა შენსა, რამეთუ არს გვირგვინი გემოვნებისა შენისა!

„დიდება ჯამსა თიხისასა, რომელსა შინა შთაგასხმენ შენ; დიდება შენდა, სამოთხიდან გადმორგულო, სუფრის მამშვენებელო ლობიო, შეჭამანდო სამეფოო!“

განსოვს, ამ დაუჯდომელის წაკითხვით რამდენი სადილი და ვახშამი გამოიგდო ჭამპურამ?

— მახსოვს, როგორ სწამდა ჭამპურას: პურადი კაცის სახლში ნაკლული ჭურჭელი დამ-დამობით თავისთავად ამოივსება ღვინითო!

— როგორ ტანტალებდა დღეობებში, ქელეხებში? ახლა გულზე ხელები დაუკრეფია!

— მე მძინავს და ჰღვიძავს სულსა ჩემსა! ვინ იცის, ამბობს ჭამპურა; — ვინ იცის, რა საჭმელზე ფიქრობს ახლა მისი დამიწებული კუჭი! — შემომცინოდა წუთით გაჭირვებადავიწყებული ბათხო.

...და მოყვევით და მოყვევით ამბები ჭამპურას მადის შესახებ.

ჭამპურა მართლაც თავჩინებული კაცი იყო! „ჭამპურა“ მისთვის ერქვა, ჭამა უყვარდა და ისიც სხვის სუფრაზე. ძუნწი არ იყო, მაგრამ არა ჰქონდა რა, რა ექნა? გლეხზე უარესად ცხოვრობდა სიღარიბის მტვერთაღენილი აზნაური! ისიც ხუმრემტი შვილის მამა!

— ყველა ვინმე კი არ გეგონოთ, ძველი გვარის ნაკვირტალია! — იტყოდა მისი ცოლი თებრო, რომელსაც ქმარი გადასძახებდა:

— შუშაბანდის ვარდო-ო!

და ბოლოს, რით სცხოვრობდა ჭამპურა-სოლომონი? თხუთმეტი შვილის მამა?

ჭამპურა თუ თვითონ გამოდიოდა იოლად დღეობებსა, წვეულებებზე, სხვის ფსონებზე, ხუთმეტ შვილს თან ხომ არ წაიყვანდა?

მისი შემოსავლის მთავარი წყარო იყო ის შავი წიგნი, რომელსაც ჯალინოზის კარაბადინს უწოდებდა. მათი საგვარეულო წიგნი იყო.

წიგნის ყდაზე, როგორც ბავშვობიდან მახსოვს, გამოყვანილი იყო სხვადასხვა დროის წარწერები, მინაწერები:

„ხაფილანდრესი ვარ“.

„არღარა ვარ ხაფილანდრესი, მიმტაცა ტიმოთემ“.

„აქა ივანე ქიშბერდიანმა ცხენი მთხოვა, ჩემი ცხენი უკანვე ვთხოვე და მევე გამლახა“.

„ივანე პომპოლიკი. მიიცვალა ჩყთი წელს“.

„ერთხელ ვცდი და შევჯექვ ვირსა,
გადმომავლო, დამცა ძირსა“

„დიდება მამასა და ძესა,
რა სჯობია მაწონსა და რძესა“

„ქალს რომ ქონი მოერევა, სადერღელი აეშლება“

„კორკოტის ქალი წინა დაიბადა ჩ... წელს, მაისის 8“.

„ღმერთო და ტკბილო უფალო, პირი სამოთხისაყენ მიყავი
მე ცოდვილსა, ანგარსა, მემრუშესა მელქისედეკს“ და სხვა ამ-
გვარნი.

ეს შავი წიგნი, ამ სასაცილო წარწერებით, მისი პატ-
რონისთვის უდრიდა ვენახსაც, ყანასაც, ძროხასაც. იგი იყო
მისი რთველიცა და კალოც... მართლა, ნატვრისთვალევით
ჰქონდა ოჯახს. ერთი სიტყვით, ამ „შავი წიგნის“ წყალობით,
ოჯახს უხვად შემოსდიოდა საზრდო და სანოვაგე.

ერთი სიტყვით, გაგეცინებათ, მაგრამ ჰამპურა-სოლო-
მონი სოფლის მკურნალობასაც მისობდა. თავის მიერ შეთი-
თხნილ თითო ფხვნილში, თითო ქათამს მაინც ართმევდა. ზო-
გი წამალი ჰქონდა, — ერთ ჰმეულ ცხვარადაც არ მისცემდა,
თითონ ჯალინოზის გამოგონილიაო!

ხალხიც უჯერებდა ჰამპურა-სოლომონს და მისი ძლიე-
რების ხმა შორს იყო გავარდნილი.

მაგრამ ერთხელ, ბეწვზე ეკიდა სოლომონის სახელი:

აღდგომის მესამე დღეს, აზნაურმა ბაშხადუნმა, სოფლის
ანგალმა და ენამაკრატელამ, დუქნის წინ შეგროვილ ხალხში,
თავისი უკორძო ენით, ასე მიმართა სოლომონ-ჰამპურას:

— თუ მართლა სიბრძნის უფსკრული ხარ, მაშ ისიც გეცო-

დინება, თუ როგორ უნდა შეაწყვეტინო ვირს ყროყინი, როცა აღარ დაიშლისო!

ხალხში ფრუტუნი გაისმა. ბევრსაც გაეხარდა ექიმბაშის მახეში მომწყვდევაც; ბევრიც საგონებელში ჩავარდა: ვირის ყროყინის შეჩერება ვის შეუძლია? იყროყინებს და იღრიალებს, ვიდრე მოსწურავდეს გულის ნაღველს!

მაგრამ სოლომონს არცა სწყენია, არცა შეშინებია ბაშხადუნისა, პირიქით, გულში თითქოს კიდევაც გაეხარდა!

მან გამოითხოვა ნება შინ ორი წუთით წასვლისა, რის დასტურიც მიიღო.

მალე სოლომონმა შავი წიგნი ჩამოიტანა, გადაფურცლა, სადაც სანიშნედ ნიახურის ფურცელი ჩაედვა და იქ, ხალხის გასაგონად ხმამაღლა და მკაფიოდ ჩაიკითხა:

„იქნება რომე, კაცის შეჯდომაზედ ვირი ყროყინს დაიწყებდეს მეტად, იმ კაცმა მოიტანოს შირბახტის ზეთი, ან წმინდა ერბო, ჰსცხოს, შიგნით ცხვირის ნესტოსა. რასაც ხანს ის საცხები იმაზედ იქნება, აღარ დაიყროყინებს ნებითა ღვთისათა“.

ბაშხადუნი გაშრა და მთელმა ხალხმა შეაქო სოლომონის მცოდინარობა, მეცნიერება.

მაგრამ ბაშხადუნმა მაინც თავი გამოიღო და ექვი დაჰკრა: ვაითუ წამალს ვერ გაეჭრა სინამდვილეში! რა ვუყოთ რომ წიგნში სწერია, იქნებ ვერ გასჭრას? ექვს ნაძლევიც მოჰყვა, — სადილი. მაშინ გადაწყდა: ერთს ამორჩეულ კაცს უნდა დაეყარაულებინა სოფელში იმ ერთადერთი ვირისათვის, რომელიც გლეხს ტალეს ჰყავდა, — თუ როდის შემოეჭიდებოდა ვირს ნაღველი და წამალიც მყისვე ეცაღნათ.

ამ შეთქმულობას მთელი სოფელი ყურს აღევნებდა. დია-

კენის წვერიკენეტის მეთვალყურეობით დავა იმავე კვირაში გადაწყდა სოლომონის სასარგებლოდ.

ბაშხადუნმა დედის ნახსოვარი ფირუზიანი ბეჭედი მისცა სადილის ხარჯად სანაძლეოში, — რაკი ფული არა ჰქონდა, თავი კი არ შეირცხვინა, ხოლო სოლომონ-ჰამპურას ძლიერება კი დარჩა მტკიცე და უცვალებელი!

ერთი სიტყვით, ჰამპურა პურ-მარილის ქურუმში გახლდათ, მთელს ხეობაზე განთქმული! უყვარდა ჰმეულობა, სმეულობა, მაგრამ ფსონსა და მამითადებს ერიდებოდა!

— დალიე, სიკვდილი გვერდით გვიზის! — ეტყოდა ჰამპურა თანამესუფრეს. — დალიე, რა არი ჩვენი ბოლო? მტვრიანი მიწა უნდა ავშალოთ!

— ვჰამოთ, ვსვათ, ცას ხომ არ გამოვეკერებით, თუ გიყვარდე! — ყოველს წინადადებაზე აუცილებლად დაატანდა „თუ გიყვარდე“-ს, „მოდი მაკოცე“-ს.

— ჰამე, ჰამე, ვჰამოთ, ჰიანჰველაც კი თავისი მუცლისთვის იბრძვის. გადიღევი, ეს ქათმის კურტუმი ძალიანი ნაჭერია, თუ გიყვარდე! — შემოგთავაზებდა თეფშით, მაგრამ სული წასძლევა და გზად, შენზე უმალ თითონვე აიღებდა იმ შემონაძლე ნაჭერს.

— ჰამე, არ ვარგა ურგები კაცი, სუფრის ზარალი! მოდი, მაკოცე!

ვიწრო წრეში სიმღერებიც იცოდა სუფრაზე:

„გემი ზღვაში არა რჩება,
სული გვამში არა რჩება,
ნეტა სიკვდილს რასა ჩივის,
საყვარელი სხვასა რჩება!“

ან კიდევ:

„სადღეგრძელო მისი იყოს,
ვისი გულიც ვისთან იყოს
ადღეგრძელოს ის ბულბული,
რა ბულბულიც ვარდზე ხარობს;
ის ყვავილიც ადღეგრძელოს,
რა მებაღეც ბაღზე ხარობს;
ის ვაჟკაციც ადღეგრძელოს,
რა ვაჟკაციც ქალზე ხარობს!

ნაზი და გუნებიერი მკამელი იყო ჭამპურა! სულაც არა ჰგავდა ღერენას, ქვაბობრივ რომ სკამდა ხინკალს; არც ხუნჩალეს, რომელსაც დღეს რომ ცოცხალი ყოფილიყო „სუფრის კომბაინს“ შევარქმევდი; არც გოგრაქას, ყაყანითა და ყრიალით რომ უყვარდა ჭამა-სმა.

ულვაშის მწყაზვრითა და წკეპით გეტყოდა ჭამპურა:

— მიყვარხარ, მეტი რა გითხრა! თუ ხატში წასვლით ცხონდება კაცი, განა კაი სუფრის გაშლით უფრო არა ცხონდება?

— ერთი, შენს ქვევრს გაუტეხოთ თავი, სისხლი მოიღვაროს! — იტყოდა ჭამპურა, კარგი სუფრის მოლოდინით დაღლილი, — მოდი, მაკოცე, თუ გიყვარდე!

— რას შვრები, ძმაო, განა მარილი არ აგითირდა აქამდე? — და როცა დაჰპატიყებდნენ, ჯერ თავაზიან მადლობას ეტყოდა, მერე დაატანდა, — მოვალ, მოვალ, ხელადას ძირს არ დავეცემი ისე ვიქეიფოთ, რომ შენი ქვევრი მოვამშრალოთ; მოდი, მაკოცე, თუ გიყვარდე!

სუფრაზე უფროს-უმცროსობა უყვარდა:

— საღვინე წინ დამიდგი, სუფრის წინ დამიმწკრივე ლავაშები და შოთები. — მშვიდად ეტყოდა დიასახლისს.

ჩვილი, გულნაზუქი ჭამპურა იტყოდა:

— კიდევ ჩამომისხი ნამი, გენაცვა, მაგ შენი ტიკჭორიდან! ჯამი რომ წითლად ელვარებს, გულს შემინათებს ხოლმე! — ხელში დაიჭერდა ჯამურას — ამ ჯამზე გაგიმარჯოსო!

— დამისხი, პეი, მეჯამევე, მეხელადევე, ღვინის მოლარევე, პატივდებულო კაცო! ჩემსავით ვინ არი დამლევი? — და როცა კმაყოფილი იყო დახვედრით, ან კაი ღვინით, სახეგაბადრული დასდგამდა გაცლილ ჯამს და იტყოდა: — რა ღვინოა, სწორეთ მზის თვალი აქვს ჩაყოლილი! გაიხაროს შენმა მამის გვარმა!

— მოშენდეს უბე დედაშენისა! — მიჰმართავდა მასპინძელს.

ჭამპურას არავითარი სხვა რამ არ აღარდებდა, გარდა იმისა, რომ მყუდროდ ესვა და ეჭამა. დიდი, კაცმრავალი სუფრა ტყრაშითა და ტყრიალით არც უყვარდა — წუთია წუთისოფელი, წუთის წებოთი იწვებო! ეს აფორიზმი ეკერა პირზე და განა მართალი არ იყო?

ფაქიზი იყო ჭამპურა, სუფთად ჩაცმული, მუდამ წვერმოპარსული, შავ ჩოხა-ახალუხში, ზამთრობით ტყავ-ფარაჯიანი, ოდნავ შეჭალარავებული, დაზვინული, ბრგე კაცი. ყველას საყვარელი, ტბილი და მოხატრე. უმართლესი იყო, სძულდა პირუჭყემმარიტობა, უპირული ქართული:

— ღმერთო, ნაწილის გამჩენო, — ასე დაილოცებოდა ხოლმე დილის საუზმეზე პურს რომ გასტეხდა ჩვენსას, ზედ რომ სავალდებულო დილის არაყს დააყოლებდა.

— კაცი პურადი უნდა იყოს, ნადიმნათელი! — ეტყოდა ხოლმე მამაჩემს ჩვენს სუფრაზე. ეს იყო მისი მთავარი ნამცენები!

და შეექცეოდნენ წმინდა პურს, ტაბაკას, მწვადს, თითო ხელადას დააყოლებდნენ და წავიდოდნენ თავთავის საქმეზე, სა-

ლუკმაპურო შრომაზე, უწყინრად, უზრუნველად, მართებულად — პურტკბილობაში შეტკობილები.

— უმეგობრო კაცი ხომ ავადმყოფია, ბოროტი აგებულე-ბისაა, რა უნდა გაიხაროს საცოდავმა ამ ქვეყანაზე, ფიფქი-ვით დადნება! — იტყოდა მამაჩემი.

ჭამპურაც თანხმობის ნიშნად თავს დაუკრავდა და ეტყო-და: — აბა, ის რა კაცია, ვინც ლხინით არ მოსჭამს საწუთროს! თუ გიყვარდე!..

— ჭამა-სმა რა ბედენაა, თუ მეგობარმა მეგობრის გულში არ ჩაიხედა! — იტყოდა ჭამპურა და ზედ დაატანდა — „თუ გიყვარდე“-ს, „მოდლი მაკოცე“-ს.

ჭამპურა გულსავესე კაცი იყო, სხვის სახლში სტუმრის დი-დად სტუმართმოყვარე! ისე ალტაცებით მიიღებდა თითონ სტუმარი სხვის სტუმარს, სულ ფიანდაზად გაეშლებოდა, — ფიცხად საჭმელებს მისთავაზებდა, ზრუნვით ამა თუ იმ ნაჭერ-საც ურჩევდა, საყვედურსაც ეტყოდა მასპინძლის მაგიერ, — ამდენ ხანს რად შეიგვიანეო! და საერთოდ, — რად დაგვივიწ-ყეო!

— ისე გაგვიხარდა ჩვენ შენი მოსვლა, როგორც ყინვაში დამზრალს თბილი მზე!

ვინ „ჩვენ“? გულში იკითხავდა გაკვირვებული სხვისი სტუმარი.

მართლა, ჭამპურა ისე ირჯებოდა, თითქოს ამ ოჯახის გაუ-ყრელი მოწილე ყოფილიყო!

მოსვლამც ქნა კაი სტუმრისა,
შინ წასვლა წესიმც არ იყოს,
ღვინოს გაჭქონდეს ლიცილიც,
გათავებამც არ იყოს!

დაატანდა ზედ საყვარელ ხალხურ ლექსს, მერე ორივე ხელ-
გაშლიდა და სტუმრებს მიმართავდა:

მობვალთ, გვალაღებთ მოსვლითა,
არ მობვალთ, — მოლოდინითა;
არ მოსულიყავთ, მოგვეკლავდა
უნახველობა თვალითა!

— სწორე არ არის, თუ გიყვარდე? მოდი მაკოცე! —
იტყოდა ჭამპურა მასპინძელს, და ისიც იტყოდა:

— დიამც, დიამც!..

ჭამპურას ასეთი ფუჭი ლაპარაკი ანუ ფულურსიტყვაობაც
უყვარდა და ასეთი შეკითხვებიც იცოდა, მაგალითად:

— მაშ, დელამუტი არ გიჭამია? არც იცი რა არის დელა-
მუტი, თუ გიყვარდე?

— საჭმელია, მერე როგორი! ძროხა რომ ხბოს მოიგებს,
მაშინ მოსწველიან ხსენს და იმისას აკეთებენ. აადუღებენ და
გამაგრდება. მერე, მარილს დააყრიან. იცი, რა გემრიელია?

— მაშ, დელამუტი არ გიჭამია? — ჩაიქნევდა ხელს გაკვირ-
ვებითა და ქოთქოთით, მერე ისევ ხელებს გაშლიდა და ისევ
გაოცებული შეგეკითხებოდათ:

— მაშ დელამუტი არ იცოდი რა იყო; აბა, რაღა ქართვე-
ლი იყავი! მოდი მაკოცე, თუ გიყვარდე!

— შენ გეტყობა სიმინდის ღურღუჭაც არ გეცოდინება!

— არა, არ ვიცი — ეგ რაღა ხილია!

— მა, რაღა გელაპარაკო, რა მოცლილი კაცი მე მნახე? —
და შემოგხედავდა აღშფოთებული შენი უვიცობით.

როცა მოიკითხავდით, შეკითხვაზე, — როგორ მოისაძლი-

სებთ; როგორ ბრძანდებით? — დაზვიანული ჭამპურა ალერსიანი კმაყოფილებით გიპასუხებდათ — შუახორცათ, შუახორცათ-ო!

რაკი ლაპარაკი ჩამოვარდა ჭამპურას კარგა ბრძანებაზე, ისიც უნდა ვთქვა, რომ ჭამპურას აუმღვრეველ მყუდრო ცხოვრებას დიდი ქარიშხალი მოჰყვა, — რევოლუცია. მისი სიტყვით რომ ვთქვათ, ქვეყანა აირია; მყუდროება მოისპო, თბილი ბუხრები გაცივდა, დადგა „დასაქტევი დრო“, შიმშილობა ჩამოვარდა. მჰადი დასანატრელი გახდა და ლობიო. ვის ეცალა ჭამპურასათვის? პატივი მოაკლდა შინ და გარეთაც; ყველა თავის კვერცხში წიოდა. ჭამპურამ ვერ აიტანა ამდენი უპატიურობა, ამდენი დაუპატიყებლობა, გახდა, ველარ იყო „შუახორცათ“ და ერთ დღეს, უცნობლად ავად გახდა, მერე უცნობელადვე გარდაიცვალა და უსახელოდ დაიმარხა...

ასეთი იყო ჭამპურას ბოლო...



— ახ, დელაღუნტის ძირი მაინც იყოს! ლამის არის, ძირხენა მოვთხარო! ყინტორა მაინც იდგეს ამ სატილოზე. იოლად გამოვიდოდით, — გმინაედა ბათხო.

— გვეღირსება კიდევ პირის ახსნა? — ვფიქრობდი შეწუხებულზე, ყუაზე მიმდგარი.

შეუმჩნევლად, ჩვენი სულის მწყობრი დაირღვა, გულის სატივიარი გაგვიარჯლდა! დაკორძილმა, პილპილიანმა, გამძვალეზულმა სიტყვამ გაითამაშა ჩვენს შორის, ცეცხლის წამკი-

დებელმა შიმშილმა ერთმანეთს გადაგვკიდა ორი ძმობილი ერთურთს ვშაშრავდით; ერთმანეთს ვაბრალებდით უაზრელ ნადირობას, ულუკმოდ დარჩენას და ეშმაკის სიბრიყვეს. ცხარედ ვიდექით ორთავენი. ერთმანეთს თვალეში ვეჩხვლიტებოდით, ერთურთის სიტყვას გავიქმარებდით.

— ეგ იყო შენი ნაბჭობი, თავქერავ!

— აი, სად მოგვიყვანა შენმა სიბრძნემ, თავქარავ!

— ნუმცარავ!

— წინამასწარავ!

— ჩიტის ჭკუავ, როდის იყავი თვალსაზრისი? ვის რად უნდა შენი ფეხმოკლე აზრები?

ნათხევარი, გულის ნალარღალი წამოვიდა... სახეზე აღმუჩრი წაგვეკიდა. აკი ერთძმანი ვიყავით? რწყილის დედასავით ვბზუოდით ორივენი, ტუჩაბზუკულები. ერთმანეთის მუქარაში, უიმედობაში, ვისხედით საფლავის ქეებზე და ველოდით წყალცოტობას, მკერდსავსე მდინარის დატოტებას. თან ჯავრი მოგვდიოდა იორზე, რომელიც ჩვენს წინ გაწოლილიყო გველუშაპივით და არ გვიშვებდა სოფელში; ჯავრი მოგვდიოდა გადამწვარ, გამოხუნებულ მიდამოებზე. რამ გაახრიოკა ტიალი?! და შენატრებულები ისევ შორიდან ველამუნებოდით წყალგალმა მღებარე დუქანს, როგორც მორწმუნენი — წმიდა ტაძარს!

თავქვეჩამდინარი წყალი ხუოდა, დგრიალეებდა...

ჭამპურა კი საფლავის ქვიდან გადმოგვეყურებდა თითქოს ნიშნის მოგებით: მანამ ვიყავ, ვჭამე და ვსვი, თქვენ კი შიმშილით იხოცებითო და გვაბრაზებდა, გვკბენდა თავისი სწორუპოვარი მადით, საჭმლიანი თავგადასავლით და ერთხელ ისიც მომესმა, ჭამპურამ ჩვენზე ჩაიხითხითა.

— ჰამპურავ, გვიშველე, გარდმოავლინე ჩვენზე პურ-ღვინო! — შევძახე ვითომდა ხუმრობით, მაგრამ ბათხოს სულაც არ გაელიმა, მუცელზე ხელი მიიჭირა, თითქოს ტკივილმა მოუარაო.

— დავდნი, დავიღვარე, გავთავდი! — და მწარედ დაიგრიხა. მე შევიშინდი...

— მიშველეთ, ქრისტიანებო! — იხლაცნებოდა ბათხო.

— რა დაგემართა, ძმისაჲ! — თავს წამოგვადგა დაღრუბლული ბიჭი, ამირანის თვალებით, ჩვენი ძველი ნაცნობი „ქორია“, მხარზე ჰრელხურჯინაკიდებული.

— არ გასტყდეთ, ქართველის შვილებო, არავინა სთქვას, გაეტყდითო!

უკამბეთ ჩვენი შიმშილიანი თავგადასავალი.

— ახლავე! — და ქორიამ ჩამოიღო ხურჯინი; მალე ახსნა ხურჯინის თვალს თასმები, ბაწრები, მერე მიწაზე ღვინისფერი ბაღდადი ფრთხილად გაშალა და ზედ დააწყო: ჯერ შავგვრემანი შოთები... მაშინვე გლემურჯივით ვეცით პურს...

— დაიცათ, ვაჟებო, დაიცათ! მადა შეინახეთ, — მოგვაძახა ქორიამ და წინ დაგვიწყო: ნაზუქები, მოხარული კვერცხები, ორი სავსე დედალი... მერე ტიკპორა წამოსვა სუფრის თავზე. ახლა უბიდან ხის ჯამურა ამოიღო და ღვინო ჩამოგვირიგა.

უცხადებულესად ვხედავდით ყოველივეს. ლუკმა დაგემოვნდა პირში. მაინც არა გვჯეროდა, ვფატრავდით, ვხლეჩდით დედალს, პირს ვიტენდით, მაინც არა გვჯეროდა; ღვინით გულს ვიგრილებდით, მაინც არ გვჯეროდა!

ბათხომ ამოისულთა, მეც!

წარმოსადგენია, რა შესახედავებიც ვიქნებოდით?!

როგორც იყო, ვიგრძენით კირმორჩენა, გულზე ვარდი გაგვეშალა. ყოველივე სასწაულად მივიღეთ. იმას კი არ ვფიქრობდით, რომ ქორიას პურ-მარილი შეიძლება ნაქურდავიც ყოფილიყო.

ბავშვობიდანვე ხელშინაური, მუცელა ქორია ახლა განთქმული ქურდი იყო, — „მგლის მუხლსაც“ ეძახდნენ, „ჩამოხეთქილ ზეავსაც“, „ეშმაკის სახნისსაც“, „ძუძუნასსლეტსაც“.

ჯერ კიდევ ბავშვი იყო, რომ გამოუთქვეს:

ვენახის გაღმა დამარხეთ,
ხილი არ მოიპაროსა!

ჩვენებური დედაკაცები გაცხელებული გულით სწყევლიდნენ:

— აი მიწამ კი ჩაგჩიქნოს მალე! შენ კი გაგეპაროს წამალი! შენ კი მოიშალე მადლისაგან! ლეგა მგელო, უნდა ფიცარზე გაგაკრას კაცმა და სულ შამფურებით დაგხვრიტოს, შე დაყროლებულო მძორო, ყომრალ სულისავ!

ერთხელ ქორიამ თავი მოიმკვდარუნა, მოინდომა სოფლის სიფხიზლე დაეძინებინა, ქალაქში მივიღივარ სამუდამოდაო, მეზობელი დედაკაცები ასეთი სიტყვით აცილებდნენ გამომშვიდობებისას: წადი ქირში და სიკვდილში! სადაც წახვიდე, სულ შავითა და ბნელით იარეო!

რის ქალაქი ქორიამ იმავე ღამით კამეჩების ხრო წაასხა; ძლივს დააყრევინეს!

აი, ვინ იყო „ქორია“, ჩვენი უუსასოესი მასპინძელი, თავცეცხლა, მიწიმწვარა, ძირუბოვარი ქვა! რამდენჯერ იჯდა ციხეში, მაგრამ ამაოდ!

დახეთ, ჩვენ მისი სტუმრები გავხდით, ის — ჩვენი მასპინძელი შეიქნა!

საიდან მოდიოდა ამჟამად ქორია, სად მიდიოდა, ვინ უწყობდა, განგების გარდა, საიდან შევეიტყობდით. არც გვეკითხებოდა; არც იმოდენა ღონე შემოგვჩინებოდა, რომ გამოგვეძალა მისგან, რას გამოტყუებოდა ათას თოკში გამოვლილი ქურდის

„ქორიას“ ბავშვობიდანვე ვიცნობდი. პატარა ქორიას ოცნება „მადლისად ჭამა“ იყო. ქვრივი დედაკაცის შვილი, ჭამას დანატრებული, ახლა მტერის ამდენი მტაცებელი გამხდარიყო. უღვაწეშემოყრილს თავისი საწადელი შეესრულებინა, ახლა უკვე თითონ შეეძლო სხვისი დაპატიჟება და აკი ლუკმა მოგვიწუნწრუქა კიდევაც. ამ მაწუნწარამ, მე და ბათხომ რომ ძმად შევისაღარეთ!

გულნება დავკარგეთ და ნებისა მნებებლობა!

რამდენჯერ გაგვიკილავს, გაგვილანძლავს, ზიზღით პირიც აგვირიდებია გზაზე ოჯახისა, გვარისა და სოფლის შემრცხვენლისათვის, ახლა კი, ყბაგამოტენილი ბათხო ქლარცის ენით გუნდრუქს უკმევდა: აი, შე უტოლო, უებაროო; აი, შე ოქროს ნათალო, ოქრო ხარ, გამოწონილიო! ეუბნებოდა უქვემოესი გრძნობებით.

მეც ტკბილსა და ზეშეფრქვეულ სიტყვებს ვხარჯავდი და არც უიმისობა იქნებოდა! სხვაფერობა იყო, მაშ, რა?

ერთი სიტყვით, ეს ცუდსახელა, მიწის დამამძიმებელი, ეს ქვეყნის ამამტუტებელი, გამაწყალებელი კარგად დავბასმეთ, — სიკეთის კაცად გამოვიყვანეთ, ერთმანეთისობას შევპირდით; ძმად შევიყარენით! — სახელდიდება შენ, ჩვენო გულისძმავ, გადაგვარჩინე და ეგ არის მადლობა გადაგვეხადოს,

ჩვენც შენი შემმატებულნი და დამსარგებლენი ვყოფილიყვნეთ სიტყვის გარდაუალად! — ვიძახოდით ჭამა-მოჯერებულე-ბი და თან გულიანად ვიღმურძლებოდით ორი ღლის დამშეუ-ლები. ღვინოსაც წურბელასავით მოვეკიდენით!

რას ვიზამდით, ქორიამ მარჯვე მიზეზი გვიშოვა, ხელთ ჩაგვიყარა, დაგვიძმაცადა!

და ასე უსირცხვილოდ ვსვამდით ქონებულ ქორიას სა-ღღეგრძელოს, ვუსურვებდით გამარჯვებას (ალბათ, ქურდობა-შიც!) და თითქოს ვერც ვამჩნევდით, თუ რას ჩავდიოდით.

სიკეთის მოჩემარი ქორიაც იფერებდა: — პურადი კაცი ქვეყანაზე არ დაიღვეაო! მოყვარესთან ძღვენი მიმქონდაო, მა-გრამ თქვენზე უკეთესი მოყვრები ვინა მყავსო?! — მოყვრე-ბადაც კი გაგვიხადა!

კმაყოფილი ბათხოც დასძენდა: აი, ამას ჰქვია მოყვრობაო!

ქორია გვეკითხებოდა: ერთი მითხარით, ვინ უფრო მეტია, პურადი თუ გულადიო! თვითონვე გვიპასუხებდა: პურადი კაცი მეტია! გულადობა გაცვდებაო, პურადობა დარჩებაო! პურადი კაცის სახელი შვილიშვილს რჩება სახელადო. მართალი იყო ქორია, აკი ხალხიც ასე ამბობს!

მალე დავღვინიანდით...

ქორია განაგრძობდა, — გეჯერებოდეთ ძმებო, ქვეყანაზე კაი კაცი არ დაიღვეა! — თავის თავზე ამბობდა ჩვენი მხსნელი, აკი პურადის სახელი დაითავისა. ჩვენც გულაჩუყებულებმა ეს ქურდი, გაწუწუებული ბაცაცა, ეს მავნე, ეს მგლის კბილი, ეს ხეძგერა, ეს მიწის ლუკმა ყველაზე ძვირფას ადამიანად ვიწა-მეთ ახლა დედამიწაზე!

— აყვავდეს ყოველი ბალახი, თითოეულმა ხემ იმსხმოია-

როს, გაიხაროს კაცის გულმა, მოკვდეს ავგულა, სცოცხლობდეს პირტკბილი და პურტკბილი! გაუმარჯოს იმ გულს, ვისაც უყვარს ყუათიანი, მარილგაცხებული ლუქმა და კეთილი გულით უჭირავს ჭრელი საღვინე!

— მაშ ჭამპურას გაუმარჯოს, ჭამპურას! — თითქმის ერთად შეეძახეთ მე და ბათხომ და ქუდები მალლა შევისროლეთ ნაღვინარებმა. უეცრივ ბათხო ჭამპურას საფლავის ქვაზე შედგა, დონჯშემოყრილმა წარმოსთქვა: ის კაცი იყო, ვით შეჭფერის კაცსა კაცობაო! და ერთი დიდი ჭიქით ღვინო ჭამპურას ქვას გადაასხურა.

ვიგრძენით ჭამპურა საფლავში შეინძრა.

— დაიტირებდეთ, მარნებო, გაუგზავნიდეთ ნამსაო; იგლოვეთ, სამზარეულო... — ვალექსებდით ჭამპურას.

— განა ჩვენ კი ჭამპურები არა ვართ? ჭამპურას რაღას დაეცინით; ორი დღის შიმშილი ვერ ავიტანეთ! — შევწყვიტე დაცინვა.

— ყველანი ჭამპურები არა ვართ, განა? — ხითხითებდა ბათხო, კინალამ ქათმის ბარკალი არ გადმოვარდა პირიღამ.

ატყდა ერთი სიცილი, ჩანჩხარი... ღვინო საყელოზე ჩამოგვესხა. ჩვენსა, ქორიას და ჭამპურას შორის ზღვარი წაშლილიყო.

ქორია ღიმილით შემოგვეყურებდა. მერე ასწია ხელთ შემორჩენილი ჯამი და... ხარჯი ხარჯიო, ჭამპურას გაუმარჯოსო!

— თქვენც კი ჭამპურები ჰყოფილხართ, მე და ჩემმა ღმერ-

თმა, ჭამპურას თავმოწაფენიო! — გვეთხრა ალერსიანი ხუმრო-
ბით და გაღალიცლიცებული ჯამი გადაიწურა.

იორიც, თეკენას დუქანიც, გულამღვრეული ღრუბელიც
ძულ აღარ გვეკითხებოდა...

ქორია საძილისკუდელ მწვადებსაც გვპირდებოდა.

ბათხო მთლად ჩაილღვა ღვინოში...



ბუნბულა

დალაქი ბუნბულა ფარსმანიშვილი მეტად ჩვილი, გულნა-
ზუქი მახსოვს, — მოსიყვარულე, უწყინარი, ძვირუხსენებელი,
მეგულკეთილე, თან გაგებული, შესშენილი კაცი.

— არავის აწყენინო, მოშიშება უნდა გქონდეს, ჩვენი ბო-
ლო სამი ფიცარია! — ზედ დააყოლებდა ამ სიტყვებს, სამართე-
ბელს რომ ღვედზე ლესვას დაუწყებდა. კარგი მემუსაიფე იყო.
ხალხის შემაქცევარი. სიტყვის თავზე „ჩემი ხარ ბატონი“ არ
დაავიწყდებოდა.

— სიწმინდის დარზე ვიდგეთ, და-ძმობაზე ვიაროთ!

— თავი და თავი გულის მოსავალია ჯერ გულის მოსავალი მოირეწე და მოკრიფე, მერე მიწისა!

ბუნბულას მიერ შემეცნებულნი თავს აკანტურებდნენ ნიშნად თანხმობისა და თვით ბუნბულას საპატიურობისა.

დალაქის აზრით, სივაჟის მოგებული არაფერია სინდისით მოგებულთან! ადამიანს რომ შეხვდები, მარტო საქმეზე კი არ უნდა ელაპარაკო, გუნებებერად მოიალერსე, გუნება მოიმყუდროვე, ორივეს ჯანი და აგებულობა დაგიმშვიდდებათო!

იმდენად სათნო და წმინდა ადამიანი იყო ბუნბულა, რომ მისმა მტერ-მოყვარებმა ხმა დაუყარეს, ბუნბულამ სთქვაო, ჩემს ჯეილობაში ქალები სულაც არ ყოფილანო!

იყვნენ თუ არა ქალები მის ახალგაზრდობაში, არ ვიცი, მაგრამ თითონ თორმეტი შვილი კი ჰყავდა: გოგოები — თათია, ნია, ფაცაცი, მზეხა, გაია; ბიჭები — ბატატა, საჩინო, ჯაბა, გეგენა, ბათუა, ხოხორა, ბაბლია. ზოგი დაოჯახებულიყო, ზოგი ახლად იდგამდა ფეხს.

მე მიკვირდა, როგორ ეტეოდა ამოდენა ხალხი ბუნბულას ორ პატარა ოთახში? ერთხელ კიდევაც შევეკითხე.

— ზოგი იატაკზეა, ზოგი სხვენზე, ზოგი ჭერში, ზოგი ერდოზე, ზოგი აივანზე, ზოგი ეზოში, ზოგი წყალზეა წასული, ზოგი პურზე, ზოგი დუქანში და ასე — ვეტევით. იოლას გამოვდივართ, — მომიგო ბუნბულამ. ამდენ შვილებში ყველაზე მეტად ბატატა უყვარდა, მე მგავსო, ხელს გაიშვერდა ბატატაზე და სიამაყით იტყოდა: — ჩემი გვირგვინის შვილია!

ძვალად, ძარღვად კარგი იყო ბატატა მამასავით, მაგრამ ნიჭმოკლე, გონების თვალთ უხედავი, დაბღურნი, ოტროველა.

— რას აკმევე, რითა ჰკვებავ შვილებს?

— სამართებლით! განა არა ვარ გაოგნებული? ფიქრით სოფელი გადავაბნელე! ბედის ბედაური გავაჭენე და ეს მომერგო საწუთროში!

მაინც საწყენი, საკრულავი სიტყვა პირიდან არ ამოუდიოდა. ენად კარგი იყო. გულდებით იცოდა საუბარი, თითქოს ცეცხლზე შემდგარი თაფლის ქვაბი ტკბილი ჩუხჩუხით გელაპარაკებო. სადალაქოში უყვარდა პოლიტიკაზე ლაპარაკი, პოლიტიკოსებს საქმიანობას უწუნებდა, თუ კაი ხალხია, ომი რად უყვართო, ომს რად აჩენენო! ნაპოლეონიც მიყვარს, გიორგი სააკაძეც, მაგრამ ომები იმათ მოიგონეს, მათი ძვლები ხალხის ცოდვით ვერ მოისვენებენო!

— ყველა ნადობი, ნაძმობი, მოკეთე, სახლიკაცი, მეზობელი, თვისტომნი და მოყვარენი ვართი ყველა რომ სიამტკბილობით ვიყვნეთ, განა ავკაცობა მოხდება დედამიწაზე? ჩვენი ბრალია, ჩვენი მოდის ყველაფერი! შუღლს შფოთი მოსდევს, შფოთს ჩხუბი, სისხლი და ციხე! სისხლს ომი მოსდევსო.

პირველი მსოფლიო ომი რომ ატყდა, ბუნბულა მართლა შეგეცოდებოდათ. კინაღამ არ შეირყა.

— ქვეყანა ბოროტების მტვერით აივსო! აჰა, ეგეც სიმწრის ჭაშნიკი! ვაი, სადა ხარ; სირცხვილო, ვაი, ადამიანის გაღორებას!

— ღმერთო, ჩვენსკენ მოღერებული ხანჯალი დაუმოკლე ჩვენს მტერს!

და შეწუხებული, დამწუხრებული ბუნბულა მიადგებოდა გამვლელ-გამომვლელს.

— კაცი არა ხარ?

— მერე?

— განა ძმები არა ვართ, გულის ძმავ?

— მერე?

— ხომ ადამიანი ხარ? ხომ ვართ ადამის შვილები!

— მერე?

— მერე ისა, რომ ჩემი სული შენს მუქაში დევს!

— რა გინდა?

— ის მინდა, რომ თუ საქართველოს მირონი გიყვართ, შევერთდეთ, ერთმანეთს მხარი მოვაბათ, ხელმწიფესთან წავიდეთ, დაუფხოქოთ, შევეხვეწოთ — ომი არ გვინდა-თქო!

— ვინ მიგიშვებს ხელმწიფესთან?

— ჩვენ ჩვენი საცადური არ დავაკლოთ!

— მერე რა გამოვა?

— როგორ თუ რა? ფარა ცხვარმა ხეს შეჰბლავლა და ხე გახმაო! ხატიცხოვლის მადლმა, მართალია! როდის ვამბობ გულის მოსაპირავად?

საწყალ დალაქს გულწრფელად სჯეროდა კეთილ ადამიანთა ნების შეერთების ძალა.

— ეჰ, მოგცლია! — ეტყოდა ვინმე ილაჩგაწყვეტილი.

— მაშ, ხალხი არ გენანება, დედამიწა, ცა-მზე? მაშ სიცოცხლე უნდა ყმად მიუგდოთ სიკვდილს? მაშ, საკაცო მადლი დავკარგოთ?!

— ენდე ღმერთს! ხელმწიფესთან წავიდეთ, ფეხქვეშ ჩავუცვივდეთ, მუხლ-დადგმით ვთხოვოთ, შევეხვეწოთ, — მუდარით შესთხოვდა ბუნებულა უცნობსა თუ ნაცნობს, ახლობელსა თუ შორეულს, გამვლელსა თუ გამომვლელს. მაგრამ მის წი-

ნადადებაზე ყველას ეღიმიებოდა. ერთმა ვირულა ბიჭმა შეკადრა კიდევაც: ტვინი ამოგიღვარესო?

სიმართლისა და მშვიდობის მაძიებელი დალაქი გაოცებული იყო ადამიანთა უმადურობით: — ვაი, გზა ვერ ვიპოვე ვერავის გულში! — ბოლოს წყრომამ ამოხეთქა მის გულს:

— მაშ, არ გინდათ ერთობის კარი? არ გსურთ ომი ავიცდინოთ? მაშ, ქრისტეს სამართალში მომეცით პასუხი! — ჩაიქნია ხელი და გამართოვდა.

ხან ვენახში მუშაობდა, ხან ბოსტანში, ხან თავის ხელობაზე. უფრო კი დაშინაურდა, ღვრიტა დაიდვა... თავი ვეღარ მოიძია... ცალარქად დადიოდა.

... ერთ დღეს, ბუნბულა გაჰქრა სოფლიდან. ცოლ-შვილი დარდობდა, დაეძებდა, მოკითხულობდა, თუმცა ამაოდ. ატყდა ზრიცვა-ტირილი, ვაი-უშველებელი. ცოლმა — გულჩინამ ხატს ზვარაკი აღუთქვა. ვიღაცამ სთქვა, მატარებელში ვნახეთო! ცოტათი დაშოშმინდნენ.

ბუნბულას თანაზიარი ბიძაჩემი სულხანი ძალზე შეაწუხა მეგობრის დაკარგვამ და საყვარელი კაკლის ქვეშ პურისჭამა აკვეთა.

— ნაწყენი ვარ, ნაწყენი! ჩემზე უმახლობლესი ვინა ჰყავდა, რომ ხვაშიადი არ გამიზიარა, თუ სადმე წავიდა, — მაგრამ ავიტან, ავიტან, ოღონდ მშვიდობით დაგვიბრუნდებოდეს! — ეუბნებოდა ბიძაჩემი გულჩინას.

ბუნბულას ოჯახი და ბიძაჩემი ბუნბულას გზას დაეძებდნენ, ფოსტალიონს ავედრებდნენ, მოვიდეს წერილი თუ არა, მყისვე, იწვე თუ იღგე, მაშინვე გამოექანეო!

გულჩინა ჩიოდა; ვინ იცის, სად რა კლდის ფხაზე სძინავ-

სო! ვინ იცის, უსაზრდლო მთხოვრად დადისო, ვინ იცის, ყელიც გამოსჭრეს ავაზაკებმაო!

ბიძაჩემი ანუგეშებდა: — ქვეყნის დამრიგებელი კაცია, რა უნდა გასჭირებოდეთ, ესეც არი, ავი ამბავი ცხენით მოჭენდება და მადლობა ღმერთს, ჯერ ხომ ცუდი არა გაგვივია რაო, წინასწარ გული რაზე გავიხეთქოთო! შეიძლება სოფელი უღალაქოდ დარჩესო მართლაც ვერ წარმოედგინა, როგორ გაუბედავდნენ სოფელს?

ბუნბულას ოჯახში კი ისევ გაისმოდა კვენესიანი სიტყვები: ვაი დაქვეულობას, გატეხილობას! დარდი ცალკე ჰკლავდა ოჯახს, უცნობლობა ცალკე.

თორმეტი შვილი ერთად ტიროდა, ცოლი ცალკე იმდურებოდა.

მეზობელი ქალები აწოშმინებდნენ. ისიც კი გაუბედეს: ვის რათ უნდა შენი ბეხრეკი ბუნბულაო, ვინ გაიტაცებდაო! ზოგმა ბოროტმა ჭორშესხმული ამბავიც დააფრინა:

— ბუნბულა ქარიან ცოლს გაექცაო და თორმეტი შვილის შენახვასაო!

გულჩვილი ბიძაჩემი დარდით მთლად მომჩვიარდა, ხმას არ გვცემდა, ბუნბულას განსაცდელზე ფიქრობდა.

მახსოვს, კვირა დღე იყო და სადილად ღვინო აღარ მიიღო. მაგრამ იმ საღამოს ისეთი ამბავი მოხდა, რომ ბიძაჩემმა ხელადა ღვინო მარტო გამოცალა და ბაღდადურიც კი დაუარა!

რა მოხდა? ის მოხდა, რომ... მარაგიანი ღამე იყო. ახლად პურმოხდილ თონის ფიცრებზე ვისხედით ბაღლები. თონე ნეზვირად გვათბობდა. თონის განელებულ ცეცხლში ახალი კართოფილი იწვოდა. მოჯამაგირე ჯულურა გრძელ ზღაპარს გვი-

ყვებოდა მზის ვაჟზე, რომ ამ დროს შმაგურად შემოვარდა ჩვენს ეზოში ბუნბულას ვაჟი ბატატა, კიბე სასწრაფოდ აირბინა და ბიძაჩემს შესძახა: — სამახარობლო, სამახარობლო!

ბიძაჩემი სიხარულით შეტორტმანდა კიდეც, მაგრამ თავს მოერიდა, არ წაიქცა!

სირბილით, ფაცაფუცით, ყველამ ბუნბულას სახლს მივაშურეთ.

ბუნბულა დარცხვენილი იდგა, ტანისამოსშელახული. აღშფოთებული მამასახლისი უღრინავდა:

— რაები დაგიწყვია ქალაქში, ვინ მოგცა მთავარმამობა, რომელი სისხლმაჭარა ხარ, რომ ხელმწიფის საქმეში ერევიო! ქალაქიდან ჩაგვაბარეს შენი თავი, ფეხი არსად გადგასო. დაჯექი და ლუკმა ლოღნე!

თავდადრეკილი ბუნბულა არას ამბობდა, მხოლოდ ცოლს უთხრა, — მაჟრიალებსო, საბანი წამახურეო და, საბანს თავზე იფარებდა. ბიძაჩემისთვის ხმა არ გაუცია, ისე რომ, ბიძაჩემი სულხანი ნაწყენივით დარჩა. — მე მაგისტვის ღამეები არ მეძინაო და მაგან კი ზედაც არ შემომხედაო! ახლა ეს საჭირვეულო ფიქრი გაუჩნდა.

ბიძაჩემი ამაოდ ექვიანობდა. ერთი კვირის მერე ბუნბულა თითონ ეახლა ბიძაჩემს სადილობისას, კაკლის ქვეშ და ყოველივე უამბო.

გრძელ სიტყვაობას რომ მოვერიდოთ, ბუნბულას ოხვრანი და გმინვანი რომ გამოვტოვოთ, მისი თავგადასავალი ასე ყოფილა:

შაშვის წყაროზე მჯდარა. — თვალი რომ მოვკიდე მწვანე ხევჭალეებს და ვენახებს, გულმა ძაგაძუგი დამიწყო, ცრემ-

ლმა დამხეტქა, — მაშ, აღარ უნდა იმწვანილონ, აღარ უნდა იკეკლუცონო? მაშ, სისხლმა უნდა დაფაროს-მეთქი! როგორ უნდა გაიმეტოს ადამიანმა დასაბუგად ეს შრომილი სილამაზე, მონაგარი ჭირნახული, ახლავე უნდა ვუშველოთ, სანამ დიდი ვეშაპი ზღვაში შეიძვრება-მეთქი! აქ ხომ არავინ მიგდო ყური, ქალაქში წავალ, იქ განათლებული ხალხია, დამიჯერებენ, ხელ-მწიფესთან გამყვებიან, სიცოცხლის საქმეზე გაირჯებიან, მე ხომ ჩემი ოჯახისას არასა ვცდილობ-მეთქი! გული ამიჩუყდა, გადაღმა რკინიგზის სადგურში ზარი აწკარუნდა. ქალაქის წასვლის ნდომამ უფრო და უფრო დამრია ხელი, სულ ვტორტმანობდი, იქნებ ხალხი გადავარჩინო-მეთქი. ცოლ-შვილს არაფერი შევატყობინე, ვიცოდი, არ გამიშვებდნენ. შენ ხომ იქ არ იყავ, რჩევა მეკითხნა. მე კი ხალხის შველა მიხლოდა. როგორ მოგრიალდა მატარებელი, როგორ ჩავჯექი, მე თვითონ არ მახსოვს და არც ის, როგორ ამოვყავი თავი ქალაქში. მეტი სიხარულისაგან თავბრუ მეხვეოდა.

პირდაპირ სასახლისაკენ გაეწიე მთავარ-მართებლის სანახავად, რომ მეთქვა ყველაფერი, არ უნდა ხალხს ომი-მეთქი! სასახლის კართან დავდექი — გამომიცივიდნენ, აქ რა გინდაო, მუჯლუგუნი მკრეს, ქიმუნჯებით გამომავდეს.

— არ წავალ, საქვეყნო საქმეზე ვარ მოსული-მეთქი! წამითაქეს, ახლა ქუჩაში შევჩივლე ნაცნობს თუ უცნობს. ერთს გადავუდექ, — გაიცინა, მეორემ — შემომავინა, მესამემ — გიჟიაო! ეს არ მაკმარეს, ახლა პოლიციამ ჩამჭიდა ხელი, ვინა ხარ, ალბათ ჯაშუში იქნებიო, სხვა სახელმწიფოს მოსყიდულიო!

პოლიციაში წამიყვანეს. ერთი კვირა ცარიელ ჭეცრებზე

ვიწეჟი მშიერ-მწყურვალ, ჩამაცივდნენ, მეკითხებოდნენ. მაწვალეს, მცემეს, რაც გროშები მქონდა, ქრთამში ამართვეს, ზერე გამაჰანდურეს. გასწი, აქეთ აღარ მოიხედოო, შენი ფეხი არ ვნახოთ ქალაქში, შე მეტიჩარაო! რას მერჩოდნენ? მე ხომ საქვეყნო საქმეზე ვიყავ წასული, ქვეყნის სამჯობინარი მინდოდა? რად ჩამცეს წიხლი შიგ გულში? რისთვის? რატომ არ ესმით, რომ ვიღუპებით? რამ გააქვავა ადამიანის გული? ვის დარჩენია ქვეყანა? მე მეგონა, ადამიანი განაგებდა! ანე დაებრუნდი გაუკაცრავებული, თითქოს დანაშაულები მქონდეს. ახლა რა კენა? — შეეკითხა ბიძაჩემს თვალგანმარტებით. სასოებით.

მდუმარე ბიძაჩემს თავი არ აუღია. ბოლოს, აიღო ხელადა, ღვინო დაუსხა ბუნბულას და ჯამი გაუწოდა.

ბუნბულამ ხელი გაასავსავა — მე ღვინის ულუფა აღარ მერგება! იქ იმოდენა სისხლი იღვრება, მე ღვინოს როგორ დავლევო, სისხლს მაგონებსო! ჩემ გულს სიმწრის ბოლი ასდის, რა დროს ღვინოაო!

ბიძაჩემმა გაკვირვებით შეჰხედა, მერე აიღო თავისი ჯამი: — ეს გაუმარჯოს ჩვენი მეომრების მშვიდობით დაბრუნებასო!

ბუნბულა გათავისდა, ხალხს აღარ ეკარებოდა. დადიოდა განაპირებული, განკვეთილი, გადაცოდინარებული, მისი გული სევდის სადგური გამხდარიყო. წინათ, სიტყვით მაინც იკლავდა ჟინს, ახლა სიტყვის ნებაც მოუხსპეს. ისე მოჰპარსავდა მუშტარს, ერთ სიტყვასაც არ გასცემდა. გულის ძარღვებშივე ჩაუხსრისეს რწმენა და ჰეშმარიტებაც. რაღა დარჩენილიყო ბუნბულას არსებაში? მხოლოდ ჩენჩო, მხოლოდ ცარიელი

ლენჯო, ეს იცოდა ბუნბულამ და მიწის ზურგზე სიარული ეზარებოდა. ჩამქრალ თვლებს აქეთ-იქით უიმედოდ აცეცებდა იმ ორიოდ სიტყვასაც ზოზნით, უხალისოდ იტყოდა.

იყო კაცი თავმომწონე და გარემოებამ ნაკაცარი გახადა. მერე რისთვის? — კაცობრიობის გულისათვის! ასეთი იყო ბუნბულა დალაქის ბედი!

ს ა რ ჩ ე ვ ი

დედას	3
მშობლიურ ხეთა ჩრდილებში	5
ნატერის ხე	13
ჩვენი პერამი	18
თალრია	23
ფუფალა	30
შეეტლე იაგორა	48
ხვედია	53
ორი შემოხედვა	57
სამთო საბალახო	67
მობუცი გუთნისდედის სიკედელი	75
ჩირიკი და ჩიკოტელა	79
„სახელის მილოცვა“	99
ღვინჯუა	117
ღეიდა მაიკო	173
სოფლის შარაზე	194
ციციკორე	205
მარიტა	241
ჩორეხი	264
ნიშანბეულის წყალი	289
კამპურა	305
ბუნბულა	329

Леонидзе Георгий Николаевич
Волшебное дерево
Новеллы

(На грузинском языке)
Художник Т. Мирзашвили
Детюниздат Грузинской ССР
«Акадеული»
Тбилиси

1962

* * *

რედაქტორი ხ. ბერუღაძე
მხატვარი თ. მიწაშვილი
მხატვ. რედაქტორი ო. ჯიშკარიანი
ტექნიკური რ. მელაძე
კორექტორი მ. გვარამია

* * *

ხელმოწერილია დასაბეჭდად 25/1-62
ანაწყოების ზომა 5 $\frac{1}{2}$ X 7
ქაღალდის ზომა 70 X 108 $\frac{1}{32}$
ნაბეჭდი თაბახი 21,25
სააღრიცხვო-საგამომცემლო თაბახი 11,1
ტირაჟი 20.000 შეკვ. № 543
ფასი 60 კაპ.

საქართველოს სსრ კულტურის სამინისტროს
საბავშვო და ახალგაზრდობის ლიტერატურის სახელმწიფო
გამომცემლობა „ნაკადული“ სტამბა.
თბილისი, ფურცელაძის ქ. № 5.

Типография Государственного издательства
детской и юношеской литературы «Акадеული»
Министерства культуры Грузинской ССР.
Тбилиси, ул. Пурцеладзе № 5.